



5. 6. 244

5 N. 6.

XI

1000000000

11



N O V A
SECTIONUM
CONICARUM
ELEMENTA.



ELEMENTA
SECTIONUM
CONICARUM

Conscripta ad usum

FAUSTINÆ
PIGNATELLI

Principis Colubranensis , & Tol-
vensis Ducatus Hæredis

Edita vero in gratiam

STUDIOSÆ JUVENTUTIS

AUCTORE

NICOLAO DE MARTINO

Regio Mathematicum Professore

T O M. I.



Excudebat FELIX MOSCA sumptibus CAJETANI
ELIÆ Superioribus annuentibus NEAPOLI
MDCCXXXIV.



FAUSTINÆ PIGNATELLI

*Principi Colubranensi , ac
Tolvensis Ducatus
Heredi .*



Luribus impellor , PRIN-
CEPS EXCELLENTISSIMA ,
ut nova ista Sectionum
Conicarum Elementa ,
Nomini tuo dicata , in
lucem emittam . Pri-
mum est , quod , quemad-
modum jussu tuo privatim conscripta
sunt ; sic etiam bono publico consilio , ac
2 3 sua-

suasione tuâ lucem adspiciunt . Deinde ,
quod , si aliquem exinde fructum studiosa
Juventus sit perceptura , Tibi potius ferri
debet acceptus . Et denique , quod in
rebus hisce adeo jam excellis , ut vix sit,
qui ab invidiæ moribus ea aptius tueri
queat . Potius sortem meam singularem
cunctis testandam hic reor . Nam , non
eo tantum honore me cûmulasti , ut in
Tui commodum , & usum Elementa ista
conscriberem ; sed pateris quoque , ut,
dum publici juris fiunt , tuum illustre
Nomen in fronte gerant . Hinc mul-
tum abest , ut publico hoc testimonio
mei erga Te officii partem aliquam per-
solvere credam ; sed ultro fateor , no-
vum mihi beneficium conferri , quod la-
bor hic meus , tanto Nomine ornatus ,
in lucem emittatur . Id vero , PRINCEPS
EXCELLENTISSIMA , generosæ tuæ indoli
omnes adscribant . Neque enim quid-
quam in me est , quod gratiam , studium-
que tuum mereatur ; sed impense mihi
faves tantum , ut singularem tui Ani-
mi magnitudinem factis impleres . Quod
namque quatuor ab hinc annis opera
mea utaris in disciplinis addiscendis ;
id potius arcto vinculo me Tibi tenet
obstrictum . Primo siquidem eximiae
mihi gloriæ reputo , quod in præcla-
ro hoc munere absque ulla hæsitatio-
ne me aliis prætulisti . Et deinde pri-

vata nostra studia nescio cui nostrum magis hætenus profuere. Prætereo eum Animi cultum, quem tua familiaritate me comparasse, omnes agnoscunt. Et silentio etiam committo illam rerum agendarum peritiam, quam consuetudine tua sensim acquisivisse, ingenue fateor. Plane vero reticere non debeo, quantum in ipsis illis disciplinis profecerim, quibus Tibi eram adjumento. Ubi enim ad eas ediscendas Animum appulisti, non ea quidem Tibi Mens erat; leviter illas, ac curiose perlustrare; sed propositum Tibi fuit, tantum iis incumbere, quantum quisque, vere sciendi cupidus, iisdem operam dabit. Hinc, ut tuis ego votis ex Animo satisfacerem, operæ pretium duxi, recolere eas artes, quibus a prima ætate deditus fui, ac de novo fere illas ediscere. Quantum autem ex repetita ista meditatione ego hauserim fructus, ac emolumentum; Nemo certe non intelligit. Quod si dixerim, me easdem disciplinas rursus didicisse, ubi pro injuncto mihi munere Tibi illas enodabam; nihil plane dixero, quod a vero sit alienum. Eo enim es acri iudicio, tantamque habes a Natura Mentis *Ακρίβειαν*, ut lectionibus iis ediscere simul, ac edocere videreris. Non itaque verebor, PRINCEPS EXCELLENTISSIMA, obfignatis hisce tabulis, candide profiteri,

ri , tantam esse beneficiorum molem ,
quæ hætenus a Te , non tam expressi ,
quam accepi , ut iis persolvendis omni-
no impar existam . Sed ea est Animi
tui magnitudo , ut non minus inspicias ,
quid vires possint aliorum , quam quid
meritis tuis debeatur . Unde , non tam
de eo dolendum mihi est , quam quod
nec item hæroicas tui Animi dotes ,
eximias omnibusque spectatas virtutes
valeam pro dignitate pertextere . Etsi
enim Nemini concedam , ut majore eas
observantia colat , venereturque ; attamen ,
ut summorum in me meritorum
magnitudinem sustinere non possum , sic
nec ulla mihi concinna videtur oratio ,
quæ lis , ut par est , commendandis suffi-
cere queat . Illa namque gravitati adper-
sa comitas , ac humanitas ; ea Animi ma-
gnitudo , cum tanta moderatione conjun-
cta ; summa illa in rebus agendis pru-
dentia , ac fortitudo ; omnium denique
virtutum concordia , nullo vitiorum
confinio polluta : plane supra omnem
commendationem assurgunt , nec quis-
quam , utut disertissimus Orator , o-
ratione ulla unquam complectetur .
At ex altera parte gaudeo , lætorque
vehementer , quod eximias tuas laudes ,
præclaras tui Animi dotes , nequeam ,
ut velim , verbis æquare . Nam , etsi
esset in me tanta dicendi copia , atque
fa-

facultas , quæ sis celebrandis sufficere
posset ; adhuc tamen moderatio tua sty-
lo manus injiceret , nec minus confide-
randum mihi esset , quid tuæ aures pati
possunt , quam quid virtutes tuæ requi-
runt . Tantum itaque , PRINCEPS EX-
CELLENTISSIMA , publico isto testimonio,
benignitati tuæ , tuæque erga me bene-
volentia gratias ago permaximas ; nec
alia sunt mea vota , meæque obsecratio-
nes , quam , ut Te diu , & mihi , &
omnibus Deus servet incolumen . Vale.

EXCELLENTIÆ TUÆ

Additissimus Famulus
Nicolaus de Martino.

A D
LECTOREM.

NOVENNIIUM est, & quod excurrit, ex quo in commodum, & usum studiosæ nostræ Juventutis nova sectionum conicarum Elementa edere mihi proposui. Nam, sicuti experientia noveram, libros conicorum Apollonii non leve negotium Tironibus facessere; sic Elementa alia, ab aliis elucubrata, nec etiam numeris omnibus absoluta mihi videbantur.

Sed quod ab eo usque tempore mihi fuit in votis, nunc tandem, Benevole Lector, exequi licuit; & fortasse diutius delata res esset, nisi ad ea conscribenda futo quodam speciali fuisset advocatus. Conscripsi vero illa methodo etiam nova, & plane singulari. Neque enim, ut vulgo fit, propositionibus, scholiis, & corollariis res in iis edocentur; sed continuo, & non interrupto sermone cuncta demonstrantur.

Visum est autem, nova ista Elementa in octo libros partiri. In eorum primo agimus de ortu, & natura sectionum conicarum. Quem in finem primo quidem ostendimus, qua ratione conus oriatur, & quot modis plano secari queat. Tum generim prosequimur earum curvarum, quæ coni sectiones dicuntur. Ad hæc docemus, quæ recta dicatur sectionis diameter, quæve item sint diametri vertex, ordinata, & abscissa. Ac denique pro-

propriam cujusque sectionis naturam relata
ad diametrum aperimas.

In secundo libro agendum aggredimur
de descriptione sectionum conicarum in plano.
Et quoniam eas non aliter Veteres in plano de-
scribebant, quam cono rursus addibito; osten-
dimus primo loco, qua ratione conica sectio-
nes in plano per conum describantur. Quam-
que Recentiores easdem curvas, nullius soli-
di ope, per solas linearum longitudines de-
scribunt; subnectimus deinde, quo pacto ean-
dem coni sectiones possint per rectas solas in
plano describi.

Sequitur liber tertius, in quo de con-
icarum sectionum diametris aliis sermonem
instituiamus. Has methodo plane nova inde-
pendenter a tangentibus definire conamur.
Ac primo quidem earum determinationem
pro qualibet sectione in medium afferimus.
Tam proprietates prosequimur, quæ commu-
nes sunt diametris omnibus cujusque sectio-
nis. Et agentes hoc loco de conjugatis dia-
metrorum hyperbolæ; curvarum, ad quas eæ
terminantur, naturam ostendimus.

Libram tertiam excipit quartus, qui
est de mutua diametrorum, parametrarumque
comparatione. In eo autem primo quidem
comparamus inter se mutuo diametros omnes
cujusque sectionis. Tum parametros earun-
dem diametrorum inter se mutuo conferimus.
Et quoniam, tam circa diametros, quam cir-
ca parametros plura possunt elegantia proble-
mata institui; visum est, horum solutionem
postremo loco subungere.

In quinto libro discrimus de tangenti-
bus,

bas, & secantibus sectionum conicarum. Ac primo quidem proprietates ostendimus, quæ competunt tangentibus cujusque sectionis. Deinde eas prosequimur, quæ pertinent ad secantes earundem sectionum. Et quoniam asymptoti hyperbolæ considerari possunt, veluti rectæ, quæ eam contingunt in punctis extremis, seu infinite a centro distantibus; ostendimus etiam hoc loco proprietates, quæ hyperbolæ asymptoti competant.

In sexto libro agendum nobis proponimus de focis, seu umbilicis sectionum conicarum. Proprietates autem, quæ competunt sectionibus conicis relate ad focos, seu umbilicos, sunt duplicis generis: aliæ nimirum generales, & aliæ speciales. Hinc primo quidem focorum cujusque conicæ sectionis proprietates generales ostendimus. Tum deinde eas demonstramus, quæ speciales sunt, & relate ad directricem locum sibi vindicant.

Septimus porro liber est de locis geometricis, conicæ sectionibus terminatis. Primo autem docemus, quid veniat nomine loci geometrici, & quot ejus species distinguantur. Deinde divisionem tradimus locorum ad lineam, & ostendimus quomodo ea construi possint. Ac denique, quia ratio construendi hujusmodi loca est duplex, utraque ratione constructionem explicamus locorum, quæ conicæ sectionibus terminantur.

Octavus, & ultimus liber est de constructione problematum solidorum. Pro ea vero rectius intelligenda, ostendimus primo loco, tum generatim rationem construendi problemata geometrica, cum speciatim methodum con-

construendi problemata plana . His autem pralibatis , ipsam solidorum problematum constructionem explicandam aggredimur .

Caterum , etsi a recepta Geometrarum methodo recedere visum sit ; sedulo tamen studuimus , ut ubique claritas eluceret . Interim ab æquo Lectore illud postulamus , ut horum Elementorum lectionem non prius aggre diatur , quam ubi priores sex libros Euclidis recte didicerit . Sed aliquam solidorum cognitionem ab eo etiam exposcimus . Vnde , priusquam operi manum admoveat , non male se geret , si undecimam Euclidis librum evolvat , ubi de planorum sectione disseritur .

Qua vero ex doctrina solidorum Lectori nostro potissimum perspecta esse debent , ac explorata , ad hac quatuor fere reducuntur . Primum est , quod , quemadmodum duæ lineæ in unico puncto se secant ; sic duarum superficierum intersectio fiat in unica lineæ : quæ recta erit , ubi ipsa superficies , sese invicem secantes , fuerint plana .

Alterum est , quod si recta una sit perpendicularis duabus aliis rectis , in plano aliquo existentibus ; ea ad ipsam planum pariter perpendicularis esse debeat ; adeoque normaliter insistet omnibus aliis rectis , quæ in plano illo duci possunt .

Tertium est , quod si duo plana , se invicem secantia , recta fuerint ad tertium ; communis eorum intersectio debeat esse perpendicularis ad utramque earum rectarum , in quibus illa eadem duo plana cum plano tertio se secant .

Est quartum denique est , quod si recta , in
pla :

plano aliquo existens, perpendicularis fuerit ad communem ejus plani cum plano altero sectionem; non aliter ipsa plana recta ad invicem esse queant, quam, si eadem illa recta subiecto plano normaliter insistat.

Ex doctrina itaque solidorum hæc quatuor potissimum nosse oportet, ut nostra ista sectionum conicarum Elementa recte intelligi possint. Et opportunum duximus, ea hic Lectori exhibere; tum, ut illa continuo ante oculos habeat; tum etiam, ut sciat, quid ipsi ex doctrina illa supponere opus sit, si priores sex libros Euclidis tantum evoluerit.

Ex prioribus autem sex libris Euclidis in primis præ manibus haberi debet doctrina proportionum, quorsum Mathematicis omnis revocatur. Quem in finem Lectorem monitam volumus, quod, ut brevitati studeremus, præter Euclidean arguendi rationes, pluribus aliis usi sumus, quas, ut facile quidem erit, ex prioribus eruere, sic juvat in antecessum cognitas, ac exploratas habere.

Nimirum primo, quemadmodum per compositionem rationis confertur summa antecedentis, & consequentis cum ipso consequente; sic licebit, eandem summam conferre pariter cum antecedente, vel etiam ipsum antecedentem cum summa illa comparare.

Secundo, sicuti per divisionem rationis confertur excessus, quo antecedens superat consequentem, cum ipso consequente; sic poterit idem excessus conferri pariter cum antecedente: perinde, ac per conversionem rationis ipse antecedens cum excessu illo comparatur.

Ter-

Tertio, si antecedens rationis minor fuerit consequente; licebit, excessum, quo vicissim consequens superat antecedentem, conferre, tam cum consequente, quam cum ipso antecedente. Nec quicquam obstat; quominus ipse antecedens cum excessu illo pariter conferatur.

Denique, si duæ rationes fuerint æquales; erit cuique illarum pariter æqualis, tam ea, quæ oritur, addendo simul antecedentes, & consequentes; tum illa, quæ nascitur per mutuam antecedentium, & consequentium subductionem.

Familiaris etiam Lectori esse debet doctrina rationis compositæ; ac potissimum ante oculos habendum est theorema illud, quod si plures fuerint magnitudines, ratio primæ ad ultimam componatur ex rationibus primæ ad secundam, secundæ ad tertiam, tertiæ ad quartam, sicque deinceps, usque donec ad ultimam perveniatur.

Sane hoc theorema assumitur ab Euclide in suis Elementis absque ulla demonstratione. Ubi enim ostendendam sibi proponit, parallelogramma æquiangula habere rationem, ex lateribus compositam; utitur quidem eo theoremate, sed non aliud laudat, quam definitionem compositæ rationis, his verbis conceptam: Ratio ex duabus, aut pluribus rationibus componi dicitur, quando istarum quantitates multiplicatæ efficiunt quantitatem illius.

Inde vero nolim, carpere Euclidem, quod doctrinam compositæ rationis mancā nobis exhibuerit. Crediderim potius, desiderari in
ejus

ejus Elementis definitionem aliam, qua explicet nobis, quid per quantitatem rationis intelligi debeat. Nam, posita definitione ista, nemo non videt, præfati theorematís veritatem extra omne dubium illico poni.

Non fuisse autem omisam ab Euclide istiusmodi definitionem, sed tantum temporis injuria doperditam esse; vel exinde conjicere licet, quod absque ea nec item rationis compositæ definitio intelligi queat. Quomodo vero definita fuerit ab Euclide in sexto libro suorum Elementorum quantitas rationis; id sane omnino nos latet, & crediderim, non ita facile posse divinari.

Ut enim doctrinam proportionum, per æquemultiplices ostensam, nobis exhibuit, posuitque, duas rationes æquales esse inter se, hoc est eandem quantitatem habere, ubi antecedentium æquemultiplices, vel una superant, vel una deficiunt, vel una adæquant æquemultiplices consequentium; sic sane iisdem multiplicibus adhibitis definienda quoque erat quantitas cujusque rationis.

Verum quo pacto, ope multiplicium, rationis quantitas definienda sit; id plane non video. An non igitur neglecta Euclidæ de quantitate rationis definitio, quia nimis ardua, ac difficilis, non omnium captui erat accommodata? Neque enim novum est, ut negligent Interpretes, quod non satis assequi possunt.

ELEMENTA¹

SECTIONUM CONICARUM

INTRODUCTIO.



Uum primum ex humanioribus litteris ad arduum Philosophiæ studium animum appulisti ; Ipse ego, FAUSTINA PRINCEPS, auctor Tibi fui, ut planæ, solidæque Geometriæ Elementis illud præmunires . Jam iis cum fructu perulustratis , non inanem Te operam ponere reor , si Geometriæ sublimiori, quæ de conicis sectionibus agit, nonnihil incumbas. Et quamquam non dubitem , quin ipsa Apollonii lectione eam addiscere valeas ; consultius tamen existimo , in Tui commodum , & usum nova illius Elementa conscribere .

Noſti, Geometriæ scopum eſſe *ſolutionem problematum, quæ circa extensionem inſtituuntur* . Sed hæc , ut non omnia ejusdem ſpeciei ſunt , ita nec eadem ratione poſſunt omnia ſolvi. Quæ primo Veteribus ſe obtulere, *circulari, & rectæ interſectione* ab iis ſoluta fuerunt. Quumque lineæ iſtæ in plano ſuam originem trahant , *plana* etiam illiuſmodi problemata vocitarunt . Sed alia deinceps iſdem oblata, quorum ſolutionem earum linearum ope *fruftra* tentarunt . Unde ad curvas alias excogi-

Tom. I.

A

tan-

2 SECTIONUM CONICARUM
tandas, quibus iis satisfieri posset, animum
converterunt.

Quas primo Veteres considerarunt, sunt
conicæ sectiones, hoc est $\alpha\epsilon$, quæ ex coni per
planum sectione oriuntur. Sed fieri fortasse
potuit, ut eo fuerint manuducti *natura ipsa*
eorum problematum, quæ primo norunt cir-
culum respuere. Nam, sicuti constat, proble-
mata ista fuisse *duplicationem cubi*, & *anguli*
trisectionem; ita explorata res est, utrumque
horum problematum *natura sua* ad conicas
sectiones pertinere. Utut vero fuerit, proble-
mata, quæ per eas solvuntur, vocarunt *solida*;
quia lineæ, iis inservientes, ex solido ducunt
originem suam.

Post conicas sectiones plures alias curvas
Veteres excogitarunt; & problemata, quo-
rum constructioni eas adhibebant, vocarunt
linearia. Sed extitere nonnulli, qui postha-
bitis coni sectionibus, utebantur curvis illis
etiam in constructione problematum solidor-
um. Verum, ut ex Pappo discimus, ad id
non aliud eos adegit, quam quia tunc tempo-
ris *difficile erat coni sectiones in plano descri-
bere*. Unde ætate nostra, qua descriptio ea-
rum curvarum in plano nullam difficultatem
patitur, piaculum foret, simile quidpiam mo-
liri.

Qui primus inter Veteres in conicarum
sectionum contemplationem devenerit, non
satis liquet. Sed, si qua fides Pappo, con-
scripsit de iis quatuor libros Euclides, quos
quum explevisset Apollonius Pergæus, aliof-
que totidem adjecisset, octo conicorum libri
con-

confecti. Ex his libris posteriores quatuor dumtaxat ad *abundantiorem scientiam* pertinebant. Et inde factum reor, ut græcum eorum exemplar ad nos usque non pervenerit. Enim vero istarum rerum studiosi solos quatuor priores, *disciplinæ elementa* continententes, evolvebant.

Probabile est autem, non eodem tempore libros quatuor posteriores intercidiisse. Nam versiones arabicæ, quæ extant, septem priorum, argumento nobis esse possunt, octavum librum fuisse primo deperditum. Ex una harum versionum in epitomen redacta excerpfit Borelius noster libros quintum, sextum, & septimum, quos latine redditos, suisque commentariis illustratos in lucem emisit. Sed eosdem, adhibitis versionibus aliis, edidit quoque Edmundus Hallejus, quibus tum quatuor priores græce latineque, cum octavum proprio Marte restitutum adjunxit.

Cæterum Apollonius inter ipsos Græcos quamplures habuit Commentatores. Præcipui vero fuerunt Pappus, & Eutocius, quorum prior lemmata in singulos libros, alter commentarios in difficiliora loca conscripsit. Et istius quidem commentarii, quum in ipso conicorum opere legerentur, mutili etiam ad nos pervenerunt. Sed Pappi lemmata nullum detrimentum injuria temporis passa sunt. Nam ea in suis collectionibus ipse Pappus inseruit, quarum etsi priores duo libri non amplius extant, extat tamen liber septimus, in quo illa ab Auctore suo inserta fuerunt.

E Græcis Apollonius confluxit ad Ara-

A 2 bes,

4 SECTIONUM CONICARUM

bes, a quibus & scholiis illustratus, & contractus etiam in epitomen. Tum Italos convenit, qui etsi cum postremis quatuor libris truncatum exceperint, in ejus tamen doctrina adeo profecerunt, ut non defuerit inter eos, qui libros quintum, & sextum propriis viribus restituerit. Denique per omnes Europæ regiones migravit, & ubique viros ingenio, doctrinaque præstantes comperit, qui illustrationi ejus certatim operam navarunt.

Verum, etsi Apollonius omni tempore fuerit excultus, & plerique ejus doctrinam nova etiam methodo enucleatam exhibuerint; adhuc tamen talia suorum conicorum Elementa desiderantur, quæ tironibus proficua esse possint, & doctis etiam non improbentur. Hanc ego provinciam exornandam mihi proposui, ex quo primum agnovi necessitatem istiusmodi Elementorum. Sed quæ in Tui commodum, & usum, PRINCEPS EXCELLENTISSIMA, conscribere decrevi, audacter se spes insinuat, posse eorum munus obire.

In lis autem conscribendis methodo utar plane singulari. Neque enim, ut passim fieri solet, propositionibus, scholiis, & corollariis Te detinebo; sed continuo, & non interrupto sermone tuis oculis cuncta subjiciam. Non inficior, hoc pacto paulo loquaciorem me esse oportere. Sed, quando ei medebor sterilitati, quam recepta Geometrarum methodus parit; nemo opinor erit, qui laxiorem illam scribendi rationem mihi vitio vertet,

LIBER I.

*De Ortu, & Natura Sectionum
Conicarum.*

Rerum veritatem nulli alii melius assequuntur, quam qui eas ab initio nascentes inspiciunt. Hinc, æsturi de sectionibus conicis, earum primo ortum oportet contemplemur. Possunt autem hujusmodi curvæ variis, multisque modis oriri. Sed, ut jam dictum est, placuit Veteribus, eas eruere ex sectione coni facta per planum. Unde, illorum exemplo, primam earum originem nos etiam ex cono deducemus.

CAP. I.

*Qua ratione oritur conus, &
quot modis plano secari
potest.*

I. UT origo conicarum sectionum ex cono rectius intelligatur, ostendenda est prius genesis illius solidi, quod *conus* appellatur. Sane Euclides in suis Elementis eam universaliter non tradidit. Nam voluit oriri conum, *quando rectanguli trianguli mappente uno crurum, circumducitur cras alterum,*

t.
De generib. &
speciebus con-
icis; cum libris
de conis op-
positis.

6 SECTIONUM CONICARUM

rum, donec redeat ad priorem locum.

Primus Apollonius ad suam universaltatem illam eiecit. Enim vero docuit conum oriri, *quando recta, ex sublimi, ac manente puncto ad circuli circumferentiam demissa, eam integre percurrit.* Qua ratione, præter conum euclidæum, quem vocavit *rectum*, adeptus est conum alium, quem *obliquum*, seu *scalenum* appellavit.

Recta liquidem, quæ sublime punctum cum centro circuli conjungit, potest cum plano hujus, tam rectos, quam obliquos angulos constituere. Itaque, quum ei insistit ad rectos angulos, conus dicendus est *rectus*; ubi vero insistit ad angulos obliquos, *obliquus*, seu *scalenus* conus ipse vocandus.

In utroque autem cono recta illa, quæ conjungit sublime punctum cum centro circuli, dicitur *axis* ipsius coni. Et sicuti punctum illud sublime, quod in coni generatione manet fixum, & immotum, vocatur *vertex*; sic & planum ipsius circuli *basis* nomine insignitur.

Utrumque etiam conum liquet *in infinitum* augeri, si recta, quæ ex sublimi puncto ad circuli circumferentiam ducitur, producat^{ur} inferius in infinitum. Sed, si eadem recta extendatur quoque *superius*; tunc describetur conus alter, cujus idem erit vertex, idemque pariter axis cum cono priore.

Duos hosce conos, quum nobis usui erunt, vocabimus *oppositos*. Sed notetur sedulo velim, quod ut tali nomine duo coni designentur, haud quidem satis sit, eos eundem

ver-

verticem, eundemque axim habere; sed necesse est quoque, ut per eandem rectam ambo describantur.

II. Ex ipsa autem coni generatione ultro sequitur, *rectam, conjungentem duo puncta superficiei conicæ, esse in ipsa superficie, quàm producta transit per verticem; & cadere intra superficiem, ubi ad verticem non pertinet.*

II.

*De positione
rectæ, conjun-
gentis super-
ficiet contra
puncta duo.*

Esto etenim conus ABC , cujus vertex sit punctum A , basis autem circulus BCD . Capiantur in ejus superficie duo puncta F , & G , quæ jungantur per rectam FG . Dico, rectam istam esse in superficie conicæ, quum transit producta per verticem A ; & cadere intra superficiem, quum non pertinet ad verticem.

FIG. 1.

2.

Si enim fieri potest, recta FG cadat in primo casu, vel intra, vel extra superficiem conicam. Et quoniam recta, quæ eam superficiem describit, revolutione sua transit per omnia puncta ejus; transibit quoque per punctum F . Quare duarum rectarum erunt iidem termini: quod fieri non potest.

FIG. 1.

In secundo autem casu jungantur rectæ AF , AG , quæ quum sint in superficie conicæ, eadem productæ occurrent circumferentiæ basis in duobus punctis B , & C . Quare, quum recta BC sit intra circulum, erit triangulum BAC intra conicam superficiem. Est autem recta FG in plano trianguli BAC . Et igitur eadem recta FG intra conicam superficiem erit.

FIG. 2.

III. Jam conus plano bifariam secari potest, primo nempe per verticem, & deinde

III.

*De duplici
plano conum
secandi ra-
tione.*

A 4

per

3 SECTIONUM CONICARUM

per alium a vertice locum. Quum *conus secatur plano per verticem*, fient in ejus superficie binæ lineæ rectæ. Quotiescumque vero *planum secans per verticem non transit*, tunc *sectio facta in superficie conï curva linea erit*.

FIG. 2.

Ut hæc ostendantur, sit rursus conus ABC, qui secetur primo plano, transeunte per verticem. Et jam, si planum istud occurrat circumferentiæ basis in punctis B, & C; junctis rectis AB, AC, erunt istæ in plano secante. Sed eædem, quum ad verticem pertineant, sunt etiam in superficie conica. Quare erunt communes sectiones plani secantis, & conicæ superficiei: proindeque, secto cono plano per verticem, fient in ejus superficie binæ lineæ rectæ.

Secetur secundo conus ABC plano, non transeunte per verticem; sitque FGH communis sectio plani secantis, & conicæ superficiei. Si fieri potest, sit vel ipsa, vel aliqua ejus portio recta, & non curva. Et quoniam ea existit in plano secante, quod per verticem non transit; utique nec etiam ipsa pertinebit ad verticem. Itaque cadet intra superficiem conicam; nec ideo erit communis sectio plani secantis, & conicæ superficiei: quod est contra hypothesin.

IV.

*De sectione
coni, qua fit
plano per
verticem.*

IV. Quemadmodum autem, quum conus plano per verticem secatur, fiunt in ejus superficie binæ lineæ rectæ; ita *communis sectio conï cum plano, per verticem transeunte, triangulum erit*.

FIG. 2.

Secetur siquidem conus ABC plano, per verticem transeunte; sintque AB, AC binæ lineæ

rectæ

ELEMENTA

neæ rectæ, quæ sunt in ejus superficie. Et quoniam planum secans occurrit plano basis in recta BG, liquet BAC triangulum esse. Est autem BAC communis sectio coni cum plano. Itaque, quum conus secatur plano, transeunte per verticem, sectio facta in cono triangulum erit.

Si planum, per quod dispescitur conus, transeat quoque per axem; tunc recta, in qua illud occurrit plano basis, erit istius diameter aliqua; proindeque triangulum per axem sectum super aliqua basis diametro semper insistet.

Vicissim autem, si triangulum ex cono sectum insistet super aliqua basis diametro, planum ejus transibit per axem. Nam aliter, ducta in eo plano recta a vertice coni ad centrum basis, forent hujus, & axis iidem termini: quod plane repugnat.

V. Planum porro conum secans, quum non transit per verticem, vel occurrit plano basis, vel ei æquidistat. Quum *secatur conus plano, æquidistante basi, sectio circulus fiet.* Nec alterius naturæ erit, si non ipse conus principalis, sed ejus oppositus ea plani positione secetur.

V.
De sectione
coni, quæ fit
plano æqui-
distanti basi.

Sit enim conus ABC, & vel ipse, vel ejus oppositus secetur plano, æquidistante plano basis BCD. Sit autem FGH communis sectio coni cum plano. Dico, sectionem istam circulum esse, ejusque centrum reperiri in axe coni AK.

FIG. 2.

Ducatur per axem planum aliud, faciens triangulum BAC. Et jam communes sectiones
ejus

10 SECTIONUM CONICARUM
 ejus cum planis æquidistantibus , nimirum re-
 ctæ BC , FG , parallelæ erunt inter se . Atque
 ita quoque, ducto per axem alio quovis plano
 DAK , parallelæ erunt rectæ DK , HL.

Hinc , quum sit , ut AK ad AL , ita BK
 ad FL , ita CK ad GL , & ita DK ad HL ;
 erunt rectæ BK , CK , DK proportionales re-
 ctis FL, GL, HL; adeoque, sicuti BK , CK , DK
 inter se sunt æquales , sic etiam æquales erunt
 FL , GL , HL.

Similiter autem ostendemus , æquales in-
 ter se esse rectas omnes , quæ in sectione FGH
 pertinent ad punctum L . Quare sectio ipsa
 FGH circulus erit , ejusque centrum erit pun-
 ctum L , quod reperitur in axe coni AK.

Id quum ita sit , liquet , planum basi æ-
 quidistans , non tam conum secare , quam
 illum restituere . Nam ea portio coni , quæ
 ad verticem pertinet , quum circulum pro ba-
 si habeat , adhuc conus vocari debet .

VI.
*De sectione
 conæ , qua sit
 planum occur-
 rente basi.*

VI. Quod si planum secans occurrit pla-
 no basis, tunc duo quidem contingere possunt.
 Nam, producto plano una cum cono , vel rur-
 sus planum ex cono egreditur , vel semper ja-
 cet intra eum . In primo casu curva , quæ gi-
 gnitur in conica superficie , redibit in orbem,
 & spatium claudet . In secundo autem casu
 curva , quæ ibidem producitur , abibit in in-
 finitum cum ipso cono .

Sed, plano intra conum continuo jacente,
 duo adhuc casus sunt distinguendi . Nam, pro-
 ducto plano superius , vel secatur quoque co-
 nus oppositus , vel ei nequaquam occurritur.
 Quum primum contingit , in utriusque coni
 su-

superficie producitur curva, quæ in infinitum extenditur. Ubi vero alterum accidit, dumtaxat in superficie conï principalis curva, in infinitum progrediens, generatur.

Jam curva, quæ abit in infinitum, quum nullam aliam in aduerso cono oppositam habet, vocabitur *parabola*. Sed, quum ei in cono opposito alia aduersatur, tam ipsa, quam ejus aduersa dicetur *hyperbola*. Et denique curva illa, quæ redit in orbem, quæque producitur plano, utrinque ex cono egrediente, si circuli circumferentia non sit, *ellipsis* appellabitur.

Est autem circumferentia circuli in unico tantum casu, qui obtinet etiam in solo cono scaleno. Agnovit hunc casum ipse conï scaleni auctor Apollonius; & sectionem, per quam ei fit locus, vocavit *subcontrariam*. Habetur vero istiusmodi sectio, quum tam ejus planum, quam planum basis triangulo per axem secto normale est, ex quo etiam triangula similia a planis illis abscinduntur.

VII. Et sane, quod *sectio conï scaleni subcontraria sit circulus*, demonstratur in hunc modum. Coni scaleni ABC sit FGH sectio subcontraria, sitque BAC triangulum per axem sectum, cui normale est, tam planum basis BCD, quam planum sectionis FGH. Et quoniam triangula ABC, AGF, quæ ex eo per plana ista abscinduntur, ut dictum est, debent esse similia inter se; erit angulus AFG æqualis angulo ACB.

Sumatur in recta FG, quæ communis est sectio planorum BAC, FGH, punctum aliquod L, per

VII.
De sectione
conï scaleni
subcontraria.
FIG. 3.

12 SECTIONUM CONICARUM

L, per quod agatur, tum recta MN ipsi BC parallela, cum planum MNH æquidistans plano basis BCD. Sit autem HL communis sectio planorum FGH, MNH, quæ perpendicularis erit utrique rectarum FG, MN; quum utrumque eorum planorum plano trianguli BAG normale sit.

Quoniam igitur rectæ BC, MN inter se sunt parallelæ; erit angulus ACB æqualis angulo ANM. Sed angulo ACB æqualis est angulus AFG. Quare duo anguli AFG, ANM æquales erunt inter se; & propterea, quum sit, ut FL ad ML, ita NL ad GL; erit rectangulum FLG æquale rectangulo MLN.

Uterius, quia sectio MNH est circulus, & diametro ejus MN ducta est perpendicularis HL; erit quadratum ex HL æquale rectangulo MLN. Sed rectangula duo MLN, FLG ostensa sunt æqualia inter se. Quare idem HL quadratum erit etiam æquale rectangulo FLG.

Similiter autem ostendemus, omnem aliam rectam, quæ in sectione FGH perpendiculariter demittitur ipsi FG, posse rectangulum, sub ejusdem FG segmentis comprehensum. Et igitur ex notissima circuli proprietate sectio ipsa FGH circulus erit.

VIII.
Ex qua con-
ni sectione,
circuli circun-
dus potest.

VIII. Quod autem, præter sectionem parallelam, & subcontrariam, nulla alia circulum exhibeat in cono, demonstratur hoc pacto. In cono ABC fiat sectio FGH, quæ neque sit basi parallela, neque eidem subcontraria. Et, si fieri potest, sit ea circulus.

FIG. 4.

Esto MN communis sectio planorum FGH,

FGH,

FGH, BCD, ad quam per centrum circuli FGH perpendicularis demittatur FM. Tum per rectam FM, & per verticem conii agatur planum aliud, occurrens plano basis in recta BM. Denique per eundem verticem aliud adhuc planum ducatur, ipsi MN æquidistans, cujus communis sectio cum cono sit triangulum DAE.

Quoniam igitur planum trianguli DAE ductum est rectæ MN æquidistanter; communes ejus sectiones cum planis circulorum BCD, FGH, hoc est rectæ DE, HI, erunt tum ipsi MN, cum inter se adhuc parallelæ. Unde, sicuti HI, velut diametro FG perpendicularis, bisecta est in L; ita quoque DE bisecabitur in K.

Simili ratione ostendemus, bisecari a recta BC quamcumque aliam, quæ in circulo BCD ducitur ipsi MN æquidistanter. Quare recta BC erit diameter circuli BCD; & consequenter planum ABM transibit per axem ipsius conii; eritque adeo triangulum BAC ex cono sectum per axem.

Uterius, quum recta BC sit diameter circuli BCD, ea non modo bifariam, verum etiam ad rectos angulos secabit aliam DE. Est autem DE parallela ipsi MN. Quare huic MN normalis erit utraque ipsarum FM, BM: proindeque triangulum per axem sectum BAC rectum erit ad basim BCD; & propter parallelas MN, HI, erit pariter rectum ad planum sectionis FGH.

Denique per punctum K ducatur recta OR ipsi FG parallela. Et quoniam in eadem

ra-

14 SECTIONUM CONICARUM

ratione rectorum AK, AL est, tum OK ad FL, cum RK ad GL; erit rectangulum OKR ad rectangulum FLG, ut est AK quadratum ad AL quadratum. Sed AK quadratum est ad AL quadratum, ut DK quadratum ad HL quadratum; five etiam, propter circulos BCD, FGH, ut rectangulum BKC ad idem rectangulum FLG. Quare erit rectangulum OKR æquale rectangulo BKC.

Hinc, quum sit, ut OK ad BK, ita CK ad RK; erit angulus OBK æqualis angulo GRK, five AGL; atque adeo triangulum ABC simile erit triangulo AGF. Unde, quum triangulo per axem secto BAC rectum sit, tam planum basis BCD, quam planum sectionis FGH; & ex eo insuper per plana ista abscindantur triangula similia ABC, AGF: sectio FGH subcontraria erit: quod est contra hypothesim.

C A P. II.

Quæ curvæ sectionum conicarum nomine veniunt, & quæ sit earum origo.

1.
Epilogus eorum, quæ præcedenti capite ostensa sunt.

I. **I**N præcedenti capite, post traditam coni generationem, expositi sunt modi omnes, quibus plano conus secari potest. Et vidimus, quod sicuti, secto cono plano per verticem, fiunt in ejus superficie bi-

næ lineæ rectæ; ita, quum conus secatur plano, per verticem non transeunte, sectio orta in eadem superficie sit linea undique curva. Novimus porro, curvam istam esse circumferentiam circuli, quum sectio, vel est basi æquidistans, vel eidem subcontraria; esse vero alterius a circumferentia circuli naturæ, quum planum secans alia ratione ad planum basis inclinatur.

Sed hanc aliam curvam, a circuli circumferentia diversam, triplicis etiam speciei esse posse, nobis innotuit. Nam, vel in orbem redit, spatiumq; comprehendit ad instar ipsius circuli circumferentiæ; & vocavimus eam *ellipsim*. Vel extenditur in infinitum, nullamque aliam in adverso cono sibi oppositam habet; & *parabolæ* ei nomen imposuimus. Vel denique abit quidem in infinitum, sed ei in opposito cono curva alia adversatur; & tum ipsam, cum ejus adversam *hyperbolæ* nomine designavimus.

II. Jam nomine *sectionum conicarum* hujusmodi tres curvas Veteres intelligebant. Circuli enim circumferentia, etsi ex cono etiam eruatur, eo tamen vocabulo minime ab iis fuit insignita. Id vero non absque consilio factum a Veteribus reor; nimirum, ut ea ratione cunctis indicarent, non debere circumferentiam circuli ex cono deduci. Coni etenim genesis, ut superius vidimus, præexistentem circulum supponit. Unde, si circuli circumferentia ex cono esset deducenda, jam in eam impingeretur labem, quam vitiosum circulum vulgus appellat.

II.
*Quæ curvæ
veniunt no-
mine sectio-
num con-
icarum.*

Qua

26 SECTIONUM CONICARUM

Qua autem ratione *parabola*, *hyperbola*, & *ellipsis* ex cono trahant originem suam, jam superius innuimus. Nimirum oritur in cono *parabola*, quum planum, per quod dissecitur conus, jacet semper intra conum, nec superius productum conum secat adversum. Oritur vero *hyperbola*, quum idem planum jacet quidem continuo intra conum, sed sursum productum secat etiam conum oppositum, ubi *hyperbolam* aliam creat. Et denique oritur *ellipsis*, quum planum secans utrinque egreditur ex cono, sed sectio nec est basi æquidistans, nec eidem subcontraria.

III.
Euclides
græcis ex-
tremum con-
um expli-
catur.

III. Interim Euclides, & Apollonius in eruendis curvis istis ex cono triangulum per axem sectum velut *regulam* adhibebant. Sed rem non eadem ratione ambo exposuerunt. Euclides siquidem, non aliter conum plano secabat, quam ut *uni laterum ejus trianguli ad rectos angulos occurreret*. Unde, quia dumtaxat conum rectum agnovit, in quo omnia triangula per axem secta sunt isoscelia, & æquales in vertice angulos habent; ex uno, eodemque cono curvas illas omnes eruere nequebat, sed pro unaquaque illarum peculiari quodam cono ei opus erat.

Nimirum, etsi conus euclidæus oriatur, quando rectanguli trianguli manente uno crure, circumducitur crus alterum, usque donec ad priorem suum locum revertatur; posunt tamen ejus coni tres *species* distingui, prout crus manens est æquale, minus, vel majus crure circumducto. Pro triplici enim hoc

ca-

casu, triangulum, sectum ex cono plano per axem, potest in vertice, tum rectum, tum obtusum, tum acutum angulum habere. Unde, habita ejus anguli ratione, poterit ipse conus, modo *rectangulus*, modo *obtusangulus*, modo demum *acutangulus* appellari.

Ad eruendam ergo *parabolam*, utebatur Euclides cono *rectangulo*. Nam in eo triangulum, per axem sectum, habet in vertice angulum rectum; adeoque planum, uni ejus lateri ad rectos angulos occurrens, jacebit semper intra conum, nec secabit ejus oppositum. Vicissim autem, ad eruendam *hyperbolam*, adhibebat conum *obtusangulum*; quia, ratione anguli obtusi, in trianguli vertice existentis, idem planum jacebit quidem continuo intra conum, sed secabit ejus adversum. Et denique, ad deducendam *ellipsim*, in subsidium advocabat conum *acutangulum*; quia, propter angulum acutum, existentem in vertice trianguli, prædictum planum rursus ex cono egredietur.

IV. Hæc igitur erat trium illarum curvarum euclidæa genesis ex cono. Sed novit Apollonius, posse illiusmodi curvas *indiscre-*
minatim ex omni cono deduci, si planum, per quod dispescitur conus, non ita duceretur, ut uni laterum trianguli, per axem secti, ad rectos angulos insisteret; sed subinde, ut *occur-*
veret plano basis, aut alterius circuli paralleli in recta, quæ normalis esset ad basim ejus trianguli.

Sit itaque conus ABC, & in eo plano per axem fiat triangulum BAC. Secetur deinde idem conus plano alio, occurrente plano ba-

IV.

Ostenditur
 earundem
 curvarum
 genesis apol-
 loniana.

FIG. 5.

6. 7.

Tom. I.

B

fis,

sis, aut alterius circuli paralleli BCD in recta DE, quæ perpendicularis sit ad basim ejus trianguli BC; sitque DFE sectio, facta in superficie conica per hoc aliud planum. Ostendendum est, sectionem istam posse unamquamque earum curvarum nobis exhibere.

Sit recta FG communis sectio planorum BAC, DFE. Hanc liquet esse posse; vel lateri AC parallelam; vel subinde ad illud inclinam, ut ei supra coni verticem occurrat; vel demum taliter ad illud annuentem, ut infra coni verticem cum eo conveniat. In primo casu sectio DFE erit *parabola*; in secundo erit *hyperbola*; ac demum in tertio casu eadem sectio erit *ellipsis*.

Ut hæc ostendantur, ducatur per latus AC planum, quod occurrat plano circuli BCD in recta CZ, ipsi DE parallela. Et quoniam recta DE posita est perpendicularis ad diametrum circuli BC, erit recta CZ eidem BC similiter perpendicularis. Continget ergo recta CZ circumferentiam circuli BCD in puncto C. Unde ipsum quoque planum tanget conicam superficiem in latere AC; & productum superius, continget etiam superficiem oppositi coni, in quam latus AC, quum sursum producitur, cadit.

Jam, quum recta FG parallela est lateri AC; erit planum DFE æquidistans quoque plano contactus. Unde, sicuti cum eo convenire non potest, ita jacebit semper intra conum, nec secabit ejus oppositum: proindeque sectio DFE *parabola* erit. Quotiescumque vero recta FG occurrit lateri AC supra verticem;

cem ; tunc planum DFE etiam supra verticem conveniet cum plano contactus : adeoque , quum secet conum oppositum , sectio DFE erit *hyperbola* . Denique , quum recta FG occurrat lateri AC infra verticem ; planum DFE conveniet cum plano contactus similiter infra verticem : proindeque , quum rursus ex cono egrediatur , sectio DFE erit *ellipsis* .

V. Verum quidem est , quod in ducendo plano sectionis etiam Apollonius hanc legem adhibuerit , ut occurreret plano basis , aut alterius circuli paralleli in recta , quæ normalis esset ad basim trianguli , per axem secti . Nihilominus ad legem istam omnes , quæ in cono fiunt , sectiones exigi possunt ; quia , quomodo-cumque planum , per quod dispescitur conus , occurrat plano basis , aut alterius circuli paralleli , semper exhiberi potest in cono triangulum per axem , ad cujus basim recta illius occursus perpendiculariter insistat .

V.
Apolloniana
generis sectionis
num conu-
tum nulla
exceptione
laborat.

Secetur etenim conus ABC plano aliquo , FIG. 5.
occurrente plano basis , aut alterius circuli 6. 7.
paralleli BCD in recta DE . Jam nihil obstat ,
quominus in circulo BCD talis diameter du-
catur , quæ ipsi DE ad rectos angulos occur-
rat . Satis siquidem erit , ex centro ipsius cir-
culi perpendicularem demittere super DE ,
eamque producere , usque donec utrinque cir-
cumferentiam secet . Sit igitur BC diameter
ista . Et triangulum , per axem sectum , quod
ei insistit , illud erit , quod quaeritur . Nam ex
ipsa constructione basi ejus BC perpendicu-
laris est recta DE , in qua planum sectionis DFE
occurrit plano circuli BCD .

B 2

Ra-

10 SECTIONUM CONICARUM

Ratio igitur eruendi tres illas curvas ex cono, quam tradidit Apollonius, *nulla exceptione laborat*. Nam, sicuti per eam præfatæ tres curvæ possunt ex quolibet cono deduci; ita omnis sectio, quæ aliquam ex iis curvis in conica superficie producit, velut ea ratione facta potest haberi. Unde etiam genesis earum curvarum apolloniana, *universalitate sua*, non modo euclidæam, sed omnem aliam, quæ fingi excogitarique potest, vincit ac superat; quandoquidem universalissima illa, a plani intra conum positione deducta, quam posuimus ab initio, ad ipsam revocatur.

VI. Sed nolim hic reticere, quod juxta *Euclidæam methodo tres illa curvæ nec etiam ex eodem cono* Euclidæam methodo tres illa curvæ nec etiam ex eodem cono scaleno erui possunt. VI. Sed nolim hic reticere, quod juxta methodum euclidæam nec etiam ex uno, eodemque cono scaleno tres illæ curvæ erui queant. Etsi enim in cono isto triangula, per axem secta, non habeant semper æquales angulos in vertice; sunt tamen anguli illi ejusdem semper speciei inter se, hoc est, vel omnes recti, vel omnes obtusi, vel omnes acuti. Unde, si planum secans uni laterum trianguli, per axem secti, ad rectos angulos occurrere deberet; adhuc alio cono opus esset ad eruendam parabolam, alio ad derivandam hyperbolam, & alio demum ad deducendam ellipsim.

Fig. 3. Sit enim conus scalenus ABC, ex quo abscindatur plano per axem triangulum aliquod BAC. In plano hujus trianguli describatur semicirculus, cujus diameter sit recta BC. Et perspicuum est, punctum A locari in ejus circumferentia, quum axis conī adæquat basis semidiametrum; intra circumferentiam, quum axis conī est minor semidiametro basis;

ac

ac demum extra circumferentiam , quum idem axis est major eadem semidiametro . Quare ipsius trianguli angulus verticalis erit rectus in primo casu , obtusus in secundo , tandemque acutus in tertio .

Hæc autem quum ita sint , liquet, conum scalenum , perinde ac rectum , esse, vel *rectangulum* , vel *obtusangulum* , vel denique *acutangulum* . Quotiescumque enim axis coni scaleni basis suæ semidiametrum adæquat , conus erit *rectangulus* ; quia quodlibet triangulum, per axem sectum , habet in vertice angulum rectum . Ubi vero axis coni scaleni est minor semidiametro basis , conus erit *obtusangulus* ; quia in vertice cujusque trianguli , per axem secti, reperitur angulus obtusus . Et denique , quum axis coni scaleni est major semidiametro basis , conus erit *acutangulus* : ob acutum angulum , quem triangula , per axem secta , in vertice habent .

VII. Recte igitur observavit Eutocius , quod in tradenda genesi earum curvarum contigerit Veteribus illud idem , quod evenit eis in ea trianguli proprietate, quod *omnes anguli simul duobus rectis sint æquales* . Nam , sicuti proprietatem istam primo norunt in triangulo æquilatelo , tum in isosceli , ac postea in scaleno : unde demum constatum ab iis universale theorema , omnes triangulorum species comprehendens ; ita quoque tres illas curvas ex totidem coni recti speciebus primum eruebant : & nonnisi post tempora Apollonii , tum ex quolibet cono recto , cum etiam ex cono scaleno eas deduxerunt .

VII.
*Sellionum
conicarum
nomina eu-
clidæ , &
ex ab his
recessit A-
pollonius.*

22 SECTIONUM CONICARUM

Cæterum Apollonio, non modo universalis earum curvarum genesis, sed nomina quoque, quibus eas designamus, ferri debent accepta. Euclides enim ab ipsis conis, unde illas eruebat, primam vocavit *sectionem coni rectanguli*, alteram *sectionem coni obtusanguli*, & tertiam demum *sectionem coni acutanguli*: hisque nominibus ad Apollonium usque, cum Archimedes, tum alii subsecuti Geometræ curvas illas vocitarunt.

Sed nominibus istis non amplius a se mutuo poterant eæ curvæ distingui, ubi novit Apollonius, posse unamquamque illarum ex quocumque cono deduci. Unde, iis abdicatis, operæ pretium duxit Geometra summus, alia curvis illis nomina imponere, quæ apta essent iis a se invicem distinguendis. Itaque, a præcipuis ipsarum proprietatibus, quas suo loco inferius ostendemus, *parabolam*, *hyperbolam*, & *ellipsim* eas appellavit.

C A P. III.

De diametro sectionum conicarum, deq; ejus verticibus, ordinatis, & abscissis.

I.
*Quarella
diametri con-
junctis con-
ica sectionis
appellatur.*

I. C Ujuscumque speciei sit sectio conica, si fiat in cono triangulum illud per axem, ad quod eam apolloniana genesis exigit, dicetur *diameter* sectionis recta illa, quæ est communis sectio ejus trianguli, & plani secantis.
Ita,

Ita , si DFE sit sectio facta , in superficie conica per planum , occurrens plano basis , aut circuli æquidistantis BCD in recta DE ; & BAC sit triangulum , per axem sectum , ad cuius basim BC normalis est recta DE : vocabimus *diametrum* sectionis DFE rectam FG , in qua duo plana BAC , DFE sese mutuo secant .

FIG. 5.
6. 7.

Jam vidimus præcedenti capite , rectam istam FG esse lateri AC parallelam , quum sectio DFE est parabola ; ei occurrere supra verticem coni , quum sectio DFE est hyperbola ; ac demum illud infra coni verticem secare , quum eadem sectio DFE est ellipsis . Unde , habita diametri ratione , tres illæ conicæ sectiones poterunt sequenti modo definiri .

Nimirum parabola est conica sectio , in qua diameter uni laterum trianguli , per axem secti , est parallela . Hyperbola est sectio conica , in qua diameter unum quidem trianguli latus infra verticem coni , & alterum supra verticem secat . Ac demum ellipsis est conica sectio , in qua diameter utrique laterum trianguli infra coni verticem occurrit .

II. Dabimus autem rectæ FG nomen *diametri* , quia transit velut per medium ipsius sectionis . Ut enim ex constructione bifecat in K rectam DE , ita quoque dividit bifariam rectas omnes , quæ ipsi DE æquidistantes , utrinque ad sectionem terminantur .

II.
Cur recta ista tali nomine vocetur, ostenditur.

FIG. 5.
6. 7.

Sit namque HI una istarum rectarum . Ostendendum est , eam a recta FG secari bifariam in L . Ducatur per punctum L recta MN , ipsi BC parallela . Jamque huic MN erit HI

B 4 pe-

perinde normalis, ac est DE perpendicularis super BC.

Et quoniam, secto cono plano, transeunte per rectas MN, HI, oritur circulus MNH, cujus diameter est recta MN; eadem HI, non modo insistet ad angulos rectos super MN, sed bifariam quoque ab ipsa secabitur. Quare etiam a recta FG bisecta erit in L.

Patet autem, eandem demonstrationem obtinere etiam, si sectio DFE sit hyperbola, & recta HI ducta sit in ejus opposita æquidistans ipsi DE. Quocirca recta FG erit utriusque hyperbolæ diameter, & in utraque dividet bifariam rectas omnes, quæ ipsi DE æquidistantes, utrinque ad sectionem terminantur.

III.

*Diametri æquidistantes
quodam pro-
prietate ad-
notatur.*

FIG. 5.

6. 7.

III. Sed nolim hic reticere, quod si triangulum per axem BAC rectum fuerit plano circuli BCD; tunc recta illa FG, quam sectionis *diametrum* appellamus, non modo bifariam, verum etiam ad angulos rectos secabit, cum rectam DE, tum alias omnes, quæ ipsi DE æquidistantes, utrinque ad sectionem terminantur.

Ex constructione enim ad rectam BC, quæ communis est sectio duorum planorum BCD, BAC, perpendicularis est ipsa DE. Itaque, quum duo illa plana sibi mutuo occurrunt ad rectos angulos, quemadmodum DE existit in uno eorum planorum BCD, ita perpendicularis erit ad planum alterum BAC. Sed recta FG, velut communis sectio planorum BAC, DFE, reperitur in plano BAC. Quare erit DE perpendicularis quoque ipsi FG: & propterea, non modo bifariam, sed
etiam

etiam ad angulos rectos ab ea secabitur .

Et quidem , quum conus est rectus , proprietas ista diametri semper locum habet ; quia in cono recto triangulum , per axem sectum , plano basis , aut circuli æquidistantis semper ad rectos angulos insistit . Sed longe secus se res habet in cono scaleno ; quandoquidem in eo triangulum , per axem sectum , tunc demum rectum est ad planum basis , aut circuli æquidistantis , quum perpendicularis , demissa ad planum illud ex vertice coni , est in ipso trianguli plano .

IV. Quemadmodum autem recta FG, quæ communis est sectio plani secantis , & trianguli per axem , vocabitur in posterum *diameter* sectionis DFE ; ita punctum F, in quo eadem FG sectioni occurrit , diametri *vertex* appellabitur . Sed semisses earum rectarum , quæ bifariam a diametro dividuntur , quum nobis usui erunt , diametri *ordinatae* dicentur . Et denique eæ diametri portiones , quæ vertice , & ordinatis continentur , ubi nobis inservient , non alio , quam *abscissarum* nomine , distinguuntur .

IV.
Diametri
vertex, or-
dinata, &
abscissa defini-
untur.
FIG. 5.
6. 7.

Quum ellipsis in orbem redeat , occurreret ei diameter in duobus punctis ; atque adeo duo erunt *vertices* ipsius . Similiter autem in hyperbola , ob aliam oppositam , quæ continuo illam comitatur , duo erunt diametri *vertices* . Sed , quemadmodum in ellipsi diameter non maiorem *longitudinem* habere potest , quam quæ ei ab utroque vertice conceditur ; sic etiam in hyperbola , ubi quæstio erit de *longitudine* diametri , ea tantum ipsius portio .

tio .

tio veniet, quæ utroque vertice continetur.

Tantum igitur in parabola, ob unicum diametri verticem, nequit ei *longitudo* ulla præfiniri. Verum, si intimius rem inspicere velimus, comperiemus in hac curva verticem alium in infinita a priore distantia: unde ipsa ejus diameter velut *infinitæ longitudinis* erit habenda. Neque enim alia ratione, tam in ellipsi, quam in hyperbola fortitur diameter FG verticem alium, quam quia in utraque curva occurrit etiam lateri AC. At quicumque novit, *rectas parallelas velut occurrentes in infinita distantia posse considerari*; facile intelliget, hunc alium occursum fieri in parabola, ubi a puncto F infinite receditur.

V. Et sane, *tam ellipsis, quam hyperbola vertitur in parabolam*, quum altero diametri vertice G in infinitum abeunte, fit ipsa diameter FG infinitæ longitudinis. Neque enim punctum G in infinitum abire potest, nisi diameter FG æquidistans fiat lateri AC. Id vero quum accidit, omnino necesse est, ut sectio DFE evadat parabola. Nam, ut superius vidimus, parabola est conica sectio, in qua diameter uni laterum trianguli, per axem secti, est parallela.

Hinc *considerari poterit parabola, tam ut ellipsis, quam ut hyperbola, cujus diameter sit infinitæ longitudinis*. Et vel hac sola consideratione poterunt parabolæ proprietates omnes ex iis derivari, quæ sive ad ellipsim, sive ad hyperbolam pertinent. Nimirum, si sedulo perpendatur, quid in ea, de qua agitur, proprietate infinita diametri longitudo mutet, ac innovet.

Pla-

v.
Qua ratione
parabola ad
ellipsim, et
hyperbolam
reducatur.

FIG. 6.
7.

Plane vero non patitur ratio Elementorum, ut in demonstrandis parabolæ proprietatibus hæc methodus usurpetur. Sed, ubi propriis suis rationibus proprietates illæ sunt comprobatæ; volupe erit, easdem hac alia methodo rursus experiri. Hinc in nostris hisce Elementis parabola post ellipsim, & hyperbolam semper sub contemplationem veniet; ut scilicet ejus accidentia ex proprietatibus ellipsis, & hyperbolæ eruere etiam valeamus.

VI. Quemadmodum autem *ellipsis vertitur in parabolam*, quum altero diametri vertice G in infinitum abeunte, sit diameter ipsa infinitæ longitudinis, & consequenter parallela lateri AC; sic *eadem ellipsis transit in circulum*, quum abeunte in infinitum puncto K, in quo rectæ duæ FG, BC sibi mutuo occurrunt, evadit diameter FG parallela ipsi BC.

VI.
Etiam circulus velut species quorundam ellipsis potest haberi.
VI.
FIG. 7.

Nam in isto casu una cum puncto K abiit etiam in infinitum recta DE, quæ communis est sectio plani secantis cum plano basis. Unde, quum duo ista plana conveniant inter se in infinita distantia, ipsa quoque evadent parallela. Hinc secabitur conus plano, æquidistante basi: & propterea, ex superius ostensis, ipsa sectio circulus erit.

Id quum ita sit, poterit *circulus velut species quorundam ellipsis haberi*. Et revera, prout ex cono oritur, est prima infinitarum variationum, quas in eo subit ellipsis. Sicuti enim, secto cono plano, æquidistante basi, producit circulus; sic, inclinato paululum plano versus basim, fit statim locus ellipsi, cujus, pro infinitis inclinationibus diversis plani secantis,

in-

28 SECTIONUM CONICARUM
 infinita quoque diversitas extat.

Ultima autem infinitarum variationum, quas in cono patitur ellipsis, parabola est; ut quæ contingit, quum planum secans non amplius egreditur ex cono. Sed parabola est etiam prima ex infinitis variationibus, quibus in cono subjacet hyperbola; quippe quæ confestim eam subsequuntur. Quumque demum hyperbola desinat in lineam rectam; hæc quoque velut ultima hyperbolarum poterit considerari.

VII.
 Omnis recta,
 quæ ex cono
 oritur, po-
 test ad hy-
 perbolam re-
 vocari.

VII. Interim *linea recta, quæ ex cono erui-
 tur, quandoque est simplex & unica, quando-
 que vero geminata*. Ad eam quippe eruendam, semper plano, per verticem transeunte, opus est. Sed, ubi planum istud contingit superficiem conicam; recta erit simplex, ac unica. Ubi vero eam partitur, & secat; recta non simplex, sed geminata orietur.

Et ne aliquid prætereamus, quod scitu sit dignum, notetur hic velim, quod sicuti recta illa simplex, quæ oritur per planum, conicam superficiem contingens, habenda est velut ultima infinitarum variationum, quas in cono subit hyperbola; ita recta illa geminata, quæ gignitur, secando conum plano per verticem, considerari poterit velut hyperbola, cujus diameter sit nullius prorsus longitudinis.

Jam enim vidimus superius, quod quum diameter hyperbolæ sit infinitæ longitudinis, hyperbola ipsa vertatur in parabolam, & ejus opposita abeat in infinitum, nec amplius extet. At, *si eadem hyperbolæ diameter minua-*
tur,

tur in infinitum, & prorsus evanescat; tunc bina hyperbolæ oppositæ accedent ad se mutuo, & vertentur in rectas duas, se invicem decussantes in vertice coni; quum non alia ratione abire possit in nihilum diameter hyperbolæ, quam plano sectionis per coni verticem trans-eunte.

VIII. Cæterum, priusquam huic capiti finem imponamus, juvat advertere, quod sicuti hyperbolarum oppositarum eadem est diameter, sic in utraque hyperbola eadem quoque sit positio earum rectarum, quæ diametri ordinatæ dicuntur.

VIII

In hyper-
olis oppositis,
sicut eadem
est diameter,
ita eadem
est positio or-
dinatarum.

Monuimus namque superius, quod recta FIG. 6. FG bifariam dividit, non solum eas omnes, quæ in hyperbola DFE ducuntur æquidistantes ipsi DE; verum etiam quotquot in hyperbola opposita eidem DE sunt parallelæ. Quare, non modo FG erit diameter utriusque hyperbolæ, sed ordinatæ, quæ pertinent ad hanc diametrum, erunt in utraque hyperbola parallelæ rectæ DE.

Clarius autem constabit veritas hujus rei, si in cono opposito plano, æquidistante basi ipsius coni principalis, circulus fiat; tum quæratür triangulum per axem, quod dirigat sectionem, factam in illo cono. Etenim, quum oriatur triangulum istud, producendo latera trianguli BAC, quod in cono principali dirigit sectionem DFE; liquido patebit, eandem esse diametrum hyperbolarum oppositarum, & eandem esse pariter in utraque positionem ordinatarum.

CAP.

C A P. IV.

*Quæ sit natura ellipsis relate ad
diametrum , definitur .*

I.
Ellipsis re-
late ad dia-
metrum pro-
prietat pri-
ma.

I. **O** Stensa genesi sectionum conica-
rum ; sequitur , ut propriam cu-
jusque naturam relate ad diametrum definia-
mus . Primo igitur in ellipsi , si binæ ad dia-
metram ordinatæ ducantur , erunt earum qua-
drata inter se , ut rectangula , quæ sub corre-
spondentibus diametri portionibus , ab utroque
vertice sumptis , continentur .

FIG. 7.

Fiat enim in cono ABC sectio elliptica
DFE , & ad diametrum ejus FG , quæ utrique
laterum trianguli , per axem secti , infra coni
verticem occurrit , ducantur duæ ordinatæ
DK , HL . Ostendendum est , DK quadratum
esse ad HL quadratum , ut est rectangulum
FKG ad rectangulum FLG .

In eodem cono fiant etiam circuli duo
BCD , MNH per plana , basi æquidistantia . Et
quoniam eorum diametris BC , MN insistant
ad rectos angulos rectæ DK , HL ; erunt ista-
rum quadrata æqualia rectangulis BKC ,
MLN . Quare erit , ut DK quadratum ad HL
quadratum , ita rectangulum BKC ad rectan-
gulum MLN .

Jam ratio horum rectangulorum compo-
nitur ex BK ad ML , & ex CK ad NL ; sive
etiam ex FK ad FL , & ex GK ad GL . Sed
duæ

duæ istæ rationes componunt pariter rationem, quam habet rectangulum FKG ad rectangulum FLG. Itaque erit ex æquali, ut DK quadratum ad HL quadratum, ita rectangulum FKG ad rectangulum FLG.

II. Hinc, si ex vertice F ducatur recta FO, ordinatis parallela, quæ sit talis longitudinis, ut quadratum unius ordinatæ DK sit ad rectangulum ei correspondens FKG, veluti est ipsa FO ad diametrum FG; erit quadratum cuiusvis alterius ordinatæ HL ad rectangulum FLG, quod illi correspondet, similiter ut FO ad FG.

II.
*Proprietas
secunda,
diametri pa-
rametrum
exhibens.*
FIG. 7.

Ostensum est enim, DK quadratum esse ad HL quadratum, ut est rectangulum FKG ad rectangulum FLG. Quare erit permutando, ut DK quadratum ad rectangulum FKG, ita HL quadratum ad rectangulum FLG. Ponitur autem, DK quadratum esse ad rectangulum FKG, ut est FO ad FG. Et igitur ex æquali HL quadratum ad rectangulum FLG erit etiam, ut FO ad FG.

Recta ista FO diametri *parameter* deinceps appellabitur; & rectangulum, sub ipsa, & diametro contentum, diametri *figura* dicitur. Ejus autem habita ratione, perspicuum est, id quidem ellipsi contingere, ut *quadratum cuiusvis ordinatæ sit ad rectangulum, quod sub correspondentibus diametri portionibus, ab utroque vertice sumptis, continetur, in eadem illa ratione, quam parameter ad diametrum habet.*

III. Maneat jam parameter FO ordinatis diametri parallela, in qua utique positione

III.
*Proprietas
tertia, eli-*
sem.

33 SECTIONUM CONICARUM

*psis dronomi-
natiorem a-
stendens.*

FIG. 7. GO, cui occurrat in R ordinata quævis DK. Et quadratum ordinatæ hujus DK æquale erit correspondenti rectangulo FKR.

Nam rectangulum FKR est ad rectangulum FKG, ut KR ad KG. Sed KR est ad KG, ut FO ad FG, sive etiam, ut DK quadratum ad rectangulum FKG. Itaque erit ex æquali, ut rectangulum FKR ad rectangulum FKG, ita DK quadratum ad idem rectangulum FKG; & propterea DK quadratum, & rectangulum FKR æqualia erunt inter se.

Perspicuum est autem, rectangulum FKR minus esse rectangulo OFK. Quare quadratum ordinatæ DK ab eodem rectangulo OFK pariter deficiet. Hinc sortita est huiusmodi conica sectio nomen *ellipsis*; quia in ea quadratum cujusvis ordinatæ a rectangulo, quod fit ex parametro in abscissam correspondentem, continuo deficit.

Defectus vero est rectangulum aliud, quod insistens eidem abscissæ, est simile, similiterque positum ei, quod diametri figuram constituit. Nam, ducta RS, ipsi FG parallela, erit relate ad quadratum ipsius DK rectangulum OSR istiusmodi defectus: quod quidem ipsi RS, seu FK insistit; & est simile, similiterque positum ei, quod fit ex FO in FG; quum sit circa diagonalem illius.

IV.
Ratio para-
metri ad
diametrum
per rectas, in

IV. Cæterum ratio, quam habet in ellipse parameter ad diametrum, potest per rectas, in cono ductas, facili negotio definiri. Positis enim omnibus ut supra, si ducatur ex vertice coni

A re-

A recta AX, ipsi FG parallela, quæ conveniat cono duntaxat, definitur. cum BC, producta, in X; erit, ut parameter FO ad diametrum FG, ita rectangulum BXC ad AX quadratum. FIG. 8.

Nam rectangulum BKC, vel ei æquale quadratum ex DK, est ad rectangulum FKG in ratione composita ex BK ad FK, & ex CK ad GK. Sed BK est ad FK, ut BX ad AX; itemque CK est ad GK, ut CX ad AX. Itaque erit DK quadratum ad rectangulum FKG in ratione composita ex BX ad AX, & ex CX ad AX.

Jam duæ istæ rationes componunt pariter rationem, quam habet rectangulum BXC ad AX quadratum. Et igitur erit ex æquali, ut rectangulum BXC ad AX quadratum, ita DK quadratum ad rectangulum FKG. Sed DK quadratum est ad rectangulum FKG, ut FO ad FG, Quare erit rursus ex æquali, ut FO ad FG, ita rectangulum BXC ad AX quadratum.

V. Atque hinc modo facile erit, *secto ex cono triangulo per axem, eruere, ope ejus, ellipsim ex ipso cono, in qua parameter ad diametrum datam habeat rationem.* Sit enim BAC triangulum, per axem sectum, cujus ope ellipsis ex cono est eruenda. Ducatur in plano ejus v.
Deductis ellipsis ex cono, in qua parameter ad diametrum data sit ratio. recta AX, quæ conveniat cum BC, producta, ita quidem in X, ut rectangulum BXC ad AX quadratum sit in data illa ratione. Et quælibet ellipsis, quæ per triangulum BAC subinde eruitur ex cono, ut diameter ejus parallela fiat ipsi AX, quæsitæ conditionem adimplebit. FIG. 8.

Tom. I.

C

Nc-

34 SECTIONUM CONICARUM

Neque vero difficile erit, adhibito triangulo BAC, talem ex cono ellipsim eruere, quæ diametrum habeat, rectæ AX parallelam. Ducatur siquidem in plano ejus trianguli recta quævis FG, æquidistans ipsi AX, & conveniens cum BC in K. Agatur postea per punctum istud K in plano circuli BCD recta DE, eidem BC perpendicularis. Et planum, transiens per rectas FG, DE, ellipsim, quam quærimus, in cono producet.

Hinc etiam, si ellipsim, ex cono eruendam, talem esse oporteat, ut *data sit in ea, tam ratio parametri ad diametrum, quam ipsius diametri longitudo*; solvetur problema, si ducta, ut prius, recta AX ea lege, ut rectangulum BXC ad AX quadratum sit in data ratione; agatur deinde ita quidem FG, ut non modo sit parallela ipsi AX, sed etiam, ut portio ejus, trianguli lateribus comprehensa, datam diametri longitudinem adæquet.

VI.
Solutio pro-
blematæ,
quod pro de
ductiōe ejus
ellipsi velut
lemma re-
quiratur.

FIG. 9.

VI. Sed, ad *lemmaticum illud problema solvendum*, nimirum ad ducendam in plano trianguli rectam illam AX; nec etiam magno mentis acumine opus est. Abscindatur enim ex trianguli latere uno AC portio CM, quæ ad ipsum AC datam illam rationem obtineat. Agatur postea per punctum M recta MN, ipsi BC parallela, quæ conveniat in N cum circumferentia circuli, triangulum ambientis. Et punctum istud N determinabit positionem ipsius AX.

Est namque, propter circulum, rectangulum BXC æquale rectangulo AXN. Sed rectangulum AXN est ad AX quadratum, ut NX ad AX, sive etiam, ut CM ad AC. Qua-

re ipsum quoque rectangulum BXC ad AX quadratum erit, ut CM ad AC: & propterea, quum CM sit ad AC in data ratione; erit pariter in eadem data ratione rectangulum BXC ad AX quadratum.

Quum data ratio est minoris ad majus, recta illa AX semper duci potest. Nam eo in casu punctum M cadit inter alia duo A, & C; adeoque recta MN, quæ ipsi BC æquidistanter ducitur, circuli circumferentiæ semper occurrit. Vicissim autem, quum data ratio est majoris ad minus, non semper duci poterit recta illa AX. Nam tunc punctum M cadit ad partem alteram ipsius A; adeoque fieri quandoque potest, ut recta MN circuli circumferentiam non secet.

Unde etiam, secto ex cono triangulo per axem, semper licebit, ope ejus, eruere ellipsim ex ipso cono, in qua parameter ad diametrum datam habeat rationem, quotiescumque data ratio est minoris ad majus. Sed, si vicissim ratio data fuerit majoris ad minus, fieri quandoque potest, ut sit omnino impossibile, adhibito eo triangulo, optatam ex cono ellipsim eruere.

VII. Nullo etiam negotio, per rectas, in cono ductas, determinari potest magnitudo, quam diametri figura habet in ellipsi. Manentibus namque omnibus, ut supra, ducantur ex utroque diametri vertice rectæ FR, GS, ipsi BC parallelæ, quæ cum lateribus trianguli conveniant in punctis R, & S. Et rectangulum, sub his rectis comprehensum, diametri figuram adæquabit.

VII.

Figura, ad ellipsim diametrum per axem ducta, magnitudo per rectas, in cono ductas, definitur.

FIG. 8.

C 2

Nam

36 SECTIONUM CONICARUM

Nam rectangulum BKC, vel ei æquale quadratum ex DK, est ad rectangulum FKG in ratione composita ex BK ad FK, & ex CK ad GK. Sed BK est ad FK, ut GS ad FG; itemque CK est ad GK, ut FR ad FG. Itaque erit DK quadratum ad rectangulum FKG in ratione composita ex GS ad FG, & ex FR ad FG.

Et quoniam duæ istæ rationes componunt quoque rationem, quam habet rectangulum sub ipsis FR, GS ad FG quadratum; erit ex æquali, ut DK quadratum ad rectangulum FKG, ita rectangulum ex FR in GS ad FG quadratum. Unde, sicuti DK quadratum est ad rectangulum FKG, ut FO ad FG; sic erit rursus ex æquali, ut FO ad FG, ita rectangulum ex FR in GS ad FG quadratum.

Jam, assumpta communi altitudine FG, ut est FO ad FG, ita est rectangulum ex FO in FG ad idem FG quadratum. Et igitur rectangulum ex FR in GS æquale erit rectangulo ex FO in FG. Sed figura diametri constituitur per rectangulum ex FO in FG. Quare aliud illud rectangulum ex FR in GS æquale erit præfatæ diametri figuræ.

VIII. Ex eo autem, quod rectangulum, sub ipsis FR, GS adæquet diametri figuram, quæ constituitur per rectangulum ex FO in FG, plura nobis derivantur theoremata, quorum ope, *etiam ignorata diametri longitudine, definiri potest parameter ejus in cono.*

FIG. 8. Nimirum primo FO erit ad FR, ut est BX ad AX. Nam, quum rectangulum ex FR in GS sit æquale rectangulo ex FO in FG; erit,

VIII.
Theoremata
pro determi-
natione pa-
rametri,
etiam igno-
rata diame-
tri longitu-
dine.

erit, ut FO ad FR, ita GS ad FG. Sed GS est ad FG, ut BX ad AX. Itaque erit ex æquali, ut FO ad FR, ita BX ad AX.

Secundo FO erit ad GS, ut est CX ad AX. Nam, ob eandem eorum rectangulorum æqualitatem, erit, ut FO ad GS, ita FR ad FG. Sed FR est ad FG in eadem ratione, quam habet CX ad AX. Quare erit ex æquali, ut FO ad GS, ita CX ad AX.

Tertio FO erit ad AF, ut est rectangulum CBX ad rectangulum BAX. Nam FO ad AF rationem habet compositam ex FO ad FR, & ex FR ad AF; sive etiam ex BX ad AX, & ex BC ad AB. Sed duæ istæ rationes componunt quoque rationem, quam habet rectangulum CBX ad rectangulum BAX. Itaque erit ex æquali, ut FO ad AF, ita rectangulum CBX ad rectangulum BAX.

Denique FO erit ad AG, ut est rectangulum BCX ad rectangulum CAX. Nam FO ad AG rationem habet compositam ex FO ad GS, & ex GS ad AG; sive etiam ex CX ad AX, & ex BC ad AC. Sed duæ istæ rationes componunt quoque rationem, quam habet rectangulum BCX ad rectangulum CAX. Quare erit ex æquali, ut FO ad AG, ita rectangulum BCX ad rectangulum CAX.

IX. Unoquoque horum theorematum determinabitur parameter in cono, etiam diametri longitudine non cognita. Sed determinationem omnium simplicissimam suppetit nobis ipsa illa proprietas, unde ea fluunt theoremata. Fiat enim angulus FRV æqualis angulo BFG. Et portio FV, abscissa ex diametro per

IX.
Determinatio parametri simplicissima, a diametri longitudine nulliusmodi dependens.

FIG. 8.

38 SECTIONUM CONICARUM

rectam RV, erit quæſita parametri longitudo.

Nam, ob æqualitatem eorum angulorum, erit, ut FR ad FV, ita FG ad GS. Unde rectangulum ex FR in GS æquale erit rectangulo ex FV in FG. Jam vero rectangulum ex FR in GS adæquat diametri figuram. Quare eidem figuræ erit etiam æquale rectangulum ex FV in FG; adeoque, quemadmodum unum ejus latus FG est ipſa diameter, ita latus alterum FV diametri parametrum adæquabit.

x. *Alia ejuſdem parametri determinatio, nulla habita ratione longitudinis diametri.* X. Idem problema de determinanda parametro in cono, nulla habita ratione longitudinis diametri, poteſt etiam reſolvi in hunc modum.

Ex vertice conſ A ducatur, tum recta AK, perpendicularis ipſi BC, cum recta AH, perpendicularis diametro FG. Abſcindatur deinde ex priorè AK portio AI, æqualis alteri AH. Et recta MN, ducta per punctum I æquidistanter ipſi BC, longitudinem parametri exhibebit.

Demiffa etenim ſuper AX perpendiculari BL, erit AK ad BL in ratione compoſita ex AK ad AI, & ex AI, ſeu AH ad BL. Sed AK eſt ad AI, ut BC ad MN; itemque AH eſt ad BL, ut AF ad AB, ſive, ut FR ad BC. Itaque erit AK ad BL in ratione compoſita ex FR ad BC, & ex BC ad MN: proindeque, quum duæ iſtæ rationes component pariter rationem, quam habet FR ad MN; erit ex æquali, ut AK ad BL, ita FR ad MN.

Et quoniam AK eſt ad BL, ut AX ad BX, ſive etiam, ut FG ad GS; erit rurfus ex æqua-

æquali, ut FR ad MN, ita FG ad GS. Unde rectangulum ex FR in GS æquale erit rectangulo ex MN in FG. Sed rectangulum ex FR in GS adæquat diametri figuram. Quare eadem figuræ erit etiam æquale rectangulum ex MN in FG: & propterea, sicuti unum ejus latus FG est ipsa diameter, ita latus alterum MN diametri parametrum exhibebit.

C A P. V.

Quid hyperbolæ relate ad diametrum accadat, ostenditur.

I. ELLIPSI est valde affinis hyperbola. Nam in ista quoque, *si binæ ad diametrum ordinatæ ducantur, erunt earum quadrata inter se, ut rectangula, quæ sub correspondentibus diametri portionibus, ab utroque vertice sumptis, continentur.*

I.
Hyperbola
relate ad
diametrum
proprietas
prima.

Fiat etenim in cono ABC sectio hyperbolica DFE, & ad diametrum ejus FG, quæ trianguli, per axem secti, unum quidem latus infra coni verticem, alterum supra verticem secat, ducantur duæ ordinatæ DK, HL. Ostendendum est, DK quadratum esse ad HL quadratum, ut est rectangulum FKG ad rectangulum FLG.

FIG. 6.

In eodem cono fiant etiam circuli duo BCD, MNH per plana, basi æquidistantia. Et quoniam eorum diametris BC, MN insunt ad rectos angulos rectæ DK, HL; erunt ista-

40 SECTIONUM CONICARUM
rum quadrata æqualia rectangulis BKC;
MLN. Quare erit, ut DK quadratum ad HL
quadratum, ita rectangulum BKC ad rectan-
gulum MLN.

Jam ratio horum rectangulorum compo-
nitur ex BK ad ML, & ex CK ad NL, sive
etiam ex FK ad FL, & ex GK ad GL. Sed
duæ istæ rationes componunt pariter ratio-
nem, quam habet rectangulum FKG ad re-
ctangulum FLG. Itaque erit ex æquali, ut
DK quadratum ad HL quadratum, ita rectan-
gulum FKG ad rectangulum FLG.

Per spicuum est autem, eandem demon-
strationem obtinere quoque, si binæ illæ or-
dinatæ ducantur in hyperbola opposita;
vel si una ex iis ducatur in hyperbola prin-
cipali, & altera in ejus adversa. Unde, si-
cuti eadem est utriusque hyperbolæ diame-
ter, & eadem positio suarum ordinarum; sic
relate ad diametrum eadem quoque erit utrius-
que natura.

II.
*Proprietas
secunda, ex-
hibens dia-
metri para-
metrum, &
fig. 6.*

II. In utraque etiam hyperbola, si ex ver-
tice F ducatur recta FO, ordinatis parallela,
quæ sit talis longitudinis, ut quadratum unius
ordinatæ DK sit ad rectangulum ei correspon-
dens FKG, velut est ipsa FO ad diametrum
FG; erit quadratum cujusvis alterius ordina-
tæ HL ad rectangulum FLG, quod illi cor-
respondet, similiter, ut FO ad FG.

Ostensum est enim, DK quadratum esse
ad HL quadratum, ut est rectangulum FKG
ad rectangulum FLG. Quare erit permutan-
do, ut DK quadratum ad rectangulum FKG,
ita HL quadratum ad rectangulum FLG. Po-
ni.

nitur autem, DK quadratum esse ad rectangulum FKG, ut est FO ad FG. Et igitur ex æquali HL quadratum ad rectangulum FLG erit etiam, ut FO ad FG.

Recta ista FO etiam in hyperbola diametri *parameter* appellabitur; & rectangulum, sub ipsa, & diametro contentum, hic quoque diametri *figura* dicitur. Ejus autem habitatione, perspicuum est, id quidem utrique hyperbolæ contingere, ut *quadratum cujusvis ordinata sit ad rectangulum, quod sub correspondentibus diametri portionibus, ab utroque vertice sumptis, continetur, in eadem illa ratione, quam parameter ad diametrum habet.*

III. Maneat jam FO, ordinatis diametri parallela, in qua utique positione semper ea intelligi debet. Jungatur alia ejus extremitas O cum vertice altero G per rectam GO, cui occurrat in R ordinata quævis DK. Et quadratum ordinatæ hujus DK æquale erit correspondenti rectangulo FKR.

Nam rectangulum FKR est ad rectangulum FKG, ut KR ad KG. Sed KR est ad KG, ut FO ad FG, sive etiam, ut DK quadratum ad rectangulum FKG. Itaque erit ex æquali, ut rectangulum FKR ad rectangulum FKG, ita DK quadratum ad idem rectangulum FKG: & propterea DK quadratum, & rectangulum FKR æqualia erunt inter se.

Perspicuum est autem, rectangulum FKR majus esse rectangulo OFK. Quare quadratum ordinatæ DK idem rectangulum OFK pariter excedet. Hinc sortita est hujusmodi conica sectio nomen *hyperbolæ*, quia in ea

III.

*Proprietas
tertia, hyper-
bolæ de nomi-
nationem as-
seruimus.*

FIG. 6.

qua-

42 SECTIONUM CONICARUM

quadratum cuiusvis ordinatæ excedit semper rectangulum, quod fit ex parametro in abscissam correspondentem.

Excessus porro est rectangulum aliud, quod insistens eidem abscissæ, est simile, similiterque positum ei, quod diametri figuram constituit. Nam, ducta OS ipsi FG parallela, erit relate ad quadratum ipsius DK rectangulum OSR istiusmodi excessus: quod quidem ipsi OS, seu FK insitit, & est simile, similiterque positum ei, quod fit ex FO in FG; quum sint circa eandem diagonalem ejus rectanguli, quod sub ipsis GK, KR continetur.

IV.
Ratio para-
metri ad
diametrum
per rectas, in
cono ductas,
determina-
tur.

FIG. 10.

IV. Cæterum etiam in hyperbola ratio, quam habet parameter ad diametrum, potest per rectas, in cono ductas, facili negotio definiri. Positis enim omnibus, ut supra, si ducatur ex vertice conî A recta AX, ipsi FG parallela, quæ conveniat cum BG in X; erit, ut parameter FO ad diametrum FG, ita rectangulum BXC ad AX quadratum.

Nam rectangulum BKC, vel ei æquale quadratum ex DK, est ad rectangulum FKG in ratione composita ex BK ad FK, & ex CK ad GK. Sed BK est ad FK, ut BX ad AX; itemque CK est ad GK, ut CX ad AX. Itaque erit DK quadratum ad rectangulum FKG in ratione composita ex BX ad AX, & ex CX ad AX.

Jam duæ istæ rationes componunt pariter rationem, quam habet rectangulum BXC ad AX quadratum. Et igitur erit ex æquali, ut rectangulum BXC ad AX quadratum, ita DK quadratum ad rectangulum FKG. Sed DK
qua-

quadratum est ad rectangulum FKG, ut FO ad FG. Quare erit rursus ex æquali, ut FO ad FG, ita rectangulum BXC ad AX quadratum.

V. Atque hinc modo facile erit, *secto ex cono triangulo per axem, cruce, ope ejus, hyperbolum ex ipso cono, in qua parameter ad diametrum datam habeat rationem*. Sit enim BAC triangulum, per axem sectum, cujus ope hyperbola ex cono est eruenda. Ducatur in plano ejus recta AX, quæ conveniat cum BC ita quidem in X, ut rectangulum BXC ad AX quadratum sit in data illa ratione. Et quælibet hyperbola, quæ per triangulum BAC subinde eruitur ex cono, ut diameter ejus parallela fiat ipsi AX, quæsitæ conditionem adimplebit.

Neque vero difficile erit, adhibito triangulo BAC, talem ex cono hyperbolam erueri, quæ diametrum habeat, rectæ AX parallelam. Ducatur siquidem in plano ejus trianguli recta quævis FG, æquidistans ipsi AX, & conveniens cum BC in K. Agatur postea per punctum istud K in plano circuli BCD recta DE, eidem BC perpendicularis. Et planum, transiens per rectas FG, DE, hyperbolam, quam quærimus, in cono producet.

Hinc etiam, si hyperbolam, ex cono eruendam, talem esse oporteat, ut *data sit in ea, tam ratio parametri ad diametrum, quam ipsius diametri longitudo*; solvetur problema, si ducta, ut prius, recta AX ea lege, ut rectangulum BXC ad AX quadratum sit in data ratione; agatur deinde ita quidem FG, ut non

V.
Deducitur
hyperbola
ex cono, in
qua para-
metri ad
diametrum
data sit ra-
tio.

FIG. 10.

44 SECTIONUM CONICARUM

non modo sit parallela ipsi AX , sed etiam, ut portio ejus, trianguli lateribus comprehensa, datam diametri longitudinem adæquet.

VI.
Solutio, pro
blemati,
quod pro de-
ductione ejus
hyperbola
velut lemma
requiritur.

FIG. 11.

VI. Sed, ad *lemmaticum illud problema solvendum*, nimirum ad ducendam in plano trianguli BAC rectam illam AX ; neque etiam magnæ animi solertia opus est. Producat enim trianguli latus unum AC adeo quidem in M , ut CM ad AC datam illam rationem obtineat. Agatur postea per punctum M recta MN , ipsi BC parallela, quæ conveniat in N cum circumferentia circuli, triangulum ambientis. Et punctum istud N definit positionem ipsius AX .

Nam, propter circulum, rectangulum BXC est æquale rectangulo AXN . Sed rectangulum AXN est ad AX quadratum, ut NX ad AX , sive, ut CM ad AC . Quare ipsum quoque rectangulum BXC ad AX quadratum erit, ut CM ad AC : & propterea, quum CM sit ad AC in data ratione, erit pariter in eadem data ratione rectangulum BXC ad AX quadratum.

Sive autem data ratio sit minoris ad majus, sive majoris ad minus, recta illa AX non semper duci poterit. Hic enim punctum M numquam reperitur inter alia duo A , & C ; sed semper ad partem alteram ipsius C , proindeque, quæcumque sit ratio ipsius CM ad AC , semper fieri potest, ut recta MN , quæ ducitur per punctum M ipsi BC æquidistans, circuli circumferentiam non secet.

Unde etiam, si ex cono triangulum per axem secetur, & eruenda sit, ope ejus, hyperbola ex ipso cono, in qua parameter ad diametrum
da:

datam habeat rationem : problema poterit esse solutum. impossibile , non modo , quum ratio data est majoris ad minus ; verum etiam , quum eadem illa ratio est vicissim minoris ad majus.

VII. Etiam in hyperbola *magnitudo, quam habet diametri figura, per rectas, in cono ductas, nullo negotio potest definiri*. Manentibus namque omnibus , ut supra , ducantur ex utroque diametri vertice rectæ FR , GS, ipsi BC parallele , quæ convenient in punctis R , & S cum lateribus trianguli . Et rectangulum , sub his rectis comprehensum , diametri figuram adæquabit .

VII.
Figura, quæ
hyperbola
diametrum
pertinens,
magnitudo
per rectas, in
cono ductas,
definitur.
FIG. 10.

Nam rectangulum BKC, vel ei æquale quadratum ex DK, est ad rectangulum FKG in ratione composita ex BK ad FK, & ex CK ad GK. Sed BK est ad FK, ut GS ad FG; itemque CK est ad GK, ut FR ad FG. Itaque erit DK quadratum ad rectangulum FKG in ratione composita ex GS ad FG, & ex FR ad FG.

Et quoniam duæ istæ rationes componunt quoque rationem, quam habet rectangulum sub ipsis FR, GS ad FG quadratum; erit ex æquali, ut DK quadratum ad rectangulum FKG, ita rectangulum ex FR in GS ad FG quadratum. Unde, sicuti DK quadratum est ad rectangulum FKG, ut FO ad FG, sic erit rursus ex æquali, ut FO ad FG, ita rectangulum ex FR in GS ad FG quadratum.

Jam, assumpta communi altitudine FG, ut est FO ad FG, ita est rectangulum ex FO in FG ad idem FG quadratum. Et igitur rectangulum ex FR in GS æquale erit rectangulo ex

FO

46 SECTIONUM CONICARUM

FO in FG. Sed figura diametri constituitur per rectangulum ex FO in FG. Quare aliud illud rectangulum ex FR in GS præfatam diametri figuram adæquabit,

VIII.
Theoremata
pro determi-
natione pa-
rametri,
etiam igno-
rata diametri
vel longitu-
dine.

FIG. 10.

VIII. Ex eo autem, quod rectangulum sub ipsis FR, GS adæquet diametri figuram, quæ constituitur per rectangulum ex FO in FG, plura nobis derivantur theoremata, quorum ope, etiam ignorata diametri longitudine, definiri poterit parameter ejus in cono.

Nimirum primo FO erit ad FR, ut est BX ad AX. Nam, quum rectangulum ex FR in GS sit æquale rectangulo ex FO in FG; erit, ut FO ad FR, ita GS ad FG. Sed GS est ad FG, ut BX ad AX. Itaque erit ex æquali, ut FO ad FR, ita BX ad AX.

Secundo FO erit ad GS, ut est CX ad AX. Nam, ob eandem eorum rectangulorum æqualitatem, erit, ut FO ad GS, ita FR ad FG. Sed FR est ad FG in eadem ratione, quam habet CX ad AX. Quare erit ex æquali, ut FO ad GS, ita CX ad AX.

Tertio FO erit ad AF, ut est rectangulum CBX ad rectangulum BAX. Nam FO ad AF rationem habet compositam ex FO ad FR, & ex FR ad AF; sive etiam ex BX ad AX, & ex BC ad AB, Sed duæ istæ rationes componunt quoque rationem, quam habet rectangulum CBX ad rectangulum BAX. Itaque erit ex æquali, ut FO ad AF, ita rectangulum CBX ad rectangulum BAX.

Denique FO erit ad AG, ut est rectangulum BCX ad rectangulum CAX. Nam FO ad AG rationem habet compositam ex FO ad GS

GS, & ex GS ad AG; five etiam ex CX ad AX, & ex BC ad AC. Sed duæ istæ rationes componunt quoque rationem, quam habet rectangulum BCX ad rectangulum CAX. Quare erit ex æquali, ut FO ad AG, ita rectangulum BCX ad rectangulum CAX.

IX. Unoquoque horum theorematum *terminabitur parameter in cono, etiam diametri longitudine non cognita*. Sed determinationem omnium *simplicissimam* suppedit nobis ipsa illa proprietas, unde recensita fluunt theoremata. Fiat enim angulus FRV æqualis angulo AFG. Et portio FV, abscissa ex diametro FG per rectam RV, erit quæsitæ parametri longitudo.

IX.
Determinatio parametri simplicissima, & diametri longitudinis nullimode dependens.
FIG. 10.

Nam, ob æqualitatem eorum angulorum, erit, ut FR ad FV, ita FG ad GS. Unde rectangulum ex FR in GS æquale erit rectangulo ex FV in FG. Sed rectangulum ex FR in GS adæquat diametri figuram. Quocirca eidem figuræ erit etiam æquale rectangulum ex FV in FG: adeoque, quemadmodum unum ejus latus FG est ipsa diameter, ita latus alterum FV diametri parametrum adæquabit.

X. Idem problema *de determinanda parametro in cono, nulla habita ratione longitudinis diametri*, potest etiam resolvi in hunc modum.

X.
Alia ejusdem parametri determinatio nulla habita ratione longitudinis diametri.
FIG. 10.

Ex vertice coni A ducatur, tum recta AK perpendicularis ipsi BC, cum recta AH, perpendicularis diametro FG. Abscindatur deinde ex priore AK portio AI, æqualis alteri AH. Et recta MN, ducta per punctum I æ-

qui-

48 SECTIONUM CONICARUM
quidifanter ipsi BC, longitudinem parametři exhibebit.

Demissa etenim super AX perpendiculari BL, erit AK ad BL in ratione composita ex AK ad AI, & ex AI, seu AH ad BL. Sed AK est ad AI, ut BC ad MN; itemque AH est ad BL, ut AF ad AB, sive, ut FR ad BC. Itaque erit AK ad BL in ratione composita ex FR ad BC, & ex BC ad MN: proindeque, quum duæ istæ rationes componant pariter rationem, quam habet FR ad MN; erit ex æquali, ut AK ad BL, ita FR ad MN.

Et quoniam AK est ad BL, ut AX ad BX, sive etiam, ut FG ad GS; erit rursus ex æquali, ut FR ad MN, ita FG ad GS. Unde rectangulum ex FR in GS æquale erit rectangulo ex MN in FG. Sed rectangulum ex FR in GS adæquat diametři figuram. Quare eidem figuræ erit etiam æquale rectangulum ex MN in FG: & propterea, sicuti unum ejus latus FG est ipsa diameter, ita latus alterum MN diametři parametrum adæquabit.

C A P. VI.

Quæ sit parabolæ relate ad diametrum natura, aperitur.

I.
Parabolæ relate ad diametrum proprias proprietates.

I. **R**eliquum jam est, ut parabolæ relate ad diametrum naturam aperiamus. Primo igitur in ea, si binæ ad diametrum ordinatæ ducantur; erunt earum quadrata

ta

*ta inter se, quemadmodum sunt abscissæ, quæ
iis ordinatis correspondent.*

Fiat enim in cono ABC sectio parabolica FIG. 5.
DFE, & ad diametrum ejus FG, quæ uni la-
terum trianguli, per axem secti, debet esse pa-
rallela, ducantur duæ ordinatæ DK, HL.
Ostendendum est, DK quadratum esse ad HL
quadratum, quemadmodum est abscissa FK ad
abscissam FL.

In eodem cono fiant etiam circuli duo
BCD, MNH per plana, basi æquidistantia. Et
quoniam eorum diametris BC, MN insunt
ad rectos angulos rectæ DK, HL; erunt ista-
rum quadrata æqualia rectangulis BKC, MLN.
Itaque erit, ut DK quadratum ad HL qua-
dratum, ita rectangulum BKC ad rectangu-
lum MLN.

Jam, propter parallelas AC, FG, latera
horum rectangulorum CK, NL æqualia sunt
inter se. Quare ratio ipsorum æqualis erit ei,
quam habet latus BK ad latus ML. Sed BK
est ad ML, ut FK ad FL. Et igitur erit ex
æquali, ut DK quadratum ad HL quadratum,
ita FK ad FL.

II. Hinc, si ex vertice F ducatur recta FO,
ordinatis parallela, quæ sit talis longitudinis,
ut quadratum unius ordinatæ DK sit æquale
rectangulo correspondenti OFK; erit quadra-
tum cujusvis alterius ordinatæ HL æquale pa-
riter rectangulo OFL, quod ei correspondet.

II.
Proprietas
secunda, ex-
hibens dia-
metri para-
metrum, &
parabola deo
nominatio-
nem osten-
dens.

Ostensum est enim, DK quadratum esse
ad HL quadratum, ut est FK ad FL. Sed in
hac eadem ratione est etiam rectangulum OFK
ad rectangulum OFL. Quare erit ex æquali,

FIG. 5.

Tom. I.

D

ut

ut DK quadratum ad HL quadratum, ita rectangulum OFK ad rectangulum OFL : & propterea, sicuti ponitur DK quadratum æquale rectangulo OFK , ita HL quadratum rectangulo OFL pariter æquale erit.

Recta ista FO , quum nobis usui erit, diametri *parameter* appellabitur, quæ quidem in ea semper positione relate ad diametrum intelligi debet, ut sit ejus ordinatis parallela. Ipsius autem habita ratione, perspicuum est, id quidem parabolæ contingere, ut *quadratum cujusvis ordinata sit æquale rectangulo, quod sit ex parametro in abscissam correspondentem*. Nec sane alia de causâ, quam *ob æqualitatem istam*, sortita est hæc conica sectio parabolæ nomen.

III.
Theoremata
duo, pro de-
terminanda
in ipso cono
parametri
longitudine.
FIG. 12.

III. Cæterum, ad determinandam in ipso cono parametri longitudinem, usui nobis esse possunt theorematum duo, quæ sequuntur.

Primum est, quod, si ex vertice diametri F ducatur recta FR , ipsi BC parallela, FO sit ad FR , ut est FR ad AR , sive etiam, ut est BC ad AC . Nam idem DK quadratum æquale est, tum rectangulo BKC , propter circulum, cum rectangulo OFK , propter parabolam. Quare duo ista rectangula BKC , OFK æqualia erunt inter se: & propterea erit, ut BK ad FK , ita FO ad CK , seu FR . Sed BK est ad FK , ut FR ad AR , sive, ut BC ad AC . Itaque erit ex æquali, ut FO ad FR , ita FR ad AR , vel ita BC ad AC .

Alterum theorema est, quod FO sit ad AF , ut est BC quadratum ad rectangulum BAC . Nam FO est ad AF in ratione compo-
sita

sita ex FO ad FR, & ex FR ad AF; sive etiam ex BC ad AC, & ex BC ad AB. Sed duæ istæ rationes componunt quoque rationem, quam habet BC quadratum ad rectangulum BAC. Itaque erit ex æquali, ut FO ad AF, ita BC quadratum ad rectangulum BAC.

IV. Utroque horum theorematum *determinabitur in ipso cono longitudo parametri*. Speciatim vero ex theoremate primo suboritur vobis determinatio ista, valde *simplex*, ac *elegans*. Nimirum ad punctum R fiat angulus FRV, æqualis angulo BFG, sive BAC. Et portio FV, abscissa ex diametro FG per rectam RV, erit quæsitæ parametri longitudo.

Nam, ob angulos illos æquales, erit, ut FV ad FR, ita BC ad AC. Sed ex primo theoremate BC est ad AC, ut FO ad FR. Itaque erit ex æquali, ut FV ad FR, ita FO ad eandem FR: & propterea FV ipsi FO æqualis erit.

V. Idem problema, *de determinanda in cono longitudine parametri*, resolvi quoque potest in hunc modum.

Ex vertice conj A ducatur, tum recta AK, perpendicularis ipsi BC, cum recta AH, perpendicularis diametro FG. Abseindatur deinde ex priore AK portio AI, æqualis alteri AH. Et recta MN, ducta per punctum I æquidistanter ipsi BC, longitudinem parametri exhibebit.

Demissa enim super AC perpendiculari BL, erit AK ad BL in ratione composita ex AK ad AI, & ex AI, seu AH ad BL. Sed AK est ad AI, ut BC ad MN; itemque AH

D 2

est

IV.

Modus simplex, & elegans determinandi longitudinem parametri in cono.

FIG. 12.

V.

Alter modus determinandi in cono parametri longitudinem.

FIG. 12.

52 SECTIONUM CONICARUM
est ad BL, ut AF ad AB, five etiam, ut FR
ad BC. Itaque erit AK ad BL in ratione com-
posita ex FR ad BC, & ex BC ad MN.

Jam duæ istæ rationes componunt pariter
rationem, quam habet FR ad MN. Itaque
erit ex æquali, ut AK ad BL, ita FR ad MN.
Sed AK est ad BL, ut AC ad BC, five ex pri-
mo theoremate, ut FR ad FO. Quare erit
rursus ex æquali, ut FR ad MN, ita FR ad
FO: proindeque duæ MN, FO æquales erunt
inter se.

VI.
*Deductio
parabolæ ex
cono, cujus
diametri
datam para-
metrum ha-
beat.*

VI. Quemadmodum autem, facta in cono
sektionē parabolica, determinari potest in ipso
cono parameter, ad ejus diametrum pertinens;
sic vicissim, scito ex cono triangulo per axem, li-
cebit, ope ejus, eruere parabolam ex ipso cono,
cujus diametri datam parametrum habeat.

FIG. 12.

Sit enim BAC triangulum, per axem se-
ctum, cujus ope parabola ex cono est eruenda.
Abscindatur ex basi ejus BC portio CK talis
longitudinis, ut data parameter sit ad eam, ve-
luti est BC ad AC. Tum per punctum K aga-
tur, tam in plano trianguli BAC recta FG,
ipsi AC parallela, quam in plano circuli BCD
recta DE, alteri BC normalis. Et planum, trans-
iens per binas istas rectas FG, DE, quæsitam
in cono parabolam producet.

Nam, quum planum istud occurrat pla-
no circuli BCD in recta DE, ipsi BC normalis
erit FG ortæ sektionis conicæ diametri. Sed
ex constructione FG est parallela lateri AC.
Quare ipsa sektionē DFE parabola erit. Deinde,
ducta ex vertice diametri F recta PR æquidi-
stanter ipsi BC; erit diametri ejus parameter
ad

ad rectam istam FR, ut BC ad AC. Sed in eadem ratione est etiam ex constructione parameter data ad portionem CK, quæ ipsi FR est æqualis. Itaque parameter diametri FG erit ipsa parameter data.

VII. Sed videamus modo, qua ratione *proprietates ellipsis, & hyperbolæ vertantur in eas, quæ parabolæ competunt, ubi earum curvarum diameter infinitæ longitudinis fieri supponitur.*

VII.
*Qua ratio-
ne proprie-
tates para-
bolæ ex his,
quæ ellipsis
& hyperbo-
læ competen-
t, sans
deducenda.*
FIG. 5.
6. 7.

Nimirum primo, tam in ellipsi, quam in hyperbola est, ut DK quadratum ad HL quadratum, ita rectangulum FKG ad rectangulum FLG. Jam, abeunte in infinitum puncto G, altero diametri vertice, rectæ duæ KG, LG fiunt longitudinis infinitæ; adeoque, quum differant a se mutuo per finitam longitudinem KL, sumi poterunt velut æquales inter se. Unde erit rectangulum FKG ad rectangulum FLG, ut est FK ad FL: & propterea in hac eadem ratione erit pariter in parabola DK quadratum ad HL quadratum.

Deinde in utraque etiam earum curvarum quadratum cuiusvis ordinatæ DK est ad rectangulum ei correspondens FKG, ut parameter FO ad diametrum FG; sive, assumpta communi altitudine FK, ut rectangulum OFK ad rectangulum KFG. Sed, abeunte in infinitum puncto G, rectæ duæ KG, FG fiunt æquales; atque adeo æqualia pariter rectangula FKG, KFG. Quare in parabola etiam DK quadratum æquale fiet rectangulo OFK.

Id ipsum consequitur quoque ex tertia earum curvarum proprietate, juxta quam

D 3

DK

54 SECTIONUM CONICARUM

DK quadratum est æquale rectangulo FKR. Nam, quotiescumque in infinitum abit punctum G, rectæ duæ FG, OG fiunt parallelæ. Unde trapezium OFKR vertitur in parallelogrammum; atque adeo latera ejus opposita FO, KR evadunt æqualia. Quo fit, ut rectangulum OFK sit æquale rectangulo FKR; & consequenter, ut DK quadratum, velut æquale rectangulo FKR, adæquet quoque rectangulum OFK.

VIII.
*Offenditur
eodem ratio-
ne, quod si ef-
se debeat in
parabola, illi
ratio param-
etri ad
diametrum,
cum figura
invenienda.*

VIII. Ulterius in parabola, quum parameter sit finita, diameter autem infinitæ longitudinis, ratio parametri ad diametrum debet esse infinite parva. Profecto autem finita illa ratio, quam vidimus superius obtinere in ellipsi, & hyperbola, talis evadit, quotiescumque in iis curvis alter diametri vertex G in infinitum abire supponitur.

FIG. 8.
10. 12. Nam, quum in hac hypothefi duæ FG, AC parallelæ fiant inter se; recta AX, quæ ducitur per punctum A ipsi FG æquidistans, cadet super AC. Quare, evanescente portione CX, evanescet pariter rectangulum BXC; & consequenter ratio ejus rectanguli ad AX quadratum, cui in ellipsi, & hyperbola ostensa est æqualis ratio parametri ad diametrum, infinite parva prodibit.

Præterea, si figura diametri considerari velit etiam in parabola, eam, ob infinitam diametri longitudinem, infinitæ magnitudinis esse, oportebit. Plane vero infinita prodibit, si ex magnitudine, quam habet in ellipsi, & hyperbola, volupe sit, illam eruere.

Enim vero in utraque earum curvarum
exhi-

exhibet figuræ magnitudinem rectangulum ex FR in GS. Sed, abeunte in infinitum puncto G, altero diametri vertice, recta GS evadit infinita. Quare, quum infinitum quoque fiat rectangulum ex FR in GS; ipsa figuræ magnitudo infinita pariter evadet.

IX. Methodo non dissimili possunt etiam demonstrari duo illa theoremata, quibus describitur in cono parameter, ad parabole diametrum pertinens.

Ex eo enim, quod tum in ellipsi, cum in hyperbola rectangulum ex FR in GS sit æquale rectangulo ex FO in FG, quod constituit diametri figuram; erit in iisdem curvis, ut FO ad FR, ita GS ad FG. Quamquam vero utraque rectarum GS, FG infinita evadat, quotiescumque punctum G in infinitum abire supponitur; ratio tamen ipsarum vertitur in eam, quam habet FR ad AR, sive BC ad AC, eo quod fiat FG ipsi AC parallela. Unde erit in parabola, ut FO ad FR, ita FR ad AR, vel ita BC ad AB, prorsus ut supra.

Sed hoc idem luculentius consequitur ex eo, quod tam in ellipsi, quam in hyperbola FO sit ad FR, ut est BX ad AX. Jam enim vidimus paulo ante, quod, abeunte in infinitum puncto G, non modo FG parallela fiat ipsi AC, sed & AX coincidat cum eadem AC. Inde igitur liquet, duas BX, AX ipsis BC, AC seorsim æquales evadere: & propterea, sicuti in ellipsi, & hyperbola FO est ad FR, ut BX ad AX; sic in parabola FO erit ad FR, ut est BC ad AC.

Quemadmodum autem, quum punctum
D 4 C in

IX.
Theoremata
duo, pro de-
terminanda
in cono pa-
rametri lon-
gitudine, ean-
dem metho-
do compro-
bantur
FIG. 8.
10. 12.

56 SECTIONUM CONICARUM

G in infinitum abire supponitur, duæ BX, AX fiunt ipsis BC, AC seorsim æquales; sic in eadem hypothefi rectangulum CBX idem fiet cum BC quadrato, & rectangulum BAX vertetur in illud, quod fit ex AB in AC. Unde, sicuti in ellipsi, & hyperbola FO est ad AF, ut rectangulum CBX ad rectangulum BAX; sic in parabola FO erit ad AF, ut est BC quadratum ad rectangulum BAC, prorsus etiam ut supra.

X. Tam in ellipsi, quam in hyperbola, pro determinanda parametri longitudine independenter ab ipsa diametro, duo alia theoremata sese nobis obtulere. Primum est, quod FO sit ad GS, veluti est CX ad AX. Alterum, quod FO sit ad AG, veluti est rectangulum BCX ad rectangulum CAX. Jam, abeunte in infinitum puncto G, fit infinitæ longitudinis, tam recta GS, quam recta AG. Unde in parabola parameter diametri ad utramque earum rectarum rationem infinite parvam debet habere.

Plane vero, tum ratio, quam habet CX ad AX, cum ratio rectanguli BCX ad rectangulum CAX, talis evadit, ubi punctum G in infinitum abire supponitur. Nam in eo casu AX coincidit cum AC; adeoque, punctis C, & X in unum cocuntibus, fit indefinitæ parvitatæ, quin omnino evanescit, non modo recta CX, verum etiam rectangulum BCX: finitis interea manentibus, & recta AX, quæ evadit AC, & rectangulo CAX, quod vertitur in AC quadratum.

X.
*Applicatio
eiusdem me-
thodi ad alia
duo theore-
mata, qua
in ellipsi, &
hyperbola
eundem usum
respon-
dunt.*

FIG. 8.
10. 12.

LIBER II.

*De Sectionum Conicarum in
Plano Descriptione.*

Superiore libro vidimus, quo pacto curvæ illæ, quæ conicæ sectiones appellantur, suam ex cono originem trahant. Nunc, qua ratione eædem curvæ possint in plano describi, sequitur, ut ostendamus. Sane Veteres non aliter, quam cono rursus adhibito, id obtinebant. Unde earum in plano descriptionem, velut arduum, & difficile quidpiam, reputabant. Sed Recentiores, nullius solidi ope, per solas linearum longitudines, eas describere docent. Quo fit, ut descriptio illarum in plano nullis hodie difficultatibus obnoxia deprehendatur.

CAP. I.

*Qua ratione ellipsis in plano per
conum describi possit,
ostenditur.*

I. **E**T si Veteres, ad describendas in plano conicas sectiones, rursus conum adhibuerint; rem tamen non ea *universalitate* tradiderunt, quæ ei inesse videtur.

Ne

^{L.}
*Quæ data
requiruntur
pro descri-
ptione se-
ctionum co-
nicarum.*

§3 SECTIONUM CONICARUM

Ne igitur in eandem *labem* nos etiam incidamus, conabimur, curvas illas ita quidem, mediante cono, in plano describere, ut ratio eas hoc pacto describendi non excidat *universalitate* illa, quam natura sua secum includit.

Quæcumque autem sit conica sectio, quam oportet in plano describere, utique ad eam *determinandam* quatuor requiruntur. Horum prius est positio diametri. Alterum est ipsius longitudo, quæ sicuti finita in ellipsi, & hyperbola, sic in parabola infinita semper esse debet. Tertium est parameter ejusdem diametri. Et quartum denique est positio suarum ordinarum.

Hinc, in tradenda descriptione sectionum conicarum, quatuor ista *nota* semper assumemus. Speciatim vero, quod attinet ad positionem ordinarum, exhibebimus eam per eandem illam, quam parametro concedimus; ut quæ diametri ordinatis parallela semper concipi debet. Unde hac ratione *determinabimus* sectionem conicam describendam, dando magnitudine, & positione, tam diametrum, quam parametrum ejus.

II.
Proponitur
methodus
describendi
ellipsim in
plano per
conum.

FIG. 8.

II. Ut igitur a *descriptione ellipsis* ordiamur, dentur in plano aliquo, tum magnitudine, cum positione rectæ duæ FG, FO, sibi mutuo occurrentes in F. Et oporteat, in eodem plano describere ellipsim, cujus FG sit diameter, FO parameter diametri, & eadem FO recta illa, cui omnes diametri ordinatæ debent esse parallelæ.

Ducatur primo planum aliud CDE, occurrens plano rectarum FG, FO in rectu DE,
ipsi

ipsi FO parallela. Deinde ex puncto K, in quo duæ FG, DE sese mutuo secant, erigatur in ducto plano recta KC, perpendicularis super DE. Tum huic KC per punctum F, diametri verticem unum, parallela agatur FP.

Capiatur porro in recta ista FP punctum quodvis R. Et ducta RY æquidistanter ipsi GF, abscindatur ex ea portio RZ, quæ sit tertia proportionalis post duas FO, FR. Denique jungantur rectæ FZ, GR, quæ producantur, usque donec conveniant, tam inter se in puncto A, quam cum recta KC in punctis B, & C.

His peractis, concipiatur jam conus, cuius vertex sit punctum A, basis autem circulus BCD, descriptus super BC, velut diametro, in plano rectarum BC, DE. Et per intersectionem conij hujus cum plano, in quo datæ sunt rectæ FG, FO, habebitur ellipsis describenda.

III. Sit enim DFE sectio, facta per tale planum in conij ejus superficie. Et quoniam BC est diameter basis BCD; erit triangulum BAC ex cono sectum per axem. Unde, quum basi ejus BC normalis sit recta DE, in qua planum secans occurrit plano basis; erit recta FG diameter sectionis DFE: & propterea, quia eadem FG secat utrumque latus trianguli infra verticem conij; ipsa sectio DFE proculdubio erit ellipsis.

Præterea in eadem sectione DFE ordinatæ, pertinentes ad ejus diametrum FG, debent esse parallele rectæ DE. S d ex constructione recta DE parallela est rectæ FO.

Qua-

III.
*Quod ellipsis, allata
methodo descripta, qua-
sita conditio-
nem adim-
piat.*
FIG. 8.

Quare eædem ordinatæ parallelæ quoque erunt ipsi FO : proindeque , sicuti ellipsis DFE , descriptæ in plano rectarum FG , FO , diameter est recta FG , sic ordinatæ ejus diametri parallelæ erunt recta FO .

Denique ex vertice coni A ducatur recta AX , ipsi FG parallela , quæ conveniat cum BC , producta , in X . Et ex superius ostensis parameter , quæ ad descriptæ ellipsis diametrum refertur , erit ad FR , ut est BX ad AX . Sed BX est ad AX , ut FR ad RZ , sive etiam ex constructione , ut FO ad FR : Quare erit ex æquali , ut FO ad FR , ita parameter diametri FG ad eandem FR : & propterea erit FO ipsa diametri parameter ,

IV.
Ejusdem
methodi
universalitas
ex infinitate
conorum ,
quæ supple-
re , ostendi-
tur.

FIG. 8.

IV. Dubitari itaque non potest , quin ellipsis DFE , descripta in plano rectarum FG , FO methodo tradita , quæsitæ conditiones adimpleat . Primo enim diameter ejus est recta FG ; deinde diametri parameter est recta FO ; denique eidem FO parallelæ sunt etiam ordinatæ , quæ ad diametrum illam referuntur . Sed perspicuum est quoque , methodum a nobis adhibitam , pro descriptione ejus ellipsis , esse adeo *universalem* , ut non unum , sed *infinitos* conos ad eum usum exhibeat .

Nam primo planum CDE duci potest infinitis plane modis . Et si enim plano rectarum FG , FO occurrere debeat in recta DE , ipsi FO parallela ; id tamen positionem ejus minime determinat . Deinde punctum R utcumque sumi potest in recta FP . Quo fit , ut longitudo ipsius FR adhuc modis innumeris possit variari . Utroque igitur ex capite liquet , *in-*
fini-

finitam esse diversitatem conorum, quorum ope quæsitam ellipsim describere licebit.

Quemadmodum autem ex positione plani CDE dependet magnitudo anguli GFR, sic ex longitudine ipsius FR trahit angulus FGR magnitudinem suam. Unde, quia per quantitates istorum angulorum determinatur triangulum FRG; perspicuum est, infinitam illam conorum diversitatem, qui adhiberi possunt, ad quæsitam ellipsim describendam, ex eo unice proficisci, quod possit triangulum FRG infinitis plane modis variari.

V. Quamquam vero *infiniti* sint coni, quibus quæsitam ellipsim describere licet, ii tamen sunt omnes *scaleni*, quum angulus GFO non ponitur rectus. Ubi enim triangulum, ex cono sectum per axem, non constituit cum plano basis angulos rectos; proculdubio conum ipsum scalenum esse oportet. Profecto autem facile erit ostendere, triangulum BAC, sectum ex cono per axem, non posse cum plano basis BCD rectos angulos constituere, quum angulus GFO nequaquam est rectus.

Nam, quotiescumque FO non constituit cum FG angulos rectos; tam ipsa, quam ejus parallela DE multo minus rectos angulos efficiet cum plano trianguli BAC, in quo recta FG reperitur. Ex constructione autem DE perpendicularis est super BC, quæ duorum planorum BAC, BCD communis est sectio. Quare, quum eadem DE sit in plano BCD, nec etiam duo ista plana BAC, BCD recta erunt ad invicem.

Idem vero coni poterunt esse, tum recti,
cum

V.
Cujusmodi
va sunt infi-
niti illi co-
ni, quos me-
thodus præ-
bet, aperit-
tur.

FIG. 8.

62 SECTIONUM CONICARUM

cum *scaleni*, quotiescumque angulus GFO ponitur rectus. Nam, constituyente FO , vel etiam ejus parallela DE , rectos angulos cum FG ; erit DE normalis utrique rectarum FG , BC : proindeque, tam ipsa DE recta erit ad planum trianguli BAC , quam duo plana BAC , BCD recta erunt ad invicem. Unde, si triangulum BAC fuerit isosceles, erit axis conii rectus etiam ad planum basis BCD ; & consequenter ipse pariter conus erit rectus, & non scalenus.

VI. Hinc, ad definiendum casum conii re-
cti, non abs re erit, inquirere hoc loco, quid
factu sit opus, quo triangulum BAC isosce-
les oriatur. Nimirum necesse est, sumere FR
talis longitudinis, ut GR quadratum, adscen-
dens diametri figuram, ejusdem diametri qua-
dratum adæquet; hoc est, ducta per alterum
diametri verticem G recta GS , ipsi FR paral-
lela, ut GR quadratum una cum rectangulo
ex FR in GS sit æquale quadrato, quod sit ex
diametro FG .

VI.

Quid requi-
ritur, ut
triangulum
per axem fo-
rum, isosce-
les oriatur.

FIG. 8.

Ponamus enim, triangulum BAC isosceles esse. Et quoniam, completo parallelogrammo $FSGP$, sit etiam isosceles triangulum PGR ; secabitur basis hujus PR bifariam a perpendicularo, quod super ipsam demittitur ex puncto G : proindeque quadrata GR , FR una cum rectangulo PRF æqualia erunt quadrato ex FG . Sed quadratum ex FR una cum rectangulo PRF est æquale rectangulo PFR , five etiam ei, quod sub ipsis FR , GS continetur. Itaque erit quadratum ex GR una cum rectangulo ex FR in GS æquale quadrato,

to, quod fit ex diametro FG.

Id quum ita sit, perspicuum est, triangulum BAC tunc demum isosceles esse posse, quum ratio parametri ad diametrum est minoris ad majus. Nam in isto casu figura diametri, quæ constituitur per rectangulum ex FO in FG, minor erit quadrato ipsius diametri FG; adeoque fieri quandoque poterit, ut GR quadratum, adsciscens diametri figuram, ejusdem diametri quadratum adæquet.

Nec saue, quum isosceles est triangulum BAC, ratio parametri ad diametrum aliter esse potest. Sit enim AK axis coni. Et, ob basim trianguli BC bisectam in K, erit rectangulum BXC minus quadrato ex KX; adeoque multo minus quadrato, quod fit ex AX. Sed ex superius ostensis FO est ad FG, ut rectangulum BXC ad AX quadratum. Itaque ratio ipsius FO ad FG erit minoris ad majus.

VII. Sit jam ratio parametri FO ad diametrum FG minoris ad majus. Et oporteat, quæsitam ellipsim ita quidem, mediante cono, in plano describere, ut triangulum BAC isosceles oriatur; rectusque adeo ipse conus, quotiescumque angulus GFO ponitur rectus.

VII.
*Quid metho-
do ad-
dendum, ut
triangulum,
per axem se-
ctum, reuera
isosceles fiat.*
FIG. 8.

Describatur super FG, velut diametro, semicirculus FQG; in quo aptetur recta FQ, quæ sit media proportionalis inter FO, & FG. Jungatur deinde GQ; & arcus, descriptus centro G, intervalloque GQ, signabit in FP punctum illud R, quo opus est, ut triangulum BAC fiat isosceles.

Quum enim FQ sit media proportionalis inter FO, & FG; erit quadratum ex FQ æqua-

64 SECTIONUM CONICARUM

quale rectangulo OFG, quod constituit diametri figuram. Sed quadratum ex GR, seu GQ una cum quadrato ex FQ est æquale FG quadrato. Quare idem GR quadratum, adificiens diametri figuram, æquale erit quadrato ejusdem diametri: proindeque, ex mox ostensis, triangulum BAC isosceles erit.

Patet autem, triangulum BAC tunc demum isosceles esse posse, quum angulus GFR non est major angulo GFQ. Nam, existente majore, perpendicularis, quæ ex puncto G demittitur super FP, major itidem erit recta GQ. Quare arcus, qui describitur centro G, intervalloque GQ, rectæ FP nequaquam occurret. Ut igitur problema sit capax solutionis, necesse est, planum CDE ita quidem inclinare ad planum rectarum FG, FO, ut angulus GFR non major oriatur angulo GFQ.

Quemadmodum vero, quum angulus GFR major est angulo GFQ, arcus, qui describitur centro G, intervalloque GQ, rectæ FP nequaquam occurrat; sic idem arcus continget rectam FP in unico puncto, quum angulus GFR æqualis est angulo GFQ; eamque secabit in duobus punctis, quum vicissim est minor. Unde, sicuti problema est impossibile in primo casu, sic erit capax unius dumtaxat solutionis in secundo, & duarum in tertio.

VIII.

Alia methodus describendi ellipticum in plano per conum in modum offertur.

VIII. Cæterum problema principale, *de describenda ellipti in plano per conum*, potest etiam resolvi in hunc modum.

Nimirum, datis ut supra rectis FG, FO, fiat eadem constructio, usque donec deventum

FIG. 8. fuerit ad punctum R, utcumque sumendum in

in recta FP. Abfcindatur postea ex diametro FG, producta, si opus, portio FV, æqualis parametro FO. Tum juncta RV, fiat angulus GFS, æqualis angulo FRV.

Producantur deinde rectæ duæ GR, SF, usque donec sibi mutuo occurrant in A, cum quibus conveniat quoque recta KC in punctis B, & C. Jamque, si conus concipiatur, cujus vertex sit punctum A, basis autem circulus BCD, descriptus super BC, velut diametro, in plano rectarum BC, DE; habebitur ellipsis describenda per intersectionem conij hujus cum plano, in quo datæ sunt rectæ FG, FO.

Ducatur etenim ex puncto R recta RZ, diametro GF parallela, quæ conveniat cum AF in Z. Et siquidem ostendi possit, FO esse ad FR, ut est FR ad RZ; jam hæc alia solutio coincidat cum priore, nec adeo de veritate ejus poterit dubitari. Id vero ostendetur hac ratione.

Ex constructione angulus GFS æqualis est angulo FRV. Sed, propter parallelas GF, RZ, idem angulus GFS æqualis est etiam angulo RZF. Quare duo anguli FRV, RZF æquales erunt inter se: & propterea erit, ut FV ad FR, ita FR ad RZ. Est autem ex constructione FV æqualis FO. Et igitur etiam FO erit ad FR, ut est FR ad RZ.

IX. Atque hinc rursus patet, triangulum BAC tunc demum isosceles esse posse, quum parameter FO minor est diametro FG. Ubi enim isosceles est triangulum BAC, erit etiam isosceles triangulum FAR: proindeque duo

Tom. I.

E

an.

IX.
*Quomodo in
hac alia me-
thodo trian-
gulum, per
axem se-
ctum, orbi
possit isosce-
les.*
FIG. 8.

66 SECTIONUM CONICARUM
 anguli GRF, RFS æquales erunt inter se. Sed
 ex constructione æquales sunt etiam anguli
 FRV, GFS. Quare, sicuti angulus RFS ma-
 jor est angulo GFS, ita quoque erit angulus
 GRF major angulo FRV : & propterea erit
 FG major, quam FV, seu FO.

Patet etiam, non posse triangulum BAC
 isosceles esse, nisi FR sit talis longitudinis, ut
 GR quadratum, adsciscens diametri figuram,
 ejusdem diametri quadratum adæquet. Nam,
 quum æquales sint, tam anguli GRF, RFS,
 quam anguli FRV, GFS; erit quoque angu-
 lus GRV æqualis angulo GFR. Unde, quum
 sit, ut FG ad GR, ita GR ad GV; erit GR
 quadratum æquale rectangulo FGV.

Et quoniam ex constructione FO est æ-
 qualis FV; erit etiam rectangulum OFG,
 quod constituit diametri figuram, æquale re-
 ctangulo GFV. Quare erit GR quadratum
 una cum diametri figura æquale duobus re-
 ctangulis FGV, GFV. Sunt autem duo ista
 rectangula æqualia quadrato ipsius diametri
 FG. Itaque erit GR quadratum una cum dia-
 metri figura æquale ei, quod ex ipsa diametro
 describitur, quadrato.

Ex eo autem, quod duo anguli GRV,
 GFR sint etiam æquales inter se, quum iso-
 sceles est triangulum BAC, alia nobis subna-
 scitur ratio describendi quæsitam ellipsim ita
 quidem, mediante cono, ut triangulum BAC
 isosceles oriatur. Nimirum, si abscissa ex dia-
 metro FG portione FV, ipsi FO æquali, de-
 scribatur super GV portio circuli, quæ susci-
 piat angulum, æqualem angulo GFR; quan-
 do

doquidem portio ista signabit in FP punctum illud R, quo opus est, ut triangulum BAC isosceles fiat.

X. Sed nolim hic silentio præterire, quod in utraque solutione problematis principalis, si punctum R ita quidem sumptum fuerit in recta FP, ut portio FR fiat media proportionalis inter diametrum FG, & ejus parametrum FO; tunc punctum A abeat in infinitum, propter rectas FZ, GR, quæ in isto casu fiunt inter se mutuo parallelæ.

X.
Conus, quo
describitur
ellipsi,
quandoque
in cylin-
dram verti
potest

FIG. 8.

Nam in prima solutione FR est media proportionalis inter FO, & RZ. Unde, semper ac eadem FR est quoque media proportionalis inter FO, & FG; dum RZ, FG æquales erunt inter se. Sed eadem RZ, FG sunt etiam ex constructione parallelæ. Quare erunt pariter æquales, & parallelæ rectæ FZ, GR, quæ illas conjungunt ad easdem partes: & propterea punctum A, in quo eæ conveniunt, in infinitum abibit.

In secunda vero solutione FO est æqualis FV. Unde, semper ac FR est media proportionalis inter FO, & FG; erit quoque, ut FV ad FR, ita FR ad FG, atque adeo angulus FRV æqualis erit angulo FGR. Ex constructione autem idem angulus FRV æqualis est etiam angulo GFS. Quare duo anguli FGR, GFS æquales erunt inter se: & consequenter, quum rectæ GR, FS fiant æquidistantes, punctum A, in quo eæ conveniunt, in infinitum abibit.

Huc adde, quod si per alterum diametri verticem G ducatur recta GS, ipsi FR paralle-

68 SECTIONUM CONICARUM

Is, rectangulum ex FR in GS æquale erit diametri figuræ, quæ constituitur per rectangulum OFG. Unde, semper ac FR est media proportionalis inter FO, & FG; erit quadratum ejus æquale rectangulo OFG, atque adeo æquale ei, quod fit ex FR in GS. Hinc erit FR non solum parallela, sed æqualis pariter ipsi GS; & propterea duæ GR, FS, quæ illas conjungunt ad easdem partes, erunt etiam æquales, & parallele.

Jam, quum punctum A abit in infinitum, ipse conus vertitur in cylindrum. Unde describetur quæsitæ ellipsis in plano, non quidem mediante cono, sed adhibito cylindro. Et quidem ipsi Veteres norunt, ellipsim non solum ex cono, sed etiam ex cylindro erui posse. Nescio autem, num genuinam hujus rei rationem, quæ nobis inopinato sese obtulit, exploratam habuerint. Nimirum id evenit, quia cylindrus haberi debet tamquam conus, cujus vertex in infinita a basi distantia reperitur.

XI.
Quomodo
de sectionibus
cylindricis
ex iis, quæ
in cono
sunt, dis-
tinguendum.

FIG. 13.

XI. Quod quum ita sit, poterit de sectionibus cylindricis ex iis, quæ in cono sunt, judicium ferri. Sit ergo cylindrus BCNM duobus circulis parallelis, & æqualibus BCD, MNY utraque ex parte terminatus. Sitque etiam AK axis ipsius cylindri, hoc est recta, quæ eorum circulorum centra conjungit.

Secetur primo cylindrus iste plano, vel transeunte per axem AK, vel ei parallelo. Et quoniam hujusmodi sectio correspondet ei, quæ in cono fit plano per verticem; orientur in superficie cylindri binæ rectæ, tum inter se,

se, cum eidem axi parallela; eritque adeo parallelogrammum communis sectio ipsius cylindri cum plano prædicto.

Secetur secundo idem cylindrus plano; quod etsi non transeat per axem ejus, cum illo tamen conveniat. Et quoniam sectio ista æquivalet ei, quæ in cono fit plano, non transeunte per verticem; oriatur in superficie cylindri linea undique curva: quæ etiam redibit in orbem, & spatium claudet; quum nequeat planum secans convenire cum axe cylindri, nisi idem planum utrinque etiam ex cylindro ipso egrediatur.

Perinde autem, ac in cono, curva ista erit circumferentia circuli, quotiescumque planum secans basi ipsius cylindri est parallelum. Et, si idem cylindrus sit scalenus, ac secto ex eo parallelogrammo per axem BCNM, fuerit ei rectum, tam planum basis BCD, quam planum sectionis FGH, itemque angulus BCN æqualis angulo GFM, & angulus CBM æqualis angulo FGN; adhuc sectio circulus erit, ut quæ sectioni subcontrariæ cono scaleni correspondet.

Per contrarium sectio cylindri erit semper ellipsis, quum nec est basi parallela, nec eidem subcontraria. Et siquidem planum secans DFE occurrat plano basis, aut circuli æquidistantis BCD in recta DE, quæ sit perpendicularis ad basim parallelogrammi BCNM; secti ex cylindro per axem; erit diameter ipsius ellipsis recta FG, quæ duorum planorum BCNM, DFE communis est sectio; & erunt ejus diametri ordinatæ rectæ omnes,

E 3

quæ

FIG. 14:

quæ ipsi DE sunt parallelæ.

Sit jam FO parameter diametri FG . Et adhuc per rectas, in cylindro ductas, defini-ri poterit ratio parametri ad diametrum. Nam, sumpto in axe cylindri AK puncto quovis A , si ducatur ex eo recta AX , ipsi FG parallela, quæ conveniat cum BC , producta, in puncto X , & cum lateribus parallelogrammi BM , CN in punctis P , & Q ; erit, ut parameter FO ad diametrum FG , ita rectangulum BXC ad rectangulum PXQ .

Sed, ductis ex utroque diametri vertice rectis FR , GS , ipsi BC parallelis; etiam in cylindro continebunt ex rectangulum, quod diametri figuram adæquat. Interim, quum, ratione parallelogrammi $FRGS$, rectæ illæ FR , GS sint æquales, tum inter se, cum ipsi BC ; rectangulum, sub iisdem contentum, idem erit, ac BC quadratum: proindeque magnitudo, quam habet in ellipsi diametri figura, exhiberi poterit in cylindro per quadratum, quod sit ex BC .

Denique, si fiat angulus FRV æqualis angulo BFG ; portio FV , abscissa ex diametro FG per rectam RV , etiam in cylindro parametri longitudinem exhibebit. Nec silentio reticendum, quod in cylindro parallelogrammum $BCNM$ nequeat esse rectangulum, nisi FR , aut ei æqualis BC , sit talis magnitudinis, ut GR quadratum, adsciscens diametri figuram, ejusdem diametri quadratum adæquet.

CAP.

C A P. II.

*Ratio describendi hyperbolam
in plano per conum, ex-
plicatur.*

I. **O** Stenfo, qua ratione describi pos-
sit ellipsis in plano per conum; vi-
deamus modo, *quo pacto per eundem conum*
hyperbola in plano sit describenda. Dentur
itaque in plano aliquo, tum magnitudine, I.
Proprietas
methodus
describendi
hyperbolam
in plano per
conum. **FIG. 10,**
cum positione rectæ duæ FG, FO, sibi mu-
tuo occurrentes in F. Et oporteat, in eodem
plano describere hyperbolam, cujus FG sit
diameter, FO parameter diametri, & eadem
FO recta illa, cui omnes diametri ordinatæ
debent esse parallelæ.

Ducatur primo planum aliud CDE, oc-
currens plano rectarum FG, FO in recta DE,
ipsi FO parallela. Deinde ex puncto K, in
quo duæ FG, DE sese mutuo secant, eriga-
tur in ducto plano recta KC, perpendicularis
super DE. Tum huic KC per punctum F,
diametri verticem unum, parallela agatur FP.

Capiatur porro in recta ista FP pun-
ctum quodvis R. Et ducta RY æquidistanter
ipsi FG, abscindatur ex ea portio RZ, quæ
sit tertia proportionalis post duas FO, FR.
Denique jungantur rectæ FZ, GR, quæ sic-
uti sibi mutuo occurrunt in puncto A, sic pro-
ducantur, usque donec convenient cum re-

72 SECTIONUM CONICARUM
 Et KC in punctis B, & C.

His peractis, concipiatur jam conus, cu-
 jus vertex sit punctum A, basis autem circu-
 lus BCD, descriptus super BC, velut diame-
 tro, in plano rectarum BC, DE. Et per Inter-
 sectionem conij hujus cum plano, in quo datæ
 sunt rectæ FG, FO, habebitur hyperbola de-
 scribenda.

II. Sit enim DFE sectio, facta per tale
 planum in conij ejus superficie. Et quoniam
 BC est diameter basis BCD; erit triangulum
 BAC ex cono sectum per axem. Unde, quum
 basi ejus BC normalis sit recta DE, in qua
 planum secans occurrit plano basis; erit recta
 FG diameter sectionis DFE: & propterea, quia
 eadem FG unum quidem trianguli latus infra
 verticem conij, & alterum supra verticem se-
 cat, ipsa sectio DFE erit hyperbola.

II.
 Quod hy-
 perbola, al-
 lata metho-
 do descripta,
 qua sita con-
 ditiones a-
 dimpleat.

FIG. 10.

Præterea in eadem sectione DFE ordina-
 tæ, pertinentes ad ejus diametrum FG, de-
 bent esse parallelæ rectæ DE. Sed ex con-
 structione recta DE parallela est rectæ FO.
 Quare eadem ordinatæ parallelæ quoque erunt
 ipsi FO: proindeque, sicuti hyperbolæ DFE,
 descriptæ in plano rectarum FG, FO, diameter
 est recta FG, sic ordinatæ ejus diametri paral-
 lelæ erunt rectæ FO.

Denique ex vertice conij A ducatur recta
 AX, ipsi FG parallela, quæ conveniat cum
 BC in puncto X. Et ex superius ostensis pa-
 rameter, quæ ad descriptæ hyperbolæ diame-
 trum refertur, erit ad FR, ut est BX ad AX.
 Sed BX est ad AX, ut FR ad RZ, sive etiam
 ex constructione, ut FO ad FR. Quare erit

ex

ex æquali, ut FO ad FR, ita parameter diametri FG ad eandem FR: & propterea erit FO ipsa diametri parameter.

III. Dubitari itaque non potest, quin hyperbola DFE, descripta in plano rectorum, FG, FO methodo tradita, quæsitæ conditiones adimpleat. Primo enim diameter ejus est recta FG; deinde diametri parameter est recta FO; denique eidem FO parallelæ sunt etiam ordinatæ, quæ ad diametrum illam referuntur. Sed perspicuum est quoque, methodum a nobis adhibitam, pro descriptione ejus hyperbolæ, esse adeo *universalem*, ut non unum, sed *infinitus* conos ad eum usum exhibeat.

III.
Ejusdem
methodi
universalitas
et infinitas
conorum,
quos supple-
tis, ostendi-
tur.

FIG. 10.

Nam primo planum CDE duci potest infinitis plane modis. Etsi enim plano rectorum FG, FO occurrere debeat in recta DE, ipsi FO parallela; id tamen positionem ejus minime determinat. Deinde punctum R utcumque sumi potest in recta FP. Quo fit, ut longitudo ipsius FR adhuc modis innumeris possit variari. Utroque igitur ex capite liquet, *infinitam* esse diversitatem conorum, quorum ope quæsitam hyperbolam describere licebit.

Quæmadmodum autem ex positione plani CDE dependet magnitudo anguli GFR, sic ex longitudine ipsius FR trahit angulus FGR magnitudinem suam. Unde, quia per quantitates istorum angulorum determinatur triangulum FRG; perspicuum est, infinitam illam conorum diversitatem, qui adhiberi possunt, ad quæsitam hyperbolam describendam, ex eo unice proficisci, quod possit triangulum FRG infinitis plane modis variari.

IV. Quam-

74 SECTIONUM CONICARUM

IV.
Cujus na-
tura sint in-
finiti illi co-
ni, quos me-
thodus pra-
bet, aper-
tur.

FIG. 10.

IV. Quamquam vero *infiniti* sint coni, quibus quæsitum hyperbolam describere licet, ii tamen sunt omnes *scaleni*, quum angulus GFO non ponitur rectus. Ubi enim triangulum, ex cono sectum per axem, non constituit cum plano basis angulos rectos; proculdubio conum ipsum scalenum esse oportet. Profecto autem facile erit ostendere, triangulum BAC, sectum ex cono per axem, non posse cum plano basis BCD rectos angulos constituere, quum angulus GFO nequaquam est rectus.

Nam, quotiescumque FO non constituit cum FG angulos rectos; tam ipsa, quam ejus parallela DE multo minus rectos angulos efficiet cum plano trianguli BAC, in quo recta FG reperitur. Ex constructione autem DE perpendicularis est super BC, quæ duorum planorum BAC, BCD communis est sectio. Quare, quum eadem DE sit in plano BCD, nec etiam duo ista plana BAC, BCD recta erunt ad invicem.

Iidem vero coni poterunt esse, tum *recti*, cum *scaleni*, quotiescumque angulus GFO ponitur rectus. Nam, constituyente FO, vel etiam ejus parallela DE, rectos angulos cum FG; erit DE normalis utrique rectarum FG, BC: proindeque, tam ipsa DE recta erit ad planum trianguli BAC, quam duo plana BAC, BCD recta erunt ad invicem. Unde, si triangulum BAC fuerit isosceles, erit axis coni rectus etiam ad planum basis BCD; & consequenter ipse pariter conus erit rectus, & non scalenus.

V.
Quid regulæ

V. Hinc, ad definiendum casum coni re-
cti,

Est, non abs re erit, inquirere hoc loco, quid factu sit opus, quo triangulum BAC isosceles oriatur. Nimirum necesse est, sumere FR talis longitudinis, ut GR quadratum sit æquale quadrato diametri una cum ejus figura; hoc est, ducta per alterum diametri verticem G recta GS, ipsi FR parallela, ut GR quadratum sit æquale quadrato ex FG una cum rectangulo ex FR in GS. Fig. 10.

Ponamus enim, triangulum BAC isosceles esse. Et quoniam, completo parallelogrammo FSGP, sit etiam isosceles triangulum PGR; secabitur basis hujus PR bifariam a perpendicularo, quod super ipsam demittitur ex puncto G: proindeque erunt quadrata GR, FR æqualia quadrato ex FG una cum rectangulo PRF. Sed rectangulum PRF est æquale quadrato ex FR una cum rectangulo PFR. Quare, dempto communi quadrato ex FR, erit GR quadratum æquale quadrato ex FG una cum rectangulo PFR, hoc est eo, quod sit ex FR in GS.

Id quum ita sit, perspicuum est, triangulum BAC isosceles esse posse, non modo, quum ratio parametri ad diametrum est minoris ad majus, verum etiam, quum eadem illa ratio est vicissim majoris ad minus. Nam in utroque casu nihil obstat, quominus possit quandoque GR quadratum æquale esse quadrato diametri una cum ejus figura.

VI. Oporteat jam, quæsitam hyperbolam ita quidem, mediante cono, in plano describere, ut triangulum BAC isosceles oriatur; rectusque adeo ipse conus, quotiescunque

*rietur, ut
triangulum,
per axem
sectum, iso-
sceles oria-
tur.*

VI.

*Quid me-
thodo adden-
dum, ut
triangulum,
per axem se-*

que

Ann. 1700 que angulus GFO ponitur rectus.

ta isosceles

fat.

FIG. 10. Ex puncto F erigatur super FG perpendicularis FQ, quæ sit media proportionalis inter FO, & FG. Jungatur deinde GQ, & arcus, descriptus centro G, intervalloque GQ, signabit in FP punctum illud R, quo opus est, ut triangulum BAC fiat isosceles.

Quum enim FQ sit media proportionalis inter FO, & FG; erit quadratum ex FQ æquale rectangulo OFG, quod constituit diametri figuram. Sed quadratum ex GR, seu GQ est æquale FG quadrato una cum quadrato ex FQ. Quare idem GR quadratum æquale erit quadrato diametri FG una cum ejus figura: proindeque, ex mox ostensis, triangulum BAC isosceles erit.

Patet autem, triangulum BAC semper isosceles esse posse, cujuscumque magnitudinis sit angulus GFR. Nam, quum sit GQ major, quam GF: arcus, qui describitur centro G, intervalloque GQ, rectæ FP semper occurret. Et quia eam secabit semper in duobus punctis, hinc inde positis à puncto F; liquet problema duas semper solutiones admittere.

VII.

Alia methodus describendi hyperbolam in plano per conum in modum asseritur.

VII. Hic etiam problema principale, de describenda hyperbola in plano per conum, potest resolvi in hunc modum.

Nimirum, datis ut supra rectis FG, FO, fiat eadem constructio, usque donec deventum fuerit ad punctum R, utcumque sumendum in recta FP. Producaturs postea diameter GF usque ad punctum V, ita ut fiat FV æqualis parametro FO. Tum juncta RV, constituatur angulus GFS, æqualis angulo FRV.

FIG. 10.

Con-

Convenient porro rectæ duæ GR, FS in A, iisdemque occurrat quoque recta KC in punctis B, & C. Jamque, si conus concipiatur, cujus vertex sit punctum A, basis autem circulus BCD, descriptus super BC, velut diametro, in plano rectarum BC, DE; habebitur hyperbola describenda per intersectionem conici hujus cum plano, in quo datæ sunt rectæ FG, FO.

Ducatur etenim ex puncto R recta RZ, diametro FG parallela, quæ conveniat cum AF in Z. Et siquidem ostendi possit, FO esse ad FR, ut est FR ad RZ; jam hæc alia solutio coincidet cum priore, nec adeo de veritate ejus poterit dubitari, Id vero ostendetur hac ratione.

Ex constructione angulus GFS æqualis est angulo FRV. Sed, propter parallelas FG, RZ, idem angulus GFS æqualis est etiam angulo RZF. Quare duo anguli FRV, RZF æquales erunt inter se: & propterea erit, ut FV ad FR, ita FR ad RZ. Est autem ex constructione FV æqualis ipsi FO. Et igitur etiam FO erit ad FR, ut est FR ad RZ,

VIII. Atque hinc rursus patet, non posse triangulum BAC isosceles esse, nisi FR sit talis longitudinis, ut GR quadratum sit æquale quadrato diametri FG una cum ejus figura.

Ubi enim isosceles est triangulum BAC, erit etiam isosceles triangulum FAR; atque adeo duo anguli ARF, AFR æquales erunt inter se. Unde, quum æquales sint, tam anguli GRF, RFS, quam anguli FRV, GFS; erit

VIII.
*Quomodo in
hac alia me-
thodo trian-
gulum, per
nam se-
ctam, circuli
potest isosce-
les.*

FIG. 10.

78 SECTIONUM CONICARUM
erit quoque angulus GRV æqualis angulo
GFR: & propterea, quum sit, ut FG ad GR,
ita GR ad GV; erit GR quadratum æquale
rectangulo FGV.

Jam rectangulum FGV est æquale qua-
drato ex FG una cum rectangulo GFV. Ita-
que, quum, propter æquales FV, FO, rectangu-
lum GFV sit æquale rectangulo OFG, quod
constituit diametri figuram; erit idem rectan-
gulum FGV, vel ei æquale quadratum, quod
fit ex GR, æquale quadrato diametri FG,
una cum figura, ad eandem diametrum perti-
nente.

Ex eo autem, quod duo anguli GRV,
GFR sint etiam æquales inter se, quum isosce-
les est triangulum BAC; alia nobis subnasci-
tur ratio describendi quæsitam hyperbolam ita
quidem, mediante cono, ut triangulum BAC
isosceles oriatur. Nimirum, si producta dia-
metro GF, usque donec fiat FV æqualis FO,
describatur super GV portio circuli, quæ
fufcipiat angulum, æqualem angulo GFR;
quandoquidem portio ista signabit in FP pun-
ctum illud R, quo opus est, ut triangulum
BAC isosceles fiat.

IX.
Conus, quo
describitur
hyperbola
numquam in
cylindrum
verti potest.
FIG. 10.

IX. Liquet igitur, hyperbolam in plano
per conum describi iisdem omnino modis, qui-
bus præcedenti capite ellipsis descriptionem
obtinuimus. Interim in utraque eam descri-
bendi ratione fieri numquam potest, ut pun-
ctum A, in quo duæ rectæ FS, GR sibi mu-
tuo occurrunt, abeat in infinitum; nec ideo
ipse conus, quo mediante hyperbola describi-
tur, unquam verti poterit in cylindrum.

Nam,

Nam, quantum ad priorem attinet describendi rationem, etsi juxta eam, tam pro ellipsi, quam pro hyperbola ducenda sit per punctum R, utcumque sumptum in FP, recta RY diametro FG æquidistanter, ex qua deinceps abscindenda portio RZ talis longitudinis, ut sit tertia proportionalis post duas FO, FR; perspicuum est tamen, rectas FG, RZ existere ad partes contrarias ipsius FR, quum agitur de describenda ellipsi; & ad partem eandem ejusdem FR, quum quæstio est de descriptione hyperbolæ. Unde, junctis rectis FZ, GR fient ex quadrilateri latera opposita in ellipsi, & se invicem decussabunt in hyperbola.

FIG. 8.
10.

Quantum vero spectat ad alteram describendi rationem, juxta eam pro ellipsi quidem abscindenda est ex diametro FG portio FV, æqualis parametro FO; pro hyperbola vero producenda est ipsa diameter versus F, usque donec fiat FV æqualis FO. Et quamquam deinde pro utraque curva fieri debeat angulus GFS, æqualis angulo FRV; liquet tamen, rectam FS existere ad partem alteram diametri FG relate ad rectam FR in ellipsi, & jacere inter diametrum FG, & ipsam FR in hyperbola. Unde, ducta GS æquidistanter eidem FR, fient rursus GR, FS quadrilateri latera opposita in ellipsi, & se mutuo decussabunt in hyperbola.

FIG. 8.
10.

X. Cæterum in hyperbola describenda nihil obstat, quominus ratio parametris ad diametrum sit etiam æqualitatis. Et quum id contingit, adhuc illdem modis eam describere

X.
Qua hyperbola dicitur æquilatera, quæq; etiam ellipsis idem nomen fortitur.

re

80 SECTIONUM CONICARUM

re licebit. Hujusmodi autem hyperbola, in qua diameter parametrum suam adæquat, communiter a Geometris vocatur *æquilatera*. Et quamquam ellipsis quoque describi possit diametro, & parametro, quæ habeant inter se rationem æqualitatis; hæc tamen non fortitur nomen *ellipsis æquilateræ*, nisi ipsi illud etiam accedat, ut ordinatæ rectos cum diametro angulos constituent.

Unde autem fiat, ut hyperbola vocetur æquilatera, per solam æqualitatem diametri cum parametro, sed non item ellipsis; alibi quidem a nobis ostendetur. Tantum hic observabimus, ellipsim æquilateram non aliam esse, quam ipsum circulum. Ob æqualitatem enim parametri cum diametro, erit in ea quadratum cujusque ordinatæ æquale pariter re-ctangulo, quod sub correspondentibus diametri portionibus, ab utroque vertice sumptis, continetur. Unde, quum eadem ordinata rectos cum diametro angulos constituat, natura ellipsis æquilateræ hæc erit, ut quadratum cujusque diametro perpendicularis adæquet re-ctangulum, sub ipsius diametri portionibus contentum.

Et sane haud difficile erit ostendere, ellipsim, quæ describitur methodo superius tradita, circulum fieri, quum æquales ponuntur rectæ FG, FO, re-ctusque etiam angulus GFO, qui sub iis re-ctis continetur. Jam enim, ratione anguli re-cti, triangulum per axem sectum BAC re-ctos constituit angulos, tam cum plano basis BCD, quam cum plano sectionis DFE. Itaque, si ostendi possit, trian-
gu-

FIG. 8. tur re-ctæ FG, FO, re-ctusque etiam angulus

GFO, qui sub iis re-ctis continetur. Jam enim, ratione anguli re-cti, triangulum per axem sectum BAC re-ctos constituit angulos, tam cum plano basis BCD, quam cum plano sectionis DFE. Itaque, si ostendi possit, trian-

gu-

gula duo ABC, AGF esse similia inter se; sectio, facta in cono, erit basi subcontraria; atque adeo circulus, per superius ostensa. Id vero demonstrabitur in hunc modum.

Ex constructione FO est ad FR, ut FR ad RZ. Itaque, semper ac ponitur FO æqualis FG, erit etiam, ut FG ad FR, ita FR ad RZ. Hinc triangula duo GFR, FRZ habebunt circum æquales angulos latera proportionalia: proindeque in iis angulus FGR angulo RFZ erit pariter æqualis. Sed, propter parallelas FR, BC, angulus RFZ æqualis est angulo CBZ. Quare, quum æquales sint anguli FGR, CBZ, duo triangula ABC, AGF æquiangula erunt, & consequenter similia inter se.

XI. Hinc autem *intima ratio elucescit*, ^{XI.}
cur sectio subcontraria, non ellipsim, sed cir- ^{Sectionis}
culum nobis exhibeat. Nimirum ellipsis abit ^{subcontraria}
in circulum, quum ei hæc duo contingunt. ^{natura panto}
Primum, ut ordinatæ rectos cum diametro an- ^{lo clarius ex-}
gulos constituent. Et deinde, ut parameter ^{ponitur.} FIG. 8.
æqualis fiat diametro, ad quam refertur. Jam
horum utrumque præstat sectio subcontraria.
Ex eo enim, quod in ipsa, tam planum secans,
quam planum basis rectum sit plano trianguli,
per axem secti; fiunt ordinatæ, diametro per-
pendiculares. Ex eo autem, quod per eadem
illa plana abscindantur duo triangula similia;
inter diametrum, & parametrum ejus æquali-
tas inducitur.

Unde hac occasione notetur hoc loco ve-
lim, quod, sicuti ordinatæ rectos semper cum
diametro angulos constituunt, quotiescum-

§. 2. SECTIONUM CONICARUM

que planum trianguli BAC rectum est, tam ad planum basis BCD, quam ad planum sectionis DFE; ita ratio parametri FO ad diametrum FG sit semper æqualitatis, quotiescumque duo triangula ABC, AGF sunt similia inter se. Neque enim ea triangula possunt esse inter se similia, nisi talia sint quoque triangula BKF, CKG. Unde, quum sit, ut BK ad FK, ita CK ad CK; erit rectangulum BKC æquale rectangulo FKG. Sed, propter circulum BCD, quadratum ex DK est æquale rectangulo BKC. Quare idem DK quadratum erit etiam æquale rectangulo FKG: & propterea, quum FO sit ad FG, ut est DK quadratum ad rectangulum FKG; duæ FO, FG erunt pariter æquales inter se.

Ostendi id etiam potest in hunc modum. Quoniam duo triangula ABC, AGF ponuntur similia; erit angulus ACB æqualis angulo AFG: & propterea, quum sint æquales duobus rectis, tam duo anguli ACB, ACX, quam duo anguli AFG, BFG; erit quoque angulus ACX æqualis angulo BFG. Sed, ob parallelas FG, AX, angulus BFG æqualis est angulo BAX. Itaque, quum æquales sint etiam duo anguli ACX, BAX; erit, ut CX ad AX, ita AX ad BX: proindeque erit AX quadratum æquale rectangulo BXC. Est autem, ex superius ostensis, ut FO ad FG, ita rectangulum BXC ad AX quadratum. Quare duæ FO, FG pariter inter se æquales erunt.

Hoc idem erui quoque potest ex eo, quod, si fiat angulus FRV, æqualis angulo BFG, portio FV, abscissa ex diametro FG
per

per rectam RV, parametri FO longitudinem adæquet. Nam, propter similitudinem triangularum ABC, AGF, angulus ACB, sive ARF erit æqualis angulo AFG. Unde, quum sint æquales duobus rectis, tam duo anguli ARF, FRG, quam duo anguli AFG, BFG; erit quoque angulus FRG æqualis angulo BFG. Quo fit, ut recta RV cadat super RG; atque adeo, coeuntibus in unum punctis G, & V, erit portio FV æqualis diametro FG.

C A P. III.

Parabolam in plano per conum describendi ratio aperitur.

I. **P**ost traditam rationem describendi in plano per conum, tam ellipsim, quam hyperbolam, aperienda nobis tandem est methodus, qua describi possit in plano parabola, eodem adhibito cono.

I. Proponitur methodus describendi parabolam in plano per conum.
FIG. 12.

Dentur itaque positione in plano aliquo rectæ duæ FG, FO, sibi mutuo occurrentes in F; quarum prior FG sit infinita versus G, altera FO sit etiam magnitudine data. Et oporteat, in eodem plano describere parabolam, cujus FG sit diameter, FO parameter diametri, & eadem FO recta illa, cui omnes diametri ordinatæ debent esse parallelæ.

Ducatur primo planum aliud CDE, occurrens plano rectarum FG, FO in recta DE, ipsi FO parallela. Deinde ex puncto K, in
F 2 quo

34 SECTIONUM CONICARUM

quo duæ FG , DE sese mutuo secant, erigatur in ducto plano recta KC , perpendicularis super DE . Tum huic KC per punctum F , diametri verticem, parallela agatur FP .

Capiatur porro in recta ista FP punctum quodvis R . Et ducta RY æquidistanter ipsi FG , abscindatur ex ea portio RA , quæ sit tertia proportionalis post duas FO , FR . Denique jungatur AF , & tam ista, quam altera AR producantur, usque donec conveniant cum recta KC in punctis B , & C .

His peractis, concipiatur jam conus, cuius vertex sit punctum A , basis autem circulus BCD , descriptus super BC , velut diametro, in plano rectarum BC , DE . Et per intersectionem coni huius cum plano, in quo datae sunt rectæ FG , FO , habebitur parabola describenda.

II.
Quod parabola, allata metodo descripta, quæ sit conditio nra adim. pteat.

FIG. 12. II. Sit enim DFE sectio, facta per tale planum in coni ejus superficie. Et quoniam BC est diameter basis BCD ; erit triangulum BAC ex cono sectum per axem. Unde, quum basi ejus BC normalis sit recta DE , in qua planum secans occurrit plano basis; erit recta FG diameter sectionis DFE , & propterea, quia eadem FG uni laterum trianguli AC est parallela, ipsa sectio DFE erit parabola.

Præterea in eadem sectione DFE ordinatæ, pertinentes ad ejus diametrum FG , debent esse parallelæ rectæ DE . Sed ex constructione recta DE parallela est rectæ FO . Quare eædem ordinatæ parallelæ quoque erunt ipsi FO : proindeque, sicuti parabolæ DFE , descriptæ in plano rectarum FG , FO , diameter est

est recta FG, sic ordinatæ ejus diametri parallelæ erunt rectæ FO.

Denique ex superius ostensis parameter, quæ ad descriptæ parabolæ diametrum refertur, erit ad FR, ut est BC ad AC, sive etiam; ut est FR ad AR. Sed ex constructione FR est ad AR, ut FO ad FR. Quare erit ex æquali, ut FO ad FR, ita parameter diametri FG ad eandem FR: & propterea erit FO ipsa diametri parameter.

III. Dubitari itaque non potest, quin parabola DFE, descripta in plano rectarum FG, FO methodo tradita, quæsitæ conditiones adimpleat. Primo enim diameter ejus est recta FG; deinde diametri parameter est recta FO; denique eidem FO parallelæ sunt etiam ordinatæ, quæ ad diametrum illam referuntur. Sed perspicuum est quoque, methodum a nobis adhibitam, pro descriptione ejus parabolæ, esse adeo *universalem*, ut non unum sed *infinitus* conos ad eum usum exhibeat.

Nam primo planum CDE duci potest infinitis plane modis. Etsi enim plano rectarum FG, FO occurrere debeat in recta DE, ipsi FO parallela; id tamen positionem ejus minime determinat. Deinde punctum R utcumque sumi potest in recta FP. Quo fit, ut longitudo ipsius FR adhuc modis innumeris possit variari. Utroque igitur ex capite liquet, *infinitam* esse diversitatem conorum, quorum ope quæsitam parabolam describere licebit.

Quemadmodum autem ex positione plani CDE dependet magnitudo anguli GFR, sic ex longitudine ipsius FR trahit parallelo-

F 3

gram-

III.
Ejusdem
methodi
universalitas
ex infinitate
conorum,
quos
supple-
tit, ostendi-
tur.

FIG. 12.

36 SECTIONUM CONICARUM

grammum FKCR latitudinem suam. Unde; quia idem parallelogrammum determinatur, tum per suam latitudinem, quam per magnitudinem anguli GFR; liquet, infinitam illam conorum diversitatem, qui adhiberi possunt ad quæsitam parabolam describendam, non aliunde pendere, quam ex eo, quod possit parallelogrammum FKCR infinitis plane modis variari.

IV.
Cujus natura
est infinita
illi con-
ni, quos me-
thodus præ-
bet, aperit-
tur.
FIG. 12.

IV. Quamquam vero *infiniti* sint con, quibus quæsitam parabolam describere licet, ii tamen sunt omnes *scaleni*, quum angulus GFO non ponitur rectus. Ubi enim triangulum, ex cono sectum per axem, non constituit cum plano basis angulos rectos; proculdubio conum ipsum scalenum esse oportet. Profecto autem facile erit ostendere, triangulum BAC, sectum ex cono per axem, non posse cum plano basis BCD rectos angulos constituere, quum angulus GFO nequaquam est rectus.

Nam, quotiescumque FO non constituit cum FG angulos rectos; tam ipsa, quam ejus parallela DE multo minus rectos angulos efficiet cum plano trianguli BAC, in quo recta FG reperitur. Ex constructione autem DE perpendicularis est super BC, quæ duorum planorum BAC, BCD communis est sectio. Quare, quum eadem DE sit in plano BCD, nec etiam duo ista plana BAC, BCD recta erunt ad invicem.

Idem vero con, poterunt esse, tum *recti*, cum *scaleni*, quotiescumque angulus GFO ponitur rectus. Nam, constituyente FO, vel etiam ejus parallela DE, rectos angulos cum FG;

FG; erit DE normalis utrique rectarum FG, BC: proindeque, tam ipsa DE recta erit ad planum trianguli BAC, quam duo plana BAC, BCD recta erunt ad invicem. Unde, si triangulum BAC fuerit isosceles, erit axis coni rectus etiam ad planum basis BCD; & consequenter ipse pariter conus erit rectus, & non scalenus.

V. Hinc, ad definiendum casum considerare, non abs re erit, inquirere hoc loco, quid factu sit opus, quo triangulum BAC isosceles oriatur. Nimirum necesse est, sumere FR talis longitudinis, ut siquidem in diametro FG capiatur punctum aliquod G, & jungatur GR, sit GR quadratum una cum rectangulo OFG æquale duobus quadratis FG, FR.

V.
Quid requiritur, ut triangulum, per axem sectum, isosceles oriatur.
FIG. 12.

Ponamus enim, triangulum BAC isosceles esse. Et quoniam, ducta GP, ipsi AF parallela, sit etiam isosceles triangulum PGF; secabitur basis hujus PF bifariam a perpendiculari, quod super ipsam demittitur ex puncto G: proindeque GR quadratum una cum rectangulo PFR æquale erit duobus quadratis FG, FR.

Uterius, quia parallelæ sunt inter se, tam rectæ GP, AF, quam rectæ FG, RA; erit, ut PF ad FG, ita FR ad RA. Sed ex constructione FR est ad RA, ut FO ad FR. Itaque erit ex æquali, ut PF ad FG, ita FO ad FR: & propterea, quum rectangulum PFR sit æquale rectangulo OFG; erit GR quadratum una cum rectangulo FGO æquale etiam quadratis FG, FR.

VI. Oporteat jam, quæsitam parabolam

VI.
Quid me-

§§ SECTIONUM CONICARUM

*the'o et
drudum, ut
triangulum,
per autem se-
ctum, reuera
ifosceles fiat.*

lam ita quidem, mediante cono, in plano describere, ut triangulum BAC isosceles oriatur; rectusque adeo ipse conus, quotiescunque angulus GFO ponitur rectus.

FIG. 12. Abscindatur ex diametro FG portio FQ, quæ sit æqualis dimidio parametri FO. Deinde, sumpto in eadem diametro puncto quovis alio G, demittatur ex eo recta GT, perpendicularis super FP. Et circulus, transiens per puncta tria T, G, Q, signabit in FP punctum illud R, quo opus est, ut triangulum BAC isosceles fiat.

Quum enim ex constructione FO dupla sit ipsius FQ; erit rectangulum OFG duplum quoque rectanguli GFQ. Sed, ob circulum, transeuntem per quatuor puncta T, R, G, Q, rectangulum GFQ est æquale rectangulo RFT. Quare idem rectangulum OFG erit duplum pariter rectanguli RFT.

Hinc, quum sit GR quadratum una cum duplo rectanguli RFT æquale duobus quadratis FG, FR; erit etiam GR quadratum una cum rectangulo OFG æquale iisdem quadratis FG, FR: proindeque, per ea, quæ mox ostensa sunt, parabola ita quidem, mediante cono, in plano describetur, ut triangulum BAC isosceles fiet.

VII. Sed notetur hic velim, quod si jungantur puncta Q, & R per rectam QR, hæc cum diametro FG rectos angulos constituet. Quum enim, ratione circuli, transeuntis per quatuor puncta T, R, G, Q, æqualia sint rectangula GFQ, RFT; erit, ut FG ad FT, ita FR ad FQ: proindeque angulus FTG an-

gu-

*Alia ejus-
dem metho-
di modifica-
tio ad idem
facilius ob-
tinendum.*
FIG. 12.

gulo FQR æqualis erit. Sed ex constructione angulus FTG est rectus. Quare rectus erit pariter angulus FQR.

Id quum ita sit, problema de describenda in plano parabola ita quidem, mediante cono, ut triangulum BAC isosceles oriatur, facilius longe resolvi poterit in hunc modum. Nimirum abscindatur, ut antea, ex diametro FG portio FQ, quæ sit æqualis dimidio parametri FO. Erigatur deinde ex puncto Q recta QR, eidem diametro perpendicularis. Et recta ista QR signabit in FP punctum illud R, quo opus est, ut triangulum BAC isosceles fiat.

Ex utraque autem constructione perspicuum est, triangulum BAC tunc tantum isosceles esse posse, quum recta FP non constituit rectos angulos cum diametro FG. Nam, ubi rectus est angulus PFG, coibit primo punctum T cum puncto F; atque adeo per tria puncta T, G, Q, velut in eadem recta existentia, nullus circulus transibit, nisi qui radium habet infinitum. Deinde vero perpendicularis, quæ super diametro erigitur ex puncto Q, fiet ipsi FP parallela; neque adeo ei occurrere poterit, nisi in infinita distantia a puncto F.

VIII. Non est tamen reticendum hoc loco, quod *posterior propositi problematis constructio erui quoque possit ex ea, quam pro eodem problemate superius attulimus in ellipsi.* Ibi enim, descripto super diametro FG semicirculo FQG, & aptata in eo recta FQ, quæ *media esset proportionalis inter FO, & FG;*

VIII.
*Quomodo
hæc alia metho-
di modifi-
catio erua-
tur ex ea,
quæ obtinet
in ellipsi.*

FIG. 8.

com-

90 SECTIONUM CONICARUM

comperiebamus punctum R ope arcus, cuius centrum esset punctum G, intervallum vero GQ . Sed facile erit ostendere, istiusmodi constructionem in eam, de qua agitur, verti, quotiescumque punctum G, alter diametri vertex, in infinitum abire supponitur.

Si enim ex diametro FG abscindatur portio FV, æqualis parametro FO, fiet FQ quadratum æquale rectangulo GFV. Unde quum duo quadrata FQ, GQ æqualia sint quadrato ex FG; erit quoque quadratum ex GQ æquale rectangulo FGV: proindeque erit, ut FG ad GQ, ita GQ ad GV. Hinc, translato intervallo GQ super ipsa diametro GF, cadet punctum Q inter alia duo F, & V. Quare, abeunte in infinitum puncto G, una cum ipsis FG, GV fiet etiam infinita GQ: & propterea arcus, qui describitur centro G, intervalloque GQ, cum tangente sua confundetur, & vertetur adeo in rectam, ipsi FG perpendicularem.

Hinc siquidem ostendi possit, quod in eadem hypotesi fiat FQ æqualis dimidio ipsius FV; jam liquido patebit, constructionem, quæ locum habet in parabola, esse eandem illam, quæ obtinet in ellipsi. Id vero demonstrabitur hoc pacto. Quoniam FG est ad GQ, ut GQ ad GV; erit convertendo, ut FG ad FQ, ita GQ ad QV. Sed, abeunte in infinitum puncto G, rectæ duæ FG, GQ sumi possunt velut æquales inter se; quum ambæ fiant longitudinis infinitæ, manente interim finita ipsarum differentia FQ. Quare in eadem hypotesi erunt etiam æquales rectæ duæ FQ, QV:

QV : & propterea FQ semissis fiet ipsius FV.

IX. Præterea eadem posterior propositi problematis constructio erit etiam potest ex ea, quam pro eodem problemate superius attulimus in hyperbola. Ibi enim, erecta super diametro perpendiculari FQ, quæ media esset proportionalis inter FO, & FG; comperiebamus punctum R ope arcus, cujus centrum esset punctum G, intervallum vero recta GQ. Sed facile erit ostendere, istiusmodi quoque constructionem in eam, de qua agitur, verti, quum punctum G, alter diametri vertex, in infinitum abire supponitur.

IX.
Quomodo
eadem ma-
nifestatio r-
vatur etiam
ex illa, qua
locum habet
in hyperbola.
FIG. 10.

Si enim producatür diameter GF, usque donec fiat FV æqualis parametro FO; erit FQ quadratum æquale rectangulo GFV. Unde, quum quadratum ex GQ sit æquale quadratis GF, FQ; erit idem GQ quadratum æquale etiam rectangulo FGV: proindeque erit, ut GV ad GQ, ita GQ ad GF. Hinc, translato intervallo GQ super ipsa diametro GF, cadet punctum Q inter alia duo F, & V. Quare, abeunte in infinitum puncto G, una cum ipsis GF, GV fiet etiam infinita GQ: & propterea arcus, qui describitur centro G, intervalloque GQ, cum tangente sua confundetur, & vertetur adeo in rectam, ipsi FG perpendicularem.

Hinc, siquidem ostendi possit, quod in eadem hypothese fiat FQ æqualis dimidio ipsius FV; jam liquido patebit, constructionem, quæ locum habet in parabola, esse eandem illam, quæ obtinet in hyperbola. Id vero demonstrabitur hoc pacto. Quoniam GV est

est ad GQ, ut GQ ad GF; erit dividendo; ut QV ad GQ, ita FQ ad GF. Sed, abeunte in infinitum puncto G, rectæ duæ GQ, GF sumi possunt velut æquales inter se; quum ambæ fiant longitudinis infinitæ, manente interim finita ipsarum differentia FQ. Quare in eadem hypothese erunt etiam æquales rectæ duæ QV, FQ; & propterea FQ semissis fiet ipsius FV.

X. Cæterum hic quoque problema principale, de describenda parabola in plano per conum, resolvi potest hac alia ratione.

Alia methodus describendi parabolam in plano per conum in medium affertur.

FIG. 12.

Nimirum datis, ut supra, rectis FG, FO, fiat eadem constructio, usque donec deventum fuerit ad punctum R, utcumque sumendum in recta FP. Abscindatur postea ex diametro FG portio FV, æqualis parametro FO. Tum, juncta RV, fiat angulus GFB, æqualis angulo FRV; & agatur per punctum R recta RC, ipsi FG parallela.

Producantur deinde rectæ duæ BF, CR usque donec sibi mutuo occurrant in A, cum quibus conveniat quoque recta KC in punctis B, & C. Jamque, si conus concipiatur, cujus vertex sit punctum A, basis autem circulus BCD, descriptus super BC, velut diametro, in plano rectarum BC, DE; habebitur parabola describenda per intersectionem coni hujus cum plano, in quo datæ sunt rectæ FG, FO.

Plane enim, si ostendi possit, FO esse ad FR, ut est FR ad RA; alia ista solutio coincidet cum priore, nec adeo de veritate ejus poterit dubitari. Id vero ostendetur hoc

facto. Ex constructione angulus GFB æqualis est angulo FRV. Sed, propter parallelas FG, AC, idem angulus GFB æqualis est etiam angulo RAF. Quare duo anguli FRV, RAF æquales erunt inter se: & propterea erit, ut FV ad FR, ita FR ad RA. Est autem ex constructione FV æqualis FO. Et igitur etiam FO erit ad FR, ut est FR ad RA.

XI. Atque hinc rursus patet, non posse triangulum BAC isosceles esse, nisi FR sit talis longitudinis, ut sumpto in diametro FG puncto quovis G, junctaque GR, sit GR quadratum una cum rectangulo OFG æ-

XI.
*Quomodo in
hoc alia me-
thodo trian-
gulum, per
axem sectum,
erit isosceles.*
FIG. 12.

quale duobus quadratis FG, FR. Ubi enim isosceles est triangulum BAC, erit etiam isosceles triangulum FAR. Quare, quum æquales sint, tam anguli CRF, RFB, quam anguli FRV, GFB; erit quoque angulus CRV æqualis angulo VFR. Sed, propter parallelas AC, FG, idem angulus CRV æqualis est etiam angulo RVF. Itaque duo anguli RVF, VFR æquales erunt inter se: & propterea, quum æqualia etiam sint latera FR, RV, triangulum FRV isosceles erit.

Hinc, quum basis hujus trianguli FV bifariam secetur a perpendiculari, quod super ipsam demittitur ex puncto R; erit GR quadratum una cum rectangulo GFV æquale duobus quadratis FG, FR. Ob æquales autem FV, FO, rectangulum GFV est æquale rectangulo OFG. Itaque idem GR quadratum una cum rectangulo OFG iisdem quadratis FG, FR pariter æquale erit.

Ex eo autem, quod duo anguli RVF, VFR

94 SECTIONUM CONICARUM

VFR sint etiam æquales inter se, quum isosceles est triangulum BAC; alia nobis subnasceatur ratio describendi quæsitam parabolam ita quidem, mediante cono, ut triangulum BAC isosceles oriatur. Nimirum, si abscissa ex diametro FG portione FV, ipsi FO æquali; fiat ad punctum V angulus FVR, æqualis angulo VFR; quandoquidem recta VR signabit in FP punctum illud R, quo opus est, ut triangulum BAC isosceles fiat.

XII.

*Eadem constructio
est etiam in
ellipsi, &
hyperbola ob-
tinet, deri-
vatur.*

FIG. 8.

10.

XII. Nec silentio præteribimus, quod *ista etiam constructio prono alveo suat ex ea, qua in ellipsi, & hyperbola hoc idem superius obtinuimus.* In his etenim curvis sumpta quoque super diametro FG portione FV, quæ æqualis esset parametro FO, comperiebamus punctum R, describendo super GV circuli portionem, quæ susciperet angulum, æqualem angulo GFR. Sed facile erit ostendere, istiusmodi constructionem in eam, de qua agitur, verti, quotiescumque punctum G, alter diametri vertex, in infinitum abire supponitur.

Si enim rectam intelligamus, quæ eam circuli portionem tangat in V, & ad eandem cum illa plagam dirigatur; ea continebit cum FV angulum, æqualem angulo VFR. Unde, quia, abeunte in infinitum puncto G, fit ipsa GV infinitæ longitudinis, atque adeo infinita quoque diameter, quæ ad eam circuli portionem refertur; confundetur ipsa circuli portio cum tangente sua, & consequenter vertetur in rectam, constituentem cum FV angulum, æqualem angulo VFR: proindeque in eadem hypothesi invenietur punctum R, si fiat ad pun-

punctum V angulus FVR, qui sit æqualis angulo VFR.

XIII. Iisdem itaque modis, quibus ellipsis, & hyperbolæ in plano per conum descriptionem obtinuimus, describitur quoque parabola. Sed punctum A, in quo rectæ duæ BF, CR sibi mutuo occurrunt, hic etiam, numquam in infinitum abire potest. Unde *ipse pariter conus, quo mediante parabola describitur, non secus ac in hyperbola, numquam verti poterit in cylindrum.*

XIII.
Conus, quo
describitur
parabola,
numquam
in cylin-
druum verti
potest.

FIG. 12.

Cylindri igitur ope tantum ellipsis describi potest. Et quamquam parabola, velut species quædam ellipsis, haberi queat; inde tamen non sequitur, parabolam quoque per cylindrum posse describi. Nam meminisse oportet, quod conus, quo describitur ellipsis, tunc quidem vertatur in cylindrum, FIG. 8. quotiescumque punctum R subinde sumitur in recta FP, ut portio FR sit media proportionalis inter diametrum FG, & ejus parametrum FO.

Quum enim in parabola diameter FG sit infinitæ longitudinis, utique media proportionalis inter ipsam, & ejus parametrum finita esse non potest. Quare, ubicumque sumetur in recta FP punctum R, semper intercepta portio FR, velut finita, minor erit linea illa, quæ media foret proportionalis inter FG, & FO: proindeque, quum quæstio erit de describenda parabola, perinde ac quum agitur de descriptione hyperbolæ, numquam fieri poterit, ut conus abeat in cylindrum.

FIG. 12.

CAP.

C A P. IV.

*Qua ratione ellipsis in plano
per solas rectas describi pos-
sit, demonstratur.*

I.
Preponitur
ratio descri-
bendi ellip-
sim in pla-
no per rectas
solas.

FIG. 15.

I. **V** Idimus huc usque, quo pacto de-
scribendæ sint in plano conicæ
sectiones, adhibendo rursus solidum illud, ex
quo ex trahunt originem suam. Nunc, qua
ratione eædem curvæ describi possint in plano,
per solas linearum longitudines, ostenden-
dum nobis erit. Ut autem a *descriptione ellip-
sis* iterum ordiamur, dentur in plano aliquo,
tum magnitudine, cum positione, rectæ duæ
AB, AD, sibi mutuo occurrentes in A. Et
oporteat, in eodem plano describere ellipsim,
cujus AB sit diameter, AD parameter diame-
tri, & eadem AD recta illa, cui omnes diame-
tri ordinatæ debent esse parallelæ.

Ducatur per punctum D recta DE, ipsi
AB parallela. Tum capiantur aliæ duæ rectæ
AX, BZ, quæ revolvantur circa puncta A,
& B in ipso plano rectarum AB, AD. Fiat
autem earum revolutio hac lege, ut portio
DF, abscissa ex DE per priorem AX, sit per-
petuo æqualis portioni AG, quam ex para-
metro AD, producta si opus, abscindit eo-
dem tempore recta altera BZ. Dico, curvam,
quæ in eodem plano rectarum AB, AD de-
scribitur continuis intersectionibus ipsarum
AX,

AX, BZ, ellipsim, quam quærimus, esse.

Ex aliquo enim ejus curvæ puncto M ducatur recta MN, ipsi AD parallela, quæ conveniat cum AB in puncto N. Jamque erit punctum M in quæsitâ ellipsi, si utique ostendi possit, MN quadratum esse ad rectangulum ANB, ut est AD ad AB. Id vero ostendetur in hunc modum. Quadratum ex MN est ad rectangulum ANB in ratione composita ex MN ad AN, & ex MN ad NB; sive etiam in ratione composita ex AD ad DF, & ex AG ad AB. Sed, ob æquales DF, AG, duæ istæ rationes componunt quoque rationem, quam habet AD ad AB. Itaque erit ex æquali, ut MN quadratum ad rectangulum ANB, ita AD ad AB.

II. Non ergo dubitari potest, quin mutuis intersectionibus rectarum AX, BZ describatur ellipsis, quam quærimus. Interim, ut *descriptio ejus melius intelligatur*, notandum est primo, quod ubi recta AX fertur circulariter ex AD versus AB; tunc recta altera BZ ferri debeat circulari etiam motu ex BA versus BI, quam ipsi AD suppono parallelam. Et quoniam revolutio harum rectarum ea lege fieri debet, ut portiones DF, AG, abscissæ per ipsas ex rectis DE, AD, sint perpetuo æquales inter se: perspicuum est, quod ubi recta AX pervenit ad AB, & infinitam adeo portionem abscindit ex DE; tunc recta altera BZ super BI reperiatur, quia hac ratione ipsa quoque ex AD infinitam portionem abscindet.

Notandum est etiam, quod quotiescum-

Tom. I.

G

que

II.
Monita pro
allata ellip-
sis descripti-
onis melius
intelligenda.

FIG. 15.

que eadem AX pergit moveri circulariter ex AB versus AH , quam ipsi AD in directum esse suppono; tunc recta altera BZ prosequi debeat motum suum circulare ex BI versus BR , in quam AB , quum producit, cadit. Et quoniam motus earundem rectarum ea adhuc lege perfici debet, ut portiones DF , AG , quas abscindunt ex ipsis DE , AD , ex altera parte productis, maneant semper æquales inter se: liquet, quod ubi recta AX pervenit ad AH , & nullam adeo portionem abscindit ex DE ; tunc altera BZ super BR reperiatur, quia hac ratione ipsa etiam ex AD nullam portionem abscindet.

III. Atque hinc luce clarius apparet, *ellipsim constare ex duabus partibus, hinc inde relate ad diametrum positis*, quæ junguntur simul in utroque vertice ejusdem diametri.

Figura ellipsi ex al. lata ejus descriptio deducitur.

FIG. 15.

Una siquidem describitur, quum recta AX fertur circulariter ex AD versus AB , eaque continetur in angulo BAD . Altera describitur, quum eadem AX moveri pergit ex AB versus AH , & pars ista continetur in angulo BAH . Nec sane, continuando motum ejusdem rectæ AX , usque donec circumferentiam integram absolvat, aliæ ei partes addi possunt.

Nam primo, quotiescumque recta AX fertur ex AH versus AK , quam ipsi AB in directum esse suppono; tunc altera BZ prosequetur motum suum ex BR versus BL , in quam BI , quum producit, cadit. Quare, quum fiant earundem rectarum intersectiones in angulo BAD ; describetur eadem ellipsis portio, quæ in angulo illo continetur. Et se-

cunt.

cundo, ubi eadem recta AX fertur ex AK
versus AD, tunc altera BZ moveri perget ex
BL versus BA. Unde, quum earundem re-
ctarum intersectiones fiant in angulo BAH;
describetur ellipsis portio illa, quæ eo in an-
gulo continetur.

IV. Ex allata autem ellipsis descriptione
perspicuum est, *ei id quidem contingere*, ut si
per aliquod ejus punctum M ducantur ex dia-
metri verticibus A, & B rectæ duæ AX, BZ;
portiones DF, AG, quas ipsæ abscindunt ex
rectis DE, AD, productis si opus, sint sem-
per æquales inter se. Sed, si eadem AX, BZ
protrahantur, usque donec conveniant cum
rectis BI, IE, similiter si opus productis, in
punctis O, & Q; erunt etiam æquales por-
tiones BO, IQ.

IV.
Proprietas
ellipsi, quæ
ex addita
eius descri-
ptione conse-
quitur.

FIG. 15.

Quum enim æquales sint inter se, tam
duæ AD, BI, quam duæ DF, AG; erit
ut AD ad DF, ita BI ad AG. Sed, ob
triangula æquiangulara ADF, ABO, AD est
ad DF, ut est BO ad AB; itemque, ob trian-
gula æquiangulara BIQ, BAG, BI est ad AG,
ut est IQ ad AB. Itaque erit ex æquali, ut
BO ad AB, ita IQ ad eandem AB: & pro-
pterea duæ BO, IQ æquales erunt inter se.

Hinc, per intersectionem rectarum AX,
BZ, describetur quæsitæ ellipsis, non solum,
quum rectæ illæ subinde revolvuntur circa
puncta A, & B, ut portiones DF, AG, quas
abscindunt ex rectis DE, AD, productis si
opus, sint perpetuo æquales inter se; verum
etiam, quum suas circa puncta illa revolutio-
nes subinde perficiunt, ut sint æquales por-

160 SECTIONUM CONICARUM
tiones BO , IQ , quas abscindunt ex rectis
 BI , IE , similiter si opus productis.

V.
*Præcedenti
proprietas
speciale
quoddam
accidens ad-
notatur.*

FIG. 15.

V. Etti autem æquales sint inter se, tam
portiones DF , AG , quam portiones BO ,
 IQ : perspicuum est tamen, *minui quidem*
istas, quum ea augmentur; & per contrarium
augeri, quum illa minuantur. Sed, tam *inore-*
mentum, quam *decrementum* fit semper *ea lege*,
ut rectangulum ex una illarum DF in unam
illarum BO exhibeat ubique magnitudinem
figuræ ipsius diametri AB . Nam, ob triangu-
la æquiangula ADF , ABO , ut est AD ad
 DF , ita est BO ad AB : proindeque rectangu-
lum ex DF in BO æquale erit rectangulo ex
 AD in DB , quod ex superius dictis consti-
tuit diametri figuram.

Hinc, quotiescumque æquales sunt in-
ter se omnes quatuor portiones DF , AG ,
 BO , IQ , necesse est, ut unaquæque ipsarum
media evadat proportionalis inter diametrum
 AB , & ejus parametrum AD ; atque adeo,
ut cujusque quadratum æquale fiat rectan-
gulo BAD . Id vero contingit, quum il-
lud ellipseos punctum describitur, ad quod
pertinet ordinata, quæ bifariam dividit dia-
metrum AB ; hoc est, quum duæ AN , NB
æquales sunt inter se.

Ubi enim duæ AN , NB inter se sunt æ-
quales, erit ut AN ad MN , ita NB ad ean-
dem MN . Sed, ob triangu-
la æquiangula ANM , ABO , AN est ad MN , ut AB ad
 BO ; pariterque, ob triangu-
la æquiangula BNM , BAG , NB est ad MN , ut AB ad AG .
Itaque erit ex æquali, ut AB ad BO , ita AB
ad

ad AG : & propterea duæ AG, BO æquales erunt inter se.

VI. Id quum ita sit, *juvat hic advertere*, quod etſi in describenda ellipſi revolutio reſtarum AX, BZ temperari poſſit, tam æqualitate portionum DF, AG, quam æqualitate portionum BO, IQ; conſultius ſit tamen, adhibere æqualitatem illarum, quum deſcribi debet portio ellipſis, quæ refertur ad ſemiſem diametri ſuperiorem; & viciffim æqualitatem iſtarum, quum per contrarium deſcribenda eſt portio altera, quæ diametri ſemiſem alium inferiorem reſpicit.

VI.
Quid peragendum, ut integra ellipſis deſcripta haberi poſſit.

FIG. 15.

Quantum enim ad portiones DF, AG; æ, ſicuti nullius magnitudinis ſunt in vertice A, ita in reſſu ab illo vertice majores ſemper, ac majores ſunt, tandemque infinitæ evadunt in vertice altero B. Quare integra ellipſis numquam deſcribi poſſet, ſi revolutio reſtarum AX, BZ æqualitate earum portionum ſemper eſſet temperanda.

Quantum vero ad portiones BO, IQ; iſtæ per contrarium nullius omnino magnitudinis ſunt in vertice B, tum in reſſu a vertice iſto majores ſemper, ac majores ſunt, tandemque in vertice altero A infinitæ deprehenduntur. Unde integram ellipſim nunquam adhuc deſcribere liceret, ſi ipſarum æqualitate revolutionem reſtarum AX, BZ dirigere ſemper oporteret.

Quocirca, ut integræ ellipſis deſcriptio haberi poſſit, præſtat, partem ejus ſuperiorem deſcribere æqualitate portionum DF, AG; & partem inferiorem æqualitate portio-

102 SECTIONUM CONICARUM
num BO, IQ. Et, ut idem sit terminus incremento, tam illarum, quam istarum, sejungi poterit pars ellipsis superior ab inferiore per ordinatam, quæ bifecat diametrum AB.

VII. Ex eo porro, quod æquales sint inter se, tam portiones DF, AG, quam portiones BO, IQ, plura possunt obtineri, aliquem fortasse usum deinceps habitura.

Nimirum primo determinari potest longitudo parametρι, quotiescumque una cum ellipsi data est, tam diameter AB, quam positio suarum ordinatarum.

FIG. 15.

Sit enim AD, vel BI recta illa, cui omnes diametri ordinatæ sunt parallelæ. Et sumpto in ellipsi puncto quovis M, agantur per illud ex verticibus diametri A, & B rectæ AX, BZ, quæ cum ipsis AD, BI conveniant in punctis G, & O.

Abscindatur deinde ex AB, utrinque producta si opus, vel portio AS, æqualis ipsi AG; vel portio BT, æqualis ipsi BO. Et parametρι longitudinem exhibebit, tam recta SF, parallela rectæ AD, & terminata ad rectam AX; quam recta TQ, parallela eidem AD, & terminata ad rectam BZ.

VIII. Secundo definiri potest punctum, in quo recta AX, ducta ex vertice A, secat ellipsim. Nimirum, si ex vertice altero B ducatur recta BZ, quæ abscindat, vel ex AD portionem AG, æqualem ipsi DF; vel ex IE portionem IQ, æqualem ipsi BO. Nam intersectio rectarum AX, BZ quæsitum punctum exhibebit.

FIG. 15.

Hinc, siquidem recta AX cadat super AD,

Quomodo
data diamet-
ro cum po-
sitione suarum ordina-
tarum, de-
terminari
potest longi-
tudo para-
metρι.

VIII.
Quomodo
definitur po-
tius punctum,
in quo
recta, ex uno
vertice du-
cta, secat el-
lipsim.

AD, quæ ducta est per verticem A diametri ordinatis æquidistanter; continget ea ellipsum in solo puncto A. Nam in isto casu DE quidem evanescit, BO vero fit infinita. Quare, ut etiam evanescat AG, & infinita fiat IQ, ducenda erit recta altera BZ per ipsum verticem A.

Per contrarium vero, quotiescumque recta AX angulum constituit cum AD, tunc ea non solum in A, sed in alio quoque puncto secabit ellipsum. Nam, ratione ejus anguli, est finitæ magnitudinis, tam portio DF, quam portio BO: proindeque recta altera BZ per ipsum verticem A transire non poterit.

Inde autem consequitur, quod si in plano descriptæ ellipsis detur positione recta aliqua, quæ non sit parallela diametri ordinatis, semper ex vertice A duci possit recta alia, quæ ei parallela, secet ellipsum in alio puncto; quum non aliter esse queat illi parallela, nisi angulum constituat cum AD.

IX. Denique determinari potest punctum, in quo recta BZ, ducta ex vertice B, secat ellipsum. Nimirum, si ex vertice altero A ducatur recta AX, quæ abscindat, vel ex DE portionem DF, æqualem ipsi AG; vel ex BI portionem BO, æqualem ipsi IQ. Nam intersectio rectarum BZ, AX quæsitum punctum exhibebit.

IX.
Quomodo
determinari
potest punctum,
in quo
recta, ex
vertice alio
ducta, secat
ellipsum.

FIG. 15.

Hinc, siquidem recta BZ cadat super BI, quæ ducta est per verticem B diametri ordinatis æquidistanter; continget ea ellipsum in solo puncto B. Nam in isto casu AG quidem fit infinita, IQ vero evanescit. Quare, ut

104 SECTIONUM CONICARUM
etiam infinita fiat DF, & BO evanescat, dū-
cenda erit recta altera AX per ipsum verti-
cem B.

Per contrarium vero, quotiescumque re-
cta BZ angulum constituit cum BI, tunc non
solum in B, sed in alio quoque puncto ea seca-
bit ellipsim. Nam, ratione ejus anguli, est fini-
tæ magnitudinis, tam portio AG, quam por-
tio IQ: proindeque recta altera AX per ipsum
verticem B duci non poterit.

Huic autem consequens est, quod si in
plano descriptæ ellipsis detur positione recta
aliqua, quæ non sit parallela diametri ordina-
tis, semper ex vertice B duci possit recta alia,
quæ ei parallela, ellipsim secet in alio puncto;
quum non aliter esse queat illi parallela, nisi
angulum constituat cum BI.

X. Cæterum haud quidem putandum est,
ellipsim in plano *per solas rectarum longitu-
dines dumtaxat exposita ratione* posse describi.
Vix enim ulla est ejus proprietas, ex qua *pe-
culiaris* eam describendi modus nobis non
subnascitur. Quin sæpe ex eadem proprietate
possunt etiam *plures* derivari.

*Ellipsis per
solas recta-
rum longi-
tudines de-
scriptio al-
tera paulo
specialius.*
FIG. 16.

Ita, si angulus BAD, quem constituit
diameter AB cum parametro AD, fuerit re-
ctus; atque adeo diameter AB major parame-
metro AD: ope ejusdem illius proprietatis
quæ ellipsi competit relate ad diametrum, po-
terit etiam quæsitæ ellipsis describi in hunc
alium modum.

Extendatur diameter BA usque ad H,
ita ut AH sit ad BH, veluti est AD ad AB.
Deinde, erecta super BH perpendiculari HL,

re-

revolvatur, tum circa verticem A angulus re-
ctus XAY, cum circa verticem alterum B re-
cta BZ.

Fiat porro utriusque revolutio ea lege,
ut intersectio rectæ BZ cum latere anguli
AY contingat semper super recta HL. Et in-
tersectio ejusdem rectæ BZ cum latere altero
AX optatam ellipsim in plano delineabit.

XI. Nec sane difficile erit, *hujus rei ve-
ritatem ostendere*. Ex aliquo enim intersectio-
nis puncto M ducatur ad diametrum ordina-
ta MN: quæ, quum sit ei perpendicularis, pa-
rallela erit ipsi HL: & consequenter duo trian-
gula BNM, BHL æquiangula erunt.

XI.
*Demonstra-
tio alterius
hujus ratio-
nis, qua de-
scribitur posset
ellipsis.*

FIG. 16.

Et quoniam rectus est uterque angulo-
rum BAD; XAY; iidem erunt æquales inter
se: proindeque, ablato communi angulo DAX,
erit etiam angulus BAX æqualis angulo
DAY, sive ALH: & propterea duo trian-
gula MNA, AHL etiam æquiangula erunt.

Uterius MN quadratum est ad rectan-
gulum ANB in ratione composita ex MN ad
AN, & ex MN ad NB. Sed MN est ad AN,
ut AH ad HL; itemque MN est ad NB, ut
HL ad BH. Quare erit MN quadratum ad re-
ctangulum ANB in ratione composita ex AH
ad HL, & ex HL ad BH.

Jam dux istæ rationes componunt pari-
ter rationem, quam habet AH ad BH. Unde erit
ex æquali, ut MN quadratum ad rectangu-
lum ANB, ita AH ad BH. Sed ex constru-
ctione AH est ad BH, ut AD ad AB. Et igi-
tur erit rursus ex æquali, ut MN quadratum
ad rectangulum ANB, ita AD ad AB.

XII. Dis-

XII.
*Quod alter
 ra ipsa ellip-
 sium descri-
 bendi vario
 recidat in
 priorem
 paulo gene-
 raliorem.*

FIG. 16.

XII. Dissimulandum autem hoc loco non est; quod alter iste ellipsim describendi modus omnino recidat in eum, quem primo loco attulimus. Si enim per punctum D ducamus rectam DE , diametro AB parallelam, cui latus AX occurrat in F ; facile erit ostendere, portionem DF æqualem esse portioni AG , quam abscindit ex AD , producta si opus, recta BZ .

Quum enim rectus sit uterque angulorum XAY , DAH ; lidem erunt æquales inter se: proindeque, ablato communi angulo DAY , erit quoque angulus DAX æqualis angulo HAY : & propterea duo triangula AHL , ADF æquiangula erunt; eritque adeo, ut AH ad HL , ita AD ad DF .

Hinc, quum sit BH ad HL in ratione composita ex BH ad AH , & ex AH ad HL ; habebit quoque BH ad HL rationem compositam ex BH ad AH , & ex AD ad DF . Sed ex constructione BH est ad AH , ut AB ad AD . Quare erit rursus BH ad HL in ratione composita ex AB ad AD , & ex AD ad DF .

Jam duæ istæ rationes componunt pariter rationem, quam habet AB ad DF . Unde erit ex æquali, ut BH ad HL , ita AB ad DF . Sed BH est ad HL , ut AB ad AG . Itaque erit rursus ex æquali, ut AB ad DF , ita AB ad AG : & propterea duæ portiones DF , AG æquales erunt inter se.

C A P. V.

*Ratio describendi hyperbolam
in plano per rectas solas
explicatur.*

1. **T** Radita ratione describendi ellipsim in plano per solas rectarum longitudines, *ad hyperbolam eodem pacto describendam* gradum nunc facimus. Dentur itaque in plano aliquo, tum magnitudine, cum positione, rectæ duæ AB, AD, sibi mutuo occurrentes in A. Et oporteat, in eodem plano describere hyperbolam, cujus AB sit diameter, AD parameter diametri, & eadem AD recta illa, cui omnes diametri ordinatæ debent esse parallelæ.

1.
Propositio
ratio descri-
bendi hy-
perbolam in
plano per
rectas solas.
Fig. 17.

Ducatur per punctum D recta DE, ipsi BA parallela. Tum capiantur aliæ duæ rectæ AX, BZ, quæ revolvantur circa puncta A, & B in ipso plano rectarum AB, AD. Fiat autem earum revolutio hac lege, ut portio DF, abscissa ex DE per priorem AX, sit perpetuo æqualis portioni AG, quam ex parametro AD, producta si opus, abscindit eodem tempore recta altera BZ. Dico, curvam, quæ in eodem plano rectarum AB, AD describitur continuis intersectionibus ipsarum AX, BZ, hyperbolam, quam quærimus, esse.

Ex aliquo enim ejus curvæ puncto M ducatur recta MN, ipsi AD parallela, quæ con-

con-

conveniat cum AB, producta, in puncto N. Jamque erit punctum M in quaesita hyperbola, si utique ostendi possit, MN quadratum esse ad rectangulum ANB, ut est AD ad AB. Id vero ostendetur in hunc modum. Quadratum ex MN est ad rectangulum ANB in ratione composita ex MN ad AN, & ex MN ad NB; sive etiam in ratione composita ex AD ad DF, & ex AG ad AB. Sed, ob æquales DF, AG, duæ istæ rationes componunt quoque rationem, quam habet AD ad AB. Itaque erit ex æquali, ut MN quadratum ad rectangulum ANB, ita AD ad AB.

II.
Monita pro
allata hy-
perbola de-
scriptione
melius in-
telligenda.
FIG. 17.

II. Non ergo dubitari potest, quin mutuis intersectionibus rectarum AX, BZ describatur hyperbola, quam quaerimus. Interim, ut descriptio ejus melius intelligatur, notandum est primo, quod ubi recta AX fertur circulariter ex AD versus AK, quam ipsi AB in directum esse suppono; tunc recta altera BZ ferri debeat circulari etiam motu ex BA versus BI, quam parametro BD suppono parallelam. Et quoniam revolutio harum rectarum ea lege fieri debet, ut portiones DF, AG, abscissæ per ipsas ex rectis DE, AD, sint perpetuo æquales inter se: perspicuum est, quod ubi recta AX pervenit ad AK, & infinitam adeo portionem abscindit ex DE; tunc altera BZ super BI reperiatur, quia hac ratione ipsa pariter ex AD infinitam portionem abscindet.

Notandum est etiam, quod quotiescumque eadem AX pergit moveri circulariter ex AK versus AH, quam ipsi AD in directum esse suppono; tunc recta altera BZ prosequi de.

debeat motum suum circulařem ex BI versus BR, in quam AB, quum producitur, cadit. Et quoniam motus earundem rectarum ea adhuc lege fieri debet, ut portiones DF, AG, quas abscindunt ex ipsis DE, AD, ex altera parte productis, maneant semper æquales inter se: liquet, quod ubi recta AX pervenit ad AH, & nullam adeo portionem abscindit ex DE; tunc altera BZ super BR reperiatur, quia hac ratione ipsa etiam ex AD nullam portionem abscindet.

III. Atque hinc luce clarius apparet, hyperbolam constare ex duabus partibus, hinc inde relate ad diametrum positis, quæ simul junguntur in vertice A; eique aliam oppositi, duabus itidem ex partibus constantem, quarum unio contingit in vertice altero B. Ubi enim recta AX fertur circulariter ex AD versus AK, describitur, primo hyperbolæ principalis pars illa, quæ existit in angulo DAK; tum ea hyperbolæ oppositæ; quæ jacet in angulo LBR. Quotiescumque vero eadem AX pergit moveri ex AK versus AH, primo quidem describitur pars illa hyperbolæ oppositæ, quæ continetur in angulo IBR; tum ea hyperbolæ principalis, quæ in angulo HAK reperitur.

Verum quidem est, quod motus rectæ AX continuari possit, usque donec integram circumvolutionem absolvat. Sed, continuando subinde ejus rectæ motum, haud novæ partes utrique hyperbolarum adduntur. Nam primo, quotiescumque recta AX fertur ex AH versus AB; tunc altera BZ prosequetur

mo-

III.
Figura hyperbolæ, ex allata ejus descriptione deducta.
FIG. 17.

motum suum ex BR versus BL, in quam BI, quum producitur, cadit. Quare, quum fiant earum rectarum intersectiones, primo quidem in angulo DAK, tum in angulo LBR; describentur eadem utriusque hyperbolæ portiones, quæ in angulis illis continentur. Et secundo, ubi eadem recta AX fertur ex AB versus AD; tunc altera BZ pergit moveri ex BL versus BA. Unde, quum earundem rectarum intersectiones fiant, primo quidem in angulo IBR, deinde vero in angulo HAK; describentur utriusque hyperbolæ portiones illæ, quæ in iisdem angulis existunt.

IV.
Proprietas
hyperbolæ,
quæ ex ad-
dita ejus
descriptione
consequitur.
FIG. 17.

IV. Ex allata autem hyperbolæ descriptione perspicuum est, *ei id quidem contingere*, ut si per aliquod ejus punctum M ducantur ex diametri verticibus A, & B rectæ duæ AX, BZ; portiones DF, AG, quas ipsæ abscindunt ex rectis DE, AD, productis si opus, sint semper æquales inter se. Sed, si eadem AX, BZ protrahantur, usque donec convenient cum rectis BL, IE, similiter si opus productis, in punctis O, & Q; erunt etiam æquales portiones BO, IQ.

Quum enim æquales sint Inter se, tam duæ AD, BI, quam duæ DF, AG; erit, ut AD ad DF, ita BI ad AG. Sed, ob triangula æquiangula ADF, ABO, AD est ad DF, ut est BO ad AB; itemque, ob triangula æquiangula BIQ, BAG, BI est ad AG, ut est IQ ad AB. Itaque erit ex æquali, ut BO ad AB, ita IQ ad eandem AB: & propterea duæ BO, IQ æquales erunt inter se.

Hinc, per intersectionem rectarum AX,
BZ

BZ describetur quaesita hyperbola, non solum, quum rectæ illæ subinde revolvuntur circa puncta A, & B, ut portiones DF, AG quas abscindunt ex rectis DE, AD, productis si opus, sint perpetuo æquales inter se; verum etiam, quum suas circa puncta illa revolutiones subinde perficiunt, ut sint æquales portiones BO, IQ, quas abscindunt ex rectis BL, IE, similiter si opus productis.

V. Etsi autem æquales sint inter se, tam portiones DF, AG, quam portiones BO, IQ: perspicuum est tamen, *minui quidem istas, quam ea augentur; & per contrarium augeri, quam ea minuantur*. Sed, tam *incrementum*, quam *decrementum* sit semper ea lege, ut rectangulum ex una illarum DF in unam istarum BO exhibeat ubique magnitudinem figuræ ipsius diametri AB. Nam, ob triangula æquiangula ADF, ABO, ut est AD ad DF, ita est BO ad AB: proindeque rectangulum ex DF in BO æquale erit rectangulo ex AD in DB, quod ex superius dictis constituit diametri figuram.

Hinc, quotiescumque æquales fiunt inter se omnes quatuor portiones DF, AG, BO, IQ, necesse est, ut unaquæque ipsarum media evadat proportionalis inter diametrum AB, & ejus parametrum AD; atque adeo, ut cujusque quadratum æquale fiat rectangulo BAD. Id vero contingit, quum rectæ duæ AX, BZ parallelæ sunt inter se; & consequenter, ubi earum intersectio in infinitum abire supponitur.

Ubi enim punctum M abit in infinitum, tunc

V.
Precedentis
propositionis
speciale
quoddam
accidens ad-
notatur.
FIG. 17.

FIG. 18.

tunc duæ AN , NB æquales fiunt inter se ; quum utraque infinita evadat , manente integritate finita ipsarum differentia AB : proindeque erit , ut AN ad MN , ita NB ad eandem MN . Sed , ob triangula æquiangularia ANM , ABO , AN est ad MN , ut AB ad BO ; itemque , ob triangula æquiangularia BNM , BAG , NB est ad MN , ut AB ad AG . Itaque erit ex æquali , ut AB ad BO , ita AB ad AG : & propterea duæ AG , BO æquales erunt inter se.

VI.
Quid peragendum , ut totius hyperbola describitur.

FIG. 17.

VI. Id quum ita sit , *juvat hic advertere* , quod etsi in describenda hyperbola revolutio rectarum AX , BZ temperari possit , tam æqualitate portionum DF , AG , quam æqualitate portionum BO , IQ ; consultius sit tamen , adhibere æqualitatem illarum , quum describi debet hyperbola inferior , quæ transit per verticem A ; & vicissim æqualitatem istarum , quum hyperbola superior , quæ traducitur per verticem B , est describenda.

Quantum enim ad portiones DF , AG ; eæ , sicuti nullius magnitudinis sunt in vertice A , ita in recessu a vertice illo majores semper , ac majores fiunt , tandemque infinitæ evadunt in vertice altero B . Quare integra hyperbola , quæ ex principali , & opposita constat , nunquam describi posset , si revolutio rectarum AX , BZ æqualitate earum portionum esset semper temperanda .

Quantum vero ad portiones BO , IQ ; istæ per contrarium nullius magnitudinis sunt in vertice B , tum in recessu a vertice isto majores semper , ac majores fiunt , tandemque in vertice altero A infinitæ deprehenduntur.

tur . Unde integram hyperbolam numquam adhuc describere liceret , si ipsarum æqualitate revolutionem rectarum AX , BZ dirigere semper oporteret .

Quocirca , ut integræ hyperbolæ descriptio haberi possit , præstat , prius quidem adhibere æqualitatem portionum DF , AG ; tum deinde æqualitatem portionum BO , IQ in subsidium advocare . Et , ut idem sit terminus incrementi , tam illarum , quam istarum ; describi poterit æqualitate priorum hyperbola principalis , quæ transit per verticem A ; & æqualitate posteriorum hyperbola opposita , quæ transit per verticem alterum B .

VII. Ex eo porro , quod æquales sint inter se , tam portiones DF , AG , quam portiones BO , IQ , plura possunt obtineri , aliquam fortasse usum deinceps habitura .

VII.
Quomodo ,
data diametre
cum positione
suarum ordinatarum ,
determinari
possit longitudo
parametri .

Nimirum primo determinari potest longitudo parametri , quotiescumque una cum hyperbola data est , tam diameter AB , quam positio suarum ordinatarum .

FIG. 17.

Sit enim AD , vel BL recta illa , cui omnes diametri ordinatæ sunt parallelæ . Et , sumpto in hyperbola puncto quovis M , agantur per illud ex verticibus diametri A , & B rectæ AX , BZ , quæ cum ipsis AD , BL conveniant in punctis G , & O .

Abscindatur deinde ex AB , utrinque producta , vel portio AS , æqualis ipsi AG , vel portio BT , æqualis ipsi BO . Et parametri longitudinem exhibebit , tam recta SF , parallela rectæ AD , & terminata ad rectam AX ; quam recta TQ , parallela eidem

Tom. I.

H

AD

114 SECTIONUM CONICARUM
AD, & terminata ad rectam BZ.

VIII. *Quomodo definitur punctum, in quo recta AX, ducta ex vertice A, secatur hyperbolam. Nimirum, si ex vertice altero B ducatur recta BZ, quæ abscindat, vel ex AD portionem AG, æqualem ipsi DF; vel ex IE portionem IQ, æqualem ipsi BO. Nam intersectio rectarum AX, BZ quæsitum punctum exhibebit.*

FIG. 17.

Hinc, siquidem recta AX cadat super AD, quæ ducta est per verticem A diametri ordinatis æquidistanter, continget ea hyperbolam in solo puncto A. Nam in isto casu DF quidem evanescit, BO vero fit infinita. Quare, ut etiam evanescat AG, & infinita fiat IQ, ducenda erit recta altera BZ per ipsum verticem A.

Per contrarium vero, quotiescumque recta AX angulum constituit cum AD, tunc ea non solum in A, sed in alio quoque puncto secabit hyperbolam. Nam, ratione ejus anguli, est finitæ magnitudinis, tam portio DF, quam portio BO: proindeque recta altera BZ per ipsum verticem A transire non poterit.

Inde autem consequitur, quod si in plano descriptæ hyperbolæ detur positione recta aliqua, quæ non sit parallela diametri ordinatis, semper ex vertice A duci possit recta alia, quæ ei parallela, secet hyperbolam in alio puncto; quum non aliter esse queat illi parallela, nisi angulum constituat cum AD.

IX. *Quomodo determinatur punctum, in quo recta BZ, ducta ex vertice B, secatur hyperbolam. Nimirum, si ex vertice altero A ducatur recta AX, quæ abscindat, vel ex AD portionem AG, æqualem ipsi DF; vel ex IE portionem IQ, æqualem ipsi BO. Nam intersectio rectarum AX, BZ quæsitum punctum exhibebit.*

FIG. 18.

IX. Denique determinari potest punctum, in quo recta BZ, ducta ex vertice B, secatur hyperbolam. Nimirum, si ex vertice altero A ducatur recta AX, quæ abscindat, vel ex AD portionem AG, æqualem ipsi DF; vel ex IE portionem IQ, æqualem ipsi BO. Nam intersectio rectarum AX, BZ quæsitum punctum exhibebit.

ducatur recta AX , quæ abscindat, vel ex DE vertice alio ducta, hyperbolam faciat. portionem DF , æqualem ipsi AG ; vel ex BL portionem BO , æqualem ipsi IQ . Nam inter- FIG. 17. sectio rectarum BZ , AX quæritum punctum exhibebit.

Hinc, siquidem recta BZ cadat super BL , quæ ducta est per verticem B diametri ordinatis æquidistanter; continget ea hyperbolam in solo puncto B . Nam in isto casu AG quidem fit infinita, IQ vero evanescit. Quare, ut etiam infinita fiat DF , & BO evanescat, ducenda erit recta altera AX per ipsum verticem B .

Per contrarium vero, quotiescumque recta BZ angulum constituit cum BL , tunc non solum in B , sed in alio quoque puncto ea secabit hyperbolam. Nam, ratione ejus anguli, est finitæ magnitudinis, tam portio AG , quam portio IQ : proindeque recta altera AX per ipsum verticem B duci non poterit.

Huic autem consequens est, quod si in plano descriptæ hyperbolæ detur positione recta aliqua, quæ non sit parallela diametri ordinatis, semper ex vertice B duci possit recta alia, quæ ei parallela, hyperbolam secet in alio puncto, quum non aliter esse queat illi parallela, nisi angulum constituat cum BL .

X. Cæterum haud quidem putandum est, hyperbolam in plano *per solas rectarum longi- tudes dumtaxat exposita ratione* posse describi. Vix enim ulla est ejus proprietas, ex qua *peculiaris* eam describendi modus nobis non subnascentur. Quin sæpe ex eadem proprietate possunt etiam *plures* derivari.

X.

Hyperbola per solas rectarum longi- tudes descripta altera puncto specialis.

H 2

Ita,

FIG. 19.

Ita, si angulus BAD , quem constituit diameter AB cum parametro AD , fuerit rectus; ope ejusdem illius proprietatis, quæ hyperbolæ competit relate ad diametrum, poterit etiam quæsitæ hyperbola describi in hunc alium modum.

Secetur diameter AB subinde in puncto H , ut AH sit ad BH , veluti est AD ad AB . Deinde, erecta super BH perpendiculari HL , revolvatur, tum circa verticem A angulus rectus XAY , cum circa verticem alterum B recta BZ .

Fiat porro utriusque revolutio ea lege, ut intersectio rectæ BZ cum latere anguli AY contingat semper super recta HL . Et intersectio ejusdem rectæ BZ cum latere altero AX optatam hyperbolam in plano delineabit.

XI.
Demonstratio
alterius
hujus ratio-
nis, quæ de-
scribitur
hyperbola.

FIG. 19.

XI. Nec sane difficile erit, *hujus rei veritatem ostendere*. Ex aliquo enim intersectionis puncto M ducatur ad diametrum ordinata MN : quæ, quum sit ei perpendicularis, parallela erit ipsi HL : & consequenter duo triangu-
gula BNM , BHL æquiangula erunt.

Et quoniam rectus est uterque angulorum BAD , XAY ; iidem erunt æquales inter se: proindeque, ablato communi angulo DAY , erit etiam angulus BAY æqualis angulo DAX , sive AMN : & propterea duo triangu-
gula MNA , AHL etiam æquiangula erunt.

Uterius MN quadratum est ad rectangulum ANB in ratione composita ex MN ad AN , & ex MN ad NB . Sed MN est ad AN , ut AH ad HL ; itemque MN est ad NB , ut HL ad BH . Quare erit MN quadratum ad re-
ctan-

Etangulum ANB in ratione composita ex AH ad HL, & ex HL ad BH.

Jam duæ istæ rationes componunt pariter rationem, quam habet AH ad BH. Unde erit ex æquali, ut MN quadratum ad rectangulum ANB, ita AH ad BH. Sed ex constructione AH est ad BH, ut AD ad AB. Et igitur erit rursus ex æquali, ut MN quadratum ad rectangulum ANB, ita AD ad AB.

XII. Dissimulandum autem hoc loco non est, quod alter iste hyperbolam describendi modus omnino recidat in eum, quem primo loco attulimus. Si enim per punctum D ducamus rectam DE, diametro BA parallelam, cui latus AX occurrat in F; facile erit ostendere, portionem DF æqualem esse portioni AG, quam abscindit ex AD, producta si opus, recta BZ.

Quum enim rectus sit uterque angulorum XAY, DAH; iidem erunt æquales inter se: proindeque, ablato communi angulo DAY, erit quoque angulus DAX æqualis angulo HAY: & propterea duo triangula AHL, ADF æquiangula erunt; eritque adeo, ut AH ad HL, ita AD ad DF.

Hinc, quum sit BH ad HL in ratione composita ex BH ad AH, & ex AH ad HL; habebit quoque BH ad HL rationem compositam ex BH ad AH, & ex AD ad DF. Sed ex constructione BH est ad AH, ut AB ad AD. Quare erit rursus BH ad HL in ratione composita ex AB ad AD, & ex AD ad DF.

Jam duæ istæ rationes componunt pariter rationem, quam habet AB ad DF. Unde erit ex æquali, ut BH ad HL, ita AB ad DF.

H 3

Sed

XII.
*Quod altera
ista hyperbo-
lam descri-
bendi ratio
recidat in
priorem
paulo gene-
raliorem.*
FIG. 19.

118 SECTIONUM CONICARUM
Sed BH est ad HL, ut AB ad AG. Itaque erit
rursus ex æquali, ut AB ad DF, ita AB ad
AG: & propterea duæ portiones DF, AG æ-
quales erunt inter se.

C A P. VI.

*Quo pacto describi possit para-
bola in plano per rectas
solas, ostenditur.*

1. *Propositur
ratio descri-
bendi pa-
rabolam in
plano per
rectas solas.*
FIG. 20.

I. **I**llud reliquum jam est, ut *qua ra-
tione per solas linearum longitudi-
nes parabola in plano describi possit*, ostenda-
mus. Dentur itaque positione in plano aliquo
rectæ duæ AB, AD, sibi mutuo occurrentes
in A; quarum prior AB sit terminata ad pun-
ctum A, indefinita vero versus B; altera AD
sit etiam magnitudine data. Et oporteat, in eo-
dem plano describere parabolam, cujus AB sit
diameter, AD parameter diametri, & eadem
AD recta illa, cui omnes diametri ordinatæ
debent esse parallelæ.

Ducatur per punctum D recta DE, ipsi
AB parallela. Tum capiantur aliæ duæ rectæ
AX, GZ; quarum prior AX circa punctum A
revolvatur; altera GZ moveatur subinde su-
per AD, ut maneat ipsi AB, vel DE jugiter
parallela. Ferantur autem rectæ istæ ea insu-
per lege, ut portio DF, abscissa ex DE per
priorem AX, sit perpetuo æqualis portioni
AG, quam ex parametro AD, producta si
opus

opus, abscindit eodem tempore recta altera GZ. Dico, curvam, quæ in eodem plano re-
ctarum AB, AD describitur continuis inter-
sectionibus ipsarum AX, GZ, parabolam,
quam quærimus, esse.

Ex aliquo enim ejus curvæ puncto M
ducatur recta MN, ipsi AD parallela, quæ
conveniat cum AB in puncto N. Jamque erit
punctum M in quæsitâ parabola, si utique
ostendi possit, MN quadratum æquale esse re-
ctangulo DAN. Id vero ostendetur in hunc
modum. Quadratum ex MN est ad rectangu-
lum DAN in ratione composita ex MN ad
AD, & ex MN ad AN; sive etiam in ratione
composita ex AG ad AD, & ex AD ad DF.
Sed duæ istæ rationes componunt quoque ra-
tionem, quam habet AG ad DF. Itaque erit
ex æquali, ut MN quadratum ad rectangulum
DAN, ita AG ad DF; & propterea, sicuti
duæ AG, DF inter se sunt æquales; ita erit
MN quadratum æquale rectangulo DAN.

II. Non ergo dubitari potest, quin mu-
tuis intersectionibus rectarum AX, GZ de-
scribatur parabola, quam quærimus, Interim,
ut *descriptio ejus melius intelligatur*, notan-
dum est primo, quod ubi recta AX fertur cir-
culariter ex AD versus AB; tunc recta alte-
ra GZ ferri debeat rectilineo suo motu ex
AB versus DE. Et quoniam motus harum
rectarum ea lege fieri debet, ut portiones DF,
AG, abscissæ per ipsas ex rectis DE, AD sint
perpetuo æquales inter se: perspicuum est,
quod ubi recta AX pervenit ad AB, & infini-
tam adeo portionem abscindit ex DE; tunc

II.
*Monita præ-
allata pa-
rabola de-
scriptione
melius in-
telligenda.*
FIG. 20.

altera GZ ab eadem AB infinite recedat, quia hac ratione ipsa quoque ex AD infinitam portionem abscindet.

Notandum est etiam, quod quotiescumque eadem AX pergit moveri circulariter ex AB versus AH, quam ipsi AD in directum esse suppono; tunc recta altera GZ intelligenda sit ex infinita distantia, ad quam abierat, accedere rursus ad AB per plagam oppositam. Et quoniam motus earundem rectarum ea adhuc lege perfici debet, ut portiones DF, AG, quas abscindunt ex ipsis DE, AD, ex altera parte productis, maneant semper æquales inter se: liquet, quod ubi recta AX pervenit ad AH, & nullam adeo portionem abscindit ex DE; tunc altera GZ super AB reperiatur, quia hac ratione ipsa etiam ex AD nullam portionem abscindet.

III. Atque hinc luce clarius apparet, parabola constare ex duabus partibus, hinc inde relate ad diametrum positæ, quæ simul junguntur in puncto A, vertice ejusdem diametri. Una siquidem describitur, quum recta AX fertur circulariter ex AD versus AB, eaque continetur in agulo BAD. Altera describitur, quum eadem AX moveri pergit ex AB versus AH, & pars ista continetur in agulo BAH. Nec sane, continuando motum ejusdem rectæ AX, usque donec circumferentiam integram absolvat, aliæ ei partes addi possunt.

Nam primo, quotiescumque recta AX fertur ex AH versus AK, quam ipsi AB in directum esse suppono; tunc altera GZ prosequetur.

III.
Figura parabolæ ex
allota ejus
descriptione
deducitur.

FIG. 20.

quætur motum suum ex AB versus DE. Quare, quum fiant earundem rectarum intersectiones in angulo BAD; describetur eadem parabolæ portio, quæ in angulo illo continetur. Et secundo, ubi eadem recta AX fertur ex AK versus AD; tunc altera GZ redibit ad AB per plagam oppositam. Unde, quum earundem rectarum intersectiones fiant in angulo BAH; describetur parabolæ portio illa, quæ eo in angulo continetur.

IV. Ex allata autem parabolæ descriptione perspicuum est, *ei id quidem contingere*, ut si per aliquod ejus punctum M ducantur rectæ duæ AX, GZ, prior quidem pertinens ad verticem A, altera diametro AB parallela; portiones DF, AG, quas ipsæ abscindunt ex rectis DE, AD, productis si opus, sint perpetuo æquales inter se. Inde vero *plura possunt obtineri, aliquem fortasse usum deinceps habitura.*

IV.
Proprietas
parabolæ,
quæ ex ea-
dem descri-
ptione conse-
quitur, &
quomodo per
eam para-
meter defi-
nitur.

FIG. 20.

Nimirum primo *determinari potest longitudo parametri*, quotiescumque una cum parabola data est, tam diameter AB, quam positio suarum ordinatarum.

Sit enim AD recta illa, cui omnes diametri ordinatæ sunt parallelæ. Et, sumpto in parabola puncto quovis M, agantur per illud rectæ duæ AX, GZ, una pertinens ad verticem A, altera diametro AB parallela, quæ conveniat cum ejus parametro AD, producta si opus, in puncto G.

Abscindatur deinde ex diametro AB portio AS, æqualis ipsi AG. Et, ducta per punctum S recta SF, parallela rectæ AD, quæ

oc-

occurrat in F rectæ AX ; exhibebit recta ista SF quæsitam parametri longitudinem.

V. Secundo *definiri potest punctum* , in quo recta AX , ducta ex vertice A , secat parabolam . Nimirum , si ducatur recta GZ , diametro AB parallela , quæ abscindat ex AD , producta si opus , portionem AG , æqualem ipsi DF . Nam intersectio rectarum AX , GZ **FIG. 20.** quæsitum punctum exhibebit.

*Quomodo
definiatur po-
tèst punctum,
in quo
recta, ex
vertice du-
cta, parabola
secat.*

Hinc , siquidem recta AX cadat super AD , quæ ducta est per verticem A diametri ordinatis æquidistanter ; continget ea parabolam in solo puncto A . Nam in isto casu portio DF evanescit . Quare , ut etiam evanescat portio AG , ducenda erit recta altera GZ per ipsum verticem A .

Per contrarium vero , quotiescumque recta AX angulum constituit cum AD , tunc non solum in A , sed in alio quoque puncto parabolam secabit . Nam , ratione ejus anguli est finitæ magnitudinis portio DF : proindeque recta altera GZ per ipsum verticem A transire non poterit .

Huic autem consequens est , quod si in plano descriptæ parabolæ detur positione recta aliqua , quæ non sit parallela diametri ordinatis , semper ex vertice A duci possit recta alia , quæ ei parallela parabolam secet in alio puncto ; quum non aliter esse queat illi parallela , nisi angulum constituat cum AD .

VI. Denique *determinari potest punctum* , in quo recta GZ , ducta æquidistanter diametro AB , parabolam secat . Nimirum , si ex vertice A ducatur recta AX , quæ abscindat ex DE ,

*Quomodo
determinari
potèst punctum,
in quo
recta, dia-*

DE, producta si opus, portionem DF, æqua- metro paral-
lem ipsi AG. Nam intersectio rectarum GZ, lela, para-
AX quæsitum punctum exhibebit. bolam fecit.

FIG. 20.

Quemadmodum autem, finita existente
portione DF, vel AG, rectæ duæ GZ, AX
semper sese mutuo secant; ita omnis recta,
quæ ducitur diametro AB parallela, ad fini-
tam ab ea distantiam, omnino necesse est, ut
parabolam secet. Et, sicuti intersectio recta-
rum GZ, AX contingit in unico puncto; sic
eadem parallela in unico quoque puncto para-
bolam secabit.

Hinc vero consequitur, crura duo, quæ
parabolam constituunt, quo magis a diametri
vertice recedunt, eo majorem ab ipsa diametro
distantiam fortiri. Unde etiam efficitur, ut
parabola sit curva, quæ expanditur in infini-
tum, & quæ nec ex se sola, nec cum sua dia-
metro spatium comprehendit.

VII. Cæterum haud quidem putandum VII.
est, parabolam in plano *per solas rectarum* Parabola
longitudines dumtaxat exposita ratione per solas re-
posse describi. Vix enim ulla est ejus proprietas, ctarum lon-
qua *peculiaris* eam describendi modus nobis gitudinis
non subnascitur. Quin sæpe ex eadem pro- descriptio
prietate possunt etiam *plures* derivari. altera paulo
specialis.

FIG. 21.

Ita, si angulus BAD, quem constituit
diameter AB cum parametro AD, fuerit re-
ctus; ope ejusdem illius proprietatis, quæ pa-
rabolæ competit relate ad diametrum, poterit
etiam quæsitæ parabola describi in hunc alium
modum.

Extendatur diameter BA usque ad H,
ita, ut AH sit æqualis parametro AD. Deinde,
ere-

erecta super BH perpendiculari HL, revolvatur circa verticem A angulus rectus XAY: eodemque tempore feratur super AD recta GZ, ipsi AB æquidistanter.

Fiat porro utriusque motus ea insuper lege, ut intersectio rectæ GZ cum latere anguli AY contingat semper super recta HL. Et intersectio ejusdem rectæ GZ cum latere altero AX optatam parabolam in plano delineabit.

VIII.
Demonstratio
alterius
hujus rationis,
qua describi
potest
parabola.

FIG. 2 I.

VIII. Nec sane difficile erit, *hujus rei veritatem ostendere*. Ex aliquo enim intersectionis puncto M ducatur ad diametrum ordinata MN: quæ, quum sit ei perpendicularis; rectus erit angulus ANM; & consequenter æqualis angulo AHL, qui ex constructione similiter est rectus.

Et quoniam rectus est uterque angulorum DAH, XAY; iidem erunt æquales inter se: proindeque, ablato communi angulo DAY, supererit angulus HAY æqualis etiam angulo DAX: & propterea, quum angulus DAX æqualis sit angulo AMN; erit eidem angulo AMN æqualis pariter angulus HAY.

Hinc duo triangula AHL, MNA æquiangula erunt; eritque adeo, ut AH ad HL, ita MN ad AN. Sed AH est ad HL, ut AD ad MN; quum sint æquales, tam dux AH, AD, quam dux HL, MN. Itaque erit ex æquali, ut AD ad MN, ita MN ad AN: & propterea MN quadratum rectangulo DAN æquale erit.

IX.
Quod altera

IX. Dissimulandum autem hoc loco non est, quod *alter iste parabolam describendi modus*.

das omnino recidat in eum, quem primo loco attulimus. Si enim per punctum D ducamus rectam DE, diametro AB parallelam, cui latus AX occurrat in F; facile erit ostendere, portionem DF æqualem esse portioni AG, quam abscindit ex AD, producta si opus, recta GZ. *Ma parabola describendi ratio recidat in priorem seu in generalem.*

FIG. 21.

Quum enim rectus sit uterque angulorum XAY, DAH, iidem erunt æquales inter se: proindeque, ablato communi angulo DAY, erit quoque angulus DAX æqualis angulo HAY: & propterea duo triangula AHL, ADF æquiangula erunt; eritque adeo, ut AH ad HL, ita AD ad DF.

Et quoniam æquales sunt inter se, tam duæ AH, AD, quam duæ HL, AG; erit quoque, ut AH ad HL, ita AD ad AG. Unde erit ex æquali, ut AD ad DF, ita AD ad AG: proindeque portiones duæ DF, AG æquales erunt inter se.

X. Cæterum allata parabolam describendi rationes sunt illæ eadem, quibus, tum ellipsis, cum hyperbola descriptionem superius obtinuimus. Quod enim hic recta GZ rectilineo motu feratur super AD; id exinde oritur, quod longitudo ipsius AB sit infinita. Nam profecto motus circularis in rectilineum vertitur, quotiescumque centrum ejus motus in infinitum abire supponitur. **X.**
Mouita circa utramque parabolam describendi rationem, & speciatim quoad secundam etiam generalem esse possit.

FIG. 22.

Notatu autem hic dignum existimo, quod altera parabolam describendi ratio, non secus ac prima, obtineat etiam, quum angulus BAD nequaquam est rectus. Si enim rectam HL subinde inclinemus super BH, ut angulus

lus AHL æqualis sit angulo DAH ; ipsumque angulum XAY , qui revolvitur circa verticem A , assumamus æqualem pariter angulo DAH : adhuc exposita ratione parabola describetur.

Ducatur similiter ex aliquo intersectionis puncto M ad diametrum AB ordinata MN . Et quoniam ordinata ista est ipsi AD parallela; erit angulus MNA æqualis angulo DAH . Sed ex constructione angulus DAH æqualis est angulo AHL . Quare erit etiam angulus MNA æqualis angulo AHL .

Rursus, quia positi sunt æquales anguli XAY , DAH ; dempto ex his communi angulo DAY , supererit angulus DAX æqualis etiam angulo HAY . Sed, ob parallelas AD , MN , angulus DAX æqualis est angulo AMN . Quare eidem angulo AMN erit pariter æqualis angulus HAY .

Hinc duo triangula AHL , MNA æquiangulara erunt; eritque adeo, ut AH , seu AD ad HL , ita MN ad AN . Sed, ob æquales angulos DAH , AHL , recta HL est æqualis ipsi AG , sive MN . Itaque erit quoque, ut AD ad MN , ita MN ad AN : & propterea MN quadratum æquale erit rectangulo DAN .

Nec silentio præteribimus, quod altera isthæc parabolam describendi ratio, etiam quum ad suam universalitatem evehitur, recidat in eam, quæ primo loco allata est. Nam ducta per punctum D recta DE , ipsi AB parallela, cum qua latus AX conveniat in F ; adhuc portio DF æqualis fiet portioni AG .

L I B E R III.

*De Conicarum Sectionum
Diametris aliis.*

Conicæ sectiones, præter eam diametrum, quam in ipso cono fortiuntur, aliis etiam infinitis sunt præditæ, ad quas quum referuntur, iisdem proprietatibus gaudent. De aliis hisce diametris conicarum sectionum agendum nobis erit hoc libro: quas tamen methodo plane nova, nec adhuc ab ullo tentata independenter a tangentibus harum curvarum definire conabimur.

C A P. I.

*Ellipsis omnes aliæ diametri
definiuntur.*

1. **Q**uemadmodum in circulo quælibet diameter transit per centrum ejus; sic etiam in ellipsi, cujus species quædam est circulus, diametri omnes transeunt per punctum illud, quod ellipsis *centrum* appellatur.

1. *Quid sit
centrum el-
lipsi, & cur
tali nomine
signetur.*

FIG. 23.

Est autem hoc punctum *id*, quod *bisariam dividit diametrum principalem*, sive quæ ex cono deducitur. Ut si AB sit diameter, quam ellipsis AMB fortitur in ipso cono, eadem-

demque secetur bifariam in puncto C; vocabitur punctum istud C centrum ipsius ellipsis.

Sortitum est vero tale nomen istiusmodi punctum; quia *omnis recta per ipsum ducta, & utrinque ad ellipsim terminata bifariam in eo dividitur*. Ducatur enim per punctum C recta quævis EF, quæ utrinque occurrat ellipsi in punctis E, & F. Dico, rectam istam EF secari bifariam in puncto C.

Demittantur namque ex punctis E, & F ordinatæ ad diametrum EG, FH. Quumque eas inter se sint parallelæ; æquiangula erunt triangula CEG, CFH; proindeque erit, ut CG quadratum ad CH quadratum, ita EG quadratum ad FH quadratum. Sed, propter ellipsim, EG quadratum est ad FH quadratum, ut rectangulum AGB ad rectangulum AHB. Quare erit ex æquali, ut CG quadratum ad CH quadratum, ita rectangulum AGB ad rectangulum AHB.

Hinc, addendo antecedentes consequentibus, erit etiam, ut CG quadratum ad CH quadratum, ita CA quadratum ad CB quadratum; & consequenter latera horum quadratorum CG, CH, CA, CB pariter proportionalia erunt. Sed, ob eadem triangula æquiangula CEG, CFH, CG est ad CH, ut CE ad CF. Itaque erit ex æquali, ut CA ad CB, ita CE ad CF: & propterea, sicuti duæ CA, CB inter se sunt æquales; sic & duæ CE, CF similiter inter se æquales erunt.

11.
Theorema
fundamen-
tale pro de-

11. Ut autem pateat, quod sit diameter ellipsis recta quælibet, ducta per centrum, & utrinque ad eam terminata; *ostendendum est prius*

prius sequens theorema. Nimirum, quod si EF terminus diagonis ellipsos diameter aliis sit aliqua istarum rectarum, eaque bisecet in O subtensam AM, pertinentem ad verticem A, & demissa ad diametrum AB ordinata EG, huic per punctum O parallela ducatur OL; sit semper, ut CL ad CG, ita CG ad CA.

FIG. 23.

Nec sane difficile erit theorema istud ostendere. Nam, sicuti AM dupla est ipsius AQ; ita, ducta ad diametrum AB ordinata alia MN, erit AN dupla quoque ipsius AL. Unde, quum sit etiam diameter AB dupla ipsius AC; erit reliqua NB dupla pariter reliquæ LC: & propterea rectangulum ANB erit quadruplum rectanguli ALC.

Et quoniam MN dupla est etiam ipsius OL; erit MN quadratum quadruplum quadrati, quod sit ex OL. Quare erit, ut MN quadratum ad rectangulum ANB, ita OL quadratum ad rectangulum ALC. Sed, propter ellipsim, MN quadratum est ad rectangulum ANB, ut EG quadratum ad rectangulum AGB. Itaque erit ex æquali, ut OL quadratum ad rectangulum ALC, ita EG quadratum ad rectangulum AGB; & consequenter permutando erit quoque, ut OL quadratum ad EG quadratum, ita rectangulum ALC ad rectangulum AGB.

Hinc, quum, ob triangula æquiangula COL, CEG, OL quadratum sit ad EG quadratum, ut CL quadratum ad CG quadratum; erit rursus ex æquali, ut CL quadratum ad CG quadratum, ita rectangulum ALC ad rectangulum AGB: & propterea, addendo antecedentes consequentibus, erit etiam, ut

Tbm. I.

I

CL

130 SECTIONUM CONFICARUM
 CL quadratum ad CG quadratum, ita rectan-
 gulum ACL ad AC quadratum, hoc est, ita
 CL ad AC: proindeque tres rectæ CL, CG,
 CA continue proportionales erunt.

III. *Præcedentis
 theorematis
 corollarium
 primum.*
 III. Inde vero sequitur primo, quod si ex
 punctis A, & E educantur rectæ AK, EI, ipsis
 EG, AM parallelæ, quarum prior AK con-
 veniat cum EF in puncto K, & altera EI cum
 AB in puncto I; triangulum EGI sit æquale
 trapezio AGEK.

Est enim ex ostensis, ut CL ad CG, ita
 CG ad CA. Sed CL est ad CG, ut CO ad CE;
 five etiam, ut CA ad CI. Quare erit ex æqua-
 li, ut CG ad CA, ita CA ad CI: & propterea,
 quum tres rectæ CG, CA, CI sint continue
 proportionales; erit quoque, ut CG ad CI, ita
 CG quadratum ad CA quadratum.

Jam, propter communem altitudinem
 triangulorum CEG, CEI, CG est ad CI, ut
 est triangulum CEG ad triangulum CEI;
 itemque, ob similia triangula CEG, CKA, CG
 quadratum est ad CA quadratum, ut triangu-
 lum CEG ad triangulum CKA. Quare erit
 rursus ex æquali, ut triangulum CEG ad
 triangulum CEI, ita idem triangulum CEG
 ad triangulum CKA.

Hinc triangula duo CEI, CKA æqualia
 erunt inter se: & propterea, dempto ex iis
 communi triangulo CEG, supererit triangu-
 lum EGI æquale trapezio AGEK. Et si aufe-
 ratur adhuc commune trapezium AGEX; re-
 manebit quoque triangulum XAI æquale
 triangulo XEK.

IV. *Hisdem positis, sequitur secundo, quod*
 trian-

triangulum AOK sit æquale trapetio EOAI.

Est enim ex ostensis, ut CL ad CG, ita CG ad CA. Sed CL est ad CG, ut CO ad CE; itemque CG est ad CA, ut CE ad CK. Quare erit ex æquali, ut CO ad CE, ita CE ad CK: & propterea, quum tres rectæ CO, CE, CK sint continue proportionales; erit quoque, ut CO ad CK, ita CO quadratum ad CE quadratum.

Jam, propter communem altitudinem triangulorum CAO, CAK, CO est ad CK, ut est triangulum CAO ad triangulum CAK; itemque, ob similia triangula CAO, CIE, CO quadratum est ad CE quadratum, ut triangulum CAO ad triangulum CIE. Quare erit rursus ex æquali, ut triangulum CAO ad triangulum CAK, ita idem triangulum CAO ad triangulum CIE.

Hinc triangula duo CAK, CIE æqualia erunt inter se: proindeque, dempto ex iis communi triangulo CAO, supererit triangulum AOK æquale trapetio EOAI. Id vero erui quoque potest ex æqualitate triangulorum XAI, XEK superius ostensa. Nam, addito iis communi trapetio AOEX, fiet trapetium EOAI æquale triangulo AOK.

V. Capiatur porro in ellipsi punctum quodvis aliud P, ex quo ducantur ad diametrum AB duæ aliæ rectæ PS, PQ, ipsis EI, EG parallelæ. Et facile erit ostendere, quod triangulum PQS sit etiam æquale correspondenti trapetio AQRK.

Quum enim similia sint triangula CAK, CGE; erit, ut CA quadratum ad CG quadratum,

I 2 tum,

IV.

Constru-
tum scem-
dum.

FIG. 23.

V.

Constru-
tum ter.

FIG. 23.

24.

tum, ita triangulum CAK ad triangulum CGE . Quare convertendo erit etiam, ut CA quadratum ad rectangulum AGB , ita triangulum CAK ad trapezium $AGEK$.

Eadem ratione, quum similia sint triangu-
la CAK , CQR ; erit, ut CA quadratum
ad CQ quadratum, ita triangulum CAK ad
triangulum CQR . Unde convertendo erit
quoque, ut CA quadratum ad rectangulum
 AQB , ita triangulum CAK ad trapezium
 $AQRK$.

Hinc autem, per æqualitatem rationis
ordinatam, erit pariter, ut rectangulum AGB
ad rectangulum AQB , ita trapezium $AGEK$
ad trapezium $AQRK$: adeoque, quia, propter
ellipsim, rectangulum AGB est ad rectangu-
lum AQB , ut EG quadratum ad PQ quadra-
tum; erit ex æquali, ut EG quadratum ad
 PQ quadratum, ita trapezium $AGEK$ ad tra-
pezium $AQRK$.

Et quoniam ex constructione parallelæ
sunt inter se, tam duæ EG , PQ , quam duæ
 EI , PS ; triangu-
la duo EGI , PQS similia
erunt. Unde, quum sit, ut EG quadratum
ad PQ quadratum, ita triangulum EGI ad
triangulum PQS ; erit rursus ex æquali, ut
triangulum EGI ad triangulum PQS , ita tra-
pezium $AGEK$ ad trapezium $AQRK$: & pro-
pterea, quemadmodum triangulum EGI osten-
sum est æquale trapezio $AGEK$; ita quoque
erit triangulum PQS æquale trapezio $AQRK$.

VI.
Confessio-
nem quæ-
ram.

VI. Denique, si recta PS , ipsi EI paral-
lela, conveniat cum recta EF in puncto V ,
nullo negotio ostendemus quoque, quod trian-
gu-

gulum PVR sit æquale correspondenti trapezio EVSI.

Ponamus etenim primo, quod punctum **S** sit supra verticem **A**, & quod punctum **P** existat inter **A**, & **E**. Quia igitur triangulum **EGI** ostensum est æquale trapezio **AGEK**, & triangulum **PQS** æquale trapezio **AQRK**: si ex triangulo auferatur triangulum, ex trapezio trapezium, ex utroque autem commune trapezium **PQGZ**; supererit trapezium **EZSI** æquale trapezio **PZER**: proindeque, addito communi triangulo **EZV**, fiet trapezio **EVSI** æquale triangulum **PVR**. Fig. 23.

Ponamus secundo, quod punctum **S** sit quidem supra verticem **A**, sed quod punctum **P** sit ad alteram partem puncti **E** relate ad eundem verticem **A**. Et rursus, quia triangulum **EGI** ostensum est æquale trapezio **AGEK**: addito communi trapezio **EGQR**, fiet trapezium **EIQR** æquale trapezio **AQRK**, sive etiam triangulo **PQS**: & proinde, dempto communi trapezio **VSQR**, fiet trapezio **EVSI** rursus æquale triangulum **PVR**.

Ponamus denique, quod punctum **S** sit infra verticem **A**. Et quoniam triangulum **PQS** ostensum est æquale trapezio **AQRK**: addito, vel dempto communi trapezio **VSQR**, fiet triangulum **PVR** æquale trapezio **ASVK**. Sed, propter æqualitatem triangulorum **XEK**, **XAI**, superius ostensam, trapezium **ASVK** est æquale trapezio **EVSI**. Quare etiam triangulum **PVR** æquale erit trapezio **EVSI**. Fig. 24.

VII. Priusquam ulterius progrediamur, *notatu hic dignum existimo*, quod punctum **P**

VII.
Mentum

I 3

ita

*elica possit
ma duo cen-
sistur.*

FIG. 23. ita quidem a nobis sumptum est in ellipsi, ut ordinata PQ, exinde ducta ad diametrum AB, cadat supra centrum ellipsis. Sed fieri quoque potest, ut eadem illa ordinata, vel ad centrum dirigatur, vel etiam cadat infra centrum.

24.

Quotiescumque ordinata PQ dirigitur ad centrum; liquido patet, trapezium AQRK non differre a triangulo CAK. Sed, ubi eadem ordinata cadit infra centrum; tunc loco trapezii AQRK sumenda est differentia triangulorum CAK, CQR, quam in omni casu trapezium illud adæquat.

Similiter idem punctum P subinde quidem a nobis sumptum est in ellipsi, ut recta PS, exinde ducta æquidistanter ipsi EI, conveniat cum EF supra centrum ellipsis. Sed fieri quoque potest, ut eadem recta PS conveniat cum EF, vel in ipso centro, vel etiam infra centrum.

Quotiescumque recta PS occurrit alteri EF in ipso centro; manifestum est, trapezium EVSI non differre a triangulo CEI. Sed, ubi occurrit infra centrum; tunc loco trapezii EVSI sumenda est differentia triangulorum CEI, CVS, quam in omni casu trapezium illud adæquat.

VIII.
*Offenditur
quod omnis
recta, ducta
per centrum,
sit diameter
ellipsos.*

FIG. 23.

24.

VIII. His præmissis, facile modo erit ostendere, quod sit diameter ellipsis recta qualibet, ducta per centrum, & utrinque ad eam terminata. Ut enim talis esse possit, duo quidem requiruntur. Primum, ut bisecet rectas omnes, aliqui æquidistanter ductas, & utrinque terminatas ad ellipsim. Deinde, ut quadrata

ex

ex semilibus istarum rectarum sint, ut recta-
gula, quæ sub correspondentibus ipsius por-
tionibus continentur.

Jam horum utrumque facili negotio de-
monstrabitur. Quantum enim ad primum, sic
EF recta quævis ducta per centrum C, eaque
bifecet in O subtensam AM, pertinentem ad
verticem A diametri principalis. Dico, ean-
dem EF secare quoque bifariam in V, quam-
vis aliam rectam PP, quæ ipsi AM parallela,
utrinque ad ellipsim terminatur.

Positis enim omnibus, ut supra; erit u-
trumque triangulorum PVR, PVR æquale
trapezio EVSI. Quare æqualia erunt inter se
ipsa duo triangula PVR, PVR. Sed eadem
triangula, velut similia, sunt ut quadrata la-
terum homologorum PV, PV. Itaque late-
ra isthæc homologa PV, PV erunt pariter æ-
qualia; & consequenter tota PP bifariam secta
erit in V.

IX. Quantum vero ad secundum, *Nec
etiam magno mentis acumine opus est, ad illud
ostendendum.* Maneant enim omnia, adhuc ut
supra. Et dico insuper, quadrata ipsarum AO,
PV esse inter se, ut rectangula correspon-
dentia EOF, EVF.

IX.
Pars altera
demonstra-
tionis, quæ
precedens
veritas confir-
matur.

FIG. 23.

24.

Quum enim similia sint triangula CEI,
COA; erit, ut CE quadratum ad CO qua-
dratum, ita triangulum CEI ad triangulum
COA. Quare convertendo erit etiam, ut CE
quadratum ad rectangulum EOF, ita trian-
gulum CEI ad trapezium EOAI.

Eadem ratione, quum similia sint trian-
gula CEI, CVS; erit, ut CE quadratum ad

I 4

CV

CV quadratum, ita triangulum CEL ad triangulum CVS. Unde convertendo erit quoque, ut CE quadratum ad rectangulum EVF, ita triangulum CEL ad trapezium EVSI.

Hinc autem, per æqualitatem rationis ordinatam, erit pariter, ut rectangulum EOF ad rectangulum EVF, ita trapezium EOAI ad trapezium EVSI: adeoque, quia trapezia ista ostensa sunt æqualia triangulis AOK, PVR; erit ex æquali, ut triangulum AOK ad triangulum PVR, ita rectangulum EOF ad rectangulum EVF.

Quoniam verò ex constructione parallelæ sunt inter se, tam duæ AK, PR, quam duæ AO, PV; triangula duo AOK, PVR similia erunt. Quare, quum sit, ut AO quadratum ad PV quadratum, ita triangulum AOK ad triangulum PVR; erit rursus ex æquali, ut AO quadratum ad PV quadratum, ita rectangulum EOF ad rectangulum EVF.

X. Non ergo dubitari potest, quin recta EF, ducta per centrum C, & utrinque ad ellipsim terminata, sit ejus diameter. Nam & bifariam dividit rectas omnes, quæ subtensæ AM æquidistantes, utrinque ad curvam terminantur. Et quadrata ex semissibus istarum rectarum servant inter se eandem rationem, quam habent rectangula, sub correspondentibus ipsius EF portionibus contenta.

Sed facile erit etiam ostendere, quod præter eas, quæ transeunt per centrum ellipsis, nulla alia recta linea possit esse diameter ejus. Ut enim recta aliqua esse queat diameter ellipsis, illud primo requiritur, ut bisariam se-

cet

X.
Quod ea
tantum re-
cta sint elli-
psis diamet-
ri, quæ
transeunt
per centrum.
FIG. 23.
24.

cet rectas omnes, alicui æquidistanter ductas, & utrinque ad ellipsum terminatas. Unde, si ostendi possit, accidens istud iis tantummodo rectis competere, quæ transeunt per centrum ellipsis; jam veritas ejus, de quo agitur, liquido constabit.

Id vero ostendetur in hunc modum. Sit TY recta positione data, cui debent esse parallelae ex omnes, quæ bifariam a diametro dividuntur. Jamque, si ea parallela est ordinatis diametri principalis AB; secabit diameter ista AB bifariam rectas omnes, quæ ipsi TY æquidistantes, utrinque ad ellipsum terminantur.

Quod si autem recta TY non sit parallela ordinatis diametri principalis AB; per ea, quæ superius ostensa sunt, semper ex vertice hujus A duci poterit recta alia AM, quæ illi parallela, ellipsum secet in alio puncto. At rectas omnes ipsi AM æquidistanter ductas, & utrinque ad ellipsum terminatas, ut modo vidimus, non alia bifecat recta, quam quæ transeat per centrum C, & bifariam dividit subtenfam ipsam AM.

XI. Cæterum circa diametros ellipsis illud notare sedulo oportet, quod si aliqua extiterit diameter, ordinatis alterius parallela, ista vicissim illius ordinatis æquidistans esse debeat. Sit enim AB ellipsis diameter aliqua, ejusque ordinatis parallela sit diameter alia EF. Dico, vicissim diametrum AB parallelam esse ordinatis ipsius EF.

XI.
Quod requirit una diameter parallela esse ordinatis alterius, nisi & ista æquidistans sit ordinatis illius.

FIG. 25.

Ducatur siquidem recta MP, ipsi AB parallela, quæ utrinque ad ellipsum terminatur
con-

conveniat cum EF in V. Jamque, actis ad eandem AB ordinatis MN, PQ, erunt istæ æquales inter se, velut parallelogrammi MQ latera opposita; & consequenter erunt etiam æqualia rectangula ANB, AQB, quæ illarum quadratis proportionem correspondent.

Hinc, detractis rectangulis istis ex æqualibus quadratis CA, CB; æqualia erunt pariter reliqua quadrata CN, CQ; atque adeo æqualia quoque ipsa horum quadratorum latera CN, CQ. Sed, propter parallelogramma CM, CP, duæ CN, CQ sunt æquales duabus MV, PV. Itaque MV, PV etiam inter se æquales erunt: & propterea tota PM bisecta erit in V.

XII. *Demonstratio pars altera, & quod hinc ista diametri vocentur conjugata.*
 XI. Secat igitur EF bifariam rectas omnes, quæ ipsi AB æquidistantes, utrinque ad ellipsim terminantur. Unde, *ut veritas ejus, de quo agitur, omnimode constet*, ostendendum est quoque, quadrata ex semissibus istarum rectarum esse, ut rectangula, quæ sub correspondentibus portionibus ipsius EF continentur; hoc est, AC quadratum esse ad MV quadratum, ut est rectangulum ECF ad rectangulum EVF.

Id autem ostendetur hac ratione. Quoniam EC, MN sunt ordinatæ diametri AB; erit EC quadratum ad MN, seu CV quadratum, ut est rectangulum ACB, seu AC quadratum ad rectangulum ANB. Itaque convertendo erit etiam, ut EC quadratum, seu rectangulum ECF ad rectangulum EVF, ita AC quadratum ad CN, seu MV quadratum.

Nulli ergo dubium esse potest, quod si
 ali.

aliqua ellipsis diameter parallela sit ordinatis alterius diametri, ista per contrarium æquidistans esse debeat ordinatis illius. Binæ autem istæ diametri, quarum altera alterius ordinatis æquidistat, sæpius deinceps sub contemplationem venient. Et, ut commodius distinguantur, vel ambas simul *conjugatas*, vel alteram alterius *conjugatam* appellabimus.

C A P. II.

Diametrorum ellipsis communia quædam ostenduntur.

I. **V**idimus præcedenti capite, ellipsum, præter eam diametrum, quam in ipso cono fortitur, alias etiam innumeras habere, quarum quælibet transit per centrum ipsius ellipsis. Sed *communis harum diametrorum*, operæ pretium est, ut paulo distinctius prosequamur. Quem in finem ellipsis AMB sit AB diameter principalis, centrum punctum D, & EF alia quævis diameter.

1.
*Proprietates
diametri
principalis
ad omnes alias
diametros
ellipsos
trahuntur.*

FIG. 26.

Primo igitur, quemadmodum diameter principalis AB suas habet ordinatas; ita suis quoque refertur ordinatis diameter alia EF. Sunt autem ex ostensis ordinatæ istæ rectæ illæ omnes, quæ ducuntur æquidistanter sub tensæ AM, quam ab ipsa EF suppono bifectam in puncto O.

Deinde, quemadmodum quadrata ordinatarum diametri principalis AB sunt inter se,

se, ut rectangula, sub correspondentibus ejus portionibus contenta; ita & quadrata ordinarum alterius diametri EF sunt proportionalia rectangulis, quæ continentur sub portionibus correspondentibus ipsius EF.

Unde porro, si per verticem E ducatur recta EH ordinatis æquidistanter, quæ sit talis longitudinis, ut quadratum unius ordinatæ AO sit ad rectangulum EOF, veluti est EH ad EF; erit in hac eadem pariter ratione quadratum cujuslibet alterius ordinatæ PV, ad rectangulum EVF.

Et quemadmodum rectam istam EH appellare licebit *parametrum* diametri EF; ita si jungatur FH, cum qua conveniat in X ordinata quævis PV; erit PV quadratum æquale rectangulo EVX, & consequenter minus rectangulo, quod fit ex parametro EH in abscissam correspondentem EV.

Quin & defectus ipsius PV quadrati a rectangulo HEV erit similiter rectangulum aliud, quod habens pro sua latitudine eandem abscissam EV, est simile, similiterque positum ei, quod fit ex parametro EH in ipsam diametrum EF.

II.

*Communes
quoque sunt
proprietates,
quas ex
ellipsi
descri-
ptione dedu-
cimur.*

II. Hæc quum ita sint, perspicuum est, *omnes illas proprietates, quæ ellipsi competunt relate ad diametrum principalem, obtinere etiam, quum ad aliam quamvis diametrum ellipsis ipsa refertur.*

FIG. 26.

Hinc ulterius, sicuti describitur ellipsis in plano, per solas rectarum longitudes, data magnitudine, & positione, tam diametro principali AB, quam parametro ejus AD; sic
etiam

etiam describi poterit eadem ellipsis, ubi magnitudine, & positione datur, tum alia quævis diameter EF, cum illius parameter EH.

Et sicuti recta AD, ducta per verticem A ipsius diametri principalis AB, æquidistanter suis ordinatis, contingit ellipsim in solo puncto A; ita etiam recta EH, ducta per verticem E alterius cujuslibet diametri EF, similiter ordinatis suis æquidistanter, dumtaxat in puncto E tanget ellipsim.

Quin imo, sicuti omnis alia recta, quæ ducta ex eodem vertice A, angulum constituit cum AD, non solum in A, sed in alio quoque puncto secat ellipsim; sic pariter quælibet alia recta, quæ ducta ex eodem vertice E angulum continet cum EH, non modo in E, verum etiam in puncto alio occurreret eidem ellipsi.

Unde etiam, si in plano ipsius ellipsis detur positione recta aliqua, quæ non sit parallela ordinatis cujuslibet alterius diametri EF, semper ex vertice E duci poterit recta alia, quæ ei parallela, ellipsim secet in alio puncto; quum non aliter esse queat illi parallela, nisi angulum contineat cum EH.

III. Sed, his ita se habentibus, liquet quoque, quod *sicuti ex diametro principali transire licuit ad alias diametros; sic vicissim ex qualibet alia diametro, tum ad ipsam principalem, cum ad alias omnes progredi licebit.*

Nam semper ac eadem sunt diametrorum omnium proprietates, theorema illud fundamentale, quod præcedenti capite ostensum est relate ad diametrum principalem, poterit

III.

Quod ex qualibet ellipsis diametro transire possit in omnes alias.

FIG. 26.

terit eadem omnino ratione demonstrari de quavis alio diametro EF.

+ Hinc erit recta
 $VCE = CR^2$;
 $CR^2 = VCE + VA^2$
 quia EV bisectat
 sectionem in R ut EP
 in G; quod est
 eiuſmodi Theorema.

Itaque, si per centrum ellipsis C ducatur recta aliqua AB, quæ bisecet in G subtenſam PE, pertinentem ad verticem E; & demissa ad diametrum EF ordinata PV, huic per punctum G parallela agatur GR, erit, ut CV ad CR, ita CR ad CE. †

Unde, quum omnes illæ æqualitates triangulorum, trapeziorumque, quas superiori capite prosecuti sumus relate ad diametrum principalem, obtineant quoque respectu ipsius diametri EF; facile erit ostendere, rectam illam AB esse diametrum quoque ipsius ellipsis.

Inde enim conficitur, ipsam AB secare bisariam rectas omnes, æquidistantes ductas subtenſæ PE, & utrinque terminatas ad ellipſim; itemque quadrata ex semilibus istarum rectarum proportionalia esse rectangulis, quæ sub correspondentibus portionibus ipsius AB continentur.

IV.
 Alia diametrorum ellipsis proprietates communes, respectu rectas, quas bisecant.

IV. Habent igitur omnes aliæ ellipsis diametri easdem omnino proprietates cum diametro principali; & ex qualibet earum, tunc ad ipsam principalem, cum ad alias omnes progredi licet. Sed ellipseos diametri, præter hæc recensitas proprietates, plures alias communes habent, quas non abs re erit hic breviter ostensas exhibere.

Ac principio quidem illud nobis est ostendendum, quod qualibet diameter ellipsis non alias rectas, utrinque ad curvam terminatas, dividat bisariam, quamquæ; vel tranſeunt

seunt per centrum, vel ordinatim ad ipsam diametrum applicantur.

Sit enim AB ellipsis AMB diameter FIG. 24.
quævis, sitque etiam AD recta illa, cui omnes ejus diametri ordinatæ sunt parallelæ. Ducatur in ellipsi recta PP, quæ utrinque ad curvam terminata, nec transeat per centrum C, nec sit ordinatim applicata diametro AB. Dico, eam ab ipsa diametro AB non posse secari bifariam.

Si enim fieri potest, secetur recta PP a diametro AB bifariam in S. Et quoniam ea non est parallela ordinatis ipsius AB; ex superius ostensis duci poterit per verticem A recta alia, quæ ipsi PP parallela ellipsim secet in alio puncto. Ducatur itaque recta ista, & sit AM. Tum, bisecta ea in puncto O, jungatur CO, quæ extendatur usque donec occurrat ellipsi in punctis E, & F.

Quia igitur recta EF transit per centrum C, & bifecat in O subtenfam AM, pertinentem ad verticem A; per superius ostensa secabit quoque bifariam in V rectam PP, ipsi AM parallelam. Sed ex hypothese recta PP secatur bifariam in S. Quare eadem PP bisecta erit, tam in puncto S, quam in puncto V. Quod fieri non potest.

V. Ex eo autem, quod quælibet diameter ellipsis eas tantum rectas, utrinque ad curvam terminatas, bifariam dividat, quæ vel transeunt per centrum, vel ordinatim ad ipsam applicantur; sequitur per contrarium, ut si aliqua ellipsis diameter bifecet rectam aliquam, non transeuntem per centrum, & utrinque

V.
*Quomodo
data ellipsis,
sive cen-
trum, sive
diameter a-
liqua potest
reperi.*

ter-

Y44 SECTIONUM CONICARUM
*terminatam ad ellipſim , hæc eſſe debeat diame-
 tri illius ordinata.*

Unde ulterius conſequitur , ut ſi recta aliqua biſecet alias duas æquidistantes , & utrinque ad ellipſim terminatas , ea eſſe debeat diameter ipſius ellipſis , atque adeo tranſire per centrum . Nam aliter , ducta per punctum biſectionis unius ex rectis æquidistantibus , & centrum recta alia , hæc velut diameter biſecabit quoque rectam aliam æquidistantem . Quod fieri non poteſt.

Id vero quum ita ſit , facile erit , cujuſlibet datæ ellipſis , ſive centrum , ſive diametrum aliquam reperire . Neque enim aliud fieri debet , quam ducere intra datam ellipſim rectas duas æquidistantes , & utrinque ad curvam terminatas . Nam , ſicuti recta , quæ eas bifariam dividit , diameter erit ellipſis ; ſic & punctum , quod biſecat diametrum iſtam , ejusdem centrum exhibebit.

VI. Speciatim in omni ellipſi reperire licet *VI. Quod in omni ellipſi reperire liceat diametrum , quæ cum ſuis ordinatis rectos angulos conſtituat .* Inveniatur ſiquidem ipſius datæ ellipſis diameter quævis EF , ſitque EH recta illa , cui omnes iſtius diametri ordinatæ debent eſſe parallelæ . Jamque , ſi angulus FEH fuerit rectus , erit ipſa EF diameter optata . Quod ſi ſecus contigerit , inveniemus diametrum , quam quærimus , ſequenti ratione .

Super diametro EF deſcribatur ſemicirculus EPF , qui neceſſario ſecabit ellipſim in puncto aliquo P . Jungantur deinde rectæ PE , PF , quæ ſecentur bifariam in punctis G , & I . Agantur porro per puncta iſta dia-

VI.
 Quod in
 omni ellipſi
 reperire li-
 ceat diame-
 trum , quæ
 rectos angu-
 los conſtituat
 cum ſuis or-
 dinatis .

Fig. 27.

diametri KL, AB. Et utraque harum diameterum eam, quam quærimus, exhibebit.

Ob rectas enim PE, EF bisectas in punctis G, & C, GE est ad GP, ut CE ad CF. Quare diameter KL ipsi PF parallela erit; adeoque angulus CGE æqualis erit angulo FPE. Sed, propter semicirculum, angulus FPE est rectus. Itaque etiam angulus CGE rectus erit; & conlequenter diameter KL cum suis ordinatis rectos angulos constituet.

Eadem ratione, ob rectas EF, PF bisectas in punctis C, & I, CE est ad CF, ut PI ad IF. Itaque diameter AB ipsi PE parallela erit; atque adeo angulus CIF æqualis erit angulo EPF. Sed, propter circulum, angulus EPF est rectus. Quare rectus erit quoque angulus CIF: & propterea diameter AB cum ordinatis suis rectos angulos continebit.

VII. Neque vero difficile erit ostendere *id, quod in constructione assumptum est*, nimirum, quod semicirculus, descriptus super diametro EF, occurrere debeat ellipsi in puncto aliquo P. Quum enim recta EH non sit perpendicularis ipsi EF, utique semicirculus ille, necesse est, ut secet, vel ipsam EH, vel eam, quæ ducitur per punctum F eidem EH æquidistanter.

VII.

*Demonstratio
ejus, quod
assumptum
est in præ-
cedenti con-
structione.*

FIG. 27.

Ponamus, semicirculum illum secare rectam EH. Id itaque fiet, quia recta EH constituet cum diametro EF angulum acutum versus eam partem, in qua semicirculus describitur. Quare recta, quæ ducitur per punctum F, ipsi EH parallela, efficiet cum eadem EF angulum obtusum: & propterea

Tom. I.

K

per-

perpendicularis, quæ ex eodem puncto F erigitur super EF , secabit ellipsum versus eam partem, in qua semicirculus reperitur.

Jam semicirculus, descriptus super diametro EF , ut ellipsum secare nequeat, necesse plane est, ut cadat totus, vel intra, vel extra eam. Sed horum utrumque fieri nequit. Non enim primum; quia sic minime conveniret cum recta EH , quam tamen necessario secare debet. Nec item secundum; quia eo pacto occurreret perpendiculari, ex puncto F erectæ super EF , quæ tamen tota extra eam cadat oportet.

VIII.
De duobus
axibus ellip-
sis, et quod
ipsa abeat in
circulum
quum
sunt æquales.

VIII. In qualibet igitur ellipsi existunt binæ diametri, quæ rectos cum suis ordinatis angulos constituunt. Hujusmodi diametros, quas liquet esse conjugatas, vocabimus in posterum axes ipsius ellipsis; eosque non aliter inter se mutuo æquales esse posse, quam ubi ellipsis ipsa abeat in circulum, facile erit ostendere.

FIG. 27. Sint enim AB , KL axes ellipsis AMB . Dico, ellipsum ipsam circulum fieri, ubi æquales sunt inter se duo illi axes AB , KL .

Ducatur ad axem unum AB ordinata quævis MN . Et quoniam KC , MN sunt ordinatæ binæ ipsius AB ; erit, ut KC quadratum ad MN quadratum, ita rectangulum ACB , sive AC quadratum ad rectangulum ANB . Sed, ob axium æqualitatem, KC quadratum est æquale AC quadrato. Quare etiam MN quadratum erit æquale rectangulo ANB .

Est igitur curva AMB talis naturæ, ut demissa ex aliquo ejus puncto M perpendiculari

lari MN super AB, sit semper MN quadratum æquale rectangulo ANB, contento sub correspondentibus portionibus ipsius AB. Unde, quum hæc sit circuli proprietas essentialis, ipsa curva AMB circulus erit.

IX. Quomodo axes ellipsis æquales inter se mutuo esse non possunt, nisi, quum ellipsis ipsa abeat in circulum; ita, *descriptis super iis, velut diametris, circulis duobus, cadet totus intra ellipsim, qui describitur super axe minore; & vicissim totus extra eam, qui describitur super axe majore.*

IX.
*Quomodo
circuli, super
axibus de-
scriptis, se ha-
bent relatis
ad ellipsim.*

Sint enim AB, KL axes ellipsis AMB; FIG. 28. sitque etiam AB axis major, & KL axis minor. Describantur super iis, velut diametris, circuli duo. Dico, eum, qui describitur super AB, cadere totum extra ellipsim; per contrarium vero illum, qui describitur super KL, cadere totum extra eam.

Sumatur in ellipsi punctum quodvis M, ex quo ducantur ad axes ordinatæ MN, MO, quæ convenient cum circulis, descriptis super iis, in punctis P, & Q. Ostendendum est igitur, PN quidem majorem esse, quam MN; QO vero minorem, quam MO. Id autem ostendemus in hunc modum.

Quoniam KL minor est, quam AB; erit quoque KC quadratum minus rectangulo ACB. Sed, ob ellipsim, KC quadratum est ad MN quadratum, ut rectangulum ACB ad rectangulum ANB. Quare etiam MN quadratum minus erit rectangulo ANB; & propterea, quum, propter circulum, PN quadratum sit æquale rectangulo ANB; erit PN major, quam MN.

K 2 Ea-

Eadem ratione, quoniam AB major est, quam KL; erit quoque AC quadratum majus rectangulo KCL. Sed, ob ellipsim, AC quadratum est ad MO quadratum, ut rectangulum KCL ad rectangulum KOL. Quare etiam MO quadratum majus erit rectangulo KOL: & propterea, quia, propter circulum, QO quadratum est æquale rectangulo KOL; erit QO minor, quam MO.

X. Jam, ut aliqua dicamus de angulis, quos alia ellipsis diametri cum ordinatis suis constituent, sit AB axis major ellipsis; & ducta ex vertice ejus A subtenfa quavis AM, sit EF diameter, quæ bifecat in O istam subtenfam, eamque velut suam ordinatam agnoscit; jungaturque BM.

De angulis, quos alia ellipsis diametri cum ordinatis suis constituent.

FIG. 29.

Quia igitur AC est ad CB, ut AO ad OM; erit BM ipsi EF parallela: proindeque angulus AMB erit æqualis angulo AOC, quem diameter cum ordinata ad plagam unam constituit. Unde alia ellipsis diametri cum ordinatis suis saltem ad partem unam non alios angulos continebunt, quam quos suscipere possunt portiones, in quas dividitur ellipsis ab axe majore.

Nullum vero horum angulorum rectum esse posse, sed quemlibet obtusum existere; jam exinde consequitur, quod circulus, qui describitur super AB, velut diametro, totus cadat extra ellipsim. Eisdem autem majores semper, atque majores fieri, prout ipsorum vertices magis, atque magis ad axem minorem accedunt, tandemque maximos evadere in

In punctis K, & L; haud difficile erit ostendere.

Si enim, demissa ad axem majorem AB ordinata MN, capiatur CQ æqualis CN, & ad punctum Q ducatur ordinata alia PQ; ob æqualia rectangula ANB, AQB, erunt etiam æqualia quadrata ordinarum MN, PQ: proindeque segmentum circuli, transiens per tria puncta A, M, B, transibit quoque per punctum P. Unde, sicuti segmentum istud eo minoris fit latitudinis, quo puncta M, & P ad axem minorem magis accedunt; sic & ipsi anguli AMB, APB eo majores evadunt, quo minor est suorum verticum ab axe minore distantia.

XI. Sed, ut ad communes diametrorum proprietates rursus revertamur, illud etiam omnibus accidit, ut ordinatae, quæ ad duas quascumque diametros ab alternis earum verticibus ducuntur, dividant ipsas diametros in eadem ratione.

XI.
Diametri ab ordinatis, super illis ductis ab alternis earum verticibus, dividuntur in eadem ratione.

Sint enim AB, EF duæ quævis diametri ellipsis AMB. Et ducatur ex vertice E ordinata EG ad diametrum AB, & ex vertice A ordinata AO ad diametrum EF. Dico, fore, ut BG ad AG, ita FO ad EO.

FIG. 29.

Extendatur ordinata una AO usque donec occurrat ellipsi ad partem alteram in M; tumque agatur per punctum O recta OL, ipsi EG parallela, quæ conveniat cum diametro AB in puncto L.

Et quoniam subtenſa AM pertinet ad verticem A, eaque dividitur bisariam per rectam EF; tranſeuntem per centrum C; erit ex

K 3 su.

150 SECTIONUM CONICARUM
superius ostensis, ut CL ad CG , ita CG ad CA . Unde, quum CL sit ad CG , ut est CO ad CE ; erit ex æquali, ut CG ad CA , ita CO ad CE .

Quoniam vero invertendo CA est ad CG , ut CE ad CO ; erit, per conversionem rationis, ut CA ad AG , ita CE ad EO ; & sumendo antecedentium dupla, erit etiam, ut AB ad AG , ita EF ad EO . Unde demum dividendo erit, ut BG ad AG , ita FO ad EO .

XII. Hujus autem proprietatis ope, facile erit, *cujuscunque ellipseos diametri positionem suam ordinatarum definire.*

Sit enim AB diameter, cujus ordinatæ quærantur. Ducatur intra ellipsim recta quævis PP , quæ non transeat per centrum. Tum, secta ea bifariam in V , jungatur CV , quæ extendatur in E , & F .

Agatur porro ex vertice A recta AM , ipsi PP parallela, quæ diametro EF occurrat in O . Et siquidem AB subinde secetur in G , ut BG sit ad AG , veluti est FO ad EO ; erit EG ordinata una ipsius AB .

Si enim EG non sit ordinata ipsius AB , sit ejus ordinata recta EH . Et quoniam ad diametros AB , EF ex alternis earum verticibus ductæ sunt ordinatæ EH , AO ; per proprietatem jam ostensam, erit, ut BH ad AH , ita FO ad EO .

Hinc, quum ex constructione FO sit ad EO , ut est BG ad AG ; erit ex æquali, ut BG ad AG , ita BH ad AH : & propterea, quum componendo sit, ut AB ad AG , ita AB ad AH ; erunt duæ AG , AH æquales inter se.

Quod

XII.
Quomodo
definitur po-
siti-
onem suam
ordinatarum
cujuscunque
diametri.

F10.29.

Quod fieri non potest.

XIII. Omnium quoque diametrorum ellipsis commune est, ut *cujusque conjugata diameter sit media proportionalis inter ipsam, & parametrum ejus.*

XIII.
*Quod inter
diametrum,
& parametrum sit me-
dia propor-
tionalis dia-
meter conju-
gata.*

Ellipsis enim AMB sit AB diameter aliqua; sitque etiam AD ejus parameter, & KL ejusdem diameter conjugata. Dico, fore, ut AD ad KL, ita KL ad AB.

FIG. 27.

Quoniam enim KC est ordinata una ipsius AB; erit, ut AD ad AB, ita KC quadratum ad rectangulum ACB, sive AC quadratum. Sed, ob rectas AB, KL, bisectas in centro C, KC quadratum est ad AC quadratum, ut KL quadratum ad AB quadratum. Quare erit ex æquali, ut AD ad AB, ita KL quadratum ad AB quadratum: & propterea tres rectæ AD, KL, AB continue proportionales erunt.

Hinc, siquidem KR sit parameter diametri KL, cum iisdem AD, KL, AB erit etiam continue proportionalis KR. Nam, sicuti KL est conjugata ipsius AB, ita AB conjugata est ipsius KL. Unde, quemadmodum KL media est proportionalis inter AD, & AB; ita erit AB media proportionalis inter KL, & KR: proindeque quatuor AD, KL, AB, KR continue proportionales erunt.

XIV.
*Diametro-
rum omnium
ellipsi alia
proprietas
communis.*

XIV. Commune itidem est accidens diametrorum omnium, ut *rectæ, ex cujusque verticibus per punctum aliquod ellipsis ductæ, abscindant ex qualibet ejus ordinata portiones duas, quæ rectangulam continent, æquale quadrato ipsius ordinatæ.*

K A

Sit

Fig. 30. Sit enim AB diameter aliqua ellipsis AMB . Et, ductis per punctum quodvis E ipsius ellipsis rectis AX , BZ , convenient ex cum aliqua ejus diametri ordinata MN in punctis P , & Q . Dico, rectangulum PNQ æquale esse quadrato ipsius MN .

Ducatur siquidem ex puncto E ad eandem diametrum AB ordinata alia EG ; eritque EG quadratum ad rectangulum AGB in ratione composita ex EG ad AG , & ex EG ad BG ; sive etiam in ratione composita ex PN ad AN , & ex QN ad BN .

Jam duæ istæ rationes componunt pariter rationem, quam habet rectangulum PNQ ad rectangulum ANB . Quare erit ex æquali, ut EG quadratum ad rectangulum AGB , ita rectangulum PNQ ad rectangulum ANB .

Ob ellipsim autem, EG quadratum est ad rectangulum AGB , ut MN quadratum ad rectangulum ANB . Itaque erit rursus ex æquali, ut MN quadratum ad rectangulum ANB , ita rectangulum PNQ ad idem rectangulum ANB : & propterea MN quadratum æquale erit rectangulo PNQ .

C A P. III.

Hyperbolæ omnes aliæ diametri determinantur.

I. Q Uemadmodum in ellipsi, ita etiam in hyperbola omnes aliæ diametri
Quid sit

tri transeunt per punctum illud, quod hyperbolæ *centrum* appellatur. centrum hyperbolæ, & cur tali nomine vocetur.

Est autem hoc punctum *id, quod bifariam dividit diametrum principalem*, sive quæ FIG. 31.

ex cono deducitur. Ut, si AB sit diameter, quam hyperbola sortitur in ipso cono, eademque secetur bifariam in puncto C; vocabitur punctum istud C centrum ipsius hyperbolæ.

Sortitum est vero tale nomen istiusmodi punctum, quia *omnis recta per ipsam ducta, & utrinque ad hyperbolas oppositas terminata, bifariam in eo dividitur*. Ducatur enim per punctum C recta quævis EF, quæ hyperbolicis oppositis occurrat in punctis E, & F. Dico, rectam istam EF secari bifariam in puncto C.

Demittantur namque ex punctis E, & F ordinatæ ad diametrum EG, FH. Quumque eæ inter se sint parallelæ; æquiangula erunt triangula CEG, CFH: proindeque erit, ut CG quadratum ad CH quadratum, ita EG quadratum ad FH quadratum. Sed, propter hyperbolam, EG quadratum est ad FH quadratum, ut rectangulum AGB ad rectangulum AHB. Quare erit ex æquali, ut CG quadratum ad CH quadratum, ita rectangulum AGB ad rectangulum AHB.

Hinc, subtrahendo terminos secundæ rationis ex terminis primæ, erit etiam, ut CG quadratum ad CH quadratum, ita CA quadratum ad CB quadratum; & consequenter latera horum quadratorum CG, CH, CA, CB pariter proportionalia erunt. Sed, ob eadem triangula æquiangula CEG, CFH, CG est ad CH, ut CE ad CF. Itaque erit ex æquali, ut CA ad CB,

CB, ita CE ad CF : & propterea, sicuti duæ CA, CB inter se sunt æquales; sic & duæ CE, CF similiter inter se æquales erunt.

II.
*Recta, per
 centrum du-
 cta, qua uni
 hyperbola-
 rum opposi-
 tarum oc-
 currit, debet
 etiam cum
 altera conve-
 nire.*

II. Verum quidem est, illud hic a nobis assumptum esse, ut *recta, per centrum ducta, quæ uni hyperbolarum oppositarum occurrit, debeat quoque cum altera convenire*. Sed facile erit, tum istud ostendere, tum alia etiam ratione probare, quod *recta, per centrum ducta, & ad hyperbolas oppositas terminata, bifariam in ipso centro secetur*.

FIG. 31.

Ducatur enim ex centro C ad unam ex hyperbolis oppositis recta CE. Tum, demissa ad diametrum AB ordinata EG, capiatur CH æqualis CG. Erigatur deinde ad partem contrariam ordinata alia HF. Ac denique jungatur recta CF.

Quia igitur æquales sunt inter se, tam duæ CA, CB, quam duæ CG, CH; erunt pariter æquales duæ AG, BH. Unde æqualia itidem erunt inter se, tam rectangula AGB, AHB, quam quadrata ordinarum EG, FH, quæ rectangulis iis proportionalia sunt.

Hinc, quum duo triangu- CGE, CHF habeant duo latera CG, EG æqualia duobus lateribus CH, FH, alterum alteri, & æquales etiam angulos, sub iis lateribus contentos; omnia alia pariter æqualia habebunt.

Duæ igitur CE, CF æquales erunt inter se. Sed eadem, ob æquales angulos ECG, FCH, jacent etiam in directum. Quare recta CE, producta versus centrum, conveniet cum hyperbola opposita in F, totaque EF bifariam secabitur in ipso centro.

III. Ut

III. Ut autem pateat, quod sit diameter hyperbolarum oppositarum recta quælibet, ducta per centrum, & ad eas terminata; ostendendum est prius sequens theorema. Nimirum, quod si EF sit aliqua istarum rectarum, eaque bisecet in O subtenfam AM, pertinentem ad verticem A, & demissa ad diametrum AB ordinata EG, huic per punctum O parallela ducatur OL; sit semper, ut CL ad CG, ita CG ad CA.

III.
Theorema
fundamenta-
le pro deter-
minandis hy-
perbola dia-
metris aliis.
FIG. 31.

Nec fane difficile erit theorema istud ostendere. Nam, sicuti AM dupla est ipsius AO; ita, ducta ad diametrum AB ordinata alia MN, erit AN dupla quoque ipsius AL. Unde, quum sit etiam diameter AB dupla ipsius AC, erit tota NB dupla pariter totius LC: & propterea rectangulum ANB erit quadruplum rectanguli ALC.

Et quoniam MN dupla est etiam ipsius OL; erit MN quadratum quadruplum quadrati, quod fit ex OL. Quare erit, ut MN quadratum ad rectangulum ANB, ita OL quadratum ad rectangulum ALC. Sed, propter hyperbolam, MN quadratum est ad rectangulum ANB, ut EG quadratum ad rectangulum AGB. Itaque erit ex æquali, ut OL quadratum ad rectangulum ALC, ita EG quadratum ad rectangulum AGB; & consequenter permutando erit quoque, ut OL quadratum ad EG quadratum, ita rectangulum ALC ad rectangulum AGB.

Hinc, quum, ob triangula æquiangula COL, CEG, OL quadratum sit ad EG quadratum, ut CL quadratum ad CG quadra-
tum;

tum; erit rursus ex æquali, ut CL quadratum ad CG quadratum, ita rectangulum ALC ad rectangulum AGB : & propterea, subtrahendo terminos secundæ rationis ex terminis primæ; erit etiam, ut CL quadratum ad CG quadratum, ita rectangulum ACL ad AC quadratum, hoc est, ita CL ad AC : proindeque tres rectæ CL , CG , CA continue proportionales erunt.

IV.
Præcedentis
theorematis
consequarium
primum.

FIG. 31.

IV. Inde vero sequitur primo, quod si ex punctis A , & E ducantur rectæ AK , EI , ipsis EG , AM parallelæ, quarum prior AK conveniat cum EF in puncto K , & altera EI cum AB in puncto I ; triangulum EGI sit æquale trapetio $AGEK$.

Est enim ex ostensis, ut CL ad CG , ita CG ad CA . Sed CL est ad CG , ut CO ad CE ; five etiam, ut CA ad CI . Quare erit ex æquali, ut CG ad CA , ita CA ad CI : & propterea, quum tres rectæ CG , CA , CI sint continue proportionales; erit quoque, ut CG ad CI , ita CG quadratum ad CA quadratum.

Jam, propter communem altitudinem triangulorum CEG , CEI , CG est ad CI , ut est triangulum CEG ad triangulum CEI ; itemque, ob similia triangula CEG , CKA , CG quadratum est ad CA quadratum, ut triangulum CEG ad triangulum CKA . Quare erit rursus ex æquali, ut triangulum CEG ad triangulum CEI , ita idem triangulum CEG ad triangulum CKA .

Hinc triangula duo CEI , CKA æqualia erunt inter se: & propterea, dempto ex his communi triangulo CEG , supererit triangulum

lum EGI æquale trapetio AGEK. Et si aufe-
ratur adhuc commune trapetium AGEX; re-
manebit quoque triangulum XAI æquale
triangulo XEK.

V. Iisdem positis, *sequitur secundo*, quod
triangulum AOK sit æquale trapetio EOAI.

V.
Conse-
quium se-
cun-
dum.

FIG. 31.

Est enim ex ostensis, ut CL ad CG, ita
CG ad CA. Sed CL est ad CG, ut CO ad
CE; itemque CG est ad CA, ut CE ad CK.
Quare erit ex æquali, ut CO ad CE, ita CE
ad CK: & propterea, quum tres rectæ CO,
CE, CK sint continue proportionales; erit
quoque, ut CO ad CK, ita CO quadratum
ad CE quadratum.

Jam, propter communem altitudinem
triangulorum CAO, CAK, CO est ad CK,
ut est triangulum CAO ad triangulum CAK;
itemque, ob similia triangula CAO, CIE, CO
quadratum est ad CE quadratum, ut triangu-
lum CAO ad triangulum CIE. Quare erit
rursus ex æquali, ut triangulum CAO ad
triangulum CAK, ita idem triangulum CAO
ad triangulum CIE.

Hinc triangula duo CAK, CIE æqualia
erunt inter se: proindeque, dempto ex iis com-
muni triangulo CAO, supererit triangulum
AOK æquale trapetio EOAI. Id vero erui
quoque potest ex æqualitate triangulorum
XAI, XEK superius ostensa. Nam, addito iis
communi trapetio AOEX, fiet trapetium
EOAI æquale triangulo AOK.

VI. Capiatur porro in hyperbola punctum
quodvis aliud P, ex quo ducantur ad diame-
trum AB duæ aliæ rectæ PS, PQ, ipsi EI,

VI.
Conse-
quium ter-
tium.

EG

FIG. 31.
32.

EG parallelæ. Et *facile erit ostendere*, quod triangulum *PQS* sit etiam æquale correspondenti trapezio *AQRK*.

Quum enim similia sint triangula *CAK*, *CGE*; erit, ut *CA* quadratum ad *CG* quadratum, ita triangulum *CAK* ad triangulum *CGE*. Quare, subtrahendo antecedentes ex consequentibus, erit etiam, ut *CA* quadratum ad rectangulum *AGB*, ita triangulum *CAK* ad trapezium *AGEK*.

Eadem ratione, quum similia sint triangula *CAK*, *CQR*; erit, ut *CA* quadratum ad *CQ* quadratum, ita triangulum *CAK* ad triangulum *CQR*. Unde, subtrahendo antecedentes ex consequentibus, erit quoque, ut *CA* quadratum ad rectangulum *AQB*, ita triangulum *CAK* ad trapezium *AQRK*.

Hinc autem, per æqualitatem rationis ordinatam, erit pariter, ut rectangulum *AGB* ad rectangulum *AQB*, ita trapezium *AGEK* ad trapezium *AQRK*: adeoque, quia, propter hyperbolam, rectangulum *AGB* est ad rectangulum *AQB*, ut *EG* quadratum ad *PQ* quadratum; erit ex æquali, ut *EG* quadratum ad *PQ* quadratum, ita trapezium *AGEK* ad trapezium *AQRK*.

Et quoniam ex constructione parallelæ sunt inter se, tam duæ *EG*, *PQ*, quam duæ *EI*, *PS*; triangula duo *EGI*, *PQS* similia erunt. Unde, quum sit, ut *EG* quadratum ad *PQ* quadratum, ita triangulum *EGI* ad triangulum *PQS*; erit rursus ex æquali, ut triangulum *EGI* ad triangulum *PQS*, ita trapezium *AGEK* ad trapezium *AQRK*: & propte-

pterea, quemadmodum triangulum EGI ostensum est æquale trapezio AGEK; ita quoque erit triangulum PQS æquale trapezio AQRK.

Notetur autem hic velim, quod si punctum P sumatur in hyperbola opposita, quæ transit per verticem alterum B; tunc loco trapezii AQRK capienda sit differentia triangulorum CAK, CQR, quam in omni casu trapezium illud adæquat. Et demonstratio adhuc est eadem.

VII. Denique, si recta PS, ipsi EI parallela, conveniat cum recta EF in puncto V, VII.
Conseque-
ntiam quer-
tum. nullo negotio ostendemus quoque, quod triangulum PVR sit æquale correspondenti trapezio EVSI.

Ponamus etenim primo, quod punctum FIG. 31. S sit supra verticem A, & quod punctum P existat inter A, & E. Quia igitur triangulum EGI ostensum est æquale trapezio AGEK, & triangulum PQS æquale trapezio AQRK: si ex triangulo auferatur triangulum, ex trapezio trapezium, ex utroque autem commune trapezium PQGZ; supererit trapezium EZSI æquale trapezio PZER: proindeque, addito communi triangulo EZV, fiet trapezio EVSI æquale triangulum PVR.

Ponamus secundo, quod punctum S sit FIG. 31. quidem supra verticem A, sed quod punctum P sit ad alteram partem puncti E relate ad eundem verticem A. Et rursus, quia triangulum EGI ostensum est æquale trapezio AGEK: addito communi trapezio EGQR, fiet trapezium EIQR æquale trapezio AQRK, sive etiam triangulo PQS: & proinde, dempto commu-

ni

160 SECTIONUM CONICARUM
 ni trapezio VSQR, fiet trapezio EVSI rur-
 sus æquale triangulum PVR.

FIG. 32. Ponamus denique, quod punctum S sit
 infra verticem A. Et quoniam triangulum
 PQS ostensum est æquale trapezio AQRK:
 addito, vel dempto communi trapezio VSQR,
 fiet triangulum PVR æquale trapezio ASVK.
 Sed, propter æqualitatem triangulorum XEK,
 XAI, superius ostensam, trapezium ASVK
 est æquale trapezio EVSI. Quare etiam trian-
 gulum PVR æquale erit trapezio EVSI.

Hic quoque notare oportet, quod si
 punctum P capiatur in hyperbola opposita;
 tunc loco trapezii EVSI sumenda sit differen-
 tia triangulorum CEI, CVS, quam in omni
 casu trapezium illud adæquat. Nec diversa erit
 demonstratio.

VIII. His præmissis, facile modo erit ostend-
 ere, quod sit diameter hyperbolarum opposita-
 rum recta qualibet, ducta per centrum, & ad eas
 terminata. Ut enim talis esse possit, duo qui-
 dem requiruntur. Primum, ut bifecet rectas
 omnes, alicui æquidistanter ductas, & utrinque
 terminatas ad eandem hyperbolam. Deinde, ut
 quadrata ex semilibus istarum rectarum sint,
 ut rectangula, quæ sub correspondentibus
 ipsius portionibus continentur.

FIG. 31. Jam horum utrumque facili negotio de-
 monstrabitur. Quantum enim ad primum, sic
 EF recta quævis ducta per centrum C, eaque
 bifecet in O subtensam AM, pertinentem ad
 verticem A diametri principalis. Dico, ean-
 dem EF secare quoque bifariam in V, quam-
 vis aliam rectam PP, quæ ipsi AM parallela,
 utrin-

VIII.
 Ostenditur,
 quod omnis
 recta, ducta
 per centrum,
 & ad hyper-
 bolas opposi-
 tas termina-
 ta, sit diam-
 eter ipsarum.

FIG. 31.
 32.

utrinque ad unam hyperbolarum terminatur.

Positis enim omnibus, ut supra; erit utrumque triangulorum PVR , PVR æquale trapezio $EVSI$. Quare æqualia erunt inter se ipsa duo triangula PVR , PVR . Sed eadem triangula, velut similia, sunt, ut quadrata laterum homologorum PV , PV . Itaque latera isthæc homologa PV , PV erunt pariter æqualia; & consequenter tota PP bifariam secta erit in V .

IX. Quantum vero ad secundum, *nec etiam magna mentis acumine opus est, ad illud ostendendum*. Maneant enim omnia adhuc, ut supra. Et dico insuper, quadrata ipsarum AO , PV esse inter se, ut rectangula correspondentia EOF , EVF . IX.
Part altera
demonstra-
tionis, qua
præcedens
veritas con-
cluitur.
FIG. 31.

Quum enim similia sint triangula CEI , COA ; erit, ut CE quadratum ad CO quadratum, ita triangulum CEI ad triangulum COA . Quare, subtrahendo antecedentes ex consequentibus, erit etiam, ut CE quadratum ad rectangulum EOF , ita triangulum CEI ad trapezium $EOAI$. 32.

Eadem ratione, quum similia sint triangula CEI , CVS ; erit, ut CE quadratum ad CV quadratum, ita triangulum CEI ad triangulum CVS . Unde, subtrahendo antecedentes ex consequentibus, erit quoque, ut CE quadratum ad rectangulum EVF , ita triangulum CEI ad trapezium $EVSI$.

Hinc autem, per æqualitatem rationis ordinatam, erit pariter, ut rectangulum EOF ad rectangulum EVF , ita trapezium $EOAI$ ad trapezium $EVSI$: adeoque, quia trapezia

Tom. I.

L

ista

16a SECTIONUM CONICARUM

ista ostensa sunt æqualia triangulis AOK, PVR; erit ex æquali, ut triangulum AOK ad triangulum PVR, ita rectangulum EOF ad rectangulum EVF.

Quoniam vero ex constructione parallelæ sunt inter se, tam dum AK, PR, quam dum AO, PV; triangula duo AOK, PVR similia erunt. Quare, quum sit, ut AO quadratum ad PV quadratum, ita triangulum AOK ad triangulum PVR; erit rursus ex æquali, ut AO quadratum ad PV quadratum, ita rectangulum EOF ad rectangulum EVF.

X.
Recta, intra
unam hyper-
bolarum sub-
tensa duobus
æquidistan-
ter, utrinque
ad eam termi-
natur.

FIG. 3a.

X. Non inficior, illud hic a nobis assumptum esse, ut recta, quæ intra unam hyperbolarum subtensa ducitur æquidistanter, utrinque ad eandem hyperbolam terminetur. Sed haud difficile erit, tum istud ostendere, tum alia etiam ratione probare, quod rectæ omnes, ipsi AM æquidistantes, & ad eandem hyperbolam utrinque terminatæ, bisariam secentur a recta EF.

Jam enim de rectis, quæ ducuntur intra segmentum hyperbolicum AEM, res est extra omnem dubitationis aleam posita. Itaque ducatur extra illud segmentum recta quævis PV, ipsi AM parallela, Et, si fieri potest, occurrat hyperbolæ tantum ex una parte in P. Extendatur ea ad partem aliam versus V, & fiat VP æqualis ipsi PV. Ostendendum est igitur, hoc aliud punctum P esse etiam in hyperbola.

Ponantur omnia, ut supra. Et quoniam dum PV, VP inter se sunt æquales, erit triangulum PVR, ad unam partem existens, æqua-

le

le triangulo PVR, quod existit ad partem alteram. Sed illud, propter hyperbolam, est æquale trapetio EVSI, sive etiam ASVK. Quare eidem trapetio ASVK hoc etiam æquale erit: & propterea utrumque triangulorum PQS erit æquale correspondenti trapetio AQRK; eritque adeo, ut triangulum PQS ad triangulum PQS, ita trapetium AQRK ad trapetium AQRK.

Jam, ob similitudinem triangulorum PQS, PQS, triangulum PQS est ad triangulum PQS, ut PQ quadratum ad PQ quadratum. Itemque, ob diametrum AB, bisectam in centro C, trapetium AQRK est ad trapetium AQRK, ut rectangulum AQB ad rectangulum AQB. Quare erit ex æquali, ut PQ quadratum ad PQ quadratum, ita rectangulum AQB ad rectangulum AQB: & propterea, sicuti punctum unum P est in hyperbola, sic etiam locabitur in hyperbola punctum aliud P.

Verum quidem est, quod recta PV ducta sit a nobis intra eandem illam hyperbolam, in qua reperitur subtensa AM. Sed facile erit, eandem demonstrationem ad eas etiam rectas transferre, quæ intra hyperbolam aliam ducuntur æquidistantes ipsi AM, si recordemur, quod in eo casu loco trapetii AQRK capienda sit differentia triangulorum CAK, CQR; & loco trapetii EVSI differentia triangulorum CEI, CVS.

XI. Non ergo dubitari potest, quin recta EF, ducta per centrum C, & utrinque ad hyperbolas oppositas terminata, sit diameter ipsarum. Nam & bisariam dividit rectas om-

XI.

Quæ ea tan-
tum recta
sint hyperbo-
larum oppo-
sitæ dia-

metri, quæ
transeunt per
centrum, &
utrinque ad
eas termi-
nantur.

FIG. 31.
32.

nes, quæ subtensæ AM æquidistantes, utrinque ad unam ex ipsis hyperbolis terminantur. Et quadrata ex semissibus istarum rectarum servant inter se eandem rationem, quam habent rectangula, sub correspondentibus ipsius EF portionibus contenta.

Sed facile erit etiam ostendere, quod præter eas, quæ transeunt per centrum, & ad hyperbolas oppositas terminantur, nulla alia recta linea possit esse diameter illarum. Ut enim recta aliqua esse queat diameter hyperbolarum oppositarum, illud primo requiritur, ut bifariam fecet rectas omnes, alicui æquidistanter ductas, & utrinque ad unam ex ipsis hyperbolis terminatas. Unde, si ostendi possit, accidens istud his tantummodo rectis competere, quæ transeunt per centrum, & ad hyperbolas oppositas terminantur; jam veritas ejus, de quo agitur, liquido constabit.

Id vero ostendetur in hunc modum. Sit TY recta positione data, cui debent esse parallelæ ex omnes, quæ bifariam a diametro dividuntur. Jamque, si ea parallela est ordinatis diametri principalis AB ; secabit diameter ista AB bifariam rectas omnes, quæ ipsi TY æquidistantes, utrinque ad unam hyperbolarum oppositarum terminantur.

Quod si autem recta TY non sit parallela ordinatis diametri principalis AB ; utique ejus positio debet esse talis, ut quæ ei intra unam hyperbolarum ducuntur parallelæ, ad eandem hyperbolam utrinque terminentur. Aliter enim nulla erit diameter, cujus ordinatæ parallelæ serunt rectæ TY ; quum ordi-

natæ cujusque diametri debeant utrinque ad eandem hyperbolam terminari.

Id vero quum ita sit, necesse est, ut recta AM, ducta ex vertice A æquidistanter ipsi TY, secet hyperbolam, transeuntem per eundem verticem A, in alio puncto M. At, rectas omnes, ipsi AM parallelas, & utrinque ad eandem hyperbolam terminatas, ut modo vidimus, non alia bifecat recta, quam quæ transit per centrum C, & bifariam dividit subtensam ipsam AM.

XII. Sed non abs re erit, hic paucis innuere, qualis esse debeat data rectæ positio, ut quæ ei ducantur æquidistantes intra unam hyperbolarum, utrinque ad eandem hyperbolam terminentur.

XII.

Qualis esse
debet positio
rectæ, ut
quæ ei du-
cantur æqui-
distantes, ut-
rinque ad
unam hyper-
bolarum
terminentur.

Sit igitur TY recta data, quæ non sit parallela ordinatis diametri principalis AB. Et oporteat, positionem definire, quam ea debet habere, ut rectæ, eidem æquidistanter ductæ intra unam hyperbolarum, possint ad eandem hyperbolam utrinque terminari.

FIG. 33

Ducatur ex vertice A recta AX, ipsi TY parallela. Et siquidem ista hyperbolam, transeuntem per eundem verticem A, secet in alio puncto M; per ea, quæ paulo ante ostensa sunt, omnes rectæ, quæ intra unam hyperbolarum ducuntur æquidistanter ipsi AM, cum eadem hyperbola utrinque convenient.

Jam ex superius ostensis recta AX secabit in puncto alio M hyperbolam, transeuntem per verticem A, quotiescumque portio DF, quam ea abscindit ex recta DE, diametro BA parallela, minor est ea, quæ media est propor-

tionalis inter diametrum AB , & parametrum ejus AD . Unde non alia esse debet positio ipsius TY , quam ut recta AX , ei æquidistanter ducta, ejusmodi portionem ex ipsa DE abscindere valeat.

XIII.
Demonstra-
tio determinati-
onis præcedentis.
FIG. 33.

XIII. Neque vero arduum erit, *veritatem hujus determinationis ostendere*. Ponamus etenim primo, portionem DF mediam illam proportionalem adæquare, punctumque adeo M , in quo recta AX secabat hyperbolam, transeuntem per verticem A , in infinitum abire.

Si fieri potest, recta HR , ipsi AX æquidistanter ducta, secet aliquam hyperbolarum, puta eandem illam, quæ transit per verticem A , in duobus punctis H , & K , ex quibus ordinatæ ad diametrum demittantur GI , KL . Et producat eandem HR , usque donec conveniat cum diametro AB in puncto R .

Quia igitur DF est media proportionalis inter AB , & AD ; erit DF quadratum æquale rectangulo DAB ; & propterea AD quadratum erit ad DF quadratum, ut est idem AD quadratum ad rectangulum ADB ; sive etiam, ut est AD ad AB .

Jam AD quadratum est ad DF quadratum, ut est HI quadratum ad RI quadratum; Itemque AD est ad AB , ut est idem HI quadratum ad rectangulum AIB . Quare, quum sit RI quadratum æquale rectangulo AIB ; erit, ut BI ad RI , ita RI ad AI ; & dividendo, ut BR ad RI , ita AR ad AI .

Simili ratione ostendemus, RL quadratum esse æquale rectangulo ALB ; atque adeo BL esse

esse ad RL, ut est RL ad AL; siue etiam di-
videndo, BR esse ad RL, ut est AR ad AL.
Unde, quum ordinando sit, ut RI ad RL, ita
AI ad AL; erit convertendo, ut RI ad IL,
ita AI ad eandem IL. Quod fieri non potest.

Ponamus secundo, portionem DF ma-
jorem esse ea, quæ media est proportionalis
inter diametrum AB, & ejus parametrum AD:
Ita, ut punctum M migret in hyperbolam op-
positam. Quumque in hoc casu recta AX ma-
gis ad diametrum inclinetur, multo minus re-
cta HR, ei æquidistans ducta, secare pote-
rit in duobus punctis eandem hyperbolam.

XIV. Hinc autem *illud pronò utroque sequi-*
tur, quod si intra aliquam hyperbolarum op-
positarum, velut intra eam, quæ transit per
verticem A, ducatur recta HK utrinque ad
eam terminata, nec æquidistans ordinatis dia-
metri AB; semper ex vertice A duci possit re-
cta alia AX, quæ ei parallela, secet in puncto
alio eandem hyperbolam.

XIV.
*Elegans &
justum de-
terminatio-
nis conclusio-
nem.*
FIG. 33.

Si enim fieri potest, recta AX non secet
in puncto alio hyperbolam, transeuntem per
verticem A. Itaque per ea, quæ mox ostensa
sunt, etiam recta HK, quæ ei est parallela, se-
cabit in unico puncto eandem hyperbolam.
Sed ex hypothesi recta HK utrinque ad hy-
perbolam illam terminatur; adeoque eam secet
in duobus punctis. Quare etiam recta AX con-
veniet cum hyperbola illa in puncto alio.

Id vero quum ita sit, perspicuum est quo-
que, non posse rectam aliquam utrinque ad
unam hyperbolarum terminari, nisi omnes
alix, quæ ei ducuntur æquidistantes, utriq-
que

que etiam convenient, vel cum eadem hyperbola, vel cum ejus opposita. Quod tamen intelligi debet, ubi aliæ istæ rectæ intra aliquam ipsarum hyperbolarum ductæ fuerint.

C A P. IV.

Diametrorum hyperbolæ communia quædam demonstrantur.

L
Proprietates
diametri
principalis
ad omnes
illas diametros
hyperbolæ
traduntur.

FIG. 34.

I. **V**idimus præcedenti capite, hyperbolam, præter eam diametrum, quam in ipso cono fortitur, alias etiam innumeras habere, quarum quælibet transit per centrum, & tum ad ipsam, cum ad ejus oppositam terminatur. Sed *communia harum diametrorum*, operæ pretium est, ut paulo distinctius prosequamur. Quem in finem sit AB diameter principalis hyperbolæ, centrum punctum D, & EF alia quævis diameter.

Primo igitur, quemadmodum diameter principalis AB suas habet ordinatas; ita suis quoque refertur ordinatis diameter alia EF. Sunt autem ex ostensis ordinatæ istæ rectæ illæ omnes, quæ ducuntur æquidistanter subtense AM, quam ab ipsa EF suppono bisectam in puncto O.

Deinde, quemadmodum quadrata ordinatarum diametri principalis AB sunt inter se, ut rectangula, sub correspondentibus ejus portionibus contenta; ita & quadrata ordinatæ

tarum alterius diametri EF sunt proportionalia rectangulis, quæ continentur sub portionibus correspondentibus ipsius EF.

Unde porro, si per verticem E ducatur recta EH ordinatis æquidistanter, quæ sit talis longitudinis, ut quadratum unius ordinatæ AO sit ad rectangulum EOF, veluti est EH ad EF; erit in hac eadem pariter ratione quadratum cujuslibet alterius ordinatæ PV ad rectangulum EVF.

Et quemadmodum rectam istam EH appellare licebit *parametrum* diametri EF; ita si jungatur FH, cum qua conveniat in X ordinata quævis PV; erit PV quadratum æquale rectangulo EVX, & consequenter majus rectangulo, quod sit ex parametro EH in abscissam correspondentem EV.

Quin & excessus ipsius PV quadrati super rectangulum HEV erit similiter rectangulum aliud, quod habens pro sua latitudine eandem abscissam EV, est simile, similiterque positum ei, quod sit ex parametro EH in ipsam diametrum EF.

II. Hæc quum ita sint, perspicuum est, omnes illas proprietates, quæ hyperbolæ competunt relate ad diametrum principalem, obtinere etiam, quum ad aliam quamvis diametrum hyperbola ipsa refertur.

II.
Communes
quæque sunt
proprietates,
quas hæc hyperbola
descriptione adduximus.

Hinc ulterius, sicuti describitur hyperbola in plano, per solas rectarum longitudes, data magnitudine, & positione, tam diametro principali AB, quam parametro ejus AD; sic etiam describi poterit eadem hyperbola, ubi magnitudine, & positione datur, tum alia quævis

FIG. 34.

vis

vis diameter EF, cum illius parameter EH.

Et sicuti recta AD, ducta per verticem A ipsius diametri principalis AB, æquidistanter suis ordinatis, contingit hyperbolam in solo puncto A; ita etiam recta EH, ducta per verticem E alterius cujuslibet diametri EF, similiter ordinatis suis æquidistanter, dumtaxat in puncto E tanget hyperbolam.

Quin imo, sicuti omnis alia recta, quæ ducta ex eodem vertice A, angulum constituit cum AD, non solum in A, sed in alio quoque puncto secatur aliquam hyperbolarum oppositarum; sic pariter quælibet alia recta, quæ ducta ex eodem vertice E angulum continet cum EH, non modo in E, verum etiam in puncto alio occurreret alicui ex illis hyperbolicis.

Unde etiam, si in plano ipsarum hyperbolarum detur positio rectæ aliquæ, quæ non sit parallela ordinatis cujuslibet alterius diametri EF, semper ex vertice E duci poterit recta alia, quæ ei parallela, unam ex iis hyperbolicis secet in alio puncto; quum non aliter esse queat illi parallela, nisi angulum contineat cum EH.

III.

*Quod ex
qualibet hy-
perbola dia-
metro transi-
tu possit in
omnes alias.*

Sed, his ita se habentibus, liquet quodque, quod sicuti ex diametro principali transire licet ad alias diametros; sic vicissim ex quolibet alia diametro, tam ad ipsam principalem, cum ad alias omnes progredi licebit.

Nam semper ac eadem sunt diametrorum omnium proprietates, theorema illud fundamentale, quod præcedenti capite ostensum est relate ad diametrum principalem, poterit

terit eadem omnino ratione demonstrari de quavis alio diametro EF.

Itaque, si per centrum hyperbolæ C ducatur recta aliqua AB, quæ biseccet in G subtenfam PE, pertinentem ad verticem E; & demissa ad diametrum EF ordinata PV, huic per punctum G parallela agatur GR, erit, ut CV ad CR, ita CR ad CE.

FIG. 34.

Unde, quum omnes illæ æqualitates triangulorum, trapetiorumque, quas superiori capite profecuti sumus relate ad diametrum principalem, obtineant quoque respectu ipsius diametri EF; facile erit ostendere, rectam illam AB esse diametrum quoque ipsius hyperbolæ.

Inde enim conficitur, ipsam AB secare bifariam rectas omnes, æquidistanter ductas subtenfam PE, & utrinque terminatas ad unam hyperbolarum; itemque quadrata ex semilibus istarum rectarum proportionalia esse rectangulis, quæ sub correspondentibus portionibus ipsius AB continentur.

IV. Habent igitur omnes aliæ hyperbolæ diametri easdem omnino proprietates cum diametro principali; & ex qualibet earum, tum ad ipsam principalem, cum ad alias omnes progredi licet. Sed hyperbolæ diametri, præter hætenus recensitas proprietates, plures alias communes habent, quas non abs re erit hic breviter ostensas exhibere.

IV.
Alia diametrorum hyperbolæ proprietates communes, respectu rectarum, quas biseccant.

Ac principio quidem illud nobis est ostendendum, quod qualibet diameter non alias rectas, utrinque ad unam hyperbolarum terminatas, dividat bifariam, quam quæ or-
di-

dinatim ad ipsam diametrum applicantur.

Sit enim AB hyperbolæ diameter quævis, sitque etiam AD recta illa, cui omnes
 FIG. 32. ejus diametri ordinatæ sunt parallelæ. Ducatur intra unam hyperbolarum recta PP, quæ utrinque ad hyperbolam illam terminata, non sit ordinatim applicata diametro AB. Dico, eam ab ipsa diametro AB non posse secari bifariam.

Si enim fieri potest, secetur recta PP a diametro AB bifariam in S. Et quoniam ea non est parallela ordinatis ipsius AB; per ea, quæ ostensa sunt in calce capitis præcedentis, duci poterit per verticem A recta alia, quæ ipsi PP parallela, secet in puncto alio hyperbolam, transeuntem per eundem verticem A. Ducatur itaque recta ista, & sit AM. Tum, bisecta ea in puncto O, jungatur CO, quæ extendatur usque donec occurrat hyperbolis oppositis in punctis E, & F.

Quia igitur recta EF transit per centrum C, & bisecat in O subtenfam AM, pertinentem ad verticem A; per superius ostensa, secabit quoque bifariam in V rectam PP, ipsi AM parallelam. Sed ex hypothese recta PP secatur bifariam in S. Quare eadem PP bisecta erit, tam in puncto S, quam in puncto V. Quod fieri non potest.

V.
*Quomodo
 data hyper-
 bola, suo
 centrum, si-
 ne diameter,
 aliqua potest
 reperiri.*

V. Ex eo autem, quod quælibet diameter eas tantummodo rectas, utrinque ad unam hyperbolarum terminatas, bifariam dividat, quæ ordinatim ad ipsam diametrum applicantur: sequitur per contrarium, ut si aliqua diameter bisecet rectam aliquam, utrinque terminatam
 ad

ad unam hyperbolarum, hæc esse debeat diameter illius ordinata.

Unde ulterius consequitur, ut si recta aliqua bifecet alias duas æquidistantes, quarum quælibet ad unam hyperbolarum sit utrinque terminata, ea esse debeat diameter, atque adeo transire per centrum. Nam aliter, ducta per punctum bisectionis unius ex rectis æquidistantibus, & centrum recta alia, hæc velut diameter bifecabit quoque rectam aliam æquidistantem. Quod fieri non potest.

Id vero quum ita sit, facile erit, cujuslibet datæ hyperbolæ, sive centrum, sive diametrum aliquam reperire. Neque enim aliud fieri debet, quam ducere intra datam hyperbolam, vel etiam intra ejus oppositam rectas duas æquidistantes, & utrinque ad eandem terminatas. Nam, sicuti recta, quæ eas bifariam dividit, diameter erit; sic & punctum, quod bifecat diametrum istam, ejusdem centrum exhibebit.

VI. Speciatim in omni hyperbola reperire licet diametrum, quæ cum suis ordinatis rectos angulos constituat. Inveniaturn siquidem ipsius datæ hyperbolæ diameter quævis EF, sitque EH recta illa, cui omnes istius diametri ordinatæ debent esse parallelæ. Jamque, si angulus FEH fuerit rectus, erit ipsa EF diameter optata. Quod si secus contigerit, inveniemus diametrum, quam quærimus, sequenti ratione.

Super diametro EF versus eam partem, in qua recta EH constituit cum eadem EF angulum acutum, describatur semicirculus EPF, qui

VI.
Quod in
datæ hyper-
bolæ reperire
licet dia-
metrum, quæ
cum suis or-
dinatis rectos
angulos con-
stituat.

FIG. 36.

174 SECTIONUM CONICARUM

qui necessario secabit hyperbolam, transeuntem per verticem E, in puncto aliquo P. Jungatur deinde recta PE, quæ secetur bifariam in puncto G. Agatur porro per punctum istud G diameter AB; atque hæc eam, quam quærimus, exhibebit.

Ob rectas enim PE, EF bisectas in punctis G, & C, GE est ad GP, ut CE ad CF. Quare, juncta recta PF, erit diameter AB ipsi PF, parallela; adeoque angulus CGE æqualis erit angulo FPE. Sed, propter semicirculum, angulus FPE est rectus. Itaque etiam angulus CGE rectus erit; & consequenter diameter AB cum suis ordinatis rectos angulos constituet.

Quod autem semicirculus, descriptus super diametro EF versus eam partem, in qua recta EH constituit cum ipsa EF angulum acutum, secare debeat hyperbolam, transeuntem per verticem E, in puncto aliquo P; facili quidem negotio ostendetur.

Quum enim angulus FEH non sit major omni angulo acuto rectilineo, potest quidem ex puncto E duci recta alia, quæ constituat cum eadem EF angulum acutum, majorem angulo FEH. Sed recta ista secare debet, tum hyperbolam, transeuntem per verticem E, cum ipsum semicirculum. Quare semicirculus, & hyperbola etiam inter se mutuo convenient.

VII.
De axe hyperbolæ, & quod circum illam, super eo descriptus, nec ipsam, nec alius oppositam secet.

VII. In qualibet igitur hyperbola existit diameter, quæ rectos cum suis ordinatis angulos constituit. Diametrum istam vocabimur in posterum axem ipsius hyperbolæ. Et facile erit ostendere, quod *circulus, super axe velus diametro descriptus, medius cadat inter*
atram.

utramque hyperbolam, nec ulli ipsarum occurrere possit.

Sit enim AB axis hyperbolarum oppositarum, super quo velut diametro circulus describatur. Dico, circulum istum nulli earum hyperbolarum occurrere.

FIG. 37.

Quoniam enim axis AB rectos cum suis ordinatis angulos constituit; perpendiculares, quæ super ipso eriguntur ex punctis A, & B, velut parallelæ ejus ordinatis, dumtaxat in punctis illis contingent hyperbolas. Sed eadem perpendiculares cadunt etiam extra circulum. Quare mediæ erunt inter circulum, & hyperbolas, circulo adjacentes: proindeque ipse circulus cum neutra hyperbolarum conveniet.

VIII. Jam, ut aliqua dicamus de angulis, quos aliæ hyperbolæ diametri cum ordinatis suis constituent, sit AB axis ipsius hyperbolæ; & ducta ex vertice ejus A subtenfa quavis AM, sit EF diameter, quæ bifecat in O istam subtenfam, eamque velut suam ordinatam agnoscit; jungaturque BM.

VIII.

De angulis, quos aliæ hyperbolæ diametri cum ordinatis suis constituent.

FIG. 37.

Quia igitur AC est ad CB, ut AO ad OM; erit BM ipsi EF parallela: proindeque angulus AMB erit æqualis angulo AOC, quem diameter cum ordinata ad plagam unam, constituit. Unde aliæ hyperbolæ diametri cum ordinatis suis, saltem ad partem unam, non alios angulos continebunt, quam quos continent rectæ, quæ ex verticibus axis ad ipsa hyperbolæ puncta ducuntur,

Nullum vero horum angulorum rectum esse posse, sed quemlibet acutum existere; jam

exin.

exinde consequitur, quod circulus, qui describitur super AB, velut diametro, medius cadat inter ipsas hyperbolas, nec ulli earum occurrat. Eisdem autem minores semper, ac minores fieri, prout ipsorum vertices magis, atque magis ab ipso axe recedunt, tandemque prorsus evanescere, quum infinite distant ab eodem axe; haud difficile erit ostendere.

Si enim, demissa ad axem illum AB ordinata MN, capiatur CQ æqualis CN, & ad punctum Q ducatur ordinata alia PQ; ob æqualia rectangula ANB, AQB, erunt etiam æqualia quadrata earum ordinarum MN, PQ: proindeque segmentum circuli, transiens per tria puncta A, M, B, transibit quoque per punctum P. Unde, sicuti segmentum istud eo majoris fit latitudinis, quo puncta M, & P magis ab axe recedunt; sic & ipsi anguli AMB, APB eo minores evadunt, quo minor est suorum verticum ab eodem axe distantia.

IX.
Diametri ab ordinatis, super illis ductis ab alternis earum verticibus, dividuntur in eadem ratione.

FIG. 37.

IX. Sed, ut ad communes diametrorum proprietates rursus revertamur, illud etiam omnibus accidit, ut ordinata, quæ ad duas quascunque diametros ab alternis earum verticibus ducuntur, dividant ipsas diametros in eadem ratione.

Sint enim AB, EF duæ quævis diametri hyperbolæ. Et ducatur ex vertice E ordinata EG ad diametrum AB, & ex vertice A ordinata AO ad diametrum EF. Dico, fore, ut BG ad AG, ita FO ad EO.

Extendatur ordinata una AO, usque donec

nec occurrat hyperbolæ ad partem alteram in M; tumque agatur per punctum O recta OL, ipsi EG parallela, quæ conveniat cum diametro AB in puncto L.

Et quoniam subtensa AM pertinet ad verticem A, eaque dividitur bifariam per rectam EF, transeuntem per centrum C; erit ex superius ostensis, ut CL ad CG, ita CG ad CA. Unde, quum CL sit ad CG, ut est CO ad CE; erit ex æquali, ut CG ad CA, ita CO ad CE.

Quoniam vero invertendo CA est ad CG, ut CE ad CO; subductis antecedentibus ex consequentibus, erit, ut CA ad AG, ita CE ad EO; & sumendo antecedentium dupla, erit etiam, ut AB ad AG, ita EF ad EO. Unde demum componendo erit, ut BG ad AG, ita FO ad EO.

X. Hujus autem proprietatis ope, facile erit, in hyperbolis oppositis cujuscunque diametri positionem suarum ordinarum definire.

x.
Quomodo
definiendi po-
sitionem
ordinarum
cujusque dia-
metri.

Sit enim AB diameter, cujus ordinatæ quærentur. Ducatur intra unam hyperbolarum recta quævis PP. Tum, secta ea bifariam in V, jungatur CV, quæ extendatur in E, & F.

FIG. 37.

Agatur porro ex vertice A recta AM, ipsi PP parallela, quæ diametro EF occurrat in O. Et siquidem AB subiude protrahatur in G, ut BG sit ad AG, veluti est FO ad EO; erit EG ordinata una ipsius AB.

Si enim EG non sit ordinata ipsius AB, sit ejus ordinata recta EH. Et quoniam ad diametros AB, EF ex alternis earum verticibus

Tòmi. I.

M

bus

178 SECTIONUM CONICARUM
 bus ductæ sunt ordinatæ EH, AO; per proprietatem jam ostensam, erit, ut BH ad AH, ita FO ad EO.

Hinc, quum ex constructione FO sit ad EO, ut est BG ad AG; erit ex æquali, ut BG ad AG, ita BH ad AH: & propterea, quum dividendo sit, ut AB ad AG, ita AB ad AH; erunt duæ AG, AH æquales inter se. Quod fieri non potest.

xi. *Diametrum omnium hyperbolæ alicuius proprietas commune est.* **XI.** Commune itidem est accidens diametrorum omnium, ut rectæ, ex cuiusque verticibus per punctum aliquod hyperbolæ ductæ, abscindant ex qualibet ejus ordinata portiones duas, quæ rectangulum continent, æquale quadrato ipsius ordinatæ.

FIG. 38. Sit enim AB diameter aliqua hyperbolæ. Et, ductis per punctum quodvis E ipsius hyperbolæ rectis AX, BZ, convenient cum aliqua ejus diametri ordinata MN in punctis P, & Q. Dico, rectangulum PNQ æquale esse quadrato ipsius MN.

Ducatur siquidem ex puncto E ad eandem diametrum AB ordinata alia EG; eritque EG quadratum ad rectangulum AGB in ratione composita ex EG ad AG, & ex EG ad BG; sive etiam in ratione composita ex PN ad AN, & ex QN ad BN.

Jam duæ istæ rationes componunt pariter rationem, quam habet rectangulum PNQ ad rectangulum ANB. Quare erit ex æquali, ut EG quadratum ad rectangulum AGB, ita rectangulum PNQ ad rectangulum ANB.

Ob hyperbolam autem, EG quadratum est ad rectangulum AGB, ut MN quadratum ad

ad rectangulum ANB. Itaque erit rursus ex æquali, ut MN quadratum ad rectangulum ANB, ita rectangulum PNQ ad idem rectangulum ANB: & propterea MN quadratum æquale erit rectangulo PNQ.

C A P. V.

De conjugatis diametrorum hyperbolæ; & de curvis, ad quas eæ terminantur.

I. **I**N hyperbola, non secus ac in ellipsi, unaquæque diameter suam habet conjugatam. Sed conjugatæ istæ diametri, etsi transiant per centrum æquidistanter ordinatis diametrorum, ad quas velut conjugatæ referuntur; ad hyperbolas tamen oppositas minime terminantur, sed extremitatibus suis binas alias hyperbolas constituunt, quæ priorum conjugatæ dicuntur.

I.
ReBa, per
centrum du-
cta, æquidist-
ante ordi-
natis alicu-
jus diamet-
ri, nulli ex
hyperbolis
occurrit.

Quod igitur hac in re primo nobis est ostendendum, illud est, quod si per centrum hyperbolarum oppositarum recta ducatur, parallela ordinatis alicujus diametri, ea cum neutra hyperbolarum possit convenire.

Id vero facili quidem negotio ostendemus. Sit enim AB hyperbolarum oppositarum diameter allqua, sitque etiam C centrum earundem. Ducatur per centrum C recta KL, parallela ordinatis ipsius diametri AB. Dico, rectam istam KL cum nulla hyperbolarum posse convenire.

FIG. 39.

M 2

Nam,

180 SECTIONUM CONICARUM

Nam, si per vertices diametri A , & B ducantur duæ aliæ rectæ, iisdem ordinatis æquidistantes; eæ, per superius ostensa, contingunt hyperbolas in iis tantummodo punctis, & totæ cadent extra eas. Sed recta KL interjicitur inter binas illas rectas, & velut iis parallela, easdem numquam egreditur. Quare etiam recta KL cum nulla earum hyperbolarum poterit convenire.

Ex ipsa autem demonstratione perspicuum est, accidens istud non tantum competere rectæ KL , quæ ducitur per centrum C æquidistanter ordinatis diametri AB ; sed cuilibet alteri rectæ, quæ parallela adhuc iisdem ordinatis, transit per quodvis aliud punctum intermedium ipsius AB . Nam, non secus ac recta KL , ista quoque interjicitur inter rectas, quæ per vertices A , & B ducuntur æquidistanter ordinatis diametri AB , nec unquam eas egreditur.

II.

Bisecat tamen recta omnes, diametro parallelas, & ad utramque hyperbolam terminatas.

II. Ostendemus deinde, quod etsi recta, quæ ducitur per centrum hyperbolarum oppositarum æquidistanter ordinatis alicujus diametri, cum neutra earum hyperbolarum possit convenire; dividat tamen bifariam rectas omnes, diametro parallelas, & ad hyperbolas oppositas terminatas.

FIG. 39.

Mancant enim omnia, ut supra, & ducantur recta MP , ipsi AB parallela, quæ conveniat cum hyperbolis oppositis in punctis M , & P . Dico, rectam istam MP secari bifariam in V ab ipsa KL .

Demittantur siquidem ex punctis M , & P ordinatæ ad diametrum MN , PQ . Et quoniam

niam istæ, velut parallelogrammi MQ latera opposita, inter se sunt æquales; erunt æqualia pariter rectangula ANB, AQB, quæ illarum quadratis proportionem correspondent.

Hinc, addendo rectangula ista æqualibus quadratis CA, CB, æqualia erunt quoque tota quadrata CN, CQ; atque adeo æqualia etiam ipsa horum quadratorum latera CN, CQ. Sed, propter parallelogramma CM, CP, duæ CN, CQ sunt æquales duabus MV, PV. Itaque MV, PV etiam inter se æquales erunt; & propterea tota PM bisecta erit in V.

III. Verum quidem est, illud hic a nobis assumptum esse, ut recta, diametro parallela, quæ uni hyperbolarum oppositarum occurrat, debeat quoque cum altera convenire. Sed haud difficile erit, tum istud ostendere, tum alia etiam ratione probare, quod recta, quæ ducitur æquidistanter diametro AB, & ad hyperbolas oppositas terminatur, bifariam secetur ab ipsa KL.

III.
Recta, dia-
metro pa-
rallela, quæ
uni ex hy-
perbolis oc-
currit, debet
quoque cum
altera con-
venire.

Fig. 39.

Sumatur enim in altera hyperbolarum punctum quodvis M. Tum, demissa ad diametrum AB ordinata MN, capiatur CQ æqualis CN. Erigatur deinde ad eandem partem ordinata alia QP, & jungatur MP. Dico, rectam istam MP, quæ ad hyperbolas oppositas terminatur, parallelam esse diametro AB, & secari bifariam in V a recta KL.

Nam, quum sint æquales inter se, tam duæ CA, CB, quam duæ CN, CQ; erunt pariter æquales duæ AN, BQ. Unde æqualia itidem erunt inter se, tam rectangula ANB, AQB, quam quadrata ordinatarum MN, PQ.

M 3

quæ

12a SECTIONUM CONICARUM

quæ rectangulis iis proportionē correspondēt: & propterea, quum duæ MN , PQ inter se sint æquales, & parallelæ; erit etiam MP diametro AB parallelæ.

Deinde, propter parallelogramma CM , CP , duæ CN , CQ sunt æquales duabus MV , PV . Sed ex constructione duæ CN , CQ inter se sunt æquales. Quare etiam inter se æquales erunt duæ MV , PV : proindeque recta MP , non modo parallelæ erit diametro AB , sed bifariam quoque secabitur in V a recta KL .

IV. Etsi autem recta, quæ ducitur per centrum æquidistanter ordinatis alicujus diametri, bifariam dividat eas omnes, quæ diametro parallelæ, utrinque ad hyperbolas oppositas terminantur; attamen, nisi ei *vertices*, suamque adeo *longitudinem* præscribamus, multum abest, ut *conjugatæ diametri* vices subire possit, quemadmodum contingit in ellipsi.

IV.
Cujusmodi
esse debet
recta illa, quæ
in hyperbola
oppositas
subit
diametri
conjugatæ.

Præscribendi vero sunt ei *vertices* ea lege, ut *bisecta in ipso centro, media evadat proportionalis inter diametrum, ad quam refertur, & parametrum ejus*. Nam meminisse oportet, in ellipsi conjugatam cujusque diametri esse rectam illam, quæ ducitur per centrum ordinatis ejus æquidistanter, quæque bifariam ibidem secta, media est proportionalis inter ipsam diametrum, & parametrum suam.

Itaque, manentibus omnibus, ut supra, dicetur recta KL conjugata diameter ipsius AB , siquidem duæ CK , CL sint æquales inter se; tumque etiam tota KL media sit pro-

portionalis inter diametrum AB , & parametrum ejus AD . Qua ratione quadratum cujusvis ordinatæ MN ad rectangulum ei correspondens ANB , non modo erit, ut AD ad AB , verum etiam, ut KL quadratum ad AB quadratum.

V. Præscriptis verticibus conjugatæ diametro, si velut ejus ordinatas habere velimus semisses earum rectarum, quæ ad hyperbolas oppositas terminatæ, bifariam ab ipsa secantur; proprietates ejus alia quidem erit ab ea, quæ competit diametro, ad quam ipsa velut conjugata refertur.

V.
Quod alia
sit proprie-
tas diametri
conjugatæ,
quæ ordi-
nata ejus ad
unam ex hy-
perbolicis ter-
minantur.

FIG. 39.

Nimirum accidens ipsius AB est, ut quadratum cujusque ordinatæ MN sit ad rectangulum ANB , sive etiam ad differentiam quadratorum CN , CA , ut est KL quadratum ad AB quadratum. Sed proprietates conjugatæ KL est, ut quadratum cujuslibet ordinatæ MV sit ad summam quadratorum CV , CK , veluti est AB quadratum ad KL quadratum.

Id vero ostendetur in hunc modum. Quadratum ex MN est ad rectangulum ANB , ut est KL quadratum ad AB quadratum; sive etiam, ut est CK quadratum ad CA quadratum. Quare invertendo erit, ut rectangulum ANB ad MN , sive CV quadratum, ita CA quadratum ad CK quadratum. Et, addendo terminos secundæ rationis terminis primæ, erit quoque, ut AN , sive MV quadratum ad summam quadratorum CV , CK , ita CA quadratum ad CK quadratum; sive etiam, ita AB quadratum ad KL quadratum.

VI. Id autem mirum esse non debet. Ne-

M 4

que

VI que enim semiffes earum rectorum, quæ ad hyperbolas oppositas terminatæ, bifariam a conjugata diametro dividuntur, sunt vera ejus ordinatæ: sed velut tales haberi debent semiffes illarum, quæ suos habent terminos in iisdem illis curvis, in quibus ipsius conjugatæ vertices locantur.

FIG. 40.

Plane enim ad easdem illas hyperbolas, in quibus existunt vertices diametri AB, terminantur quoque diametri ejus ordinatæ. Sed aliter obtinet in conjugata diametro KL. Rectæ liquidem, quas bifecat, & quarum semiffes ut ordinatas ejus habuimus, suos habent terminos in hyperbolicis oppositis; at in iis vertices ipsius KL minime consistunt.

Hinc non abs re erit, earum curvarum, in quibus conjugatæ diametri vertices locantur, determinationem hic aggredi. Hunc in finem, sit EF alia quævis diameter hyperbolarum oppositarum. Et sicuti ipsius AB est KL conjugata diameter; ita alterius hujus EF sit PR diameter conjugata. Inquirendum est ergo, cujus naturæ sint curvæ illæ, quæ transeunt per extremitates ipsarum KL, PR.

VII. Jam in hac inquisitione, ostendendam est prius sequens theorema. Nimirum, quod: sicuti diametri hyperbolarum oppositarum AB, EF dividuntur in eadem ratione ab ordinatis EG, AO, quæ super iis demittuntur ex alternis earum verticibus; ita ipsæ ordinatæ EG, AO sint inter se, ut conjugatæ KL, PR earundem diametrorum.

FIG. 40.

Id vero ostendemus in hunc modum. Quoniam BG est ad AG, ut FO ad EO; erit di-

THEOREMA
fundamen-
tale pro de-
terminatio-
ne earum
curvarum.

dividendo, ut AB ad AG, ita EF ad EO. Unde, quia permutando AB est ad EF, tam ut AG ad EO, quam ut BG ad FO; compositis rationibus, erit quoque, ut AB quadratum ad EF quadratum, ita rectangulum AGB ad rectangulum EOF; & rursus permutando, AB quadratum erit ad rectangulum AGB, ut est EF quadratum ad rectangulum EOF.

Quia autem, propter hyperbolam; KL quadratum est ad AB quadratum, ut EG quadratum ad rectangulum AGB; erit etiam permutando, ut KL quadratum ad EG quadratum, ita AB quadratum ad rectangulum AGB. Et similiter, quia ratione ejusdem hyperbolæ, PR quadratum est ad EF quadratum, ut AO quadratum ad rectangulum EOF; erit adhuc permutando, ut PR quadratum ad AO quadratum, ita EF quadratum ad rectangulum EOF.

Hinc, quum ex æquali KL quadratum sit ad EG quadratum, ut est PR quadratum ad AO quadratum; latera horum quadratorum KL, EG, PR, AO erunt pariter proportionalia. Erit igitur, ut KL ad EG, ita PR ad AO: & propterea permutando ordinatæ duæ EG, AO erunt inter se, ut conjugatæ diameterum KL, PR.

VIII. Inde vero plura colligi possunt; quæ ad eas, quod querimus, determinationem sensim nos adducent.

Nimirum sequitur primo, quod ducta ad conjugatam KL recta PQ, ipsi AB parallela, CK sit ad CQ, ut est CE ad CO. Nam CK ad CQ rationem habet compositam ex CK ad CP,

VIII.
Præcedentis
theoremati
transferta
est.
Fig. 40.

CP, & ex CP ad CQ. Sed CK est ad CP, ut KL ad PR; five etiam, ex theoremate ostenso, ut EG ad AO. Et, ducta OS, ipsi EG parallela, CP est ad CQ, ut AO ad OS. Itaque erit CK ad CQ in ratione composita ex EG ad AO, & ex AO ad OS; hoc est in simplici ratione, quam habet EG ad OS, vel etiam CE ad CO.

Sequitur secundo, quod ducta ad conjugatam PR recta KH, ipsi EF parallela, CP sit ad CH, ut est CA ad CG. Nam CP ad CH rationem habet compositam ex CP ad CK, & ex CK ad CH. Sed CP est ad CK, ut PR ad KL; five etiam, ex theoremate ostenso, ut AO ad EG. Et, ducta GV, ipsi AO parallela, CK est ad CH, ut EG ad GV. Itaque erit CP ad CH in ratione composita ex AO ad EG, & ex EG ad GV; hoc est in simplici ratione, quam habet AO ad GV, vel etiam CA ad CG.

Ex quibus sequitur ulterius, CP esse ad CH, ut est CK ad CQ. Quum enim ordinatæ EG, AO dividant diametros AB, EF in eadem ratione; erit, ut BG ad AG, ita FO ad EO; & dividendo, ut AB ad AG, ita EF ad EO. Sed, capiendo semisses antecedentium, CA est ad AG, ut CE ad EO. Itaque, addendo antecedentes consequentibus, erit etiam, ut CA ad CG, ita CE ad CO. Jam vero, ex ostensis, CA est ad CG, ut CP ad CH; itemque CE est ad CO, ut CK ad CQ. Quare erit ex æquali, ut CP ad CH, ita CK ad CQ.

IX. Ducatur nunc, tam ad diametrum
8. inf. 8m AB recta EI, ipsi PR parallela, quam ad con-
 jugatam

jugatam ejus KL recta PT , æquidistans ipsi EF . Et sicuti ex eo, quod CA sit ad CG , veluti est CE ad CO , ostendemus, rectangulum AGB æquale esse rectangulo CGI ; ita quoque ex eo, quod CK sit ad CQ , ut est CP ad CH , *facili negotio demonstrabimus*, rectangulum KQL esse æquale rectangulo CQT . *theorematibus
consequarum
quartum.*
FIG. 40.

Quoniam enim eidem PR parallela est, tam recta El , quam recta AO ; erunt duæ El , AO parallelæ etiam inter se: proindeque erit ut CI ad CA , ita CE ad CO . Sed CE est ad CO , ut CA ad CG . Quare erit ex æquali, ut CI ad CA , ita CA ad CG : & propterea CA quadratum æquale erit rectangulo ICG .

Hinc, addito communi rectangulo AGB , erit etiam CG quadratum æquale duobus rectangulis ICG , AGB . Sed CG quadratum æquale est pariter duobus rectangulis ICG , CGI . Itaque duo ista rectangula ICG , CGI duobus illis ICG , AGB æqualia erunt: & proinde, ablato communi rectangulo ICG , remanebit rectangulum CGI æquale rectangulo AGB .

Eadem autem ratione, quoniam eidem EF parallela est, tam recta PT , quam recta KH ; erunt duæ PT , KH parallelæ etiam inter se; proindeque erit, ut CT ad CK , ita CP ad CH . Sed CP est ad CH , ut CK ad CQ . Quare erit ex æquali, ut CT ad CK , ita CK ad CQ : & propterea CK quadratum æquale erit rectangulo TCQ .

Hinc, addito communi rectangulo KQL , erit etiam CQ quadratum æquale duobus rectangulis TCQ , KQL . Sed CQ quadratum æqua-

æquale est pariter duobus rectangulis TCQ, CQT. Itaque duo ista rectangula TCQ, CQT duobus illis TCQ, KQL æqualia erunt: & proinde, ablato communi rectangulo TCQ, remanebit rectangulum CQT æquale rectangulo KQL.

X.
Confeſſa-
rium quin-
tum, quæſ-
tam curva-
rum deter-
minationem
exhibent.

X. Atque hinc modo, sicuti EG quadratum est ad rectangulum AGB, vel ei æquale rectangulum CGI, ut est KL quadratum ad AB quadratum; ita quoque *nullo negotio ostendemus*, PQ quadratum esse ad rectangulum KQL, vel ei æquale rectangulum CQT, ut est AB quadratum ad KL quadratum.

FIG. 20.

Nam EG quadratum ad rectangulum CGI rationem habet compositam ex EG ad CG, & ex EG ad IG. Sed, ob triangula æquiangularia CGE, PQT, EG est ad CG, ut TQ ad PQ. Itemque, ob triangula æquiangularia EGI, CQP, EG est ad IG, ut CQ ad PQ. Quare EG quadratum ad rectangulum CGI erit in ratione composita ex TQ ad PQ, & ex CQ ad PQ.

Jam duæ istæ rationes componunt pariter rationem, quam habet rectangulum CQT ad PQ quadratum. Itaque erit ex æquali, ut EG quadratum ad rectangulum CGI, ita rectangulum CQT ad PQ quadratum. Sed EG quadratum est ad rectangulum CGI, sive AGB, ut KL quadratum ad AB quadratum. Quare erit rursus ex æquali, ut rectangulum CQT ad PQ quadratum, ita KL quadratum ad AB quadratum; adeoque invertendo PQ quadratum erit ad rectangulum CQT, ut AB quadratum ad KL quadratum.

Ex

Ex eo autem, quod PQ quadratum sit ad rectangulum CQT, five KQL, ut est AB quadratum ad KL quadratum; liquet, punctum P locari in hyperbola, cujus KL est diameter primaria, & AB ejus conjugata. Sed in ejusdem opposita locabitur quoque punctum R; quandoquidem, ducta RZ, eidem AB parallela, ostendemus eadem ratione, RZ quadratum esse ad rectangulum KZL, ut est AB quadratum ad KL quadratum.

XI. Quod quum ita sit, manifestum est, per extremitates earum rectarum, quæ sunt conjugatæ diametrorum in hyperbolis oppositis, non alias curvas transire, quam binas alias oppositas hyperbolas. Atque hinc est, ut aliæ istæ binæ hyperbolæ priorum conjugatæ dicantur; quia scilicet diametri priorum hyperbolarum non alias rectas, velut suas conjugatas, agnoscunt, quam quæ ductæ per centrum, ad alias istas hyperbolas terminantur.

Jam in aliis hisce binis hyperbolis, quæ priorum conjugatæ dicuntur, KL est diameter primaria, & AB ejus conjugata. Unde eadem ratione hyperbolæ, quæ ipsarum conjugatæ dicendæ sunt, necesse est, ut habeant AB velut diametrum primariam, & KL velut ejus conjugatam: & ea propter non aliæ erunt, quam ipsæ priores hyperbolæ. Ex quo patet, quod sicuti priorum hyperbolarum conjugatæ diametri ad alias istas terminantur, sic per contrarium conjugatæ diametri istarum in iis suos terminos debeant habere.

Quin etiam, si descriptis aliis hisce duabus hyperbolis, fuerit cujusvis alterius diametri

XI.
Conjugatarum hyperbolarum natura, & ostenduntur.

FIG. 40.

tri EF priorum hyperbolarum PR conjugata diameter; erit per contrarium EF diameter conjugata ipsius PR in aliis istis hyperbolis. Jam enim per id, quod modo ostensum est, ad priores hyperbolas terminari debet istiusmodi conjugata diameter. Itaque, si ostendi possit, ipsi EF parallelas esse ordinatas diametri PR; proculdubio erit EF diameter ejus conjugata.

Id vero demonstrabimus in hunc modum. Quoniam, ex superius ostensis, CK est ad CQ, ut CP ad CH; subducendo antecedentes ex consequentibus, erit quoque, ut CK ad KQ, ita CP ad PH. Sed, sumptis antecedentium duplis, KL est ad KQ, ut PR ad PH. Quare componendo erit pariter, ut LQ ad KQ, ita RH ad PH: & propterea, quemadmodum PQ est ordinata diametri KL; ita & KH, quæ est ipsi EF parallela, ordinata erit diametri PR.

Patet igitur, quod sicuti duæ hyperbolæ nequeunt esse conjugatæ duarum aliarum hyperbolarum, nisi & istæ etiam sint illarum conjugatæ; sic in quatuor hisce hyperbolis nequeat diameter una conjugata esse alterius diametri, nisi & ista pariter sit conjugata illius. Hinc, quum duæ hujusmodi diametri sub contemplationem venient, non modo alteram alterius conjugatam, sed ambas simul conjugatas diametros appellabimus.

XII. Cæterum, priusquam huc capiti finem imponamus, notetur velim, *theorema illud, superius ostensum in hyperbola, de ordinatis, quæ ducuntur ad binas diametros ex alterius earum verticibus, obtinere etiam in ellipfi.*

Elli-

XII.
Quod theorema, paulo
superius ostensum in
hyperbola
obtinere

Ellipsis enim ALB sunt AB, EF duæ ^{item in el.} quævis diametri, ad quas ex alternis earum ^{hyp.} verticibus ducantur ordinatæ EG, AO, sintque ^{Fig. 41.} etiam KL, PR earum diametrorum conjugatæ. Dico, ordinatas EG, AO habere inter se eandem rationem, quā habent conjugatæ KL, PR.

Quoniam enim ordinatæ EG, AO dividunt diametros AB, EF in eadem ratione: erit, ut BG ad AG, ita FO ad EO: proinde, que componendo AB erit ad AG, ut est EF ad EO. Sed permutando AB est ad EF, tam ut AG ad EO, quam ut BG ad FO. Quare, compositis rationibus, erit quoque, ut AB quadratum ad EF quadratum, ita rectangulum AGB ad rectangulum EOF; & rursus permutando erit, ut AB quadratum ad rectangulum AGB, ita EF quadratum ad rectangulum EOF.

Quia autem, propter ellipsum, KL quadratum est ad AB quadratum, ut EG quadratum ad rectangulum AGB; erit etiam permutando, ut KL quadratum ad EG quadratum, ita AB quadratum ad rectangulum AGB. Et similiter, quia ratione ejusdem ellipsis, PR quadratum est ad EF quadratum, ut AO quadratum ad rectangulum EOF; erit adhuc permutando, ut PR quadratum ad AO quadratum, ita EF quadratum ad rectangulum EOF.

Hinc, quum ex æquali KL quadratum sit ad EG quadratum, ut est PR quadratum ad AO quadratum; latera horum quadratorum KL, EG, PR, AO erunt pariter proportionalia. Erit igitur, ut KL ad EG, ita PR ad AO; & propterea permutando ordinatæ duæ EG, "

192 SECTIONUM CONICARUM
 EG, AO erunt inter se in eadem omnino
 ratione, quam habent conjugatæ diametro-
 rum KL, PR.

C A P. VI.

*Parabolæ omnes aliæ diametri
 determinantur.*

I.
 Theorema
 fundamen-
 tale pro de-
 terminandis
 parabolæ
 diametris a-
 liis.

I. **E** Tſi parabola, perinde ac ellipsis, &
 hyperbola, præter eam diametrum,
 quam in ipſo cono fortitur, infinitas alias
 diametros habeat; in ea tamen omnes aliæ iſtæ
 diametri, non convergunt ad punctum ullum,
 ut contingit in hyperbola, & in ellipſi; ſed
 ſunt omnes tam inter ſe, quam cum ipſa dia-
 metro principali parallelæ.

FIG. 42.

Ut autem pateat, quod ſit diameter pa-
 rabolæ recta quælibet, ducta æquidistanter
 diametro principali; *oſtendendum eſt prius ſe-
 quens theorema*. Nimirum, quod ſi AB ſit pa-
 rabolæ diameter principalis, & aliqua ejus pa-
 rallelæ EF biſecet in O ſubtenſam AM, perti-
 nentem ad verticem A; quod, inquam, demiffa
 ad diametrum ordinata EG, & ducta per pun-
 ctum O recta OL, ei parallelæ, ſit ſemper AG
 æqualis ipſi GL.

Nec ſane difficile erit, theorema iſtud
 oſtendere. Nam, ſicuti AM dupla eſt ip-
 ſius AO; ita, demiffa ad diametrum ordi-
 nata alia MN, erit quoque, tum AN dupla ip-
 ſius AL, cum MN dupla ipſius OL, ſive EG;
 proin-

proindeque MN quadratum erit quadruplum quadrati, quod fit ex EG. Sed, ob parabolam, MN quadratum est ad EG quadratum, ut AN ad AG. Quare etiam AN quadrupla erit ipsius AG: & propterea, quum sit AL dupla ejusdem AG; duæ AG, GL æquales erunt inter se.

II. Inde vero *sequitur primo*, quod si ex punctis A, & E ducantur rectæ AK, EI, ipsis EG, AM parallelæ, quarum prior AK conveniat cum EF in puncto K, & altera EI cum AB in puncto I; triangulum EGI sit æquale parallelogrammo AGEK.

II.
*Præcedentis
theorematis
consequentiū
primum.*
FIG. 42.

Est enim, ex theoremate ostenso, AG æqualis GL. Sed GL est æqualis ipsi EO, seu AI. Quare duæ AG, AI etiam inter se æquales erunt: proindeque tota GI dupla erit ipsius AG.

Jam triangulum EGI, & parallelogrammum AGEK sunt in iisdem parallelis. Quare, quum basis trianguli GI dupla sit basis parallelogrammi AG; erit triangulum EGI æquale parallelogrammo AGEK.

Et hinc patet, æqualia esse etiam triangu-
la XAI, XEK; quandoquidem, si ex trian-
gulo EGI, & ex parallelogrammo AGEK au-
feratur commune trapetium AGEX, nonnisi
duo illa triangu-
la remanebunt.

III. Iisdem positis, *sequitur secundo*, quod
triangulum AOK sit æquale parallelogrammo
EOAI.

III.
*Conse-
quentiū secon-
dum.*

Est enim, ex theoremate ostenso, AG æ-
qualis GL. Sed AG est æqualis ipsi EK, &
GL est æqualis ipsi EO. Itaque duæ EK, EO

FIG. 42.

etiam inter se æquales erunt: proindeque tota KO dupla erit ipsius EO.

Jam triangulum AOK, & parallelogrammum EOAI sunt in iisdem parallelis. Quare, quum basis trianguli KO dupla sit basis parallelogrammi EO; erit triangulum AOK æquale parallelogrammo EOAI.

Potest etiam id crui ex æqualitate triangulorum XAI, XK, superius ostensa. Nam, si eis addatur commune trapezium AOEX, fiet parallelogrammum EOAI æquale triangulo AOK.

IV. Capiatur porro in parabola punctum quodvis aliud P, ex quo ducantur ad diametrum AB duæ aliæ rectæ PS, PQ, ipsis EI, EG parallelæ. Et facile eris ostendere, quod triangulum PQS sit etiam æquale correspondenti parallelogrammo AQRK.

43.

Quum enim, ex constructione, parallelæ sint inter se, tam duæ EG, PQ, quam duæ EI, PS; triangula duo EGI, PQS similia erunt: proindeque erit, ut EG quadratum ad PQ quadratum, ita triangulum EGI ad triangulum PQS. Sed, propter parabolam, EG quadratum est ad PQ quadratum, ut AG ad AQ. Itaque erit ex æquali, ut AG ad AQ, ita triangulum EGI ad triangulum PQS.

Jam parallelogramma duo AGEK, AQRK habent eandem altitudinem. Unde, quum sint inter se in eadem ratione rectarum AG, AQ; erit rursus ex æquali, ut triangulum EGI ad triangulum PQS, ita parallelogrammum AGIK ad parallelogrammum AQRK: & propterea, quemadmodum triangulum EGI ostensum

IV.
Confessum
est
tunc.

FIG. 42.

sum est æquale parallelogrammo AGEK; ita quoque erit triangulum PQS æquale parallelogrammo AQRK.

V. Denique, si recta PS, ipsi EI parallela, conveniat cum recta EF in puncto V, *nullo negotio ostendemus quoque, quod triangulum PVR sit æquale correspondenti parallelogrammo EVSI.* v.
Causa-
rium
quæ-
tum.

Ponamus etenim primo, quod punctum S sit supra verticem A, & quod punctum P existat inter A, & E. Quia igitur triangulum EGI ostensum est æquale parallelogrammo AGEK, & triangulum PQS æquale parallelogrammo AQRK; si ex triangulo auferatur triangulum, ex parallelogrammo parallelogrammum, ex utroque autem commune trapezium PQGZ; supererit trapezium EZSI æquale trapezio PZER: proindeque, addito communi triangulo EZV, fiet parallelogrammo EVSI æquale triangulum PVR. FIG. 42.

Ponamus secundo, quod punctum S sit quidem supra verticem A, sed quod punctum P sit ad alteram partem puncti E relate ad eundem verticem A. Et rursus, quia triangulum EGI ostensum est æquale parallelogrammo AGEK: addito communi trapezio EGQR, fiet trapezium EIQR æquale parallelogrammo AQRK, sive etiam triangulo PQS: & proinde, dempto communi trapezio VSQR, fiet parallelogrammo EVSI rursus æquale triangulum PVR. FIG. 42.

Ponamus denique, quod punctum S sit infra verticem A. Et quoniam triangulum PQS ostensum est æquale parallelogrammo AQRK:

N 2

AQRK:

AQRK : addito , vel dempto communi trapezio VSQR, fiet triangulum PVR æquale trapezio ASVK. Sed, propter æqualitatem triangulorum XEK, XAI, superius ostensam, trapezium ASVK est æquale parallelogrammo EVSI. Quare etiam triangulum PVR æquale erit parallelogrammo EVSI.

VI. His præmissis, facile modo erit, ostendere, quod sit *diameter quoque parabole recta qualibet, ducta æquidistanter diametro principali*. Ut enim talis esse possit, duo quidem requiruntur. Primum, ut bisecet rectas omnes, alicui æquidistanter ductas, & utrinque ad parabolam terminatas. Deinde, ut quadrata ex semissibus istarum rectarum sint, ut ipsius portiones correspondentes.

Jam horum utrumque facili negotio demonstrabitur. Quantum enim ad primum, sit **FIG. 42.** EF recta quævis, ducta æquidistanter diametro principali AB; eaque bisecet in O subtenfam AM, pertinentem ad verticem A ejusdem diametri. Dico, eandem EF secare quoque bifariam in V quamvis aliam rectam PP, quæ ipsi AM parallela, utrinque ad parabolam terminatur.

Positis enim omnibus, ut supra; erit utrumque triangulorum PVR, PVR æquale parallelogrammo EVSI. Quare æqualia erunt inter se ipsa duo triangula PVR, PVR. Sed eadem triangula, velut similia, sunt, ut quadrata laterum homologorum PV, PV. Itaque latera isthæc homologa PV, PV erunt pariter æqualia; & consequenter tota PP bifariam secta erit in V.

VII. Quan-

Omnis recta, ducta æquidistanter diametro principali, est etiam parabola diameter.

43.

VII. Quantum vero ad secundum, *nec etiam magno labore opus est, ad illud ostendendum*. Maneant enim omnia adhuc, ut supra. Et dico insuper, quadrata ipsarum AO, PV esse inter se, quemadmodum sunt portiones correspondentes EO, EV.

VII.
Pars altera
demonstra-
tionis, quæ
præcedens
veritas a-
pproxiatur.
FIG. 42.

Quum enim triangulum AOK ostensum sit æquale parallelogrammo EOAI, & triangulum PVR æquale parallelogrammo EVSI; erit, ut triangulum AOK ad triangulum PVR, ita parallelogrammum EOAI ad parallelogrammum EVSI.

43.

Jam vero, ob similitudinem triangulorum AOK, PVR, triangulum AOK est ad triangulum PVR, ut AO quadratum ad PV quadratum. Itemque, ob communem altitudinem parallelogrammorum EOAI, EVSI, parallelogrammum EOAI est ad parallelogrammum EVSI, ut EO ad EV. Quare erit ex æquali, ut AO quadratum ad PV quadratum, ita EO ad EV.

VIII. Non inficior, illud hic a nobis assumptum esse, ut *recta, quæ intra parabolam sub-tensa ducitur æquidistanter, utrinque ad ipsam parabolam terminetur*. Sed facile erit, tum istud ostendere, tum alia etiam ratione probare, quod rectæ omnes, ipsi AM æquidistantes, & utrinque ad parabolam terminatæ, bifariam secantur a recta EF.

VIII.
Recta intra
parabolam,
subtensa du-
cta æquidi-
stanter, ut-
rinque ad
eam termi-
natur.
FIG. 43.

Jam enim de rectis, quæ ducuntur intra segmentum parabolicum AEM, res est, extra omnem dubitationis aleam posita. Itaque ducatur extra illud segmentum recta quævis PV, ipsi AM parallela. Et, si fieri potest, oc-

currat parabolæ tantum ex una parte in P . Extendatur ea ad partem aliam versus V , & fiat VP æqualis ipsi PV . Ostendendum est, hoc aliud punctum P esse etiam in parabola.

Ponantur omnia, ut supra. Et quoniam duæ PV , VP inter se sunt æquales; erit triangulum PVR , ad unam partem existens, æquale triangulo PVR , quod existit ad partem alteram. Sed illud, propter parabolam, est æquale parallelogrammo $EVSI$, five etiam trapetio $ASVK$. Quare eidem trapetio $ASVK$ hoc etiam æquale erit: & propterea utrumque triangulorum PQS erit æquale correspondenti parallelogrammo $AQRK$; eritque adeo, ut triangulum PQS ad triangulum PQS , ita parallelogrammum $AQRK$ ad parallelogrammum $AQRK$.

Jam, ob similitudinem triangulorum PQS , PQS , triangulum PQS est ad triangulum PQS , ut PQ quadratum ad PQ quadratum; itemque, ob eandem altitudinem parallelogrammorum $AQRK$, $AQRK$, parallelogrammum $AQRK$ est ad parallelogrammum $AQRK$, ut est AQ ad AQ . Quare erit ex æquali, ut PQ quadratum ad PQ quadratum, ita AQ ad AQ : & propterea, sicuti punctum unum P est in parabola, sic etiam locabitur in parabola punctum aliud P .

IX.

*Quod ea
tantum re-
cta sunt pa-
rabola dia-
metri, qua
parallela
sunt diame-
tro principa-
li.*

IX. Non ergo dubitari potest, quin recta EF , ducta æquidistanter diametro principali AB , sit etiam diameter parabolæ. Nam, & bifariam dividit rectas omnes, quæ subtenfæ AM æquidistantes, utrinque ad parabolam terminantur. Et quadrata ex semilibus istarum rectarum

rum

rum servant inter se eandem rationem, quam habent correspondentes portiones ipsius EF.

Sed facile erit etiam ostendere, quod *præter eas, quæ ducuntur æquidistanter diametro principali, nulla alia recta linea possit esse diameter parabolæ*. Ut enim recta aliqua esse queat parabolæ diameter, illud primo requiritur, ut bifariam secet rectas omnes, alicui æquidistanter ductas, & utrinque ad parabolam terminatas. Unde, si ostendi possit, accidens istud iis tantummodo rectis competere, quæ ducuntur æquidistanter diametro principali; jam veritas ejus, de quo agitur, liquido constabit.

Id vero ostendetur in hunc modum. Sit TY recta positione data, cui debent esse parallelæ ex omnes, quæ bifariam à diametro dividuntur. Jamque, si ea parallela est ordinatis diametri principalis AB; secabit diameter ista AB bifariam rectas omnes, quæ ipsi TY æquidistantes, utrinque ad parabolam terminantur.

FIG. 42.
43.

Quod si autem recta TY non sit parallela ordinatis diametri principalis AB; per ea, quæ superius ostensa sunt, semper ex vertice A duci poterit recta alia AM, quæ illi parallela, parabolam secet in alio puncto. At rectas omnes, ipsi AM æquidistanter ductas, & utrinque ad parabolam terminatas, ut modo vidimus, non alia bifecat recta, quam quæ parallela est diametro principali AB, & bifariam dividit subtensam ipsam AM.

X. Cæterum theorema, hoc capite a nobis ostensum, pro determinandis aliis parabola diametris, colligi etiam potest ex eo, quod superius de-

X.
Theorema
hujus
capitis ostensum

sum corre- demonstravimus, tum in ellipsi, cum in hyper-
spondet ei, bola, pro definiendis harum curvarum diame-
quod pro el- tris aliis.
lipsi. & hy-
perbola su-
perius at-
tulimus.

FIG. 23.

31.

Tam enim in ellipsi, quam in hyperbola, posito, quod AB sit diameter principalis, & centrum punctum C, si EF sit recta quævis per centrum ducta, quæ bisecet in O subten- sam AM, pertinentem ad verticem A, & de- missa ad diametrum AB ordinata EG, huic per punctum O parallela agatur OL; erit, ex supe- rius ostensis, ut CL ad CG, ita CG ad CA; atque adeo subducendo, vel antecedentes ex consequentibus, vel consequentes ex antece- dentibus, erit etiam, ut CL ad GL, ita CG ad AG.

Jam, abeunte in infinitum puncto B, altero diametri vertice, tam ellipsis, quam hyperbola vertitur in parabolam. Et, quia in infini- tum etiam abit centrum C, quod bisecat dia- metrum AB: quemadmodum duæ AC, EC parallelæ sunt inter se; sic utraque ipsarum CG, CL infinita evadet. Unde, quum earum differentia GL sit finita; eædem erunt æqua- les inter se; & propterea, quum sit, ut CL ad GL, ita CG ad AG; etiam AG ipsi GL æqua- lis erit.

XI.

Correspon-
dent etiam
utriusque
consectaria,
& quid ex
infinita cen-
tri distantia
ampius
consequitur.

FIG. 23.

31.

XI. Quin, & consectaria ejusdem theorematism correspondent quoque iis, quæ in ellipsi, & hyperbola ex eodem illo theoremate deduximus. Nam, ubi centrum C in infinitum abire supponitur, quemadmodum parallelæ sunt duæ AC, EC; sic omnia illa trapetia, quibus æqualia demonstravimus correspondentia trian- gula, in parallelogramma totidem vertuntur.

At.

Atque hinc etiam vera ratio elucescit, *cum in parabola diametri omnes inter se sint parallele*. Nimirum, quia in ea centrum est in infinita distantia a vertice principalis diametri; adeoque ejus diametri convergunt ad punctum, infinite distans ab eodem vertice.

Sed ex eo, quod centrum in parabola sit in infinita distantia a vertice diametri principalis, liquet quoque, *in eadem curva non posse locum habere conjugatarum diametrorum contemplationem*; quippe quæ suas positiones habent similiter in infinita ab eodem vertice distantia.

In posterum ergo considerabimus parabolam, non modo, ut ellipsim, & hyperbolam, cujus diameter est infinitæ longitudinis; verum etiam, *ut ellipsim, & hyperbolam, cujus centrum est in infinita distantia a vertice diametri*. Nam, utraque consideratione parabolæ proprietates ex iis, quæ ellipsi, & hyperbolæ competunt, deducuntur.

C A P. VII.

Diametrorum parabolæ communia quedam ostenduntur.

I. **E**X iis, quæ ostensa sunt in capite præcedenti, abunde liquet, parabolam, præter eam diametrum, quam in ipso cono sortitur, alias etiam innumeras habere, quæ omnes parallelæ sunt, tam inter se, quam cum

I.
Proprietates
diametri
principalis
ad omnes
alias dia-
metros pa-

parabola tra-
ducuntur.
FIG. 44.

cum ipsa diametro principali. Sed *communis* *harum diametrorum* operæ pretium est, ut paulo distinctius prosequamur. Quem in finem parabolæ AM sit AB diameter principalis, & EF alia quævis diameter.

Primo igitur, quemadmodum diameter principalis AB suas habet ordinatas; ita suis quoque refertur ordinatis diameter alia EF. Sunt autem, ex ostensis, ordinatæ istæ rectæ illæ omnes, quæ ducuntur æquidistanter subtenfæ AM, quam ab ipsa EF suppono bisectam in puncto O.

Deinde, quemadmodum quadrata ordinatarum diametri principalis AB sunt inter se, ut portiones ejus correspondentes, a vertice sumptæ; ita & quadrata ordinatarum alterius diametri EF proportionalia sunt correspondentibus ejus portionibus, similiter a vertice sumptis.

Unde porro, si per verticem E educatur recta EH ordinatis æquidistanter, quæ sit talis longitudinis, ut quadratum unius ordinatæ AO sit æquale rectangulo HEO; vocari poterit recta ista EH *parameter* diametri EF, & erit quadratum cujuscvis alterius ordinatæ PV, similiter æquale rectangulo HEV.

II. Hæc quum ita sint, perspicuum est, *omnes illas proprietates, quæ parabolæ competunt relate ad diametrum principalem, obtinere etiam, quum ad aliam quamvis diametrum parabolæ ipsa refertur.*

FIG. 44. Hinc ulterius, sicuti describitur parabola in plano, per solas rectarum longitudines, data diametro principali AB cum magnitudi-

ne,

ne, & positione parametri AD, quæ ad ipsam refertur; sic etiam describi poterit eadem parabola, ubi una cum alia quavis diametro EF magnitudine, & positione datur illius parameter EH.

Et sicuti recta AD, ducta per verticem A ipsius diametri principalis AB æquidistanter suis ordinatis, contingit parabolam in solo puncto A; ita etiam recta EH, ducta per verticem E alterius cujuslibet diametri EF, similiter ordinatis suis æquidistanter, dumtaxat in puncto E tanget parabolam.

Quin imo, sicuti omnis alia recta, quæ ducta ex eodem vertice A, angulum constituit cum AD, non solum in A, sed in alio quoque puncto secat parabolam; sic pariter quælibet alia recta, quæ ducta ex eodem vertice E, angulum continet cum EH, non modo in E, verum etiam in puncto alio occurret eidem parabole.

Unde etiam, si in plano ipsius parabole detur positio recta aliqua, quæ non sit parallela ordinatis cujuslibet alterius diametri EF, semper ex vertice E duci poterit recta alia, quæ ei parallela, parabolam secet in alio puncto; quum non aliter esse queat illi parallela, nisi angulum contineat cum EH.

III. Sed his, ita se habentibus, liquet quoque, quod *sicuti ex diametro principali transire licuit ad alias diametros; sic vicissim ex quolibet alia diametro, tum ad ipsam principalem, cum ad alias omnes progredi licebit.*

Nam semper ac eadem sunt diametrorum omnium proprietates, theorema illud fundamen-

III.

Quod ex
quolibet pa-
rabola dia-
metro trans-
ire possit in
omnes alias.

FIG. 44.

204 SECTIONUM CONICARUM
mentale, quod præcedenti capite ostensum est
relate ad diametrum principalem, poterit eadem
omnino ratione demonstrari de quavis alia
diametro EF.

Itaque, si ducatur recta aliqua AB, diame-
tro EF æquidistanter, quæ bifecet in G sub-
tensam PE, pertinentem ad verticem E; & de-
missa ad diametrum EF ordinata PV, huic per
punctum G parallela agatur GR; duæ ER,
VR æquales erunt inter se.

Unde, quum omnes illæ æqualitates
triangulorum, parallelogrammorumque, quas
superiori capite prosecuti sumus relate ad dia-
metrum principalem, obtineant quoque respec-
tu ipsius diametri EF; facile erit ostendere,
rectam illam AB esse diametrum quoque ip-
sius parabolæ.

Inde enim conficitur, ipsam AB secare bi-
fariam rectas omnes, æquidistanter ductas sub-
tensæ PE, & utrinque terminatas ad parabo-
lam; itemque quadrata ex semissibus istarum
rectarum proportionalia esse correspondenti-
bus portionibus ipsius AB, sumptis a termi-
no A.

IV. Habent igitur omnes aliæ parabolæ
diametri easdem omnino proprietates cum dia-
metro principali; & ex qualibet earum, tum ad
ipsam principalem, cum ad alias omnes pro-
gredi licet. Sed parabolæ diametri, præter
hæc recensitas proprietates, plures alias
communes habent, quas non abs re erit hic
breviter ostensas exhibere.

Ac principio quidem illud nobis est
ostendendum, quod qualibet diameter para-
bolæ

IV.
Alia dia-
metrorum
proprietates
communes
respiciens
rectas, quas
bifecat.

bola non alias rectus, utrinque ad curvam terminatus, dividat bifariam, quam quæ ordinatim ad ipsam diametrum applicantur.

Sit enim AB parabolæ AM diameter quævis, sitque etiam AD recta illa, cui omnes ejus diametri ordinatæ sunt parallelæ. Ducatur in parabola recta PP, quæ utrinque ad curvam terminata, non sit ordinatim applicata diametro AB. Dico, eam ab ipsa diametro AB non posse secari bifariam. FIG. 43

Si enim fieri potest, secetur recta PP a diametro AB bifariam in S. Et quoniam ea non est parallela ordinatis ipsius AB; ex superius ostensis, duci poterit per verticem A recta alia, quæ ipsi PP parallela, parabolam secet in alio puncto. Ducatur itaque recta ista, & sit AM. Tum, bisecta ea in puncto O, ducatur per punctum istud recta EF, ipsi AB parallela.

Quia igitur recta EF ducta est æquidistanter diametro AB, & bisecat in O subtensam AM, pertinentem ad verticem A; per superius ostensa, secabit quoque bifariam in V rectam PP, ipsi AM parallelam. Sed ex hypothesis recta PP secatur bifariam in S. Quare eadem PP bisecta erit, tam in puncto S, quam in puncto V. Quod fieri non potest.

V. Ex eo autem, quod quælibet diameter parabolæ eas tantum rectas, utrinque ad curvam terminatas, bifariam dividat, quæ ordinatim ad ipsam diametrum applicantur; sequitur per contrarium, ut si aliqua parabola diameter bisecat rectam aliquam, utrinque terminatam ad parabolam, hæc esse, debeat diametri illius ordinata.

V.
*Quomodo
data para-
bola diamet-
ter aliqua
potest reperi-
ri.*

Un-

Unde ulterius consequitur, ut si recta aliqua bifecet alias duas æquidistantes, & utrinque ad parabolam terminatas, ea esse debeat diameter ipsius parabolæ, atque adeo cuiuscumque alteri diametro parallela. Nam aliter, ducta per punctum bisectionis unius ex rectis æquidistantibus recta alia, cuiusvis diametro parabolæ parallela; hæc velut diameter bifecabit quoque rectam aliam æquidistantem. Quod fieri non potest.

Id vero quum ita sit, facile erit, cuiuslibet datæ parabolæ diametrum aliquam reperire, & consequenter positionem determinare omnium aliarum diametrorum. Neque enim aliud fieri debet, quam ducere intra datam parabolam rectas duas æquidistantes, & utrinque ad curvam terminatas. Nam, sicuti recta, quæ eas bifariam dividit, diameter erit parabolæ; ita & eadem positionem omnium aliarum diametrorum exhibebit.

VI.

Quod in
omni para-
bola reperire
licet dia-
metrum, qua
vellet angu-
lus consti-
tuat cum
sua ordina-
ta.

FIG. 45.

VI. Speciatim in omni parabola reperire licet diametrum, quæ cum suis ordinatis rectos angulos constituat. Inveniatur siquidem ipsius datæ parabolæ diameter quævis EF, sitque EH recta illa, cui omnes istius diametri ordinatæ debent esse parallelæ. Jamque, si angulus FEH fuerit rectus, erit ipsa EF diameter optata. Quod si secus contigerit, inveniemus diametrum, quam quærimus, sequenti ratione.

Super diametro EF ex vertice ejus E perpendicularis erigatur EP. Et quoniam ea angulum continet cum EH, cui parallelæ sunt ipsius EF ordinatæ; per superius ostensa, necessario secabit parabolam in puncto alio P.

Se-

Secetur ergo PE bifariam in G, & ducta per punctum istud recta AB, ipsi EF parallela, erit AB diameter, quam quærimus.

Quod enim AB sit diameter parabolæ; id liquet ex eo, quod parallela sit ipsi EF, quæ ex constructione est parabolæ diameter. Quod autem cum suis ordinatis rectos angulos constituat; patet etiam abunde. Nam ordinatæ ejus parallelæ sunt rectæ PE, quam ipsa dividit bifariam: & propterea, sicuti rectus est angulus PEF; sic etiam, propter parallelas AB, EF, rectus erit angulus PGB.

VII. In qualibet igitur parabola existit diameter, quæ rectos cum suis ordinatis angulos constituit. Diametrum istam vocabimus in posterum *axem* ipsius parabolæ. Et facile erit ostendere, quod *in omni parabola nonnisi unus axis reperitur*. VII.
De axe parabola, & quod is nonnisi unus esse possit.

Si enim fieri potest, parabola AM, præter axem AB, habeat quoque axem alium, qui sit EF. Et quoniam duo isti axes, velut parabolæ diametri, inter se sunt paralleli; illæ eadem rectæ, quæ uni axi perpendiculares sunt, erunt etiam normales ad axem alterum. FIG. 45.

Id vero fieri non potest. Quum enim uterque axis cum ordinatis suis rectos angulos constituat; eadem erunt utriusque axis ordinatæ. Quare illa eadem recta, quæ utrinque ad parabolam terminata, dividitur bifariam ab axe uno, bisecabitur quoque ab axe altero. Quod plane repugnat.

VIII. Jam, ut aliqua dicamus de angulis, quos aliæ parabolæ diametri cum ordinatis suis constituunt, sit AB axis ipsius parabolæ. Et VIII.
De angulis, quos aliæ parabolæ dia-
du-

metri cum ordinatis suis confistunt. ducta ex vertice ejus A subtenſa quavis AM, ſit EF diameter, quæ biſecat in O ſubtenſam iſtam, eamque velut ſuam ordinatam agnoſcit.

FIG. 45. Quia igitur AB, EF, velut parabolæ diametri, inter ſe ſunt parallelæ; erit angulus BAM æqualis angulo AOE, quem diameter cum ordinata ad plagam unam conſtituit. Unde aliæ parabolæ diametri cum ordinatis ſuis, ſaltem ad partem unam, non alios angulos continebunt, quam quos ſubtenſæ, pertinentes ad verticem axis, cum ipſo axe conſtituunt.

Nullum vero horum angulorum rectum eſſe poſſe, ſed quemlibet acutum exiſtere; jam exinde conſequitur, quod perpendicularis, erecta ſuper axe ex vertice ejus, velut parallela ordinatis ipſius axis, tota extra parabolam cadat. Eoſdem autem minores ſemper, ac minores fieri, prout longitudo earum ſubtenſarum major ſemper, atque major evadit; notius eſt, quam ut ulla egeat demonſtratione.

IX. Sed, ut ad communes diametrorum proprietates rurfus revertamur, illud etiam omnibus accidit, ut *ordinatæ, quæ ad duas quaſcumque diametros ab alternis earum verticibus ducuntur, æquales ex ipſis diametris portiones abſcindant.*

Ordinatæ, ſuper diametris duſta ab alternis earum verticibus, æquales ex iis portiones abſcindunt.
FIG. 46. Sint enim AB, EF duæ quævis diametri parabolæ AM. Et ducatur ex vertice E ordinata EG ad diametrum AB, & ex vertice A ordinata AO ad diametrum EF. Dico, portionem AG æqualem eſſe portioni EO.

Extendatur ordinata una AO uſque donec occurrat parabolæ ad partem alteram in M; tumque agatur per punctum O recta OL, ipſi

ipsi EG parallela, quæ conveniat cum diametro AB in puncto L.

Et quoniam subtensa AM pertinet ad verticem A, eaque dividitur bifariam per rectam EF, ductam æquidistanter diametro AB; duæ AG, GL, ex superius ostensis, æquales erunt inter se. Sed, ob parallelogrammum EL, æquales quoque sunt duæ GL, EO. Quare etiam AG ipsi EO æqualis erit.

X. Hujus autem proprietatis ope, facile erit, *cujuscumque parabolæ diametri positionem suarum ordinarum definire.*

Sit enim AB diameter, cujus ordinatæ quærentur. Ducatur intra parabolam recta quævis PP, quæ utrinque ad ipsam terminetur. Tum, secta ea bifariam in V, agatur per punctum istud V recta EF, diametro AB parallela.

Ducatur porro ex vertice A recta AM, ipsi PP æquidistanter, quæ diametro EF occurrat in O. Et, siquidem ex AB abscindatur portio AG æqualis portioni EO, jungaturque EG; erit EG ordinata ipsius AB.

Si enim EG non sit ordinata ipsius AB, sit ejus ordinata recta EH. Et quoniam ad diametros AB, EF ex alternis earum verticibus ductæ sunt ordinatæ EH, AO; per proprietatem jam ostensam, portiones duæ AH, EO æquales erunt inter se. Sed ex constructione eisdem EO æqualis est portio AG. Quare erunt præter æquales inter se duæ AG, AH. Quod fieri non potest.

XI. Omnium quoque diametrorum parabolæ commune est, ut si per aliquod parabolæ

Tom. I.

O

pun-

X.

Quomodo
definitur po-
siti-
onem
ordinatæ
cujus-
que diametri.

FIG. 46.

XI.

Diametri-

omni para-
bola alla
proprietate
communis.

FIG. 47.

punctum recta dua ducantur, quarum una pertineat ad verticem alicujus diametri, altera sit ei parallela; ea abscindant ex qualibet diametri ordinata portiones duas, quæ rectangulum continent, æquale quadrato ipsius ordinatæ.

Sit enim AB diameter aliqua parabolæ AM. Et, ductis per punctum quodvis E ipsius parabolæ rectis AX, EZ, quarum prior AX pertineat ad verticem A, altera sit ipsi diametro parallela, convenient eæ cum aliqua ejusdem diametri ordinata MN in punctis P, & Q. Dico, rectangulum PNQ æquale esse quadrato ipsius MN.

Ducatur siquidem ex puncto E ad eandem diametrum AB ordinata alia EG; eritque, propter parabolam, ut EG, sive QN quadratum ad MN quadratum, ita AG ad AN. Sed AG est ad AN, ut EG, sive QN ad PN. Itaque erit ex æquali, ut QN quadratum ad MN quadratum, ita QN ad PN: & propterea, quum tres rectæ QN, MN, PN sint continue proportionales; erit MN quadratum æquale rectangulo PNQ.

Patet autem, hujusmodi communem diametrorum omnium parabolæ proprietatem correspondere ei, quam postremo loco, tum in ellipsi, cum in hyperbola superius demonstravimus. Nam, ubi punctum B, alter diametri vertex, in infinitum abire supponitur; quemadmodum, tam ellipsis, quam hyperbola vertitur in parabolam; ita recta BX, convergens ad punctum B, abit in rectam aliam, diametro AB parallelam.

FIG. 30.
38.

XII. Denique omnibus etiam parabolæ dia-

diametris accidit, ut si ad aliquam ex iis tres ordinatæ continuæ proportionales demittantur, quarum extremæ tendant ad contrarias partes; recta, conjungens terminos istarum, transire debeat per punctum diametri, cui ordinata media correspondet.

Sit enim AB diameter aliqua parabolæ AM, ad quam demittantur tres ordinatæ EG, MN, HL, ita ut ipsarum extremæ EG, HL tendant ad partes contrarias. Dico, rectam EH, conjungentem terminos istarum, transire per punctum N, cui correspondet ordinata media MN.

Est namque, propter parabolam, ut EG quadratum ad MN quadratum, ita AG ad AN. Et similiter, ut MN quadratum ad HL quadratum, ita AN ad AL. Quare, sicuti tres ordinatæ EG, MN, HL sunt continuæ proportionales; ita erunt etiam in continua proportionem tres abscissæ AG, AN, AL, quæ cum quadratis earum ordinarum eandem habent rationem.

Quum ergo AG sit ad AN, ut est AN ad AL; erit dividendo, ut GN ad AN, ita LN ad AL; & permutando, ut GN ad LN, ita AN ad AL. Sed AN est AL, ut MN quadratum ad HL quadratum, sive etiam, ut EG ad HL. Quare erit ex æquali, ut GN ad LN, ita EG ad HL: proindeque, quum duæ EG, HL parallelæ sint inter se, recta EH transibit per punctum N.

XIII. Sed conversum hujus proprietatis pariter obtinet. Nimirum, quod si ducatur intra parabolam recta quævis EH, quæ oc-

XII.

Alia adhuc
communis
proprietas
diametro-
rum parabola-
rum.

FIG. 47.

XIII.

Præteritis
proprietas
conversum

demonstratur.

FIG. 47.

currat parabolæ quidem in punctis E, & H; alicui autem ex ejus diametris AB in puncto N; ordinata MN, huic puncto correspondens, fit media proportionalis inter ordinatas EG, HL, quæ ex iis punctis super diametro AB demittuntur.

Si enim EG non sit ad MN, ut est MN ad HL; capiatur ad eandem partem cum HL ordinata alia KI, quæ sit tertia proportionalis post duas EG, MN. Itaque, per proprietatem jam ostensam, recta KE transibit per punctum N; & propterea, vel idem habebit segmentum cum recta EF, quæ similiter transit per punctum N; vel cum ea spatium comprehendet. Quorum utrumque repugnat.

Non igitur esse potest, ut EG ad MN, ita MN ad KI. Quare erit, ut EG ad MN, ita MN ad HL: & propterea tres ordinatæ EG, MN, HL continue proportionales erunt. Sed, quemadmodum sunt continue proportionales tres ordinatæ EG, MN, HL; ita quoque erunt in continua proportionione tres abscissæ AG, AN, AL: quippe quæ, ob parabolæ naturam, cum quadratis earum ordinatarum eandem habent rationem.

LIBER IV.

De Mutua Diametrorum, Parametrorumque Comparatione.

Demonstravimus præcedenti libro, conicas sectiones, præter eam diametrum, quam in ipso cono sortiuntur, innumeras alias habere, quarum quælibet, ad instar principalis, suam quoque parametrum habet. Sed non abs re erit, inter se mutuo conferre, tum ipsas sectionum conicarum diametros, cum parametros earundem. Itaque de mutua ista diametrorum, parametrorumque comparatione agendum nobis erit hoc libro.

CAP. I.

Ellipsis diametri omnes inter se mutuo comparantur.

I. **V**idimus superius, in qualibet ellipsi binas diametros extare, quæ cum ordinatis suis rectos angulos constituunt. Binas hæc diametros vocavimus axes ipsius ellipsis. Et demonstravimus quoque, ellipsim abire in circulum, quum duo ejus axes inter se sunt æquales.

1.
Diametrorum ellipses maxima quidem est axis major, minima vero axis minor.

FIG. 48

O 3 . Id

214 SECTIONUM CONICARUM

Id quum ita sit, omnino necesse est, ut ex duobus axibus ellipsis unus quidem sit major, alter vero minor. Sed facile erit etiam ostendere, *diametrorum omnium ellipsis maximam quidem esse axem majorem, minimam vero axem minorem.*

Ellipsis enim AKBL sit AB axis major, & KL axis minor. Sit autem EF alia ejus diameter. Dico, aliam istam diametrum EF minorem esse axe majore AB, majorem vero axe minore KL.

Demissa siquidem ad axem majorem AB ordinata EG; erit, ob naturam ellipsis, ut KL quadratum ad AB quadratum, ita EG quadratum ad rectangulum AGB. Sed KL quadratum minus est quadrato ex AB. Quare etiam EG quadratum minus erit rectangulo AGB.

Hinc, appposito communi quadrato ex CG, erit pariter CE quadratum minus quadrato, quod fit ex CA: & propterea, sicuti CE minor est, quam CA; ita quoque erit EF minor, quam AB.

Eadem ratione, demissa ad axem minorem KL ordinata EI; erit, propter ellipsim, ut AB quadratum ad KL quadratum, ita EI quadratum ad rectangulum KIL. Sed AB quadratum majus est quadrato ex KL. Quare etiam EI quadratum majus erit rectangulo KIL.

Hinc, appposito communi quadrato ex CI, erit pariter CE quadratum majus quadrato, quod fit ex CK: & propterea, sicuti CE major est, quam CK; ita quoque erit EF major, quam KL.

II. Nul-

II. Nullo itidem negotio ostendi potest, quod *omnium aliarum diametrorum illa quidem sit major, quæ vel minus distat ab axe majore, vel magis recedit ab axe minore.*

Quum enim CA quadratum sit æquale rectangulo AGB una cum CG quadrato, & CE quadratum sit æquale duobus quadratis EG, CG; erit excessus, quo CA quadratum superat CE quadratum, æqualis excessui, quo rectangulum AGB superat EG quadratum.

Quia autem rectangulum AGB ad EG quadratum datam habet rationem; habebit idem rectangulum AGB datam quoque rationem ad excessum ejus super EG quadratum: proindeque, quum minuitur rectangulum AGB, necesse est, ut ille pariter excessus minuatur.

Hinc etiam excessus, quo CA quadratum superat CE quadratum, minor fiet, quotiescumque minuitur rectangulum AGB. Et inde liquido patet, diametrum EF eo esse majorem, quo minus distat ab axe majore AB. Nam minui nequit distantia ista, nisi simul minuatur quoque rectangulum AGB.

Ostendi id ipsum potest, adhibito axe minore KL. Quum enim CE quadratum sit æquale duobus quadratis EI, CI; & CK quadratum sit æquale rectangulo KIL una cum CI quadrato; erit excessus, quo CE quadratum superat CK quadratum, æqualis excessui, quo quadratum ex EI superat rectangulum KIL.

Quia autem data est ratio inter EI quadratum, & rectangulum KIL; dabitur etiam

II.

Ex diametris ellipse illa major est, quæ distat, vel minus ab axe majore, vel magis ab axe minore

FIG. 48.

216 SECTIONUM CONICARUM

ratio inter excessum, quo EI quadratum superat rectangulum KIL, & ipsum rectangulum KIL: proindeque, quum augetur rectangulum istud, necesse est, ut ille pariter excessus augeatur.

Hinc etiam excessus, quo CE quadratum superat CK quadratum, major fiet, quotiescumque augetur rectangulum KIL. Et inde liquido patet, diametrum EF eo esse majorem, quo magis distat ab axe minore KL. Nam augeri nequit distantia ista, nisi simul augeatur quoque rectangulum KIL.

III. Ellipsis igitur diametri in recessu ab axe majore minores evadunt, maximamque patiuntur diminutionem, quum maxime distant ab axe majore, hoc est, quum ad axem minorem perveniunt. Interim, dum ex minuuntur, augentur ipsarum conjugatæ. Quod ut liquido constet, ostendendum est prius sequens theorema.

III.
Conjugata
diametri per
ordinatas,
super iis du-
ctis ex ver-
ticebus alia-
rum, aperi-
duntur in
eodem ratio-
ne.

Nimirum, quod si copiantur in ellipsi binæ quævis conjugatæ diametri, eæ dividantur in eadem ratione ab ordinatis, quæ super iis demittuntur ex verticibus duarum quarumvis aliarum similiter conjugatarum diametrorum.

Neque vero difficile erit, theorema istud ostendere, si eorum recordemur, quæ superius ostensa sunt. Ellipsis enim AKBL sint AB, KL duæ quævis conjugatæ diametri. Demittantur ad eas ordinatæ EG, PQ ex verticibus duarum quarumvis aliarum similiter conjugatarum diametrorum EF, PR. Dico, fore, ut BG ad AG. ita LQ ad KQ.

Ducatur siquidem ad diametrum EF or-
di-

dinata AO. Tum per punctum O agatur recta OS, ipsi EG parallela. Et jam CK ad CQ rationem habebit compositam ex CK ad CP, & ex CP ad CQ. Sed CK est ad CP, ut KL ad PR, sive etiam, ut EG ad AO; itemque CP est ad CQ, ut AO ad OS. Itaque erit CK ad CQ in ratione composita ex EG ad AO, & ex AO ad OS.

Et quoniam duæ istæ rationes componunt pariter rationem, quam habet EG ad OS, sive etiam CE ad CO; erit ex æquali, ut CK ad CQ, ita CE ad CO; & convertendo, ut CK ad KQ, ita CE ad EO. Sed, sumptis antecedentium duplis, KL est ad KQ, ut EF ad EO. Quare dividendo erit, ut LQ ad KQ, ita FO ad EO: & propterea, quum FO sit ad EO, ut est BG ad AG; erit rursus ex æquali, ut BG ad AG, ita LQ ad KQ.

IV. Ex isto autem theoremate *primo al-*
teo finit, quadratum quidem ordinatæ EG esse æquale rectangulo KQL; quadratum vero ordinatæ PQ æquale esse rectangulo AGB.

Quum enim BG sit ad AG, ut est LQ ad KQ; erit componendo, ut AB ad AG, ita KL ad KQ. Unde, quia permutando AB est ad KL, tam ut AG ad KQ, quam ut BG ad LQ; compositis rationibus, erit, ut AB quadratum ad KL quadratum, ita rectangulum AGB ad rectangulum KQL.

Jam, propter ellipsim, AB quadratum est ad KL quadratum, tam ut rectangulum AGB ad EG quadratum, quam ut PQ quadratum ad rectangulum KQL. Quare ex æquali, primo quidem erit, ut rectangulum AGB ad re-

IV.
*Præcedenti
propositionis
elegantem con-
siderationem
respicit
quadrata
eorum ordi-
natorum.*

FIG. 41.

Rectangulum KQL , ita idem rectangulum AGB ad EG quadratum. Deinde vero, ut rectangulum AGB ad rectangulum KQL , ita PQ quadratum ad idem rectangulum KQL : & propterea rectangulo quidem KQL æquale erit EG quadratum; rectangulo vero AGB erit æquale PQ quadratum.

V.

*Quadrata
axium ellip-
sis sunt æ-
qualia qua-
dratis ex bi-
nis eius dia-
metris con-
jugatis.*

FIG. 41.

V. Atque hinc ulterius nullo etiam negotio deducitur, *quadrata, quæ fiunt ex binis ellipsois diametris conjugatis, simul sumpta eandem ubique summam constitnere, hoc est eam, quam quadrata duorum axium conficiunt.*

Referant enim AB , KL axes ipsius ellipsis, ita ut ordinatæ EG , PQ rectos cum illis angulos constituent. Ostendendum est igitur, quadrata, quæ fiunt ex axibus AB , KL , æqualia esse quadratis, quæ fiunt ex aliis conjugatis diametris EF , PR . Id vero ostendimus in hunc modum.

Quadratum ex CA est æquale rectangulo AGB una cum CG quadrato. Pariterque quadratum ex CK est æquale rectangulo KQL una cum CQ quadrato. Duo igitur quadrata CA , CK æqualia erunt duobus rectangulis AGB , KQL una cum duobus quadratis CG , CQ .

Quum autem rectangulo AGB ostensum sit æquale quadratum ex PQ , & rectangulo KQL æquale quadratum ex EG ; erunt duo quadrata PQ , EG æqualia duobus rectangulis AGB , KQL : & ideo quadrata duo CA , CK æqualia erunt quatuor quadratis, quæ fiunt ex PQ , EG , CG , CQ .

Jam ex quatuor hisce quadratis duo PQ ,
 CQ

CQ sunt æqualia quadrato ex CP; alia vero duo EG, CG sunt æqualia quadrato ex CE. Quare eadem quadrata CA, CK æqualia erunt duobus quadratis CE, CP; atque adeo quadrata ex totis AB, KL, æqualia erunt pariter iis, quæ fiunt ex totis EF, PR.

VI. Ex eo autem, quod quadrata, quæ fiunt ex binis ellipseos diametris conjugatis, simul sumpta, eandem ubique summam constituunt, facile modo erit ostendere id, quod nobis ab initio proposuimus: nimirum, quod *dum primaria diametri minuantur in recessu ab axe majore, vicissim coniugata ipsarum au- geantur.* VI. Quam pri-
maria dia-
metri mi-
nuuntur,
necesse est, ut
conjugatae
ipsarum con-
iugatae. FIG. 48.

Maneant enim omnia, ut supra, adeo nempe, ut AB sit axis major ellipseis, KL axis minor, & EF diameter quævis. Sit autem PR coniugata diametri hujus EF. Dico, non posse diametrum EF minorem fieri, nisi ipsius coniugata PR vicissim augeatur.

Nam quadrata ex ipsis EF, PR simul sumpta debent ubique æqualia esse quadratis, quæ fiunt ex axibus AB, KL. Quare excessus, quo AB quadratum superat EF quadratum, erit semper æqualis excessui, quo vicissim PR quadratum superat KL quadratum; & propterea nequit excessus ille augeri, nisi iste pariter augeatur.

Jam, ubi per recessum ab axe majore AB minor evadit diameter EF, tunc augetur excessus, quo AB quadratum superat EF quadratum. Quare in eodem recessu necesse est, ut augeatur etiam excessus, quo PR quadratum superat KL quadratum; & propterea ipsa PR major evadet.

VII. Non

VII.
Theorema
duo de ra-
tione conj-
ugatis diametri
elliptici ad
suam conju-
gatam.
FIG. 48.

VII. Non igitur dubitari potest, quin in-
terea ac primariæ diametri minuuntur in re-
cessu ab axe majore, vicissim conjugatæ ipsa-
rum augeantur. Inde autem, sicuti clare pa-
tet, *accedere conjugatas diametros ad axem
majorem, ubi primariæ, ad quas velut conjuga-
tæ referuntur, ab eodem axe recedunt; sic
etiam non obscure colligi possunt sequentia
duo theoremata.*

Nimirum primo, quod axis major AB
ad axem minorem KL majorem habeat ratio-
nem, quam diameter quævis alia EF ad suam
conjugatam PR.

Quum enim AB major sit, quam EF; ha-
bebit AB ad KL majorem rationem, quam
EF ad KL. Sed KL minor est, quam PR;
atque adeo EF majorem habet rationem ad
KL, quam ad PR. Itaque ratio, quam habet
AB ad KL multo major erit ratione, quam
habet EF ad PR.

Secundo, quod diameter EF, axi majori
propinquior, majorem habeat rationem ad
suam conjugatam PR, quam diameter DH, ab
eodem illo axe remotior, ad conjugatam suam
QS.

Quum enim EF major sit, quam DH;
habebit EF ad PR majorem rationem, quam
DH ad PR. Sed PR minor est, quam QS; at-
que adeo DH majorem habet rationem ad PR,
quam ad QS. Itaque ratio, quam habet EF
ad PR multo major erit ratione, quam habet
DH ad QS.

VIII.
Lem-
ma
omnium dia-

VIII. Cæterum, ut alia quamplurima,
quæ locum habent in comparatione diametro-
rum

rum ellipsis, tum hic, cum in sequentibus facilius prosequi valeamus, juvat hic advertere, quod *locus diametrorum omnium ellipsis per dati cujusdam circuli portionem possit exhiberi.*

Referant namque rectæ duæ AC, BC axes ellipsis, hoc est AC axem majorem, & BC axem minorem; junctisque iis ad angulos rectos, describatur super AB semicirculus ACB, & agatur per punctum C recta CD, ipsi AB parallela, quæ occurrat circumferentiæ ad partem alteram in D. Dico, portionem ejusdem circumferentiæ CED considerari posse veluti locum omnium diametrorum ellipsis.

FIG. 49.

Primo enim, ex superius ostensis, quælibet ellipsis diameter debet esse minor axe majore AC, & major axe minore BC, vel AD. Sed omnes rectæ, quæ ducuntur ex puncto A ad portionem circumferentiæ CED, minores sunt recta AC, majores vero recta AD. Itaque poterunt rectæ istæ omnes ellipsis diametros exhibere.

Deinde, ostensum est quoque, quadrata ex binis ellipseos diametris conjugatis, simul sumpta, æqualia esse quadratis axium AC, BC. Sed, inclinatis ad punctum quodvis E ejusdem portionis CED rectis AE, BE, quadrata istarum, velut æqualia quadrato ex AB, adæquant quadrata, quæ fiunt ex ipsis AC, BC. Itaque, si AE referat diametrum aliquam primariam ellipsis, erit BE ejus conjugata.

IX. Hoc jacto principio, jam circa comparationem diametrorum ellipsis duo alia theoremata facillime licebit ostendere. Horum pri-

IX.

Theorema
de relatione
sub binis

ellipticos con-
jugatis dia-
metris con-
prehensa.
 FIG. 49. *primum est, quod rectangulum ex binis ellipseos diametris conjugatis eo majus evadat, quo magis ipsæ diametri ad æqualitatem accedunt; & maximum fiat, ubi omnino inter se sunt æquales.*

Ut enim rectæ AC, BC referunt axes elliptis, sic rectæ AE, BE referant binas ejus diametros conjugatas. Dico, rectangulum AEB eo majus esse relate ad rectangulum ACB, quo duæ AE, BE minus a se mutuo differunt; & maximum fieri, quum eadem AE, BE inter se sunt æquales.

Demittantur siquidem super AB perpendiculares CF, EG. Jamque istarum quadrata proportionalia erunt rectangulis AFB, AGB, quæ iis quadratis sunt æqualia. Sed rectangulum AFB est ad rectangulum AGB in ratione composita ex AF ad AG, & ex BF ad BG. Itaque in hac eadem composita ratione erit pariter CF quadratum ad EG quadratum.

Jam, assumpta communi altitudine AB, AF est ad AG, ut rectangulum BAF ad rectangulum BAG, five etiam, ut AC quadratum ad AE quadratum. Et similiter, assumpta eadem communi altitudine AB, BF est ad BG, ut rectangulum ABF ad rectangulum ABG, five etiam, ut BC quadratum ad BE quadratum. Quare CF quadratum ad EG quadratum habebit rationem compositam ex AC quadrato ad AE quadratum, & ex BC quadrato ad BE quadratum.

Hinc, capiendo latera omnium horum quadratorum, habebit quoque CF ad EG rationem compositam ex AC ad AE, & ex
 BC

BC ad BE. Sed duæ istæ rationes componunt itidem rationem, quam habet rectangulum ACB ad rectangulum AEB. Quare erit ex æquali, ut CF ad EG, ita rectangulum ACB ad rectangulum AEB: ex quo facili negotio propositi theorematís veritas constat.

X. Alterum theorema est, quod *summa quoque ex binis ellipseos diametris conjugatis eo major evadat, quo magis ipsæ diametri ad æqualitatem accedunt; & maxima itidem fiat, ubi omnino inter se sunt æquales.*

X.
Theorema
de summa
duarum el-
lipseos con-
jugatarum
diametra-
rum.

Maneant enim omnia, ut supra. Dico, summam ex diametris conjugatis AE, BE eo majorem esse relate ad summam axium AC, BC, quo ipsæ AE, BE minus a se mutuo differunt; & maximam fieri, quum eadem AE, BE inter se sunt æquales.

FIG. 49.

Ex præcedenti theoremate rectangulum AEB relate ad rectangulum ACB ea quidem lege augetur. Itaque etiam duplum illius rectanguli eadem lege augebitur relate ad duplum istius. Et, addendo iis commune quadratum ex AB, eadem pariter erit lex incrementi quadrati ex AB una cum duplo rectanguli AEB relate ad idem AB quadratum, autem duplo rectanguli ACB.

Quoniam autem AB quadratum est æquale duobus quadratis AE, BE; erit AB quadratum una cum duplo rectanguli AEB æquale quadrato, quod fit ex summa ipsarum AE, BE. Et similiter, quia AB quadratum est æquale duobus quadratis AC, BC; erit AB quadratum una cum duplo rectanguli ACB æquale quadrato, quod fit ex ipsis AC, BC simul sumptis.

Id

Id vero quum ita fit, necesse est, ut eadem illa lege augeatur quoque quadratum, quod fit ex summa ipsarum AE, BE , relate ad quadratum, quod fit ex ipsis AC, BC simul sumptis: & propterea eadem erit pariter lex, qua summa ex conjugatis diametris AE, BE augetur relate ad summam axium AC, BC .

xi.

Quod in omni ellipsi dentur duae diametri conjugatae, quae inter se sunt aequales.

FIG. 48. XI. Neque vero difficile erit ostendere, dari in qualibet ellipsi binas diametros conjugatas aequales inter se, ad quas quo magis accedunt binæ aliæ conjugatae, eo minus a se mutuo differant.

Ellipsis namque $AKBL$ sit AB axis major, & KL axis minor. Jungantur subtenſæ AK, AL ; Et, bisectis iis in punctis O , & V , agantur per puncta ista diametri EF, PR . Dico primo, diametros istas æquales esse inter se.

Quoniam enim axis major AB secat ordinatas suas, non modo bifarium, verum etiam ad angulos rectos; idem axis adeo quidem dividet ellipsim in duas partes AKB, ALB , ut una alteri superimposita, congruent omnino. Sed in hac superimpositione congruunt etiam, tum subtenſæ AK, AL , cum diametri EF, PR . Itaque binæ istæ diametri EF, PR æquales erunt inter se.

Dico secundo; earundem diametrorum EF, PR alteram alterius conjugatam esse. Jungatur enim subtenſa alia BL . Et, ob axes AB, KL bisectos in centro C , duæ AK, BL parallelæ erunt inter se. Sed, quum sit, ut AV ad VL , ita AC ad CB ; eadem BL parallela est quoque ipsi PR . Quare & PR ipsi AK parallela

lola erit; & consequenter PR conjugata erit ipsius EF.

Dico denique, quod si DH, QS fuerint binæ aliæ ellipsis conjugatæ diametri; & tanto minus a se mutuo differant, quo magis accedunt ad ipsas EF, PR. Nam, ex superius ostensis, si una DH minuatur in accessu ad EF, altera QS augebitur accedendo ad PR. Et per contrarium si illa augeatur, hanc minui oportebit.

XII. Nolim autem hoc loco reticere, quod et si rectangulum ex binis ellipseos diametris conjugatis eo majus evadat, quo magis ipsæ diametri ad æqualitatem accedunt, & maximum fiat, ubi omnino inter se sunt æquales; attamen parallelogrammum, circa binas ellipsis conjugatas diametros descriptum, sit ejusdem ubique magnitudinis, hoc est æquale semper rectangulo, quod sub ipsis axibus continetur.

XII.
Parallelo-
grammum,
circa duas
ellipsis con-
jugatas dia-
metros de-
scriptum, est
æquale re-
ctangulo sub
axibus.

FIG. 50.

Ellipsis enim AKBL sit AB axis major, & KL axis minor. Sint autem EF, PR binæ ejus conjugatæ diametri. Ducantur per puncta E, & F rectæ QS, TV, ipsi PR parallelæ; tum item per puncta P, & R rectæ QV, TS, æquidistantes ipsi EF: ita, ut circa diametros conjugatas EF, PR descriptum sit parallelogrammum QSTV. Dico, parallelogrammum istud æquale esse rectangulo, quod sub axibus AB, KL continetur.

Demittatur, tum ad axem AB ordinata EG, cum ad diametrum EF ordinata AO. Et, ex superius ostensis, erit, ut EG ad AO, ita KL ad PR; sive etiam, ita CK ad CP. Sed, demissis super CE, CP perpendicularis AI, EH,

Tom. I.

P.

EG.

EG est ad AO in ratione composita ex EG ad AI, & ex AI ad AO; hoc est in ratione composita ex CE ad CA, & ex EH ad CE. Quare etiam CK ad CP rationem habebit compositam ex EH ad CE, & ex CE ad CA.

Jam duæ istæ rationes componunt pariter rationem, quam habet EH ad CA. Quare erit ex æquali, ut CK ad CP, ita EH ad CA; & propterea rectangulum ex CP in EH, hoc est parallelogrammum PCEQ, erit æquale rectangulo, quod fit ex CA in CK. Sed parallelogrammum QSTV est quadruplum parallelogrammi PCEQ, & rectangulum sub axibus AB, KL est quadruplum rectanguli ACK. Quare etiam parallelogrammum QSTV æquale erit rectangulo sub axibus AB, KL.

XIII.

*Theorema
de angulis,
quos conjugate
diameter in
ipsis centro
constituunt.*

FIG. 50.

XIII. Hinc vero plura deducuntur circa angulos, quos ellipseos conjugatæ diametri occursu mutuo in centro constituunt.

Nimirum primo, quod *sinus anguli, sub duabus quibuslibet conjugatis diametris contenti, sit ad radium, ut est rectangulum sub axibus ad id, quod sub ipsis diametris constituitur.*

Positis enim omnibus, ut supra, sinus anguli ECP est ad radium, ut EH ad CE; sive etiam, ut rectangulum ex CP in EH ad rectangulum ex CP in CE. Sed rectangulum ex CP in EH ostensum est æquale rectangulo ACK: quod quidem est ad rectangulum ex CP in CE, ut rectangulum ex AB in KL ad rectangulum ex EF in PR. Quare erit ex æquali, ut sinus anguli ECP ad radium, ita rectangulum ex AB in KL ad rectangulum ex EF in PR.

Se-

Secundo, quod *sinus angulorum*, quos *conjugatæ diametri occursu mutuo in centro constituunt*, *sint reciproce, ut rectangula*, quæ *fiunt ex ipsis diametris conjugatis*.

Jam enim ostensum est, quod sinus anguli, quem duæ quævis conjugatæ diametri continent, sit ad radium, ut est rectangulum sub axibus ad id, quod sub ipsis diametris continetur. Quare, ex æquo perturbando, sinus anguli duarum conjugatarum erit ad sinum anguli, quem aliæ duæ conjugatæ comprehendunt, ut est rectangulum istarum ad id, quod ex iis efficitur.

Denique, quod *angulus acutus*, sub *binis ellipseos diametris conjugatis comprehensus*, eo minor evadat, quo magis ipsæ diametri ad æqualitatem accedunt; & minimus fiat, ubi omnino inter se sunt æquales.

Nam, ex superius ostensis, rectangulum, quod binæ ellipseos conjugatæ diametri continent, eo majus evadit, quo magis eæ diametri ad æqualitatem convergunt. Sed ei rectangula est reciproce proportionalis sinus anguli, sub iisdem diametris contenti. Quare per contrarium, tam sinus, quam ipse angulus acutus, ad quem sinus refertur, necesse est, ut eo minor fiat, quo magis conjugatæ diametri ad æqualitatem accedunt.

C A P. II.

Parametri diametrorum ellipsis inter se mutuo conferuntur.

I.
Dua ellip-
sis diame-
tri conjuga-
te sunt con-
tinuè pro-
portionales
cum suis
parametris,
ubi inverso
ordine inter
eos collo-
cantur.

FIG. 51.

I. **C**omparatis inter se mutuo diame-
tris ellipsis, sequitur, ut parame-
tros ipsarum ad invicem conferamus. Et pri-
mo quidem, *quum conjugatæ fuerint eæ diame-
tri, quarum parametros simul conferre oportet,
facile erit, de iis parametris dijudicare.*

In parametris enim, quæ ad duas diame-
tros conjugatas referuntur, istud obtinet
theoremata, quod *ipsæ diametri continuam cum
eis proportionem constituent, ubi inverso or-
dine inter illas collocantur.*

Ellipsis namque AKBL sint AB, KL bi-
næ ejus diametri conjugatæ. Sit autem AD
parameter unius AB, & KI parameter alterius
KL. Dico, diametros AB, KL, inverso ordine
positas inter suas parametros AD, KI, conti-
nuam cum eis proportionem constituere.

Quoniam enim KL est conjugata ipsius
AB; erit, ut AD ad KL, ita KL ad AB. Et si-
militer, quoniam AB est conjugata ipsius KL,
erit ut KL ad AB, ita AB ad KI. Quare qua-
tuor AD, KL, AB, KI continue proportio-
nales erunt.

II.
Comparatio
parametro-
rum, quæ

II. Hinc autem *plura deducuntur circa
parametros, quæ ad duas diametros conjugatas
referuntur.*

Ni-

Nimirum primo, quod si duæ conjugatæ diametri AB, KL inter se sint æquales; etiam parametri AD, KI debeant esse æquales, tam inter se, quam cum diametris suis.

Secundo, quod si vicissim duæ conjugatæ diametri AB, KL sint inæquales; parametri quoque AD, KI debeant esse inæquales, tam inter se, quam cum qualibet earum diametrorum.

Tertio, quod ex diametris AB, KL ea, quæ major est, habeat parametrum, tum ipsa, cum diametro altera minorem; illa vero, quæ minor est, parametrum habeat, etiam altera diametro majorem.

Quarto, quod quum inæquales sunt diametri AB, KL, & inæquales adeo ipsarum parametri AD, KI, summa parametrorum major sit semper summa diametrorum.

Et denique, quod si capiatur differentia, tam inter diametrum AB, & parametrum suam AD, quam inter diametrum KL, & suam parametrum KI; ea quidem differentia sit major, quæ ad minorem diametrum, majoremque adeo parametrum refertur.

III. Ubi autem diametri non fuerint conjugatæ, poterit de parametris ipsarum judicium ferri, ostenso prius hoc theoremate, quod si quadrato alicujus diametri figura ejus adjiciatur, summa, quæ inde oritur, eadem ubique erit.

Maneant enim omnia; ut supra. Dico, quod si ad quadratum diametri AB apponatur figura ejus, quæ constituitur per rectangulum DAB; summa, inde confecta, sit semper

P 3

ca-

ad duas el-
lipsis dia-
metros con-
jugatas re-
ferantur.

FIG. 51.

III.
In ellip-
si quadratum
diametri
una cum
ejus figura
eandem
ubique
summam
constituit.

FIG. 51.

230. SECTIONUM CONICARUM
eadem, quocumque in loco capiatur diame-
ter AB.

Ex superius siquidem ostensis, eadem
ubique summa conficitur, si ad quadratum
diametri AB adjiciatur quadratum, quod fit
ex ejus conjugata KL. Sed quadratum ex
KL est æquale rectangulo DAB. Quare, si ei-
dem AB quadrato apponatur rectangulum
DAB, summa inde orta pariter eadem ubique
erit.

IV.
*Dua ellipsis
diametri
sunt vel
proce pro-
portionales
summis la-
terum sua-
rum figura-
rum.*

IV. Inde vero inferre licet, *duas quasvis
diámetros ellipsis reciproce proportionales esse
summis laterum suarum figurarum.*

Ut enim diametri AB parameter est AD,
ita sit EH parameter cujusvis alterius diame-
tri EF. Dico, AB esse ad EF, ut est summa
ipsarum EF, EH ad summam ex ipsis AB, AD.
FIG. 51.

Ob ostensum namque theorema, eadem
summa oritur, tam si ad AB quadratum adj-
ciatur rectangulum DAB, quam si ad EF qua-
dratum apponatur rectangulum HEF. Itaque
AB quadratum una cum rectangulo DAB æ-
quale erit EF quadrato una cum rectangulo
HEF.

Jam AB quadratum una cum rectangulo
DAB tantundem valet, ac rectangulum ex
AB in summam ipsarum AB, AD. Et similiter
EF quadratum una cum rectangulo HEF pe-
rinde est, ac rectangulum ex EF in summam
ex ipsis EF, EH. Quare, quum æqualia sint
inter se duo ista rectangula; erit, ut AB ad
EF, ita summa duarum EF, EH ad summam
duarum AB, AD.

V. Atque hinc modo facile erit ostende-
re,

re, quod ex binis ellipsois diametris ea, quæ major est, minorem parametrum habeat.

Y.
Ex duabus
diametris
ellipsis ea,
quæ minor
est, maio-
rem para-
metrum ha-
bet.

Maneant enim omnia, ut supra. Et pona-
mus, diametrum AB majorem esse diametro
EF. Dico, parametrum AD, quæ refertur ad
diametrum majorem, esse vicissim minorem pa-
rametro EH, quæ refertur ad diametrum mi-
norem.

FIG. 51.

Ostensum est namque, quod diameter
AB sit ad diametrum EF, ut est summa ipsa-
rum EF, EH ad summam ex ipsis AB, AD.
Quare, sicuti AB major est, quam EF; ita &
duæ EF, EH majores erunt duabus AB, AD.

Parameter igitur EH, adsciscens suam
diametrum EF, majorem summam constituit,
quam parameter AD, assumens diametrum
suam AB. Sed EF minor est, quam AB. Ita-
que EH multo major erit, quam AD.

VI. Id quum ita sit, perspicuum est, quod
sicuti omnium diametrorum ellipsis maxima
est axis major, minima vero axis minor; sic vi-
cissim omnium parametrorum minima quidem
sit illa, quæ refertur ad axem majorem, maxi-
ma vero ea, quæ refertur ad axem minorem.

VI.
Comparatio
parametro-
rum, quæ ad
ellipsos dia-
metros
omnes refe-
rantur.

FIG. 51

Liquet etiam, quod sicuti diameter in
recessu ab axe majore, & in accessu ad mino-
rem continuo minuitur, maximamque pa-
titur diminutionem, quum ad ipsum axem
minorem pervenit; sic vicissim ejus parameter
continuo augeatur, maximumque incremen-
tum subeat in ipso axe minore.

Quia autem ostensum est, parametrum
ejus diametri, quæ conjugatam habet æqua-
lem, adæquare diametrum suam; liquet de-

num, parametrum minorem esse diametro, ad quam refertur, ab axe majore usque ad eum locum, in quo aequalitatis diameter reperitur; esse vero majorem, ab eo loco usque ad axem minorem.

VII.
Locus, ad
quem refer-
minantur
parametri
omnium
diametrorum
elliptis,
desinitur.

VII. Sed nolim hic reticere, quod sicuti locus omnium diametrorum elliptis exhiberi potest per dati cujusdam circuli portionem; sic locus omnium parametrorum sit portio rectæ lineæ, quæ circuli ejus circumferentiam in dato quodam puncto contingit.

FIG. 49.

Si enim rectæ AC, BC referant axes elliptis, hoc est AC axem majorem, & BC axem minorem; junctisque iis ad angulos rectos, describatur super AB semicirculus ACB, & ducatur per punctum C recta CD, ipsi AB parallela; erit, ex superius ostensis, portio CED locus omnium diametrorum elliptis.

Jam, si ex puncto B erigamus super AB perpendicularem BH, cum qua conveniat, tum axis major AC in puncto H, cum axis minor AD in puncto I: quemadmodum recta ista BH continget circumferentiam in puncto B; ita portio hujus tangentis HI erit nobis veluti locus omnium parametrorum elliptis.

Est enim portio circumferentiæ CED locus omnium diametrorum elliptis; quia quælibet elliptis diameter exhiberi potest per rectam, quæ ducitur ex puncto A ad eam portionem. Et, ob eandem rationem, erit portio tangentis HI locus omnium parametrorum; quia, si AE fuerit diameter quævis, eademque extendatur, usque donec tangenti occurrat in K, erit EK parameter ipsius AE.

VIII. Ne-

VIII. Neque vero difficile erit, *rei hujus* *veritatem ostendere*, tam relate ad ipsos axes AC, AD, quam respectu cujusvis alterius diametri AE, si ejus recordemur, quod supra demonstravimus, nimirum conjugatam diametri AE esse rectam alteram BE, ductam ad idem punctum E ex termino altero B.

Est namque triangulum ABH rectangulum in B. Quare, quum ex angulo recto demissa sit super hypotenusam AH perpendicularis BC; erit, ut AC ad BC, ita BC ad CH. Sed parameter axis majoris est tertia proportionalis post ipsum axem majorem, & axem alterum minorem. Itaque erit CH parameter axis majoris AC.

Eadem ratione, quoniam triangulum ABI rectum habet angulum in B, & ex angulo recto demissa est super hypotenusam AI perpendicularis BD; erit ut AD ad BD, ita BD ad DI. Sed parameter axis minoris est tertia proportionalis post ipsum axem minorem, & axem alterum majorem. Itaque erit DI parameter axis minoris AD.

Denique, quia triangulum ABK est rectangulum in B, & ex angulo recto demissa est super hypotenusam AK perpendicularis BE; erit ut AE ad BE, ita BE ad EK. Sed parameter diametri AE est tertia proportionalis post ipsam diametrum AE, & ejus conjugatam. Itaque quum sit BE conjugata diametri AE, erit EK parameter ejusdem diametri AE.

IX. Id quum ita sit, *jam veritas eorum omnium, quæ paulo ante a nobis ostensa sunt circa parametros diametrorum ellipsis, rursus apparebit.*

Pro-

VIII.
*Demonstratio determinatio-
nationis
precedentis.*
FIG. 49.

IX.
*Veritas eorum, quæ in
comparatio-*

ne paramet-
rorum ellip-
sis locum
habent, cum
his demon-
stratur.

FIG. 49.

Protractis siquidem ad tangentem usque BH rectis omnibus, quæ ducuntur ex puncto A ad circumferentiam CED; perspicuum est, ex portionibus ipsarum, quæ tangente, & circulo intercipiuntur, minimam quidem esse CH, maximam vero DI. Itaque parametro- rum omnium ellipsis minima quidem erit illa, quæ refertur ad axem majorem AC; maxima vero ea, quæ refertur ad axem minorem AD.

Deinde perspicuum est quoque, easdem illas portiones eo magis augeri, quo magis a puncto B remouentur, atque adeo, quo minores sunt rectæ, cum quibus jacent in directum. Quare similiter parametri ellipsis tanto quidem majores erunt, quanto minores sunt diametri, ad quas eæ referuntur.

Ad hæc, si duæ AE, BE fuerint inter se mutuo æquales, utrique ipsarum erit æqualis quoque EK; quum sit, ut AE ad BE, ita BE ad EK. Unde rursus liquet, parametrum ejus diametri, quæ conjugatam habet æqualem, longitudine sua, tum ipsam diametrum, ad quam refertur, cum conjugatam ejus adæquare.

Denique, quum tres AE, BE, EK sint continue proportionales, erit EK minor, quam AE, quotiescumque AE superat BE; erit vero major, quum vlcissim BE superat AE. Unde rursus apparet, ab axe majore usque ad diametrum, quæ conjugatam habet æqualem, esse parametros minores suis diametris; esse vero majores, ab ea diametro usque ad axem minorem.

X. Exinde etiam colligi denuo potest veritas

ritas theorematum, superius ostensi, quod *duæ quævis ellipseos diametri sint reciproce proportionales summis laterum suarum figurarum.*

Si enim AE referat ellipsis diametrum aliquam; protracta ea usque ad tangentem BH, fiet EK parameter ejus. Unde erit AK summa laterum suæ figuræ. Sed AK est ad AB, ut AB ad AE. Quare rectangulum, quod sit ex diametro AE in summam laterum suæ figuræ, æquale erit quadrato ipsius AB.

Simili ratione ostendemus, eidem AB quadrato æquale esse rectangulum, quod sit ex quavis alia diametro in summam laterum figuræ suæ. Quare æqualia erunt inter se rectangula, quæ fiunt ex duabus quibuscumque diametris in summas laterum suarum figurarum: & propterea summis istis reciproce proportionales erunt ipsæ diametri.

XI. Quamquam autem vi hujus theorematum, summa laterum figuræ diametri eo sit minor, quo magis ipsa diameter ad majorem axem accedit; *differentia tamen eorundem laterum ex minor evadit, quo magis diameter accedit ad eam, quæ tum parametrum, cum conjugatam habet æqualem.*

Sit enim AE diameter illa, cui æqualis est, tam parameter EK, quam conjugata BE. Jamque, ex superius ostensis, parametri minores erunt suis diametris ab axe majore usque ad AE; erunt vero per contrarium majores ab AE usque ad axem minorem.

Quia autem in accessu ab axe majore ad ipsam AE, parametri quidem augentur, diametri vero minuuntur; omnino necesse est, ut

in

X.
Rursus ostenditur, quod diametri ellipse reciproce respondent summis laterum suarum figurarum.

FIG. 49.

XI.
Theorema de summa & differentia laterum figuræ diametri.

FIG. 49.

236 SECTIONUM CONICARUM

in accessu isto decrescat differentia laterum figuræ. Sed decrescet quoque in accessu ab axe minore ad eandem AE; quia hic per contrarium diametri quidem augentur, parametri vero diminutionem patiuntur.

Ob æquales porro AE, EK, liquet, differentiam laterum figuræ diametri, tam in accessu ab axe majore ad ipsam AE, quam in accessu ab axe minore ad eandem AE, decrescere eo usque, ut tandem evanescat. Et quamquam eadem differentia maximum subeat incrementum sub ipsis axibus; per ea tamen, quæ superius ostensa sunt, major est sub axe minore, quam sub axe majore.

XII.
*Theoremata
de summa
& differen-
tia quadra-
torum, qua
sunt ex illa
dem figura
lateribus.*

XII. Quod ostensum est de differentia laterum figuræ, verum est quoque de differentia quadratorum, quæ sunt ex figuræ lateribus; idque eadem omnino ratione demonstratur. Quantum vero ad summam eorundem quadratorum duo sunt casus distinguendi.

Primus casus est, quum quadratum ex axe majore non majus est dimidio quadrati, quod fit ex summa laterum suæ figuræ. Et quum id contingit, quadrata ex lateribus figuræ diametri, simul sumpta, eo minorem summam conficiunt, quo ipsa diameter magis accedit ad axem majorem.

Alter casus est, quum per contrarium est majus. Et tunc, comperta diametro, cujus quadratum æquale sit quadrato, quod fit ex summa laterum suæ figuræ; eo minorem constituent summam quadrata ex lateribus figuræ alterius diametri, quo magis altera ista diameter ad priorem illam accedit.

XIII. Pen-

XIII. Pendet autem utriusque demon-
stratio ex pulcherrima ista circuli proprietate,
quod si ex extremitate diametri A ducatur ad
tangentem AH recta AM talis longitudinis,
ut AN quadratum æquale sit dimidio quadra-
ti ipsius AM, summa quadratorum AE, EK
eo quidem sit minor, quo magis AK accedit
ad AM.

XIII.
Demonstra-
tio theore-
matum de
summa, et
elegantia cir-
culi pro-
prietate de-
ducta.

Ponamus etenim primo, quod AC qua-
dratum non sit majus dimidio quadrati, quod
fit ex AH. Et quia AC est ad AH, ut AF ad
AB; nec etiam AF quadratum majus erit di-
midio quadrati, quod fit ex AB. Quare, si fiat
AO quadratum æquale dimidio quadrati ip-
sius AB, non erit AO minor, quam AF; sed
vel æqualis, vel major.

FIG. 52.

Erigatur itaque ex puncto O perpendi-
cularis ON, circumferentiæ occurrens in
puncto N, per quod agatur recta AM. Et quia
AO est ad AB, ut AN ad AM; etiam AN
quadratum æquale erit dimidio quadrati,
quod fit ex AM. Quare, per eam circuli pro-
prietatem, summa quadratorum AE, EK eo
minor erit, quo magis AK accedit ad AM, &
consequenter ad AH.

Ponamus secundo, quod AC quadratum
majus sit dimidio quadrati, quod fit ex AH.
Et quia etiam AF quadratum majus erit di-
midio quadrati, quod fit ex AB; si fiat, ut huic
dimidio æquale sit AO quadratum, erit AO
minor, quam AF. Unde, erecta perpendicu-
lari ON, dabitur diameter AN, cujus quadra-
tum adæquat dimidium quadrati, quod fit ex
summa laterum suæ figuræ; & propterea, per
eam.

FIG. 53.

eandem circuli proprietatem, summa quadratorum ex lateribus figuræ cujuscvis alterius diametri AE eo minor erit, quo magis altera ista diameter accedit ad AE.

XIV. Si autem consideremus, angulum quemvis rectilineum, ubi vertitur circa verticem suum, eo minorem ex recta positione data cruribus suis portionem abscindere, quo

magis accedit ad eam positionem, in qua crura ejus æqualia sunt; haud difficulter *præfata proprietatis, quæ circulo competit, veritatem demonstrabimus.*

Si enim sit G centrum circuli, erunt quadrata duo AF, BF dupla quadratorum, quæ sunt ex AG, GF; & consequenter dupla quoque quadrati, quod fit ex EF. Unde, quemadmodum summa quadratorum AC, CH est ad summam quadratorum AF, BF, ut AC quadratum ad AF quadratum, sive etiam, ut AB ad AF; ita eadem summa quadratorum AC, CH erit ad duplum quadrati, quod fit ex EF, similiter ut AB ad AF.

Jam, si fiat angulus FES æqualis angulo EAF; erit, ut AF ad EF, ita EF ad FS; proindeque, quum EF quadratum sit æquale rectangulo AFS; erit adhuc, ut summa quadratorum AC, CH ad duplum rectanguli AFS, ita AB ad AF: & propterea, quia AB est ad AF, ut rectangulum ex AB in FS ad rectangulum AFS; erit summa quadratorum AC, CH æqualis duplo rectanguli, quod fit ex AB in ipsam FS.

Simili autem ratione ostendemus, quod si fiat angulus OER, æqualis eidem angulo EAF,

EAF, summa quadratorum AN, NM sit æqualis duplo rectanguli, quod fit ex AB in OR. Unde erit, ut summa quadratorum AC, CH ad summam quadratorum AN, NM, ita FS ad OR: proindeque, quia duo anguli FES, OER, qui cruribus suis abscindunt ex AB portiones FS, OR, sunt æquales inter se; jam incidimus in eum casum, in quo angulus rectiligneus vertitur circa verticem suum, & ex recta positione data cruribus suis portionem abscindit.

Id quum ita sit, eo res redit, ut ostendamus, angulum istum, quum abscindit portionem OR, talem positionem habere, ut æqualia sint crura ejus EO, ER. Id vero liquet abunde. Nam, quemadmodum AN quadratum adæquat dimidium quadrati, quod fit ex AM, ita AO quadratum æquale erit dimidio quadrati, quod fit ex AB. Sed AE quadratum, velut æquale quadratis AG, EG, dimidium istud similiter adæquat. Quare duæ AE, AO æquales erunt inter se: & propterea, ob triangula æquiangula AEO, OER, erunt etiam æquales duæ EO, ER.

C A P. . III.

Problemata quædam circa ellipsis diametros, & parametros resolvuntur.

- I. **C**irca diametros ellipsis, earundemque parametros plura possunt pro-
ble- I.
Datis aut.
bus ellipsi

*invenire
duas dia-
metros con-
jugatas,
quarum
data sit ra-
tio.*

FIG. 49.

blemata institui, elegantia quidem per se ipsa, tum etiam apprime utilia. Eo hoc capite cursum profequi, haud equidem gravabimur; eoque magis, quod nullo negotio resolvantur, postquam nobis innotuit, diametros omnes ellipsis in dati cujusdam circuli portione reperiri, easdemque, ad datam usque tangentem productas, parametros nobis exhibere.

Primum itaque problema hoc erit: *datis axibus ellipsis, invenire duas diametros conjugatas, quæ datam habeant rationem inter se.* Referant ergo rectæ duæ AC, BC axes ellipsis, hoc est AC axem majorem, & BC axem minorem. Jamque, si junctis his ad angulos rectos, describatur super AB semicirculus ACB, ducaturque recta CD, ipsi AB parallela; erit, ex superius ostensis, portio circumferentiæ CED locus omnium diametrorum ellipsis.

Quia autem, ex superius ostensis, axis major ad axem minorem habet majorem rationem, quam quævis alia diameter ad suam conjugatam; utique data ratio, tum directe, cum inverse sumpta, minor esse debet ea, quam habet AC ad BC. Itaque, si fiat primo, ut AC sit ad CR in data illa ratione: erit CR major, quam BC. Et si fiat secundo, ut BC sit ad AC, veluti est AC ad CS; erit CR minor, quam CS.

Hinc, junctis rectis AR, AS, erit angulus ARC minor quidem angulo ABC, major vero angulo ASC. Sed, ob triangula æquiangula ABC, ACS, angulus ASC æqualis est angulo BAC, sive ABD. Quare idem angulus ARC, ut est minor angulo ABC, sic major erit

erit angulo ABD: & propterea, si fiat angulus ABE, æqualis angulo ARC; recta BE cadet inter duas BC, BD; adeoque terminabitur ad portionem circumferentiæ CED.

Inde vero consequitur, rectas duas AE, BE esse diametros conjugatas ejus ellipsis, cujus axes sunt rectæ AC, BC. Et quoniam, ob triangula æquiangula AEB, ACR, ratio ipsarum AE, BE æqualis est ei, quam habet AC ad CR; liquet, easdem AE, BE esse etiam in data ratione. Unde diametri conjugatæ, quæ proposito problemati satisfaciunt, ex erunt, quas exhibent ipsæ AE, BE.

II. Secundum problema ita se habet: *data axibus ellipsis, invenire duas diametros conjugatas, quæ datum rectangulum contineant.* Referant adhuc rectæ duæ AC, BC axes ellipsis: adeo, ut iisdem, ut supra, peractis, sit portio circumferentiæ CED locus omnium diametrorum ellipsis. Et quoniam, ex superius ostensis, rectangulum sub binis ellipseos diametris conjugatis eo majus evadit, quo magis ipsæ diametri accedunt ad eas, quæ inter se sunt æquales; utique datum rectangulum, nec minus esse debet eo, quod sub axibus AC, BC continetur, nec majus illo, quod conjugatæ æquales comprehendunt.

Jam, demissa super AB perpendiculari CF, rectangulum sub axibus AC, BC æquale est ei, quod fit ex AB in CF; quandoquidem triangula ABC, BCF inter se sunt æquiangula; adeoque AB est ad AC, ut BC ad CF. Et quoniam conjugatæ æquales sub eo circumferentiæ puncto reperiuntur, quod bifariam di-

II.
Data axi-
bus ellip-
sis, invenire
duas diamet-
ros conjugatas,
quæ datum
rectangulum
contineant.

FIG. 49.

vidit portionem CED; rectangulum, sub ipsis contentum, ob eandem rationem, erit æquale ei, quod fit ex AB in circuli radium. Quare datum rectangulum, nec minus esse debet eo, quod fit ex AB in CF, nec majus illo, quod fit ex AB in sui ipsius semissem.

Hinc, si datum rectangulum æquale ponatur ei, quod fit ex AB in rectam XZ; erit recta ista XZ major, quam CF, minor vero semisse ipsius AB. Quare, si ex puncto A erigatur super AB perpendicularis AP, æqualis ipsi XZ, & per punctum P ducatur recta PE, eidem AB parallela; hæc secabit portionem CED in puncto aliquo E. Jungantur rectæ AE, BE. Et rectæ istæ exhibebunt nobis diametros quæsitas. Nam, propter triangula æquiangula ABE, AEP, erit ut AB ad BE, ita AE ad AP, sive XZ: & propterea rectangulum sub ipsis AE, BE æquale erit rectangulo, quod fit ex AB in XZ.

III. Tertium problema in hunc modum concipitur: *dati axis ellipsis, invenire duas diametros conjugatas, quæ datam summam conficiant.* Sed istud problema facili negotio ad præcedens reducitur. Ubi enim data est summa diametrorum, dabitur etiam quadratum, quod fit ex summa illa. Sed quadratum istud est æquale quadratis diametrorum una cum rectangulo, bis sub ipsis diametris contento. Quare, quod constituunt quadrata ex diametris una cum rectangulo, bis sub eis comprehenso, illud utique datum erit.

Et quoniam, per superius ostensa, quadrata diametrorum simul sumpta datam summam con-

*Dati axis
bus ellipsis,
invenire
duas diame-
tros conju-
gatas, quæ
datam sum-
mam confi-
ciant.*

constituunt, nimirum eandem illam, quam exhibent quadrata axium; constituet quoque datam summam duplū rectanguli, quod sub ipsis diametris continetur. Quare datum erit rectangulum istud: & propterea propositum problema eo reducetur, ut datis axibus ellipsis, inveniātur binæ diametri conjugatæ, quæ datum rectangulum contineant.

Quemadmodum autem, quum quæruntur binæ diametri conjugatæ, quæ datum rectangulum comprehendant, oportet, ut rectangulum datum, nec sit minus eo, quod continetur sub axibus, nec majus illo, quod fit ex diametris conjugatis æqualibus; ita quoque, quum inveniendæ sunt duæ conjugatæ diametri, quæ simul datam rectam adæquent: per ea, quæ superius ostensa sunt, necesse est, ut recta data, nec summa axium sit minor, nec major summa conjugatarum æqualium.

IV. Quartum problema hujusmodi erit: *dati axibus ellipsis, invenire duas diametros conjugatas, quarum differentia sit data.* Sed hoc quoque problema facili negotio ad secundum revocabitur, si consideremus, quod per septimam secundi Elementorum quadratum ex differentia duarum conjugatarum diametrorum, una cum rectangulo, bis sub ipsis contento, æquale esse debeat quadratis earundem; atque adeo quadratis axium.

Hinc enim fit, ut siquidem ex summa quadratorum, quæ sunt ex axibus, auferatur quadratum datæ differentiæ; id, quod superest, sit duplum rectanguli, quod quæsitæ dia-

IV.
Datis aut.
duas ellipsis,
invenire
duas diametros
conjugatas, quarum
differentia sit
data.

metri continent. Unde, quum datum sit residuum istud, dabitur etiam dimidium ejus, hoc est rectangulum, sub quæsitis diametris contentum; & consequenter eo res redit, ut inveniantur duæ diametri conjugatæ, quæ datum rectangulum cõprehendant.

Cæterum, quum inveniendæ sunt duæ diametri conjugatæ, quarum differentia sit data; illud quidem requiritur, ut data ista differentia non sit major differentia axium. Nam, ex superius ostensis, omnium diametrorum maxima quidem est axis major, minima vero axis minor. Quare omnino necesse est, ut differentia duarum conjugatarum diametrorum minor sit differentia axium.

V. Quintum problema ita proponetur :
Datis ex- datis axibus ellipsis, invenire duas diametros
bus ellipsis, conjugatas, quarum quadrata differant a se
invenire mutuo per datam differentiam. Ejus autem re-
duas diametros conjuga- solutio nullam difficultatem involvit. Quum
tas, quarum quadrata differant a se
mutuo per differentiam datam. summa, quam differentia eorum quadratorum.

Hinc, siquidem ad dimidium summæ addatur dimidium differentiæ, habebitur quadratum diametri majoris. Quod si autem ex dimidio summæ auferatur dimidium differentiæ, prietur quadratum diametri minoris. Quare diametrorum quadrata data etiam erunt seorsim; & consequenter dabuntur quoque ipsæ diametri, quas oportet invenire.

Sicuti autem, quum quæruntur binæ diametri conjugatæ, quarum differentia sit data, necesse est, ut data ista differentia non sit
 ma;

major differentia axium; ita quoque, quum invenire oportet, binas conjugatas diametros, quarum quadrata differant a se mutuo per datam differentiam, illud quidem requiritur, ut istiusmodi data differentia non sit major quadrato, quod sit ex differentia axium.

VI. Sextum problema hunc in modum, *VI.*
 efferemus: *datis axibus ellipsis, invenire duas* *Datis axibus ellipsis, invenire*
diametros conjugatas, quæ datum angulum *duas diametros conjugatas, quæ*
contineant. Sed facile erit, problema istud *datum angulum contineant.*
 ad secundum revocare, in quo datis axibus ellipsis, quærentur binæ diametri conjugatæ, quæ datum rectangulum comprehendant.

Nam semper ac datus est angulus, quem quæsitæ diametri continent; data erit ratio, quam habet ejus sinus ad radium. Sed ratio ista est æqualis ei, quam habet rectangulum sub axibus ad id, quod sub ipsis diametris continetur. Quare etiam hæc alia ratio data erit: & propterea, quum datum sit rectangulum sub axibus; dabitur quoque rectangulum, quod continent quæsitæ diametri.

Quemadmodum autem, quum quærentur binæ diametri conjugatæ, quæ datum rectangulum comprehendant, necesse est, ut rectangulum datum non sit majus eo, quod sub conjugatis æqualibus continetur; ita, quum inveniendæ sunt duæ diametri conjugatæ, quæ datum angulum contineant, oportet, ut ratio sinus anguli dati ad radium non sit minor ea, quam habet rectangulum sub axibus ad id, quod conjugatæ æquales comprehendunt.

VII. In septimo problemate illud porro

Q 3

quæ.

VII.
Datis axi-
bus ellipsis,
invenire
diametrum,
quæ datam
parametrum
habeat.

FIG. 49.

quæremus, *qua ratione datis axibus ellipsis, invenire liceat diametrum, quæ datam parametrum habeat*. Solvemus autem problema istud in hunc modum. Manentibus omnibus, ut supra, erigatur super AB perpendicularis BQ; quæ dimidium datæ parametri adæquet. Tum juncta AQ, describatur centro Q, intervalloque QB circuli circumferentia, cum qua ipsa AQ conveniat in punctis T, & V. Denique in angulo ABH applicetur recta AK, æqualis ipsi AV. Et erit AE diameter quæsitæ.

Jam enim eidem AB quadrato æquale est, tam rectangulum EAK, quam rectangulum TAV. Quare duo rectangula EAK, TAV æqualia erunt inter se: & propterea erit, ut AK ad AV, ita AT ad AE. Sed ex constructione duæ AK, AV sunt æquales inter se. Quare erunt pariter æquales duæ AE, AT; atque adeo etiam EK ipsi TV æqualis erit. Sed TV, velut dupla ipsius BQ, datam parametrum adæquat. Et igitur eidem parametro æqualis quoque erit ipsa EK; adeoque erit AE diameter, quam quærimus.

Constat autem, ex superius ostensis, parametrorum omnium ellipsis minimam quidem esse illam, quæ refertur ad axem majorem AC, maximam vero eam, quæ pertinet ad axem minorem AD. Quare, ut propositum problema resolvi possit, omnino necesse est, ut data parameter, nec minor sit parametro axis majoris, nec major parametro axis minoris.

VIII.
Datis axi-
bus ellipsis,
invenire

VIII. Ad octavum problema quod attinet, quæremus in eo, *qua ratione datis axibus ellipsis, inveniri possit diameter, quæ ad parametrum*.

metrum suam datam habeat rationem. Ejus vero solutionem facili negotio obtinebimus, si hifdem, ut supra, manentibus, secetur AB subinde quidem in G, ut AG ad BG fit in data illa ratione. Nam, erecta deinde perpendiculari GE ad circumferentiam usque, fiet AE diameter quæfita; quum sit, ut AE ad EK, ita AG ad BG.

*diametrum
quæ ad pa-
rametrum
suam datam
habet ratio-
nem.*

FIG. 49.

Ex eo autem, quod diametrorum omnium ellipsis maxima quidem sit axis major, minima vero axis minor; parametrorum autem minima sit illa, quæ refertur ad axem majorem, maxima vero ea, quæ pertinet ad axem minorem; liquet, rationem cujusvis diametri ad suam parametrum, ea quidem, quam habet axis major ad parametrum suam, minorem esse; illa vero, quam habet axis minor ad suam parametrum majorem esse debere. Unde, nisi ratio data his terminis contineatur, problema erit solutu impossibile.

Idem problema potest etiam ad primum revocari. Nam, semper ac data est ratio, quam quæfita diameter habere debet ad suam parametrum; utique data erit pariter ratio, quam eadem quæfita diameter habebit ad suam conjugatam: quippe quæ illius est duplicata. Unde vicissim primum problema ad octavum istud poterit reduci: quærendo nempe diametrum, quæ ad suam parametrum habeat rationem subduplicatam ejus, quæ inter utramque diametrum esse debet.

IX. Nonum problema eo se vertet, ut *dati axibus ellipsis, inveniatur diameter, quæ, vel constituat datam summam cum sua pa-*

*IX.
Dati axi-
bus ellip-
tice*

*diametrum,
qua vel con-
stituitur da-
tam suam
cum
sua parame-
tro, vel dif-
ferat ab ea
per datam
differentiam.*

FIG. 53.

54.

*parametro, vel differat ab ea per datam differen-
tiam.* Et quantum ad priorem partem facili
negotio resolvetur; quum satis sit in angulo
ABH applicare rectam AK, quæ datam illam
summam adæquet. Quantum vero ad partem
alteram duo sunt casus distinguendi: Nam
diameter quæsitæ, vel maior esse debet sua pa-
rametro per datam illam differentiam, vel per
contrarium minor.

In utroque autem casu resolvetur pro-
blema in hunc modum. Extendatur tangens
BH ad partem alteram versus M: ita, ut fiat
BM æqualis ipsi AB. Tum juncta AM, eriga-
tur super ea perpendicularis MN, æqualis di-
midio datæ differentiæ. Describatur deinde
centro N, intervalloque NM circuli circum-
ferentia MOR, cum qua conveniat recta
AN in punctis O, & R. Jamque, si in angulo
ABH applicetur recta AK, æqualis ipsi AO in
primo casu, & ipsi AR in secundo; fiet AE
diameter quæsitæ.

Quum enim AM quadratum duplum sit
quadrati ex AB, sitque etiam rectangulum
OAR æquale quadrato ex AM, & rectangu-
lum EAK æquale quadrato ex AB; erit re-
ctangulum OAR duplum patiter rectanguli
EAK. Unde, secta AO bisariam in puncto S,
erit, tam rectangulum ex AO in SN, quam
rectangulum ex AS in AR æquale rectangu-
lo EAK: & propterea erit, non modo, ut AO
ad AK, ita AE ad SN; verum etiam, ut AR
ad AK, ita AE ad AS.

FIG. 53.

Hinc, quum in primo casu duæ AK, AO
sint æquales inter se, erunt etiam æquales duæ
AE,

AE, SN: proindeque, si fiat AT, æqualis ipsi ON: adeo nempe, ut sit TN æqualis ipsi AO, seu AK; erit reliqua TS æqualis reliquæ EK. Sed, ob æquales NR, AT, duæ NR, TS sunt æquales ipsi AS, vel SO; atque adeo, apposita communi ON, etiam duæ OR, TS adæquant totam SN. Quare, sicuti SN superat TS per rectam OR, quæ, velut dupla ipsius MN, adæquat datam differentiam; ita quoque diameter AE superabit parametrum suam EK per differentiam datam.

In secundo vero casu, quum sint æquales FIG. 54.
duæ AK, AR; erunt etiam æquales duæ AE, AS: proindeque reliqua EK reliquæ SR pariter æqualis erit. Sed SR superat AS, vel SO per rectam OR, quæ, velut dupla ipsius MN, est æqualis datæ differentiæ. Quare etiam parameter EK superabit diametrum AE, ad quam ipsa refertur, per differentiam datam.

Cæterum per ea, quæ superius ostensa sunt, sicuti data summa, quam constituere debet diameter cum sua parametro, minor sit oportet summa ex lateribus figuræ axis minoris, major vero summa ex lateribus figuræ axis majoris; ita etiam data illa differentia, per quam diameter a sua parametro differre debet, in primo casu necesse est, ut sit minor differentia laterum figuræ axis minoris, in secundo vero casu minor differentia laterum figuræ axis majoris.

X. Decimum problema illud ostendet, quæ ratione, datis axibus ellipsis, invenire liceat diametrum, cujus parameter cum summa ex lateribus figura datam rectangulum contineat.

Ejus

X.
Datis mi-
nus ellipsis,
invenire
diametrum
cujus para-

*metur cum
summa ex
lateribus fi-
gura datum
rectangulum
contineat.*

Ejus vero solutionem protinus obtinebimus, si utique ex tangente BH abscindamus portionem BK , cujus quadratum datum illud rectangulum adæquet. Nam, juncta AK , fiet
FIG. 49. AE diameter quæsitæ.

Quum enim diametri AE parameter quidem sit EK , summa vero ex lateribus figuræ sit AK ; erit AKE rectangulum, quod sit ex parametro ejus in summam laterum suæ figuræ. Sed rectangulum AKE est æquale quadrato ipsius BK . Unde, sicuti BK quadratum, ex constructione, datum rectangulum adæquat; ita quoque eidem dato rectangulo æquale erit rectangulum AKE .

Patet autem, quod, ut problema istud resolvi possit, omnino necesse sit, ut datum rectangulum sit majus eo, quod sit ex parametro axis majoris in summam laterum suæ figuræ, & minus illo, quod parameter axis minoris continet cum summa laterum suæ figuræ. Nam vidimus superius, tam parametrum, quam summam laterum figuræ eo magis augeri, quo magis diameter ad axem minorem accedit.

Hoc idem problema poterat etiam ad præcedens revocari. Quum enim datum sit rectangulum, quod sit ex parametro in summam laterum figuræ; si ei addamus rectangulum aliud, similiter datum, quod sit ex diametro in eandem illam summam, dabitur quoque quadratum ex figuræ lateribus simul sumptis; & consequenter ipsa laterum summa etiam data erit. Unde eo res redit, ut quæramus diametrum, quæ cum sua parametro datam

tam

tam summam constituat.

XI. In undecimo problemate ostendemus, *quo pacto, datis axibus ellipsis, inveniri possit diameter, cujus quadratum differat a quadrato parametri per datam differentiam.* Atque hic duo sunt casus distinguendi. Primus est, quum quadratum diametri majus esse debet quadrato parametri. Alter, quum vicissim debet esse minus. In primo casu data differentia minor sit oportet differentia quadratorum, quæ fiunt ex lateribus figuræ axis majoris. In secundo vero casu debet esse minor differentia quadratorum ex lateribus figuræ axis minoris.

XI.
Datis axi-
bus ellipsis,
invenire
diametrum,
cujus qua-
dratum dif-
ferat à qua-
drato para-
metri pre
datam diffé-
rentiam.

Quantum ad priorem casum solvetur **FIG. 55.** problema in hunc modum. Extendatur tangens BH ad partem alteram versus M: ita, ut fiat BM æqualis ipsi AB. Tum juncta AM, describatur super ea, velut diametro, semicirculus ANM, in quo applicetur recta MN talis longitudinis, ut quadratum ejus datam differentiam adæquet. Jungatur deinde AN. Jamque, si in angulo ABH applicemus rectam AK, æqualem ipsi AN; erit AE diameter quæsitæ.

Quum enim AK sit æqualis ipsi AN, erunt quadrata duo AK, MN æqualia quadrato ex AM. Sed quadratum ex AM, velut duplum quadrati, quod sit ex AB, est æquale duplo rectanguli EAK. Quare quadrata duo AK, MN duplo rectanguli EAK pariter æqualia erunt: & consequenter, appposito communi quadrato ex EK, erunt tria quadrata AK, MN, EK æqualia duplo rectanguli EAK una cum EK quadrato.

Jam

478 SECTIONUM CONTIGUARUM

Jam duplum rectanguli EAK una cum EK quadrato est æquale duobus quadratis AK, AE. Quare erunt tria quadrata AK, MN, EK æqualia duobus quadratis AK, AE, adeoque, dempto communi quadrato ex AK, remanebunt quadrata duo MN, EK æqualia quadrato ex AE. Unde quadratum diametri AE superabit quadratum suæ parametri EK per MN quadratum, quod ex constructione datam differentiam adæquat.

FIG. 56. Quantum ad secundum casum, solutio problematis fiet hoc pacto. Extendatur rursus tangens BH ad partem alteram versus M: ita, ut fiat BM æqualis ipsi AB. Tum, juncta AM, erigatur super ea perpendicularis MN talis longitudinis, ut quadratum ejus datam differentiam adæquet. Jungatur deinde AN. Jamque, si in angulo ABH applicemus rectam AK æqualem ipsi AN, erit AE diameter quæsitæ.

Quum enim AM quadratum sit æquale duplo quadrati ex AB, sive etiam duplo rectanguli EAK: apposito communi quadrato ex MN, erit AN, sive AK quadratum æquale duplo rectanguli EAK una cum MN quadrato: & propterea, addito rursus communi quadrato ex AE, erunt duo quadrata AK, AE æqualia duplo rectanguli EAK una cum duobus quadratis AE, MN.

Et quoniam duo quadrata AK, AE sunt æqualia quoque duplo rectanguli EAK una cum EK quadrato; erit EK quadratum æquale duobus quadratis AE, MN. Unde quadratum diametri AE superabitur a quadrato suæ

sum parametri EK per MN quadratum, quod ex constructione datam differentiam adæquat.

XII. In ultimo problemate docebimus, XII.
quomodo, datis axibus ellipsis, inveniri possit *Datis axibus ellipsis, invenire*
diameter talis, ut data sit summa quadrato- *diameterum, in qua data sit summa*
rum, quæ fiunt ex lateribus sua figuræ. *quadratorum, quæ fiunt ex lateribus sua figuræ.*
 Hunc in finem, manentibus omnibus, ut supra, ponamus rectam PQ esse ejus longitudinis, ut duplum rectanguli ex AB in PQ datam illam summam exhibeat. Tum, descripta super ea circuli portione PSQ, quæ suscipiat angulum Fig. 57.
 semirectum, erigatur perpendicularis PT, æqualis dimidio ipsius AB. Et per punctum T ducatur recta TS, eidem PQ parallela, quæ circuli portionem secet in S.

Sit deinde E punctum, quod bifecat portionem CED. Et quoniam, demisso perpendiculo EG, fiunt duæ EG, PT æquales inter se; poterit triangulum PSQ ita quidem aptari super AB, ut punctum S cadat in E. Aptetur itaque triangulum illud super AB ea lege, sitque OER. Erigatur porro perpendicularis ON. Et juncta AN, dabit ista diameter quæsitam.

Extendatur enim AN usque donec tangenti BH occurrat in M. Et quoniam angulus OER, velut æqualis angulo PSQ, est æqualis angulo BAE; per ea, quæ ostensa sunt in calce capitis præcedentis, erit summa quadratorum AN, NM æqualis duplo rectanguli, quod fit ex AB in OR. Sed ex constructione OR est æqualis ipsi PQ. Quare eadem summa quadratorum AN, NM æqualis erit du-

154 SECTIONUM CONICARUM
 duplo rectanguli, quod fit ex AB in PQ; atque adeo data erit.

Non esse autem problema istud continuo solutionis capax; jam abunde patet ex his, quæ in fine capituli præcedentis ostensa sunt. Sed exinde facili quoque negotio intelligere licet, quid utique requiratur, quo possit problema resolvi. Unde, ne diutius in eo explicando hæreamus, sufficiat illud indicare, & ad alia progrediamur.

XIII.
*Datis autem
 duabus ellipsis,
 definire in
 ordine ad eas
 positionem
 cuiusvis dia-
 metri data.*
 FIG. 58.

XIII. Apollonius in solutione horum problematum aliam methodum paulo difficiliorem usurpavit. Sed ea mediante exhibuit quoque positionem diametri relate ad datos axes ellipsis. Unde, ne ex hoc capite methodus a nobis adhibita manca existimetur; ostendemus modo, *qua ratione datis axibus ellipsis, definiri possit relate ad eas positio cuiusvis diametri data.*

Sint itaque AB, KL axes ellipsis, hoc est AB axis major, & KL axis minor. Sit autem EF aliqua ejusdem ellipsis diameter data. Jam innotescet diametri hujus positio, si demissa ad axem majorem AB ordinata EG, nota sit longitudo portionis CG. Unde, eo res redit, ut inquiramus quo pacto ipsius CG longitudo possit definiri.

Et sane, propter ellipsim, CA quadratum est ad CK quadratum, ut rectangulum AGB ad EG quadratum. Sed EG quadratum æquale est differentię quadratorum CE, CG, & rectangulum AGB æquale est differentię quadratorum CA, CG. Itaque erit, ut CA quadratum ad CK quadratum, ita differentia qua-

quadratorum CA, CG ad differentiam quadratorum CE, CG.

Hinc, quum convertendo sit, ut CA quadratum ad differentiam quadratorum CA, CK, ita differentia quadratorum CA, CG ad differentiam quadratorum CA, CE: erit, permutando, ut CA quadratum ad differentiam quadratorum CA, CG, ita differentia quadratorum CA, CK ad differentiam quadratorum CA, CE. Unde, rursus convertendo, erit, ut CA quadratum ad CG quadratum, ita differentia quadratorum CA, CK ad differentiam quadratorum CE, CK.

Describantur jam super ipsis CA, CE semicirculi AMC, ENC; & aptentur in iis rectæ CM, CN, quarum utraque sit æqualis ipsi CK. Jamque, junctis rectis AM, EN; erit AM quadratum æquale differentię quadratorum CA, CK; & EN quadratum æquale differentię quadratorum CE, CK. Unde erit, ut CA quadratum ad CG quadratum, ita AM quadratum ad EN quadratum: & propterea, quum proportionales sint quatuor rectæ AM; EN, CA, CG; invenietur CG, si fiat, ut AM ad EN, ita CA ad ipsam CG.

XIV. Ne aliquid hic omittamus, ostendamus denique, *qua ratione in ipsa ellipsi, data parametro unius diametri, inveniri possit parameter cujusvis alterius diametri.* Sint igitur AB, EF duæ quævis diametri ellipsis AEF. Et data parametro unius diametri AB, oporteat, invenire parametrum alterius diametri EF.

XIV.
In ellipsi,
data para-
metro unius
diametri, in-
venire para-
metrum cu-
jusvis alter-
ius diametri.
FIG. 59.

Sit AD parameter diametri AB, quæ
cum

cum ipsa AB ponatur in directum . Tum , secta AD bifariam in puncto M , describatur per tria puncta A , E , M circulus AEM , occurrens ipsi EF productæ in puncto N . Extendatur porro EN usque ad punctum H : ita , ut sit EH dupla ipsius EN . Et erit EH parameter diametri EF .

Est enim , propter circulum , rectangulum ACM æquale rectangulo ECN . Sed rectangulum ABD est quadruplum rectanguli ACM , & rectangulum EFH est quadruplum rectanguli ACM , & rectangulum EFH est quadruplum rectanguli ECN . Quare duo rectangula ABD , EFH etiam æqualia erunt : & propterea erit , ut diameter EF ad diametrum AB , ita BD ad FH .

Jam per ea , quæ superius ostensa sunt , diametri EF , AB sunt reciproce proportionales summis laterum suarum figurarum . Quare erit ex æquali , ut BD ad FH , ita summa laterum figuræ diametri AB ad summam laterum figuræ diametri EF : & propterea , quemadmodum prior summa est æqualis ipsi BD ; ita quoque summa posterior æqualis erit ipsi FH . Unde erit EH parameter diametri EF .

CAP. III.

Hyperbolæ diametri omnes inter se mutuo comparantur.

I. **C**onstat, ex superius ostensis, in qualibet hyperbola extare diametrum unam, quæ cum suis ordinatis rectos angulos constituat. Diametrum istam vocavimus axem ipsius hyperbolæ. Et facile erit ostendere, *omniam hyperbolæ diametrorum minimam esse illam, quæ axis appellatur.*

I.
Omnium
hyperbolæ
diametro-
rum mini-
ma quidem
est axis.
FIG. 40.

Sit enim AB axis hyperbolarum oppositarum, sitque EF alia quævis diameter earundem. Dico, diametrum istam EF majorem esse axe AB.

Demittatur siquidem ad axem AB ordinata EG. Et quia ista cadit infra verticem A; erit portio CG major semiaxe CA. Sed, ob angulum rectum CGE, semidiameter CE major est portione CG. Quare eadem semidiameter CE multo major erit semiaxe CA: & propterea diameter tota EF major erit axe integro AB.

II. Nullo itidem negotio ostendi potest, quod *omnium aliarum diametrorum illa quidem sit minor, quæ minus distat ab axe.*

II.
Aliarum au-
tem illa mi-
nor est, quæ
minus distat
ab axe.

Manentibus namque omnibus, ut supra, perspicuum est, CE quadratum æquale esse duobus quadratis CG, EG. Sed CG quadratum est æquale CA quadrato una cum re-

FIG. 40.

Et angulo AGB. Quare erit idem CE quadratum æquale duobus quadratis CA, EG una cum rectangulo AGB.

Id quum ita sit, liquet, excessum, quo CE quadratum superat CA quadratum, esse EG quadratum una cum rectangulo AGB. Sed, tam EG quadratum, quam rectangulum AGB, eo quidem sit minus, quo magis punctum E accedit ad punctum A. Itaque excessus, quo CE quadratum superat CA quadratum, eo etiam minor erit, quo minus distant a se invicem puncta duo A, & E.

Minuitur ergo CE quadratum, dum punctum E accedit ad punctum A. Unde ipsa CE etiam diminutionem patitur. Est autem diameter EF dupla ipsius CE. Quare minuetur quoque diameter EF: & propterea omnium aliarum diametrorum hyperbolæ illa quidem minor erit, quæ minus distat ab axe.

III.

Coniugata
diametri
per ordina-
tas, super illis
ductas ex
verticibus a-
liarum, di-
viduntur in
eandem ratio-
ne.

FIG. 40.

Hyperbolæ igitur diametri in recessu ab axe maiores evadunt. Sed, iis crescentibus, augentur etiam ipsarum conjugatæ. Quod ut liquido constet, ostendendum est prius sequens theorema.

Nimirum, quod si capiantur in hyperbola binæ quævis conjugatæ diametri, eæ dividantur in eadem ratione ab ordinatis, quæ super iis demittantur ex verticibus duarum quarumvis aliarum similiter conjugatarum diametrorum.

Neque vero difficile erit, theorema istud ostendere, si eorum recordemur, quæ superius ostensa sunt. Capiantur enim in hyperbola duæ quævis conjugatæ diametri AB, KL. Demittantur ad eas ordinatæ EG, PQ ex verti-
ci-

cibus duarum quarumvis aliarum similiter conjugatarum diametrorum EF, PR. Dico, fore, ut BG ad AG, ita LQ ad KQ.

Ducatur siquidem ad diametrum EF ordinata AO. Tum per punctum O agatur recta OS, ipsi EG parallela. Et jam CK ad CQ rationem habebit compositam ex CK ad CP, & ex CP ad CQ. Sed CK est ad CP, ut KL ad PR, sive etiam, ut EG ad AO; itemque CP est ad CQ, ut AO ad OS. Itaque erit CK ad CQ in ratione composita ex EG ad AO, & ex AO ad OS.

Et quoniam duæ istæ rationes componunt pariter rationem, quam habet EG ad OS, sive etiam CE ad CO; erit ex æquali, ut CK ad CQ, ita CE ad CO; & subducendo, antecedentes ex consequentibus, erit quoque ut CK ad KQ, ita CE ad EO. Sed, sumptis antecedentium duplis, KL est ad KQ, ut EF ad EO. Quare, componendo, erit, ut LQ ad KQ, ita FO ad EO: & propterea, quum FO sit ad EO, ut est BG ad AG; erit rursus ex æquali, ut BG ad AG, ita LQ ad KQ.

IV. Ex isto autem theoremate *prono al-
teo fuit*, quadratum quidem ordinatæ EG esse æquale rectangulo KQL; quadratum vero ordinatæ PQ æquale esse rectangulo AGB.

Quum enim BG sit ad AG, ut est LQ ad KQ; erit dividendo, ut AB ad AG, ita KL ad KQ. Unde, quia permutando AB est ad KL, tam ut AG ad KQ, quam ut BG ad LQ; compositis rationibus, erit, ut AB quadratum ad KL quadratum, ita rectangulum AGB ad rectangulum KQL.

R 2

Jam,

IV.

*Præcedentis
proprietas
elegans con-
siliarium,
respicitur
quadrata
earum ordi-
natarum.*

FIG. 40.

Jam, propter hyperbolam, AB quadratum est ad KL quadratum, tam ut rectangulum AGB ad EG quadratum, quam ut PQ quadratum ad rectangulum KQL . Quare ex æquali, primo quidem erit, ut rectangulum AGB ad rectangulum KQL , ita idem rectangulum AGB ad EG quadratum. Deinde vero, ut rectangulum AGB ad rectangulum KQL , ita PQ quadratum ad idem rectangulum KQL : & propterea rectangulo quidem KQL æquale erit EG quadratum; rectangulo vero AGB erit æquale PQ quadratum.

v.
*Alia ejus-
 dem pro-
 prietatis
 confessio-
 nem, etiam
 notata di-
 gnum.*

V. Supponamus modo AB , KL esse axes conjugatos hyperbolæ: adeo nempe, ut ordinatæ EG , PQ rectos angulos cum iis constituent. Et *nullo etiam negotio ostendemus*, differentiam quadratorum EF , AB æqualem esse differentiæ quadratorum PR , KL .

FIG. 40.

Ut enim vidimus paulo ante, excessus, quo CE quadratum superat CA quadratum, est EG quadratum una cum rectangulo AGB . Sed rectangulo AGB ostensum est æquale PQ quadratum. Quare excessus, quo CE quadratum superat CA quadratum, erit summa quadratorum EG , PQ .

Eadem ratione excessus, quo CP quadratum superat CK quadratum, est PQ quadratum una cum rectangulo KQL . Sed rectangulo KQL ostensum est æquale EG quadratum. Quare excessus, quo CP quadratum superat CK quadratum, erit pariter summa quadratorum EG , PQ .

Id quum ita sit, erit differentia quadratorum CE , CA æqualis differentiæ quadrato-
 rum

rum CP, CK. Sed ipsarum CE, CA, CP, CK duplæ sunt EF, AB, PR, KL. Quare differentia quadratorum EF, AB differentia quadratorum PR, KL etiam æqualis erit.

VI. Atque hinc modo facile erit ostendere id, quod ab initio nobis proposuimus: *nimirum, quod, crescentibus hyperbolæ diametris primariis, augeri debeant quoque ipsarum conjugatæ.* VI.
*Crescentibus
diametris
primariis,
augentur
etiam ipsa-
rum conju-
gatæ.*

Maneant enim omnia, ut supra: adeo nempe, ut AB sit axis hyperbolæ, KL ejus conjugatus; EF diameter quævis primaria, & PR ipsius conjugata. Dico, non posse diametrum EF majorem fieri, nisi etiam augeatur ejus conjugata PR. FIG. 40.

Ostensum est namque, excessum, quo EF quadratum superat AB quadratum, esse æqualem excessui, quo PR quadratum superat KL quadratum. Quare nequit augeri prior excessus, nisi etiam excessus secundus major evadat.

Jam, ubi per recessum ab axe AB major evadit diameter EF, tunc augetur excessus, quo EF quadratum superat AB quadratum. Itaque in eodem recessu necesse est, ut augeatur etiam excessus, quo PR quadratum superat KL quadratum: & propterea ipsa PR major itidem evadet.

VII. Sed ex eo, quod differentia quadratorum EF, AB sit æqualis differentia quadratorum PR, KL, colligi alterius potest, diametrum EF esse æqualem, majorem, vel minorem conjugata sua PR, prout axis AB est æqualis, major, vel minor conjugato suo KL. VII.
*Quomodo sit
qualibet ex
diametris
primariis
relata ad
suam conju-
gatam.*

FIG. 40.

Ponamus etenim primo, axem AB æqualem esse conjugato suo KL. Dico, etiam diametrum EF adæquare conjugatam suam PR. Nam si major, vel minor esset; foret differentia quadratorum EF, AB major quoque, vel minor differentia quadratorum PR, KL. Quod plane repugnat.

Ponamus secundo, axem AB majorem esse conjugato suo KL. Dico, etiam diametrum EF majorem esse conjugata sua PR. Nam, si æqualis, vel minor esset; foret differentia quadratorum EF, AB minor differentia quadratorum PR, KL. Quod quidem est falsum.

Ponamus denique, axem AB minorem esse conjugato suo KL. Dico, etiam diametrum EF minorem esse conjugata sua PR. Nam, si æqualis, vel major esset; foret differentia quadratorum EF, AB major differentia quadratorum PR, KL; quum tamen ei æqualis esse debeat.

VIII.
Locus omnium diametrorum hyperbolæ potest per data cujusdam rectæ portionem exhiberi.

FIG. 60

VIII. Cæterum, ut alia quamplurima, quæ locum habent in comparatione diametrorum hyperbolæ, tum hic, cum in sequentibus facilius prosequi valeamus; juvat hic advertere, quod locus diametrorum omnium hyperbolæ per data alicujus rectæ portionem possit exhiberi.

In triangulo namque ABC, rectangulo in B, referat hypothenusa AC eum ex duobus axibus conjugatis hyperbolæ, qui major est. & latus BC axem alterum minorem. Extenatur porro latus istud BC in directum versus X. Et dico, portionem ejus CX confide.

siderari posse veluti locum omnium diametro-
rum hyperbolæ .

Primo enim, ex superius ostensis, quælibet diameter, quæ ad eas hyperbolas terminatur, in quibus suos terminos habet axis AC, debet esse major ipso axe AC. Sed omnes rectæ, quæ ducuntur ex puncto A ad rectam CX, majores sunt ipsa AC. Itaque poterunt rectæ istæ omnes earum hyperbolarum diametros exhibere.

Deinde, si AE sit aliqua earum diametrorum, ejus conjugata talis esse debet, ut excessus, quo ipsius quadratum superat BC quadratum, sit æqualis excessui, quo AE quadratum superat AC quadratum. Unde facile erit ostendere, quod debeat esse BE conjugata ipsius AE.

Est enim BE quadratum æquale BC, CE quadratis una cum duplo rectanguli BCE. Quare excessus, quo BE quadratum superat BC quadratum, erit CE quadratum una cum duplo rectanguli BCE. Sed hujusmodi est etiam excessus, quo AE quadratum superat AC quadratum. Itaque differentia quadratorum BE, BC æqualis erit differentiæ quadratorum AE, AC: & propterea, sicuti BC est conjugatus axis AC, sic erit BE conjugata diametri AE.

IX. Hoc facto principio, jam circa diametros conjugatas hyperbolæ plura alia facillime licebit ostendere. Ac primo quidem ostendemus, quod *differentia quadratorum, quæ fiunt ex axis conjugatis, æqualis sit differentia quadratorum, quæ fiunt ex aliis duabus dia-*

IX.
Differentia
quadrato-
rum ex axis
conjugatis
est æqua-
lis differen-
tia quadrato-
rum ex
aliis duabus

*diametris
conjugatis.*
FIG. 60.

metris. similiter conjugatis.

Ut enim rectæ AC, BC referunt axes hyperbolæ conjugatos, sic rectæ AE, BE referant binas ejus diametros similiter conjugatas. Dico, differentiam quadratorum AC, BC æqualem esse differentiæ quadratorum, quæ fiunt ex ipsis AE, BE.

Ob triangulum namque ABC, rectangulum in B, est AC quadratum æquale duobus quadratis AB, BC. Quare differentia quadratorum AC, BC æqualis erit quadrato, quod fit ex AB.

Simili ratione, ob triangulum ABE, rectangulum in B, est AE quadratum æquale duobus quadratis AB, BE. Quare differentia quadratorum AE, BE æqualis erit quadrato, quod fit ex AB.

Eidem igitur AB quadrato æqualis est, tam differentia quadratorum AC, BC, quam differentia quadratorum AE, BE. Quare differentia quadratorum AC, BC æqualis erit differentiæ quadratorum AE, BE.

X.
*Theorema
primum de
ratione
quam habet
diameter
primaria ad
suam conju-
gatam.*

X. Ostendemus deinde, quod *quum axis hyperbolæ major est suo conjugato, non modo omnis alia diameter major erit conjugata sua, sed etiam ratio axis ad suam conjugatum major erit ratione, quam quævis alia diameter habet ad conjugatam suam.*

FIG. 60.

Jam enim clare patet, quod sicuti axis AC major est conjugato suo BC, ita quævis alia diameter AE major sit quoque conjugata sua BE. Sed facile erit etiam ostendere, quod AC ad BC majorem rationem habeat, quam AE ad BE.

Du-

Ducta siquidem per punctum E recta EF, ipsi AC parallela, quæ conveniat cum AB in F; erit, ut AC ad BC, ita FE ad BE. Sed, ob angulum rectum EBF, FE major est, quam AE; atque adeo FE ad BE majorem rationem habet, quam AE ad BE. Quare etiam AC ad BC majorem rationem habebit, quam AE ad BE.

Simili autem ratione ostendemus, quod si fuerit AG quævis alia hyperbolæ diameter, remotior ab axe AC; ratio, quam habet diameter AE, axi propinquior, ad suam conjugatam BE, major sit ratione, quam habet diameter AG, ab axe remotior, ad conjugatam suam BG.

XI. Ostendemus porro, quod *quum per* ^{XI. Theorema} *contrarium axis hyperbolæ minor est suo con-* ^{secundum de} *jugato, tunc non solum omnis alia diameter mi-* ^{eadem ra-} *nor erit conjugata sua, sed etiam ratio axis ad* ^{tionem, quam} *suam conjugatam minor erit ratione, quam* ^{habet dia-} *quævis alia diameter habet ad conjugatam* ^{meter pri-} *suam.* ^{maria ad} ^{suam conju-} ^{gatam.}

FIG. 60.

Jam enim liquido patet, quod sicuti axis BC minor est suo conjugato AC, ita quævis alia diameter BE minor sit quoque conjugata sua AE. Sed nullo etiam negotio ostendemus, quod BC ad AC minorem rationem habeat, quam BE ad AE.

Ducta siquidem per punctum E recta EF, ipsi AC parallela, quæ conveniat cum AB in puncto F; erit, ut BC ad AC, ita BE ad FE. Sed, ob angulum rectum EBF, FE major est, quam AE; atque adeo BE ad FE minorem rationem habet, quam BE ad AE.

Qua-

Quare etiam BC ad AC minorem rationem habebit, quam BE ad AE.

Simili autem ratione ostendemus, quod si fuerit BG, quævis alia hyperbolæ diameter, remotior ab axe BC; ratio, quam habet diameter BE, axi propinquior, ad suam conjugatam AE, minor sit ratione, quam habet diameter BG, ab axe remotior, ad conjugatam suam AG.

XII.
Theoremata
de summa,
rectangulo,
& differen-
tia duarum
hyperbolæ
conjugata-
rum diamet-
rorum.

XII. Ulterius ex eo, quod crescentibus hyperbolæ diametris, augeantur etiam ipsarum conjugatarum, ultro sequitur, tam summam, quam rectangulum ex duabus hyperbolæ diametris conjugatis, eo magis augeri, quo magis ipsæ diametri ab axibus recedunt.

Sed quantum attinet ad differentiam earundem diametrorum, ea per contrarium eo minor evadit, quo magis diametri ab axibus remonentur; tandemque in infinita distantia differentia illa prorsus evanescit, & ipsæ diametri fiunt inter se mutuo æquales.

FIG. 60.

Manentibus namque omnibus, ut supra, extendatur CB usque in H, ut fiat AC æqualis ipsi CH. Jamque, si ostendi possit, AE minorem esse, quam EH; erit differentia axium AC, BC major differentia diametrorum AE, BE. Id vero ostendemus in hunc modum.

Jungatur AH. Et quoniam duæ AC, CH sunt æquales inter se; erit angulus CAH æqualis pariter angulo CHA. Sed angulus EAH major est angulo CAH. Quare idem angulus EAH erit etiam major angulo EHA: & propterea AE minor erit, quam EH.

Simili ratione ostendemus, differentiam dia-

diametrorum AE, BE , axibus propinquo-
rum, majorem esse differentia diametrorum
 AG, BG , ab iisdem axibus remotiorum. Quare
differentia inter binas hyperbolæ diametros
conjugatas eo minor evadet, quo magis ipsæ
diametri ab axibus removentur.

XIII. Nolim autem hoc loco reticere, quod
etsi rectangulum ex binis hyperbolæ diametris
conjugatis eo majus evadat, quo magis ipsæ
diametri ab axibus removentur, atque adeo
ad æqualitatem accedunt; attamen *parallelo-*
grammum, circa binas hyperbolæ conjugatas
diametros descriptum, sit ejusdem ubique ma-
gnitudinis, hoc est æquale semper rectangulo,
quod sub ipsis axibus continetur.

XIII.
Parallelo-
grammum,
circa duas
hyperbolæ
conjugatas
diametros
descriptum,
est æquale
rectangulo
sub axibus
FIG. 61.

Sint enim AB, KL axes hyperbolæ
conjugati; sintque etiam EF, PR binæ
eius conjugatæ diametri. Ducantur per pun-
cta $E, \& F$ rectæ QS, TV , ipsi PR parallelæ;
tum item per puncta $P, \& R$ rectæ QV, TS ,
æquidistantes ipsi EF : ita, ut circa diametros
conjugatas EF, PR descriptum sit parallelo-
grammum $QSTV$. Dico, parallelogrammum
istud æquale esse rectangulo, quod sub axibus
 AB, KL continetur.

Demittatur, tum ad axem AB ordinata
 EG , cum ad diametrum EF ordinata AO . Et,
ex superius ostensis, erit, ut EG ad AO , ita
 KL ad PR ; sive etiam, ita CK ad CP . Sed, de-
missis super CE, CP perpendicularibus AI, EH ,
 EG est ad AO in ratione composita ex EG ad
 AI , & ex AI ad AO ; hoc est in ratione com-
posita ex CE ad CA , & ex EH ad CE . Quare
etiam CK ad CP rationem habebit compo-
sitam

tam

263 SECTIONUM CONICARUM
tam ex EH ad CE, & ex CE ad CA.

Jam duæ istæ rationes componunt pariter rationem, quam habet EH ad CA. Quare erit ex æquali, ut CK ad CP, ita EH ad CA; & propterea rectangulum ex CP in EH, hoc est parallelogrammum PCEQ, erit æquale rectangulo, quod fit ex CA in CK. Sed parallelogrammum QSTV est quadruplum parallelogrammi PCEQ, & rectangulum sub axibus AB, KL est quadruplum rectanguli ACK. Quare etiam parallelogrammum QSTV æquale erit rectangulo sub axibus AB, KL.

XIV.
Theorema
ex angulis,
quos conjugata
diametri in hyper-
bola centro
constituunt.

XIV. Hinc vero plura deducuntur circa
angulos, quos hyperbolæ conjugatæ diametræ
occursum mutuo in centro constituunt.

Nimirum primo, quod sinus anguli, sub
duabus quibuslibet conjugatis diametris con-
sistenti, sit ad radium, ut est rectangulum sub
axibus ad id, quod sub ipsis diametris conti-
netur.

FIG. 61.

Positis enim omnibus, ut supra, sinus
anguli ECP est ad radium, ut EH ad CE; sive
etiam, ut rectangulum ex CP in EH ad re-
ctangulum ex CP in CE. Sed rectangulum
ex CP in EH ostensum est æquale rectangulo
ACK: quod quidem est ad rectangulum ex
CP in CE, ut rectangulum ex AB in KL ad
rectangulum ex EF in PR. Quare erit ex æ-
quali, ut sinus anguli ECP ad radium, ita re-
ctangulum ex AB in KL ad rectangulum ex
EF in PR.

Secundo, quod sinus angulorum, quos
conjugatæ diametræ occursum mutuo in centro
constituunt, sint reciproce, ut rectangula, quæ
sunt

sunt ex ipsis diametris conjugatis.

Jam enim ostensum est, quod sinus anguli, quem duæ quævis conjugatæ diametri continent, sit ad radium, ut est rectangulum sub axibus ad id, quod sub ipsis diametris continetur. Quare, ex æquo perturbando, sinus anguli duarum conjugatarum erit ad sinum anguli, quem aliæ duæ conjugatæ comprehendunt, ut est rectangulum istarum ad id, quod ex iis efficitur.

Denique, quod *angulus acutus, sub binis hyperbolæ diametris conjugatis comprehensus, eo minor evadat, quo magis ipsæ diametri ab axibus removentur.*

Nam, ex superius ostensis, rectangulum, quod binæ hyperbolæ conjugatæ diametri continent, eo majus evadit, quo magis eæ diametri ab axibus recedunt. Sed ei rectangulo est reciproce proportionalis sinus anguli, sub hisdem diametris contenti. Quare per contrarium, tam sinus, quam ipse angulus acutus, ad quem sinus refertur, necesse est, ut eo minor fiat, quo magis conjugatæ diametri ab axibus removentur.

C A P. V.

Parametri diametrorum hyperbolæ inter se mutuo conferuntur.

1. **C**omparatis inter se mutuo diametris hyperbolæ, sequitur, ut parametros

1.
Dne hyper-
bolæ diamet-

vi conjugata sunt con-
stante pro-
portionales
cum suis pa-
rametris, ubi
inverso
ordine inter
 eas collocan-
tur.

FIG. 62.

tros ipsarum ad invicem conferamus. Et primo quidem, *quum conjugatae fuerint ea diametri, quarum parametris simul conferre oportet, facile erit, de iis parametris dijudicare.*

In parametris enim, quæ ad duas diametros conjugatas referuntur, istud obtinet theorema, quod *ipsæ diametri continuam cum eis proportionem constituent, ubi inverso ordine inter illas collocantur.*

Sint enim hyperbolæ AB, KL binæ ejus diametri conjugatæ. Sit autem AD parameter unius AB, & KI parameter alterius KL. Dico, diametros AB, KL, inverso ordine positas inter suas parametris AD, KI, continuum cum eis proportionem constituere.

Quoniam enim KL est conjugata ipsius AB; erit, ut AD ad KL, ita KL ad AB. Et similiter, quoniam AB est conjugata ipsius KL; erit ut KL ad AB, ita AB ad KI. Quare quatuor AD, KL, AB, KI continue proportionales erunt.

II.
Comparatio
parametrorum, quæ
ad duas hyperbolas
diametros con-
jugatas referuntur.

FIG. 62.

II. Hinc autem *plura deducuntur circa parametris, quæ ad duas diametros conjugatas referuntur.*

Nimirum primo, quod si duæ conjugatæ diametri AB, KL inter se sint æquales; etiam parametri AD, KI debeant esse æquales, tam inter se, quam cum diametris suis.

Secundo, quod si vicissim duæ conjugatæ diametri AB, KL sint inæquales; parametri quoque AD, KI debeant esse inæquales, tam inter se, quam cum qualibet earum diametrorum.

Tertio, quod ex diametris AB, KL ea, quæ

quæ major est, habeat parametrum, tum ipsa, cum diametro altera minorem; illa vero, quæ minor est, parametrum habeat, etiam altera diametro majorem.

Quarto, quod quum inæquales sunt diametri AB, KL, & inæquales adeo ipsarum parametri AD, KI, summa parametrorum major sit semper summa diametrorum.

Et denique, quod si capiatur differentia, tam inter diametrum AB, & parametrum suam AD, quam inter diametrum KL, & suam parametrum KI; ea quidem differentia sit major, quæ ad minorem diametrum, majoremque adeo parametrum refertur.

III. Ubi autem diametri non fuerint conjugatæ, sed ad eandem hyperbolas terminantur, poterit de parametris ipsarum judicium ferri, ostenso prius hoc theoremate, quod *differentia inter quadratum alicujus diametri, & figuram ejus sit eadem ubique.*

III.
In hyperbola differentia inter quadratum diametri, & ejus figuram est eadem ubique.

Maneant enim omnia, ut supra. Dico, quod differentia inter quadratum diametri AB, & figuram ejus, quæ constituitur per rectangulum DAB, sit semper eadem, quocumque in loco capiatur diameter AB.

Ex superius siquidem ostensis, differentia quadratorum, quæ fiunt ex diametris conjugatis AB, KL, ubique reperitur æqualis differentiæ quadratorum, quæ fiunt ex axibus; & consequenter ubique est eadem. Sed quadratum ex KL est æquale rectangulo DAB. Quare eadem pariter ubique erit differentia inter AB quadratum, & rectangulum DAB.

IV. In-

FIG. 62.

IV.
Dua hyper-
bole diamet-
ris sunt reci-
proce propor-
tionales cum
differentiis
lateralum sua-
rum figura-
rum.

FIG. 62.

IV. Inde vero inferre licet, *duas quasvis diametros hyperbole reciproce proportionales esse differentiis lateralum suarum figurarum.*

Ut enim diametri AB parameter est AD, ita sit EH parameter cuiusvis alterius diametri EF. Dico, AB esse ad EF, ut est differentia ipsarum EF, EH ad differentiam, quæ est inter ipsas AB, AD.

Ob ostensum namque theorema, differentia inter quadratum alicujus diametri, & figuram ejus est eadem ubique. Quare differentia inter AB quadratum, & rectangulum DAB æqualis erit differentiæ inter EF quadratum, & rectangulum HEF.

Jam differentia inter AB quadratum, & rectangulum DAB tantundem valet, ac rectangulum ex AB in differentiam ipsarum AB, AD. Et similiter differentia inter EF quadratum, & rectangulum HEF perinde est, ac rectangulum ex EF in differentiam ipsarum EF, EH. Quare, quum æqualia sint inter se duo ista rectangula; erit, ut AB ad EF, ita differentia duarum EF, EH ad differentiam duarum AB, AD.

V.
Ex binis
diametris,
ad easdem
hyperbolas
terminatis
ea majorem
parametrum
habet, quæ
major est.

FIG. 62.

V. Atque hinc modo facile erit ostendere, quod *ex binis diametris, ad easdem hyperbolas terminatis ea, quæ major est, majorem parametrum habeat.*

Maneant enim omnia, ut supra. Et ponamus, diametrum AB minorem esse diametro EF. Dico, parametrum AD, quæ refertur ad diametrum minorem, esse etiam minorem parametrum EH, quæ refertur ad diametrum majorem.

Osten-

Ostensum est namque, quod diameter AB sit ad diametrum EF, ut est differentia ipsarum EF, EH ad differentiam, quæ est inter ipsas AB, AD. Quare, sicuti AB minor est, quam EF; ita & differentia duarum EF, EH minor erit differentia duarum AB, AD.

Differentia igitur inter diametrum EF, & parametrum suam EH est minor differentia, quæ est inter diametrum AB, & parametrum suam AD. Sed EF major est, quam AB. Itaque EH multo major erit, quam AD.

Id quum ita sit, perspicuum est, quod, sicuti omnium diametrorum hyperbolæ minima est ea, quæ axis vocitatur; sic omnium parametrorum illa quidem sit minima, quæ refertur ad axem. Et quemadmodum omnes aliæ diametri in recessu ab axe continuo augentur; sic & parametri earundem in eodem recessu perpetuo quoque majores evadunt.

VI. Notetur autem hic sedulo velim, proprietatem istam veram esse in iis tantummodo diametris, quæ majores sunt suis parametris; quum allata demonstratio dumtaxat in eis illius veritatem evincat. Sed longe secus se res habet in diametris illis, quæ parametris suis sunt minores; quum in eis duo sunt casus distinguendi.

Primus casus est, quum quadratum axis non est minus dimidio quadrati, quod sit ex suo conjugato. Et quum id contingit, minima quidem parameter est ea, quæ refertur ad axem; aliarum autem eæ semper sunt minores, quæ ad diametros item minores referuntur: adeo, ut hic quoque generaliter verum erit,

Tom. I.

S

quod

VI.

Quod procedens proprietas non universaliter obtineat in diametris minoribus parametris suis.

274 SECTIONUM CONICARUM
quod, crescentibus diametris, augeantur etiam
parametri ipsarum.

Alter casus est, quum quadratum axis
minus est dimidio quadrati, quod fit ex suo
conjugato. Et tunc, comperta diametro, cu-
jus quadratum adæquet semissem quadrati,
quod fit ex ejus conjugata; erit parameter
istius diametri omnium minima, tum item
aliarum eæ semper minores erunt, quæ refe-
runtur ad diametros, minus ab illa distantes.

VII.
Oſtenduntur
casus, qui
adſunt, de-
ſcribendo pri-
mam para-
metros dia-
metrorum.

FIG. 63.

VII. Neque vero difficile crit, *utriuſque*
casus veritatem oſtendere. Si enim in trian-
gulo rectangulo ABC referat latus BC axem
hyperbolæ, & hypothenusa AC ejus conju-
gatum; per ea, quæ superius ostensa sunt,
exhibente BE aliam quamvis diametrum,
exhibebit AE conjugatam illius. Unde, ere-
ctis super ipsis AC, AE perpendicularis AI,
AL; fiet CI parameter axis BC, & EL para-
meter diametri BE.

Quum enim in triangulo rectangulo
CAI ex angulo recto A demissa sit ad hypo-
thenusam CI perpendicularis AB; erit, ut
BC ad AC, ita AC ad CI. Sed parameter
axis BC est tertia proportionalis post ipsum
axem, & ejus conjugatum. Itaque, quum sit
AC conjugatus axis BC, erit CI parameter
ejusdem axis BC.

Eadem ratione, quoniam in triangulo
rectangulo EAL ex angulo recto A demissa
est ad hypothenusam EL perpendicularis AB;
erit, ut BE ad AE, ita AE ad EL. Sed para-
meter diametri BE est tertia proportionalis
post ipsam diametrum, & ejus conjugatam,
Ita-

Itaque, quum sit AE conjugata diametri BE, erit EL ejusdem diametri parameter.

VIII. Quemadmodum ergo CI est parameter axis BC, ita EL est parameter diametri BE. Et quoniam anguli CAI, EAL, quorum cruribus suis abscindunt ex eadem AX portiones CI, EL, sunt æquales inter se; jam hic etiam sumus in eo casu, in quo angulus retilineus vertitur circa verticem suum, & ex recta, positione data, cruribus suis perpetuo portionem aliquam abscindit.

VIII.
Demonstratio prædictionum casuum in medium offertur.
FIG. 63.

Hinc, siquidem MAN sit positio anguli recti, in qua crura ejus æqualia sunt; erit portio MN omnium minima; tum item aliarum ex semper minores erunt, quæ ad ipsam MN magis accedunt. Unde eo res redit; ut ostendamus, BC quadratum non minus esse dimidio quadrati, quod fit ex AC, quotiescumque BC non minor est, quam BM; esse vero minus, quum per contrarium BC minor est, quam BM.

Id vero liquet abunde. Nam, propter æquales AM, AN, sunt etiam æquales duæ AB, BM. Quare, quum BC non minor est, quam BM, nec etiam minor erit, quam AB: & propterea quadratum ejus nec item minus erit dimidio quadrati, quod fit ex AC. Vicissim vero, quum BC minor est, quam BM; erit BC minor quoque, quam AB: adeoque BC quadratum minus erit dimidio quadrati, quod fit ex AC.

IX. Cæterum nolim hic silentio præterire, quod sicuti, erectis super ipsis AC, AE perpendicularis AI, AL, sunt CI, EL parametri

IX.
Definiuntur parametri diametri, tum, quæ sit

S 2

ipsa-

sunt majores. Ipsarum BC, BE; ita, demissis super iisdem
 FIG. 63. AC, AE perpendicularis BH, BK, fiant por-
 tiones CH, EK parametri, quæ referuntur ad
 ipsas AC, AE.

Quum enim in triangulo rectangulo ABC ex angulo recto B demissa sit ad hypothenusam AC perpendicularis BH; erit, ut AC ad BC, ita BC ad CH. Sed parameter axis AC est tertia proportionalis post ipsum axem, & ejus conjugatum. Itaque, quum sit BC conjugatus axis AC, erit CH parameter ejusdem axis AC.

Simili ratione, quoniam in triangulo rectangulo ABE ex angulo recto B demissa est ad hypothenusam AE perpendicularis BK; erit, ut AE ad BE, ita BE ad EK. Sed parameter diametri AE est tertia proportionalis post ipsam diametrum, & ejus conjugatam. Itaque, quum sit BE conjugata diametri AE, erit EK ejusdem diametri parameter.

Jam, si super AB, velut diametro, semicirculus describatur, transibit iste per illa eadem puncta, in quæ cadunt perpendiculares BH, BK. Unde portio suæ circumferentiæ AH considerari poterit veluti locus parametrorum, quæ referuntur ad diametros AC, AE. Et inde rursus apparet, quod crescentibus hisce diametris, augeri debeant quoque parametri ipsarum.

X. Ex his omnibus colligi etiam denuo potest veritas theorematis superius ostensi, quod *duæ quævis hyperbolæ diametri sint reciproce proportionales differentiis laterum suarum figurarum*. Nam facile erit ostendere, re-
 stan-

X.

*Quod dia-
metri rect-
proce pro-
portiones sint
differentiis
lateralum sua-
rum figura-*

Rectangulum ex diametro quavis in differentiam
 laterum suæ figuræ adæquare semper quadra- eum translat
 ostenditur. FIG. 63.
 tum datæ rectæ AB.

Sit enim primo AE diameter, de qua
 agitur. Et quoniam, ex ostensis, EK est ejus
 parameter; erit AK differentia laterum suæ
 figuræ. Unde eo res redit, ut ostendamus,
 rectangulum ex AE in AK æquale esse qua-
 drato ex AB. Quod quidem liquet abunde;
 quum tres rectæ AE, AB, AK sint in conti-
 nua proportionione.

Sit secundo BE diameter, de qua est
 quæstio. Et quoniam, per superius ostensa, EL
 est parameter ejus; erit BL differentia laterum
 suæ figuræ. Unde eo res redit, ut ostenda-
 mus, rectangulum ex BE in BL æquale esse
 quadrato ex AB. Quod quidem ad huc liqui-
 do patet; quum tres rectæ BE, AB, BL sint
 in continua proportionione.

XI. Quamquam autem vi hujus theore- XI.
 Theorema
 de summa,
 et differen-
 tia laterum
 figurae dia-
 metri.
 matis differentia laterum figuræ diametri mi-
 nuatur, crescente diametro; attamen non pe-
 rinde res est de summa eorundem laterum. Ubi
 enim diametri majores sunt suis parametrīs; FIG. 63.
 tunc, quia cum diametro augetur quoque pa-
 rameter ejus, necesse est, ut summa laterum
 figuræ cum eadem diametro pariter augeatur.
 Ubi vero diametri minores sunt parametrīs
 suis; tunc duo oportet casus distinguantur.

Primus casus est, quum quadratum axis
 non est minus triente quadrati, quod sit ex
 suo conjugato. Et quum id contingit, sum-
 ma laterum figuræ ipsius axis erit omnium mi-
 nima; ea vero, quæ refertur ad diametrum,

278 SECTIONUM CONICARUM

axi propinquiorem, minor erit illa, quæ refertur ad diametrum, ab eodem axe remotiorem: adeo, ut hic quoque generaliter verum erit quod, crescente diametro, augeatur etiam summa laterum suæ figuræ.

Alter casus est, quum quadratum axis est minus triente quadrati, quod fit ex suo conjugato. Et tunc, comperta diametro, cuius quadratum adæquet trientem quadrati, quod fit ex ejus conjugata; erit summa laterum figuræ istius diametri omnium minima; ea vero, quæ refertur ad diametrum, ipsi propinquiorem, minor erit illa, quæ refertur ad diametrum, ab eadem remotiorem.

XII.
Demonstratio
casuum,
qui locum
habent in
summa,
quum dia-
metri sunt
minores suis
parametris.
FIG. 63.

XII. Pendet autem *utrinque casus demonstratio ex præclaro isto theoremate*, quod manentibus omnibus, ut supra, si angulus rectus CAI revolvatur circa verticem suum A , summa duarum BC , CI eo minor evadat, quo magis ipse angulus ad eam positionem accedit, in qua quadratum cruris AC adæquat semisem quadrati, quod fit ex crure altero AI .

Sit enim MAN positio anguli recti, in qua quadratum cruris AM est æquale dimidio quadrati, quod fit ex crure altero AN . Erigatur igitur summa duarum BM , MN omnium minima; tum item aliarum summarum eæ semper minores erunt, quæ ad summam illam magis accedunt. Unde eo res redit, ut ostendamus, BC quadratum non minus esse triente quadrati, quod fit ex AC , quotiescumque BC non minor est, quam BM ; esse vero minus, quum vicissim BC minor est, quam BM .

Id vero facili negotio ostendemus. Est enim

enim AM quadratum ad AN quadratum, ut BM ad BN . Unde, sicuti AM quadratum est dimidium quadrati, quod fit ex AN ; ita quoque BM semissis erit ipsius BN . Hinc, quotiescumque BC non minor est, quam BM , nec etiam BC minor erit, tum semisse ipsius BI , cum triente totius CI ; adeoque, quia BC quadratum est ad AC quadratum, ut BC ad CI , nec item BC quadratum minus erit triente quadrati, quod fit ex AC . Vicissim vero, quum BC minor est, quam BM , erit BC minor triente ipsius CI ; & BC quadratum minus quoque triente quadrati, quod fit ex AC .

XIII. Memorabile est autem, quod locum XIII.
Theorema
de differen-
tia quadra-
torum, quod
sunt ex figu-
ra lateribus.
habet in differentia quadratorum, quæ fiunt ex figura lateribus. Ista enim in diametris, quæ sunt majores parametris suis, augetur, crescente diametro; in diametris vero, quæ parametris suis sunt minores, minuitur, ubi diameter crescit: adeo, ut omnium minima est illa, quæ refertur ad axem.

F10.63.

Capiatur etenim primo diameter AE ; quæ major est parametro sua EK . Et quoniam AE quadratum est æquale AK , EK quadratis una cum duplo rectanguli AKE , sive etiam duplo quadrati, quod fit ex BK , erit differentia quadratorum AE , EK æqualis quadrato ex AK una cum duplo quadrati ex BK ; atque adeo æqualis duobus quadratis AB , BK . Sed summa horum quadratorum eo major evadit, quo magis augetur diameter AE . Quare, crescente diametro AE , augetur etiam differentia quadratorum AE , EK .

Capiatur secundo diameter BE, quæ minor est parametro sua EL. Et quoniam EL quadratum est æquale BE, BL quadratis una cum duplo rectanguli EBL, five etiam duplo quadrati, quod sit ex AB; erit differentia quadratorum BE, EL æqualis quadrato ex BL una cum duplo quadrati ex AB; atque adeo æqualis duobus quadratis AB, AL. Sed summa horum quadratorum eo minor evadit, quo magis augetur diameter BE. Quare, crescente diametro BE, minuitur differentia quadratorum BE, EL.

XIV.
Theorema
Summa quadratorum,
quæ sunt ex
figura lateribus,
FIG. 63.

XIV. Reliquum jam est, ut, quid obtineat in summa quadratorum, quæ sunt ex figura lateribus, breviter ostendamus. Sane in diametris, quæ majores sunt suis parametris, ea crescit, crescente diametro. Et ratio est, quia una cum diametro augetur quoque parameter ejus. In diametris autem, quæ parametris suis sunt minores, duo sunt casus distinguendi.

Primus casus est, quum quadratum axis non est minus dimidio quadrati, quod sit ex differentia laterum suæ figuræ. Et quum id contingit, summa quadratorum ex lateribus figuræ ipsius axis, erit omnium minima; ea vero, quæ refertur ad diametrum, axi propinquiorem, minor erit illa, quæ refertur ad diametrum, ab eodem axe remotiorem: adeo, ut hic quoque generaliter verum erit, quod crescente diametro, augeatur quoque summa quadratorum, quæ sunt ex figuræ lateribus.

Alter casus est, quum quadratum axis est minus dimidio quadrati, quod sit ex diffe-

ren-

rentia laterum suæ figuræ . Et tunc , comper-
ta diametro , cujus quadratum adæquet semif-
sem quadrati ex differentia laterum figuræ
ejus ; erit summa quadratorum ex lateribus
figuræ istius diametri omnium minima ; ea ve-
ro , quæ refertur ad diametrum , ipsi propin-
quiorem , minor erit illa , quæ refertur ad dia-
metrum , ab eadem remotiorem .

XV. Utriusque autem casus demonstratio
pendet ex hoc altero eleganti theoremate, quod
manentibus omnibus , ut supra , si angulus re-
ctus CAI revolvatur circa verticem suum A ,
summa quadratorum ex ipsis BC , CI eo mi-
nor evadat , quo magis ipse angulus ad eam
positionem accedit , in qua quadratum cruris
AC est ad quadratum alterius cruris AI in ea-
dem illa ratione , quam habet latus cujusque
quadrati ad ejus diagonalem .

XV.

*Demonstra-
tio casuum,
qui obtinentur,
quotiescun-
que diametri
parametris
sunt minores.*

FIG. 63.

Sit enim MAN positio anguli recti , in
qua quadratum cruris AM est ad quadratum
alterius cruris AN , ut est latus cujusque qua-
drati ad ejus diagonalem . Erit igitur summa
quadratorum ex ipsis BM , MN omnium mini-
ma ; tum item aliarum summarum eæ semper
minores erunt , quæ ad summam illam magis
accedunt . Unde eo res redit , ut ostendamus ,
BC quadratum non minus esse dimidio qua-
drati , quod fit ex BI , quotiescunque BC ,
non minor est , quam BM ; esse vero minus ,
quum vicissim BC minor est , quam BM .

Id vero nullo negotio ostendemus . Est
enim AM quadratum ad AN quadratum , ut
BM ad BN . Unde , sicuti AM quadratum est
ad AN quadratum , ut latus cujusque quadra-

si

182 SECTIONUM CONICARUM
 ti ad ejus diagonalem ; ita in hac eadem ratio-
 ne erit quoque BM ad BN : & propterea BM
 quadratum æquale erit dimidio quadrati, quod
 fit ex BN . Hinc , quotiescumque BC non mi-
 nor est , quam BM , nec etiam BC quadratum
 minus erit dimidio quadrati, quod fit ex BI .
 Quotiescumque vero BC minor est , quam
 BM, erit itidem BC quadratum minus dimidio
 quadrati , quod fit ex BI.

C A P. VI.

*Solvuntur problemata quedam
 circa hyperbolæ diametros ,
 & parametros.*

I.
*Datis axibus
 hyperbolæ, in-
 venire duas
 diametros
 conjugatas ,
 quarum da-
 ta sit ratio.*
 FIG. 60.

I. **C**omparatis inter se mutuo; tam
 diametris , quam parametris hy-
 perbolæ ; sequitur modo , ut problemata quæ-
 dam resolvamus , quæ circa eas institui pos-
 sunt . Primum itaque problema hoc erit : *da-
 tis axibus hyperbolæ , invenire duas diametros
 conjugatas , quæ datam habeant rationem in-
 ter se .* Quem in finem referat in triangulo re-
 ctangulo ABC hypotenusæ AC axem majore-
 rem , & latus BC axem minorem.

Per ea , quæ superius ostensa sunt , jam
 eo res redit , ut producta BC versus X , in-
 veniatur in CX tale quidem punctum E , ut
 AE ad BE fit in data illa ratione . Itaque,
 quia ducta CS , ipsi AE parallela , AE est ad
 BE , ut CS ad BC ; erit CS ad BC similiter
 in

in illa data ratione. Unde solvetur propositum problema, applicando intra angulum ABC rectam CS, quæ ad axem minorem BC datam habeat rationem; & ducendo per punctum A rectam AE, ipsi CS parallelam.

Patet autem, in solutione propositi problematis illud a nobis assumptum esse, ut ratio data sit majoris ad minus. Unde, si fuerit minoris ad majus, necesse est, ut ea invertatur. Sed liquet etiam, rationem datam minorem esse debere ea, quam habet axis major ad axem minorem; quia aliter punctum E reperiretur in ipso axe minore BC, atque adeo problema impossibile foret.

II. Secundum problema ita se habet: *dati* *axibus hyperbolæ, invenire duas diametros conjugatas, quæ datum rectangulum contineant.* Maneant omnia, ut supra, & produ-
cta CB versus T, sit ABT rectangulum datum, quod quidem majus esse debet rectangulo ACB. Secetur AB bifariam in S. Et juncta ST, extendatur AB versus V, ita ut SV ipsi ST sit æqualis. Describatur deinde super AV semicirculus AEV; & erunt AE, BE diametri quæsitæ.

II.
Datis axibus
hyperbolæ,
invenire
duas diam-
etros conju-
gatas, quæ
datum re-
ctangulum
contineant.
FIG. 64.

Quum enim duæ ST, SV inter se sint æquales; erit quoque ST quadratum æquale quadrato, quod fit ex SV. Sed ST quadratum est æquale duobus quadratis BS, BT; & SV quadratum est æquale rectangulo AVB una cum BS quadrato. Itaque erunt quadrata duo BS, BT æqualia rectangulo AVB una cum BS quadrato: & propterea, dempto communi quadrato ex BS, supererit BT.

184 SECTIONUM CONICARUM
BT quadratum æquale rectangulo AVB.

Et quoniam, juncta VE, rectangulum AVB æquale est VE quadrato; erit etiam BT quadratum æquale VE quadrato. Unde, quum duæ BT, VE inter se sint æquales; erit rectangulum ABT æquale rectangulo ex AB in VE. Sed rectangulum ex AB in VE est æquale rectangulo AEB; quum AB sit ad AE, ut est BE ad VE. Quare rectangulum AEB erit æquale rectangulo ABT; & propterea duæ AE, BE erunt quæsitæ diametri.

III.

Datis axibus hyperbolæ, invenire duas diametros conjugatas, quæ datam summam efficiant.

FIG. 64.

III. Tertium problema in hunc modum concipitur: *datis axibus hyperbolæ, invenire duas diametros conjugatas, quæ datam summam efficiant.* Iisdem, ut supra, manentibus, capiatur recta data super BX, & sit BZ, quam ex superius ostensis majorem esse oportet summa duorum axium AC, BC. Jungatur deinde AZ, cui perpendicularis erigatur AT, ipsi BZ occurrens in T. Secetur postea TZ bifariam in E; & juncta AE, exhibebunt duæ AE, BE quæsitæ diametros.

Quum enim angulus ZAT sit rectus, semicirculus descriptus super TZ, velut diametro, transibit per punctum A. Sed centrum hujus semicirculi est punctum E: ut quod ex constructione dividit bifariam diametrum ejus TZ. Quare duæ AE, EZ æquales erunt inter se: proindeque, quia apposita communi BE, fiunt duæ AE, BE æquales toti BZ, erunt eadem AE, BE optatæ diametri.

IV.

Datis axibus hyperbolæ, invenire duas diametros conjugatas, quarum differentia sit data.

FIG. 65.

IV. Quartum problema hujusmodi erit: *datis axibus hyperbolæ, invenire duas diametros conjugatas, quarum differentia sit data.* Ejus autem

autem solutio est fere eadem cum præcedente. træ conju-
 Capiatur enim differentia data super CB pro- gatas, quo-
 ducta, & sit BT, quam, per superius ostensa, rum diffe-
 minorem esse oportet differentia axium AC, rentia sit da-
 BC. Jungatur deinde AT, cui perpendicularis ta.
 erigatur AZ, ipsi BT occurrens in Z. Secetur Fig. 64.
 postea TZ bifariam in E. Et juncta AE,
 fient AE, BE diametri quæsitæ.

Nam similiter, quum angulus ZAT sit
 rectus, semicirculus, qui describitur super
 TZ, velut diametro, transibit per punctum A.
 Sed centrum hujus semicirculi est punctum
 E: quippe quod dividit ex constructione bi-
 fariam diametrum ejus TZ. Quare duæ AE,
 TE æquales erunt inter se: & propterea,
 quemadmodum BT est differentia duarum TE,
 BE; ita erit eadem BT differentia duarum
 AE, BE.

V. Quintum problema ita proponetur: V.
dati axibus hyperbolæ, invenire duas diametros Datis axibus
conjugatas, quarum quadrata datam summam hyperbolæ, in-
constituant. Ejus autem resolutio nullam dif- venire duas
 ficultatem involvit. Quum enim differentia diametros
 eorundem quadratorum æqualis esse debeat conjugatas,
 differentiæ, quæ est inter quadrata axium; quarum
 utique data erit, tam summa, quam diffe- quadrata da-
 rentia eorum quadratorum. ta sum-
ma congl-
tuens.

Hinc, siquidem ad dimidium summæ ad-
 datur dimidium differentiæ, habebitur qua-
 dratum diametri majoris. Quod si autem ex
 dimidio summæ auferatur dimidium differen-
 tiæ, orietur quadratum diametri minoris.
 Quare diametrorum quadrata data etiam erunt
 seorsim; & consequenter dabuntur quoque
 ipsæ

386 SECTIONUM CONICARUM
ipsæ diametri, quas oportet invenire.

Sicuti autem, quum quærentur binæ diametri conjugatæ, quarum summa sit data, necesse est, ut data ista summa sit major summa axium; ita quoque, quum invenire oportet binas conjugatas diametros, quarum quadrata datam summam constituent, illud quidem requiritur, ut istiusmodi data summa sit major summa quadratorum, quæ sunt ex axibus.

VI.
Datis axibus
hyperbolæ,
invenire
duas diametros
conjugatas,
quæ datum
angulum
compleant.

VI. Sextum problemam hunc in modum efficeremus: *datis axibus hyperbolæ, invenire duas diametros conjugatas, quæ datum angulum contineant.* Sed facile erit, problemam istud ad secundum revocare, in quo datis axibus hyperbolæ, quærentur binæ diametri conjugatæ, quæ datum rectangulum comprehendant.

Nam semper ac datus est angulus, quem quæsitæ diametri continent; data erit ratio, quam habet ejus sinus ad radium. Sed ratio ista est æqualis ei, quam habet rectangulum sub axibus ad id, quod sub ipsis diametris continetur. Quare etiam hæc alia ratio data erit: & propterea, quum datum sit rectangulum sub axibus, dabitur quoque rectangulum, quod continent quæsitæ diametri.

VII.
Datis axibus
hyperbolæ,
invenire
diametrum,
quæ datam
parametrum
habeat.

FIG. 65.

VII. In septimo problemate illud porro quæremus, *qua ratione, datis axibus hyperbolæ, invenire liceat diametrum, quæ datam parametrum habeat.* Hujus autem problematis, perinde ac eorum omnium, quæ sequuntur, duo erunt casus, Nam diameter, quam quærimus, vel invenienda est inter eas, quæ terminantur

tur ad hyperbolas axis majoris; vel etiam inter illas, quæ suos terminos habent in hyperbolis axis minoris.

In priore casu erigatur super AB perpendicularis BQ, quæ dimidium datæ parametri adæquet. Tum, juncta AQ, describatur centro Q, intervalloque QB circuli circumferentia, cum qua ipsa AQ conveniat in punctis T, & V. Denique in angulo ABC applicetur recta AE, æqualis ipsi AV. Et erit AE diameter quæsitæ.

Demisso enim super AE perpendicularo BK, erit eidem AB quadrato æquale, tam rectangulum EAK, quam rectangulum TAV, Quare duo ista rectangula EAK, TAV æqualia erunt inter se: & propterea, quemadmodum sunt æquales duæ AE, AV, ita æquales erunt pariter, tam duæ AK, AT, quam duæ EK, TV. Sed TV, velut dupla ipsius BQ, datam parametrum adæquat. Et igitur eidem parametrum æqualis quoque erit ipsa EK, quæ est parameter diametri AE.

In secundo vero casu applicetur in angulo ABQ recta AQ, quæ semissem adæquet datæ parametri. Fiat deinde QE æqualis ipsi AQ. Et erit BE quæsitæ diameter. Nam, si centro Q, intervalloque QE semicirculus describatur, ipsi BE occurrens ad partem alteram in L: ob angulum rectum EAL, erit EL parameter ipsius BE; adeoque, quum EL sit dupla ipsius QE, sive AQ, erit EL datæ parametrum æqualis.

VIII. Ad octavum problema quod attinet, quæremus in eo, *qua ratione, datis axibus* VIII.
Datis axibus
hyperbola,
hy-

inveniri dia-
metrum, quæ
ad paramet-
rum suam
datam ha-
beat ratio-
nem.

FIG. 64.

*hyperbolæ, inveniri possit diameter, quæ ad pa-
rametrum suam datam habeat rationem.* Et ubi
quidem data ratio est majoris ad minus, dia-
meter, quam quærimus, invenienda est inter
eas, quæ terminantur ad hyperbolas axis ma-
joris. Quotiescumque vero est minoris ad
majus, comperienda inter illas, quæ suos
terminos habent in hyperbolis axis minoris.

In priore casu extendatur AB usque in
V: ita, ut AV ad BV sit in data ratione. De-
scribatur deinde super AV semicirculus
AEV. Et erit AE diameter quæsitæ. Nam, de-
misso super AE perpendiculo BK, fiet EK
parameter ipsius AE. Sed AE est ad EK, ut
AV ad BV. Itaque diameter AE ad paramet-
rum suam EK erit in data ratione.

In secundo casu extendatur quoque AB
usque in V, sed ita tamen, ut BV ad AV sit
in data ratione. Postea describatur similiter
super AV semicirculus AEV. Et erit BE dia-
meter optata. Nam, erecto super AE perpen-
diculo AL, fiet EL parameter ipsius BE. Sed
BE est ad EL, ut BV ad AV. Itaque diame-
ter BE ad parametrum suam EL erit in data
ratione.

Idem problema potest etiam ad primum
revocari. Nam, semper ac data est ratio, quam
quæsitæ diameter habere debet ad suam para-
metrum, utique data erit pariter ratio, quam
eadem quæsitæ diameter habebit ad suam con-
jugatam: quippe quæ illius est duplicata. Un-
de vicissim primum problema ad octavum
istud poterit reduci: quærendo nempe diame-
trum, quæ ad suam parametrum habeat ratio-
nem

nem subduplicatam ejus, quæ inter utramque diametrum esse debet.

IX. Nonum problema eo se vertet, ut *Datis axibus hyperbolæ, inveniatur diameter, quæ vel constituat datam summam cum sua parametro, vel differat ab ea per datam differentiam.* Et quantum ad priorem partem, solvetur problema in eum, qui sequitur, modum.

Sit primo diameter invenienda ex eorum numero, quæ parametræ suis sunt majores. Extendatur CB versus M, ut fiat BM æqualis ipsi AB. Tum, juncta AM, erigatur super ea perpendicularis MN æqualis dimidio datæ summæ. Describatur deinde centro N, intervalloque NM circuli circumferentia MOR, conveniens cum AN in punctis O, & R. Jamque, si in angulo ABC applicetur recta AE, æqualis dimidio ipsius AO; fiet AE diameter quæsitæ.

Demittatur enim super AE perpendicularis BK; eritque, tam rectangulum OAR æquale quadrato ex AM, quam rectangulum EAK æquale quadrato ex AB. Sed, ex constructione, AM quadratum duplum est quadrati ex AB. Quare etiam rectangulum OAR duplum erit rectanguli EAK: proindeque, secta AO bifariam in S, fiet rectangulum SAR æquale rectangulo EAK; atque adeo, ob æquales AE, AS, erunt etiam æquales, tam duæ AK, AR, quam duæ EK, RS. Unde, additis æqualibus AE, OS; erit summa duarum AE, EK æqualis toti OR, quæ dupla est ipsius MN.

Sit deinde diameter invenienda ex nu-

Tim. I.

T

me-

IX.

Datis axibus hyperbolæ, inveniatur diameter, quæ vel constituat datam summam cum sua parametro, vel differat ab ea per datam differentiam.

FIG. 65.

mero illarum, quæ vicissim sunt minores suis parametris. Extendatur quoque CB versus M, ut fiat BM æqualis ipsi AB. Tunc, juncta AM, fiat adhuc angulus rectus AMN, in quo tamen applicetur recta AN, æqualis dimidio datæ summæ. Describatur pariter centro N, intervalloque NM circuli circumferentia MOR, conveniens cum AN in punctis O, & R. Jamque, si ex BX abscindatur portio BE, æqualis dimidio ipsius AO; fiet BE diameter quæsitæ.

Erigatur enim super AE perpendicularis AL; eritque, tam rectangulum OAR æquale quadrato ex AM, quam rectangulum EBL æquale quadrato ex AB. Sed, ex constructione, AM quadratum duplum est quadrati ex AB. Quare etiam rectangulum OAR duplum erit rectanguli EBL: proindeque, secta AO bifariam in S, fiet rectangulum SAR æquale rectangulo EBL; atque adeo, ob æquales BE, AS, erunt etiam æquales duæ BL, AR. Unde summa duarum BE, EL æqualis erit summæ duarum AO, AR, quæ dupla est ipsius AN.

Quantum ad secundam partem, nullo negotio solvetur problema. Nam, si diameter inveniunda sit inter eas, quæ parametris suis sunt majores; satis erit, in semicirculo, descripto super AB velut diametro, applicare rectam AK, quæ sit æqualis datæ differentiæ; quandoquidem ista, producta usque ad E, dabit diametrum quæsitam. Quod si vero diameter comperienda sit inter eas, quæ minores sunt suis parametris; tunc extendatur

CB

CB usque in L, ut sit BL æqualis differentiæ datæ. Et, erecta super AL perpendiculari AE, fiet BE diameter optata.

X. Decimum problema illud ostendet, *quæ ratione, datis axibus hyperbolæ, invenire liceat diametrum, cujus parameter cum differentia laterum figuræ datum rectangulum constineat.* Jamque, si diameter invenienda debet esse ex numero earum, quæ suis parametræ sunt majores, solvetur problema, si descripto super AB, velut diametro semicirculo AKB, applicetur in eo recta BK, cujus quadratum datum rectangulum adæquet. Nam, juncta AK fiet, AE diameter quæsitæ.

X.
Datæ aut.
bus hyperbo-
læ, invenire
re diamete-
trum, cujus
parameter
cum differ-
rentia later-
um figuræ
datum re-
ctangulum
constineat.

FIG. 63.

Quum enim diametri AE parameter quidem sit EK, differentia vero laterum figuræ sit AK; erit AKE rectangulum, quod sit ex parametro ejus in differentiam laterum suæ figuræ. Sed rectangulum AKE est æquale quadrato ipsius BK. Quare, sicuti BK quadratum, ex constructione, datum rectangulum adæquat; ita quoque eidem dato rectangulo æquale erit rectangulum AKE.

Quod si vero diameter invenienda debeat esse ex numero illarum, quæ minores sunt suis parametræ, solvetur problema, si producta CB versus L, applicetur in angulo ABL recta AL talis longitudinis, ut ejus quadratum sit æquale dato rectangulo. Nam, si deinde super AL perpendicularis erigatur AE, ipsi BC occurrens in E; fiet BE diameter optata.

Quum enim diametri BE parameter quidem sit EL, differentia vero laterum figuræ

T 2 sit

fit BL ; erit ELB rectangulum, quod fit ex parametro ejus in differentiam laterum suæ figuræ. Sed rectangulum ELB est æquale quadrato ipsius AL . Quare, sicuti AL quadratum, ex constructione, datum rectangulum adæquat; ita quoque eidem dato rectangulo æquale erit rectangulum ELB .

Hoc idem problema poterat etiam ad præcedens revocari. Quum enim datum sit rectangulum, quod fit ex parametro in differentiam laterum figuræ; & rectangulum ex diametro in eandem illam differentiam similiter sit datum: dabitur quoque differentia horum rectangulorum, hoc est quadratum ex differentia laterum figuræ; & consequenter ipsa laterum differentia etiam data erit. Unde eo res redit, ut quæramus diametrum, quæ differat a sua parametro per datam differentiam.

XI.
*Datis axibus
 hyperbolæ,
 invenire dia-
 metrum, cu-
 jus quadra-
 tum differat
 a quadrato
 parametri
 per datam
 differentiam.*

XI. In undecimo problemate ostendemus quo pacto, datis axibus hyperbolæ, inveniri possit diameter, cujus quadratum differat a quadrato parametri per datam differentiam. Atque hic quoque duo sunt casus distinguendi. Nam quæsitæ diameter, vel invenienda est inter eas, quæ parametris suis sunt majores; vel etiam inter illas, quæ vicissim sunt minores suis parametris.

FIG. 66. Quantum ad priorem casum solvetur problema in hunc modum. Extendatur CB versus M , ut fiat BM æqualis ipsi AB . Tum juncta AM , describatur super ea, velut diametro, semicirculus ANM , in quo applicetur recta MN talis longitudinis, ut quadratum
 ejus

ejus datam differentiam adæquet. Jungatur deinde AN. Jamque, si in semicirculo AKB applicemus rectam AK, æqualem ipsi AN; erit AE diameter quæsitæ.

Quum enim AK sit æqualis ipsi AN, erunt quadrata duo AK, MN æqualia quadrato ex AM. Sed quadratum ex AM, velut duplum quadrati, quod fit ex AB, est æquale duplo rectanguli EAK. Quare quadrata duo AK, MN duplo rectanguli EAK pariter æqualia erunt: & consequenter, appposito communi quadrato ex EK, erunt tria quadrata AK, MN, EK æqualia duplo rectanguli EAK una cum EK quadrato.

Jam duplum rectanguli EAK una cum EK quadrato est æquale duobus quadratis AK, AE. Quare erunt tria quadrata AK, MN, EK æqualia duobus quadratis AK, AE; adeoque, dempto communi quadrato ex AK, remanebunt quadrata duo MN, EK æqualia quadrato ex AE. Unde quadratum diametri AE superabit quadratum suæ parametri EK per MN quadratum, quod ex constructione datam differentiam adæquat.

Quantum ad secundum casum, solutio FIG. 65.
problematis fiet hoc pacto. Extendatur rursus CB versus M, ut fiat BM æqualis ipsi AB. Tum, juncta AM, erigatur super ea perpendicularis MN. Et in angulo AMN applicetur recta AN talis longitudinis, ut quadratum ejus datam differentiam adæquet. Fiat postea BL æqualis ipsi MN. Et, erecta super AL perpendiculari AE, erit BE diameter quæsitæ.

Quum enim AM quadratum sit æquale

duplo quadrati ex AB, sive etiam duplo rectanguli EBL: apposito communi quadrato ex MN, sive BL; erit AN quadratum æquale duplo rectanguli EBL una cum BL quadrato: & propterea, addito rursus communi quadrato ex BE, erunt duo quadrata AN, BE æqualia duplo rectanguli EBL una cum duobus quadratis BL, BE.

Et quoniam duplum rectanguli EBL una cum duobus quadratis BL, BE est æquale quadrato, quod fit ex EL; erit EL quadratum æquale duobus quadratis AN, BE. Unde quadratum diametri BE superabitur a quadrato suæ parametris EL per AN quadratum, quod ex constructione datam differentiam adæquat.

XII.
Datæ axibus hyperbolæ, invenire diametrum, in qua data sit summa quadratorum, quæ sunt ex lateribus suæ figure.

FIG. 64.

XII. In ultimo problemate docebimus; quomodo, datis axibus hyperbolæ, inveniri possit diameter talis, ut data sit summa quadratorum, quæ sunt ex lateribus suæ figure. Ac primo quidem, si diameter invenienda debeat esse ex earum numero, quæ parametris suis sunt majores, solvetur problema in eum, qui sequitur, modum.

Extendatur AB usque in Y, ita ut duplum rectanguli ABY datam illam summam exhibeat. Tunc secetur AY ita quidem in puncto V, ut AB quadratum sit æquale duplo rectanguli AVY. Describatur postea super AV, velut diametro, semicirculus AEV. Et recta AE exhibebit diametrum quæsitam.

Nam, demissa super AE perpendiculari BK, erit summa quadratorum AE, EK ad summam quadratorum AV, BV, ut est AE qua-

quadratum ad AV quadratum; sive etiam, ut est AB ad AV ; sive demum, ut est rectangulum ABY ad rectangulum ex AV in BY . Sed summa quadratorum AV , BV est æqualis duplo rectanguli ex AV in BY ; quum rectangulum istud sit æquale rectangulo AVB una cum rectangulo AVY , quod ex constructione æquale est dimidio quadrati ex AB . Quare etiam summa quadratorum AE , EK æqualis erit duplo rectanguli ABY .

Quod si vero diameter invenienda debeat esse ex numero illarum, quæ minores sunt suis parametris, solvetur problema hac ratione. Extendatur quoque AB usque in Y , sed ita tamen, ut duplum rectanguli BAY exhibeat datam summam. Tum secetur BY ita quidem in puncto V , ut AB quadratum sit æquale duplo rectanguli BVY . Describatur postea super AV , velut diametro, semicirculus AEV . Et recta BE exhibebit quæsitam diametrum.

Nam, erecto super AE perpendiculo AL , erit summa quadratorum BE , EL ad summam quadratorum BV , AV , ut est BE quadratum ad BV quadratum; sive etiam, ut est AB ad BV ; sive demum, ut est rectangulum BAY ad rectangulum ex BV in AY . Sed summa quadratorum BV , AV est æqualis duplo rectanguli ex BV in AY ; quum rectangulum istud sit æquale rectangulo BVA una cum rectangulo BVY , quod ex constructione æquale est dimidio quadrati ex AB . Quare etiam summa quadratorum BE , EL æqualis erit duplo rectanguli BAY .

XIII.
*Datis axibus
 hyperbolæ,
 invenire in
 ordine ad
 eos positio
 nem cuius
 vis diametri
 data.*

XIII. Cæterum, quæ requirantur, ut singula ista problemata resolvî possint, abunde nos docent, tum ea, quæ superius ostensa sunt, tum ipsæ eorum problematum allatæ solutiones. Unde, ne diutius in iis recensendis hæreamus, sufficiat istud indicasse, & ad theoriæ hujus complementum ostendemus modo, *qua ratione, datis axibus hyperbolæ, definiri possit relate ad eos positio cuiusvis diametri data.* Nam in solutione illorum problematum apolloniana exhibetur quoque positio diametri relate ad datos axes hyperbolæ.

FIG. 67. Sint itaque AB, KL axes hyperbolæ. Sit autem EF aliqua ejusdem hyperbolæ diameter data, quæ suos terminos habeat in iisdem illis hyperbolis, ad quas terminatur axis major AB. Jam innotescet diametri hujus positio, si demissa ad axem AB ordinata EG, nota sit longitudo portionis CG. Unde, eo res redit, ut inquiremus, quo pacto ipsius CG longitudo possit definiri.

Et sane, propter hyperbolam, CA quadratum est ad CK quadratum, ut est rectangulum AGB ad EG quadratum. Sed EG quadratum æquale est differentiæ quadratorum CE, CG; & rectangulum AGB æquale est differentiæ quadratorum CA, CG. Itaque erit, ut CA quadratum ad CK quadratum, ita differentia quadratorum CA, CG ad differentiam quadratorum CE, CG.

Hinc, quum convertendo sit, ut CA quadratum ad differentiam quadratorum CA, CK, ita differentia quadratorum CA, CG ad differentiam quadratorum CA, CE; erit, per-

mu-

mutando, ut CA quadratum ad differentiam quadratorum CA, CG, ita differentia quadratorum CA, CK ad differentiam quadratorum CA, CE. Unde, addendo antecedentes consequentibus, erit, ut CA quadratum ad CG quadratum, ita differentia quadratorum CA, CK ad differentiam quadratorum CE, CK.

Describantur jam super ipsis CA, CE semicirculi AMC, ENC; & aptentur in iis rectæ CM, CN, quarum utraque sit æqualis ipsi CK. Jamque, junctis rectis AM, EN, erit AM quadratum æquale differentię quadratorum CA, CK; & EN quadratum æquale differentię quadratorum CE, CK. Unde erit, ut CA quadratum ad CG quadratum, ita AM quadratum ad EN quadratum: & propterea, quum proportionales sint quatuor rectæ AM, EN, CA, CG; invenietur CG, si fiat, ut AM ad EN, ita CA ad ipsam CG.

XIV. Ne aliquid hic omittamus, ostendemus denique, *qua ratione in ipsa hyperbola, data parametro unius diametri, inveniri possit parameter cujusvis alterius diametri.* Sint igitur AB, EF duæ quævis hyperbolæ diametri. Et, data parametro unius diametri AB, oporteat, invenire parametrum alterius diametri EF.

XIV.
In hyperbola data parametro unius diametri, invenire parametrum cujusvis alterius diametri.

FIG. 68.

Sit AD parameter diametri AB, quæ super ipsa AB capiatur. Tum, secta AD bifariam, in puncto M, describatur per tria puncta A, E, M circulus AEM, occurrens ipsi EF in puncto N. Abscindatur porro ex EF portio EH, quæ sit dupla ipsius EN. Et erit EH parameter diametri EF.

Est

298 SECTIONUM CONICARUM

Est enim, propter circulum, rectangulum ACM æquale rectangulo ECN. Sed rectangulum ABD est quadruplum rectanguli ACM, & rectangulum EFH est quadruplum rectanguli ECN. Quare duo rectangula ABD, EFH etiam æqualia erunt: & propterea erit, ut diameter EF ad diametrum AB, ita BD ad FH.

Jam per ea, quæ superius ostensa sunt, diametri EF, AB sunt reciproce proportionales differentiis laterum suarum figurarum. Quare erit ex æquali, ut BD ad FH, ita differentia laterum figuræ diametri AB ad differentiam laterum figuræ diametri EF: & propterea, quemadmodum prior differentia est æqualis ipsi BD; ita quoque differentia posterior æqualis erit ipsi FH. Unde erit EH parameter diametri EF.

C A P. VII.

Parametri diametrorum parabolæ inter se mutuo comparantur.

1. *Theorema fundamen- tale pro in- stituendo comparatio- ne parametrorum pa- rabolæ.* I. **D**iametros parabolæ haud quidem necesse est, ut inter se mutuo conferamus. Nam, quum sint infinitæ longitudinis, ex mutua ipsarum comparatione nihil quidem erui potest. Conferemus autem inter se invicem parametros diametrorum. **FIG. 69.** Nam, velut finitæ longitudinis, inter se mu- suo

tuo collatæ, plures nobis proprietates subministrabunt.

Ad hanc comparationem instituendam *conducit non parum sequens theorema*: nimirum, quod si AB sit axis parabolæ, AD parameter ejus, AM subtenfa aliqua, ex axis vertice ducta, & MN ejusdem axis ordinata: quod, inquam, quadratum subtenfæ AM sit æquale rectangulo, quod fit ex abscissa AN in summam ipsarum AD, AN.

Ostendetur vero theorema istud in hunc modum. Quoniam MN est axis ordinata, erit angulus ANM rectus. Quare quadratum ipsius AM æquale erit duobus quadratis AN, MN. Sed, ob parabolæ naturam, MN quadratum est æquale rectangulo DAN; & AN quadratum una cum rectangulo DAN est æquale ei, quod fit ex AN in summam ipsarum AD, AN. Itaque quadratum subtenfæ AM erit æquale rectangulo, quod fit ex abscissa AN in eam, quæ componitur ex ipsis AD, AN.

II. Sit jam EF diameter parabolæ, cujus ordinatæ parallelæ sunt subtenfæ AM; sitque etiam EH parameter ejus. Ducatur ex ejusdem vertice E ordinata ad axem EG. Et ex *ostenso theoremate facile erit inferre*, quod parameter diametri EH superet parametrum axis AD per quadruplum abscissæ AG.

II.
*Theorema
de cursu,
quæ param-
eter cujusque
diametri su-
perat para-
metrum a-
xis.*

FIG. 69.

Quum enim subtenfa AM a diametro EF secetur bifariam in O; erit MN dupla ipsius EG; adeoque MN quadratum quadruplum quadrati, quod fit ex EG. Sed MN quadratum est ad EG quadratum, ut AN ad AG.

AG. Quare etiam AN quadrupla erit ipsius AG: & propterea, quia ex superius ostēsis duæ AG, EO sunt æquales inter se; erit eadem AN quadrupla pariter ipsius EO.

Hinc, sicuti AM quadratum quadruplum est AO quadrati, ita rectangulum ex EH in AN quadruplum erit rectanguli ex EH in EO: proindeque erit, ut AM quadratum ad AO quadratum, ita rectangulum ex EH in AN ad rectangulum ex EH in EO. Sed, ob parabolæ naturam, AO quadratum est æquale rectangulo ex EH in EO. Quare etiam AM quadratum æquale erit rectangulo ex EH in AN.

Et quoniam, per ostensum theorema, idem AM quadratum est æquale pariter rectangulo ex AN in summam ipsarum AD, AN; erit rectangulum istud æquale ei, quod fit ex EH in AN: proindeque EH æqualis erit ipsis AD, AN simul sumptis. Unde parameter diametri EH superabit parametrum axis AD per AN, quæ est æqualis quadruplo ipsius AG.

III. Atque hinc modo liquet abunde, *omnium parabolæ parametrorum minimam esse illam, quæ refertur ad axem; quum parameter cuiusvis alterius diametri superet parametrum axis per quadruplum ejus abscissæ, quam aufert ab ipso axe ordinata, ad eum ducta ex vertice diametri.*

III.
Cujusmodi
se habent
parametri
diametro-
rum in pa-
rabola, de-
monstratur.

FIG. 69.

Patetque etiam, *aliarum parametrorum eam semper minorem esse, quæ refertur ad diametrum, axi propinquiorem.* Nam, quo magis diameter EF accedit ad axem AB, eo mi-
nor

nor evadit abscissa AG, per cujus quadruplum parameter diametri superat parametrum ipsius axis.

Patetque demum, *æquales esse parametros earum diametrorum, quæ æqualiter binde inde distant ab axe*. Nam ordinatæ, quæ ex ipsarum verticibus ducuntur ad axem, eandem ab ipso axe auferunt abscissam; adeoque idem est excessus, per quem cujusque diametri parameter superat parametrum axis.

Vidimus autem, hæc omnia obtinere etiam, generaliter quidem in ellipsi, & in hyperbola tunc tantum, quum axis est major suo conjugato. Unde, quia utraque earum curvarum vertitur in parabolam, quotiescumque centrum abit in infinitum; poterit hac item ratione eorum omnium veritas ostendi.

IV. In recessu itaque diametri ab axe parabolæ, augetur parameter ejus. Sed, quemadmodum nobis innotuit excessus, per quem parameter cujusque diametri superat parametrum axis; ita licebit etiam, *excessum definire, per quem parameter diametri, ab axe remotioris, superat parametrum diametri, eidem axi propinquioris*.

Maneant enim omnia, ut supra; sitque KL diameter altera, remotior ab axe AB, cujus parameter sit recta KI. Ducatur ex vertice ejus K ad axem AB ordinata KR, quæ occurrat diametro EF in puncto Q. Dico, parametrum KI superare parametrum EH per quadruplum ipsius EQ.

Nam, sicuti EH est æqualis AD una cum quadruplo ipsius AG; ita KI æqualis erit eidem

IV.

Theorema de excessu, quo parameter diametri, ab axe remotioris, superat parametrum diametri, eidem axi propinquioris.

FIG. 69.

dem AD una cum quadruplo ipsius AR. Quare excessus, quo KI superat EH, æqualis erit excessui, quo quadruplum abscissæ AR superat quadruplum abscissæ AG. Sed excessus iste est quadruplum ipsius GR, sive EQ. Itaque per idem hoc quadruplum parameter KI superabit parametrum EH.

Quod quum ita sit, perspicuum est, theorema generale, quod in hac re locum obtinet, ita quidem concipi debere; nimirum, *quod differentia parametrorum, quæ ad duas quasvis diametros referuntur, sit æqualis portioni, quam ex diametro, axi propinquiore, aufert perpendicularis ad eam ducta ex vertice alterius remotioris.*

V.
Excessus,
quibus pa-
rametri dia-
metrorum
superant
parametrum
axis, sunt in
duplicata
ratione re-
ctarum, qui-
bus diametri
distant ab
axe.

FIG. 69.

V. Sed nolo hic reticere pulcherrimum istud theorema, respiciens excessus, quibus parametri aliarum diametrorum superant parametrum axis: scilicet, quod excessus isti sint inter se in duplicata ratione rectarum, quibus ipsæ diametri distant ab axe.

Esto enim AB axis parabolæ, EF diameter propinquior, & KL diameter remotior. Sint autem AD, EH, KI parametri ipsarum. Dico, excessus, quibus parametri diametrorum EH, KI superant parametrum axis AD, esse inter se in duplicata ratione rectarum, quibus ipsæ diametri EF, KL distant ab axe AB.

Ducantur namque ex verticibus diametrorum E, & K ordinatæ ad axem EG, KR. Et quoniam ordinatæ istæ rectos cum axe angulos constituunt, metientur eæ distantias diametrorum EF, KL ab ipso axe AB. Unde eq res

re-

redit, ut ostendamus, excessus, quibus parametri diametrorum EH , KI superant parametrum axis AD , esse inter se, vuluti sunt quadrata ordinarum EG , KR .

Id vero ostendemus in hunc modum. Excessus, quo EH superat AD , est quadruplum abscissæ AG . Pariterque excessus, quo KI superat AD , est quadruplum abscissæ AR . Quare excessus, quibus parametri diametrorum EH , KI superant parametrum axis AD , erunt ut abscissæ AG , AR ; atque adeo, ob parabolæ naturam, ut quadrata ordinarum EG , KR .

VI. Cæterum ex eo, quod parameter cuiusque diametri superet parametrum axis per quadruplum ejus abscissæ, quam aufert ex axe ordinata ad eum ducta ex vertice diametri, facile erit, datis axe parabolæ, & parametro ejus, invenire diametrum, quæ habeat parametrum datam.

VI.
Datis axe
parabolæ, &
parametro
ejus, inve-
nire diame-
trum, quæ
habeat para-
metrum da-
tam.

FIG. 69.

Sit enim AB axis parabolæ, & AD parameter ejus. Et quoniam parameter axis est omnium minima; utique parameter data major esse debet ipsa AD . Capiatur itaque excessus, quo data parameter superat AD , & quadrantibus ejus æqualis constituatur abscissa AG . Erigatur porro ex puncto G perpendicularis GE , parabolæ occurrens in E . Et, ducta per punctum E recta EF , ipsi AB parallela, erit ista diameter quæsitæ.

Esto namque EH parameter ipsius EF . Jamque, ex superius ostensis, parameter ista EH superabit parametrum axis AD per quadruplum abscissæ AG . Sed, ex constructione, per hoc idem quadruplum parameter da-

304 SECTIONUM CONICARUM
data superat eandem AD. Quare erit EH æ-
qualis datæ parametro: & propterea erit EF
quæsitæ diameter.

VII. Si loco axis, & suæ parametri detur
diameter quævis alia cum parametro ejus,
per ea, quæ superius ostensa sunt, etiam lice-
bit *invenire diametrum alterum, quæ habeat
parametrum datam*. Sed hic duo sunt casus
distinguendi. Vel enim data parameter est
major ea, quæ refertur ad diametrum datam;
vel vicissim minor.

VII.
Dati dia-
metro aliqua
parabola, &
parametro
ejus, inven-
ire diame-
trum aliam,
quæ datæ
habeat para-
metrum.

FIG. 69.

In priore casu solvetur problema in hunc
modum. Sit EF diameter data, & EH pa-
rameter ejus. Capiatur excessus, quo data
parameter superat EH; & quadranti ejus æ-
qualis constituatur portio EQ. Erigatur dein-
de ex puncto Q perpendicularis QK, parabo-
læ occurrens in K. Et, ducta per punctum K
recta KL, ipsi EF parallela, erit ista diameter
quæsitæ.

Esto enim KI parameter ipsius KL. Jam-
que, ex superius ostensis, parameter ista KI su-
perabit parametrum EH per quadruplum por-
tionis EQ. Sed, ex constructione, per hoc idem
quadruplum parameter data superat eandem
EH. Quare erit KI æqualis datæ parametro: &
propterea erit KL quæsitæ diameter.

In secundo autem casu solutio proble-
matis fiet hoc pacto. Sit KL diameter data,
& KI parameter ejus. Capiatur excessus, quo
KI superat datam parametrum; & quadranti
ejus æqualis constituatur recta KP, ipsi KL
in directum existens. Erigatur deinde ex pun-
cto P perpendicularis PE, parabolæ occur-
rens

rens in E. Et, ducta per punctum E recta EF, ipsi KL parallela, erit ista diameter optata.

Sit namque EH parameter ipsius EF. Jamque, ex superius ostensis, ducta KQ, ipsi EF perpendiculari, parameter KI superabit parametrum EH per quadruplum portionis EQ, sive KP. Sed, ex constructione, per idem hoc quadruplum eadem KI superat parametrum datam. Quare erit EH æqualis datæ parametro: & propterea quæsitæ diameter erit ipsa EF.

Patet autem, problema esse semper solutionis capax in primo casu, sed non item in secundo; quia fieri potest, ut perpendicularis PE minime occurrat parabolæ: quod quidem quum contingit, nulla erit diameter, cui data parameter competit. Nec id mirum esse debet; quandoquidem, si parameter data minor sit ea, quæ refertur ad axem, omnino necesse est, ut problema sit solutu impossibile.

VIII. Non dissimili artificio, data parametro unius diametri, inveniri poterit parameter cujusvis alterius diametri. Sint enim EF, KL duæ quævis parabolæ diametri. Et, data parametro unius diametri EF, quæ sit EH, oporteat, invenire parametrum alterius diametri KL.

VIII.
Data para-
metro uni-
us diame-
tri, invenire
parametrum
cujusvis al-
terius dia-
metri.

FIG. 69.

Ex vertice K alterius diametri demittatur super EF perpendicularis KQ. Jamque duo contingere possunt. Primo nempe, ut punctum Q cadat infra verticem E. Et secundo, ut idem punctum Q cadat supra verticem E. In priore casu parameter diametri KL major erit parametro diametri EF. In secundo

Tom. I.

V

ve-

306 SECTIONUM CONICARUM
vero casu erit per contrarium minor.

In utroque autem casu differentia parametrorum est semper quadruplum portionis EQ. Unde, siquidem contingat, ut punctum Q cadat infra verticem E, inveniatur parameter diametri KL, addendo quadruplum ejus portionis ad EH, quæ est parameter ipsius EF. Quod si vero accadat, ut punctum Q cadat supra verticem E, habebitur quæsitæ parameter, subducendo ex EH quadruplum ejusdem illius portionis.

Fieri quoque potest, ut perpendicularis, quæ demittitur super EF ex vertice alterius diametri K, cadat in ipsum verticem E. Et in isto casu, evanescente portione EQ, utraque constructio nobis ostendet, eandem EH esse etiam parametrum diametri KL. Quod quidem mirum esse non debet; quia, quum id contingit, binæ diametri EF, KL reperiuntur æqualiter hinc inde ab axe distantes.

IX. Possumus quoque, data parametro unius diametri, reperire parametrum alterius diametri, eodem illo artificio, quo superius usi sumus, ad idem problema solvendum in hyperbola, & ellipsi. Sint enim AB, EF duæ quævis parabolæ diametri. Et, data parametro unius diametri AB, oporteat, invenire parametrum alterius EF.

Sit AD parameter diametri AB, quæ cum ipsa AB ponatur in directum. Tum, secta AD bifariam in puncto M, describatur per tria puncta A, E, M circulus AEM, occurrens ipsi EF productæ in puncto N. Extenda-

da-

IX.
Alia ejus-
dem proble-
matis solu-
tio in me-
dium offer-
tur.
FIG. 70.

datur porro EN usque ad punctum H: ita, ut sit EH dupla ipsius EN. Et erit EH parameter diametri EF.

Demittatur siquidem super AB perpendicularis EG. Jamque, per superius ostensa, differentia parametrorum, quæ referuntur ad diametros AB, EF, est quadruplum portionis AG. Unde eo res redit, ut ostendamus rectas AD, EH differre a se mutuo per quadruplum ipsius AG.

Id vero facili negotio ostendemus. Nam, demisso ex puncto N super eadem AB perpendiculo alio NO, erunt duæ AG, MO æquales inter se: proindeque differentia rectarum AM, EN erit duplum portionis AG. Sed ex constructione AD est dupla ipsius AM, & EH dupla ipsius EN. Itaque differentia rectarum AD, EH erit quadruplum ejusdem AG.

X. Reliquum jam est, ut breviter ostendamus quæcumque pertinent ad angulos, quos parabolæ diametri cum ordinatis suis constituunt. Hunc in finem, *præmittendum est prius sequens theorema*, quod si AB, EF sint duæ quævis parabolæ diametri, super quibus ex alternis earum verticibus ducantur ordinatæ EG, AO; ordinatæ istæ sint in subdupplicata suarum parametrorum ratione.

X.
*Lemma pp
determina-
tionem angu-
lorum, quos
diametri
cum suis or-
dinatis con-
stituunt.*

FIG. 69.

Sit enim AD parameter diametri AB, & EH parameter diametri EF. Erit igitur, ob parabolæ naturam, EG quadratum æquale rectangulo DAG, & AO quadratum æquale rectangulo HEO. Quare erit, ut EG quadratum ad AO quadratum, ita rectangulum DAG ad rectangulum HEO.

V 2

Et

Et quoniam ex superius ostensis, ordinatæ EG, AO abscindunt ex diametris AB, EF portiones æquales; erit abscissa AG æqualis abscissæ EO. Unde, quemadmodum rectangulum DAG est ad rectangulum HEO, ut AD ad EH; ita in hac eadem ratione erit pariter EG quadratum ad AO quadratum: & propterea ipsæ ordinatæ EG, AO erunt in subduplicata ratione parametrorum AD, EH.

XI.
Theoremata
de angulis,
quos
constituunt
diametri cum
suis ordina-
tis.

FIG. 69.

XI. Hinc vero pronò alveo fluunt quæcumque obtinent circa angulos, quos parabola diametri cum ordinatis suis constituunt.

Nimirum consequitur primo, *sinum anguli, quem diameter quævis constituit cum ordinatis suis, esse ad radium in subduplicata ratione ejus, quam habet parameter axis ad parametrum ejus diametri.*

Posito enim, quod AB sit axis parabola, & EF diameter quævis, si ducatur ad hanc diametrum ordinata AO, & ex puncto O demittatur ad axem perpendicularis OL; erit, ut sinus anguli BAO ad radium, ita OL ad AO, sive etiam ita EG ad AO. Sed EG ad AO est in subduplicata ratione parametrorum AD, EH. Quare in hac eadem subduplicata ratione erit etiam sinus anguli BAO ad radium.

Consequitur secundo, *sinus angulorum, quos duæ quævis diametri constituunt cum ordinatis suis, esse in subduplicata ratione reciproca suarum parametrorum.*

Jam enim ostensum est, quod sinus anguli, quem constituit diameter aliqua cum suis ordinatis, sit ad radium in subduplicata ratio-

tio-

tione ejus , quam habet parameter axis ad parametrum ejus diametri. Quare, ex æquo perturbando, sinus anguli , quem constituit diameter una cum suis ordinatis , erit ad sinum anguli , quem efficit diameter altera cum ordinatis suis , in subduplicata ratione ejus , quam habet parameter istius ad parametrum illius .

Consequitur demum , *angulum acutum, quem constituit diameter cum ordinatis suis, eo minorem evadere, quo magis ipsa diameter ab axe recedit.*

Nam , ex superius ostensis , parameter diametri eo major evadit, quo magis ipsa diameter ab axe removetur . Sed ei parametro est reciproce proportionale quadratum sinus, quem eadem diameter cum suis ordinatis constituit . Quare per contrarium, tam sinus, quam ipse angulus acutus , ad quem sinus refertur , necesse est, ut eo minor fiat , quo magis diameter recedit ab axe.

F I N I S.

IN.

I N D E X

LIBRORUM, ET CAPITUM,

Quæ in hoc Primo Tomo
continentur.

L I B E R I.

*De Ortu, & Natura Sectionum
Conicarum.*

- CAP.I. *Qua ratione oriatur conus, & quos
modis plano secari potest.* 5
- CAP.II. *Qua curvæ sectionum conicarum
nomine veniunt, & quæ sit ea-
rum origo.* 14
- CAP.III. *De diametro sectionum conicarum,
deque ejus verticibus, ordinatis,
& abscissis.* 22
- CAP.IV. *Quæ sit natura ellipsis relate ad
diametrum definitur.* 30
- CAP.V. *Quid hyperbolæ relate ad diame-
trum accadat, ostenditur.* 39
- CAP.VI. *Quæ sit parabola relate ad diame-
trum natura aperitur.* 48

LIBER II. 311

De Sectionum Conicarum in Plano Descriptione.

- CAP. I. *Qua ratione ellipsis in plano per conum describi possit, ostenditur.* 57
 CAP. II. *Ratio describendi hyperbolam in plano per conum explicatur.* 71
 CAP. III. *Parabolam in plano per conum describendi ratio aperitur.* 83
 CAP. IV. *Qua ratione ellipsis in plano per solas rectas describi possit, demonstratur.* 96
 CAP. V. *Ratio describendi hyperbolam in plano per rectas solas explicatur.* 107
 CAP. VI. *Quo pacto describi possit parabola in plano per rectas ostenditur.* 118

LIBER III.

De Conicarum Sectionum Diametris aliis.

- CAP. I. *Ellipsis omnes aliae diametri definiuntur.* 127
 CAP. II. *Diametrorum ellipsis communis quaedam ostenduntur.* 139
 CAP. III. *Hyperbola omnes aliae diametri determinantur.* 152
 CAP.


- 312
CAP.IV. *Diametrorum hyperbolæ communia
quadam demonstrantur.* 168
CAP.V. *De conjugatis diametrorum hyper-
bolæ, & de curvis, ad quas ea
terminantur.* 179
CAP.VI. *Parabola omnes aliæ diametri de-
terminantur.* 192
CAP.VII. *Diametrorum parabola communia
quadam ostenduntur.* 201

L I B E R IV.


De Mutua Diametrorum, Pa- rametrorumque compara- tione.

- CAP.I.** *Ellipsis diametri omnes inter se
mutuo comparantur.* 213
CAP.II. *Parametri diametrorum ellipsis in-
ter se mutuo conferuntur.* 228
CAP.III. *Problemata quadam circa ellipsis
diametros, & parametros resol-
vuntur.* 239
CAP.IV. *Hyperbolæ diametri omnes inter se
mutuo comparantur.* 257
CAP.V. *Parametri diametrorum hyperbolæ
inter se mutuo conferuntur.* 269
CAP.VI. *Solvuntur problemata quadam cir-
ca hyperbolæ diametros, & para-
metros.* 282
CAP.VII. *Parametri diametrorum parabola
inter se mutuo comparantur.* 298
























005652853

